

本國學基
叢書 續
後漢書 中

323
4721

郝經撰

本國
叢學
書基

續

後

漢

書

中

商務印書館

續後漢書卷第四十八

列傳第四十五

魏臣

曹爽弟羲訓何晏鄧颺丁謐畢軌

李勝桓範魯芝楊綜謹案曹爽傳闕止存附傳內何晏丁謐李勝三篇

何晏字平叔漢大將軍進之孫也曹操爲司空納晏母尹氏并收養晏時秦宜祿兒朗謹案魏略作秦宜祿

亦隨母在曹家並見寵如公子晏美姿容沾沾自喜粉白不去手行步顧影而面尤白太子不疑其

傅粉方暑令食湯餅以巾拭之而面轉白朗性謹愿而晏汰侈無賴服飾擬太子故丕特惡之每不呼其

姓名謂爲假子晏後尙公主又好色故黃初時無所事任及曹叡立頗爲冗官正始初曲附曹爽爲散騎

侍郎遷侍中尙書主選舉宿舊多被拔擢與鄧颺丁謐等朋扇黨與氣焰赫然自謂旦夕當至台司及爽

敗被誅原注魏氏春秋曰初宣王使晏典治爽等獄晏阿治黨與冀以獲宥宣王曰凡有八族晏疏丁鄧等七姓

乎晏豈不自知與爽最親而冀獨免此殆孫盛承說者之妄耳晏妻金卿公主賢嘗謂其母沛王太妃曰晏爲惡日甚將何保身太妃笑曰

汝得無妒晏邪俄而晏誅有一男年五歲懿遣人錄之太妃藏之王宮向使者搏頰乞活之使者白懿懿

聞公主有先見之言且爲沛王故特原不殺。

原注。裴松之曰。魏末傳云。晏取其同母妹爲妻。此摺紳所不忍言。雖楚王之妻嫂不是甚也已。設令此言出於舊史。猶將莫之信。況

陛下之書乎。按諸王公傳。沛王出自杜夫人所生。晏母姓尹。公主若與沛王同生。焉得與晏同母。

初晏與夏侯元等名盛于時。司馬師亦預焉。晏曰。唯深也。故

能通天下之志。夏侯泰初是也。惟幾也。故能成天下之務。司馬子元是也。惟神也。不疾而速。不行而至。吾

聞其語。未見其人。蓋以神自況也。尤好老莊言。與夏侯元。荀粲。及山陽王弼之徒競爲清談。祖尙虛無。謂

六經爲聖人糟粕。由是天下士大夫爭慕效之。遂成風流。不可復制。晏博學能文。早有重名。作道德論。及

諸文賦。著述凡數十篇。集論語諸家說曰集解。今行于世。丁謚字彥靖。沛國譙人。父斐。初隨曹操起兵。操

以斐鄉里。特愛重之。斐性好貨。數請求犯法。輒得原。爲典軍校尉。總攝內外。所陳說多聽用。建安末。從操

伐吳。以家牛羸困。私易官牛。爲人所白。被收送獄。奪官。其後操問斐曰。文侯印綬安在。斐知見戲。對曰。以

易餅耳。操大笑。願謂左右曰。東曹毛掾數白此家。欲令我重治罪。我非不知。良有以也。我之有斐。譬如家

有盜貓。與善捕鼠。雖有小損。完我囊貯。遂復斐官。聽用如初。後數歲病卒。謚少不喜交。博觀書傳。爲人沈

毅。頗有才略。太和中常住鄴。借人空屋居。而諸王亦欲借之。不知謚已得直。開門入。謚望見王臥不起。

呼其奴曰。此何等。人促呵使去。王怒其無禮。還具上言。曹叡收謚繫獄。以功。臣子原出。久之。召拜度支郎

中。素與曹爽親善。爽爲武衛將軍。數與叡言謚可大用。會叡卒。爽輔政。乃拔謚爲散騎常侍。轉尙書。謚爲

人外疎而內多忌。其在臺閣。數有彈駁。臺中患之事不得行。又其意輕貴。多所忽略。雖與何晏鄧颺同位。

而皆少之。惟以勢屈于爽，爽亦敬之。言無不從。故於時謗書謂臺中有三狗，二狗崖柴不可當，一狗憑獸作疽囊。三狗謂何、鄧、丁也。獸者，爽小字也。又爲之謠曰：何、鄧、丁亂京城，徙郭太后出居別宮。及遣樂安王使北詣鄴，又遣文欽令還淮南，皆謚之謀也。司馬懿由是特深恨之。畢軌字昭先，東平人也。父某字子禮，建安中爲典農校尉，軌有才學。曹叡在東宮爲文學，黃初末出爲長史，叡立入爲黃門郎。子尚公主，居處殷富，遷并州刺史。驕豪不治，時雜虜數爲暴害，軌輒出軍擊鮮卑，軻比能失利。中護軍蔣濟表曰：畢軌前失，旣往不咎，但恐難可以再。凡人才有長短，不可強爲。軌文雅智意，自爲美器。今失并州，換置他州，若入居顯職，不毀其德於事實善。此安危之要，惟聖明察之。正始中入爲中護軍，轉侍中尚書，遷司隸校尉。素與曹爽善，每言於爽，輒從之。李勝字公昭，南陽人也。父休字子朗，有智略。張魯之爲鎮北將軍，休爲司馬。家南鄭。時漢中有甘露降，休見張魯精兵數萬，有四塞之固，遂建言赤氣久衰，黃家當興，欲魯舉尊號，魯不聽。會魯破，曹操以其勸魯內附，賜爵關內侯，署散官騎，從詣鄴。黃初中，歷上黨、鉅鹿二郡太守。後以年老還拜議郎。勝少遊京師，雅有才智，與曹爽善。曹叡禁浮華，而人白勝堂有四窗八達，各有主名，用是收。以其所連引者多，故得原。禁錮數歲，叡卒，曹爽輔政，勝爲雒陽令。夏侯元爲征西將軍，以勝爲長史，元亦宿與勝厚。略谷之役，議從勝出，由是司馬懿不悅於勝。累遷滎陽太守、河南尹。勝前後所宰守，未嘗不稱職。爲尹歲餘，廳事前屠蘇壞，令人更治之。小材一枚激墮，正搗受符吏石虎頭，斷之後旬日，遷爲荊州。

刺史爽等令勝辭懿并伺察焉。勝見懿陳自無他功勞。橫蒙時恩。當爲本州詣閣拜辭。懿令兩婢侍持衣。衣落復上。指口言渴。求飲。婢進粥。懿持杯飲粥。粥皆流出沾胸。勝愍然爲之涕泣。謂懿曰。今主上尙幼。天下恃賴。明公然衆情謂明公方舊風發動。何意尊體乃爾。懿徐更寬言。才令氣息相屬。說年老沈疾。死在旦夕。君當屈并州。并州近胡。好善爲之。恐不復相見。勝曰。當還忝本州。非并州也。懿仍復佯爲昏謬曰。君方到并州。努力自愛。錯亂其辭。狀如荒瘡。勝復曰。當忝荊州。非并州也。懿乃若微悟者。謂勝曰。懿年老意荒。不解君言。今還爲本州刺史。盛德壯烈。好建功勛。今當與君別。自顧氣力轉微。欲自力設薄主人。生死共別。以師昭兄弟爲託。因流涕哽咽。勝亦長歎。答曰。輒當承教。須待救命。勝辭出。與爽等相見。說司馬公語言錯誤。口不攝杯。指南爲北。尸居餘氣。形神已離。不足慮矣。他日又向爽等垂泣曰。太傅病不可復濟。令人愴然。未及之官而敗。

議曰。國之將亡。必有姦臣。而後有亂臣。有亂臣。而後有篡臣。姦臣所以兆亂。亂臣所以興亂。篡臣所以乘亂。漢魏季世是也。漢之將亡。有胡廣。趙戎。然後有董卓。有董卓。然後有曹操。魏之將亡。有劉放。孫資。然後有曹爽。有曹爽。然後有司馬懿。相因而然也。正臣立朝。挈綱敷紀。進君子。退小人。亂何由而生哉。亂生無由焉。得而篡之哉。譬諸人身。元氣盛。神觀明。則害氣不得奸。而壯且安矣。姦人進而用小人。邪氣入於膏肓。凡物皆能斃。而攻之。欲不危亡得乎。放資之進爽。特以其庸闇易制爾。爽遂驕盈。蔑懿弗忌。微功妄舉。

結怨于民。方鷲匿狸伏。鼠嘯宮廟。殞身償族。宜哉。自是祿去公室。晉卒篡魏。皆爽基之也。詩曰。大風有隧。貪人敗類。爽之謂矣。鄧颺諸人。構扇虛僞。躁競一時。皆覺勇蓄禍。覆邦家之人也。桓範之智不如葵。惜哉。何晏。徑徑自喜。貪冒榮寵。志願軒然。速禍宜矣。初。蓋公言黃老。文景之間。雖云崇尚。特清淨寡欲。恬素無爲。曾未害道。以亂天下也。至正始間。晏與王弼等。始爲清談。祖尙老莊。穰穰六經。曠蕩虛無。幽沈仁義。使夷甫諸人。敗俗傷化。卒亡中國。故晏之附爽亂魏之罪小。清談亂天下之罪大也。贊曰。宗室固絕。本支傷殘。再世託孤。心死骨寒。昭伯憤憤。罔堪顧天。一時浮躁。專朝竊權。藉蛟枕虎。平步晏居。通奏釋兵。竟卽門誅。大盜胙餼。肉人弗置。孤兒泣血。能免篡弑。平叔粉孺。清談自喜。王風不變。遂成正始。綱領紐解。波頽草靡。竟亡中國。禍實在此。

續後漢書卷第四十九

列傳第四十六

吳

孫堅 孫策

孫堅字文臺。吳郡富春人。吳將孫武之後也。父鍾家貧種瓜方熟。三人來乞瓜。鍾設瓜及飯。三人者去。謂鍾曰。我司命也。當報君惠。因指示葬地。令改葬其先人。曰。爾後世封侯。出數天子。言卒俱爲白鶴飛去。鍾從其言。改葬起家。冢上數有光怪。雲氣五色。上屬于天。曼延數里。父老相謂曰。是非凡氣。孫氏其興乎。及鍾妻妊堅。夢腸出繞吳閭門。懼以告鄰婦。婦曰。安知非吉也。堅生。容貌魁傑。闊達好奇節。年十七爲縣吏。與父共乘船至錢唐。會海賊胡玉等從匏里上掠取賈人財物。於岸上分之。行旅皆艤船不敢進。堅謂父曰。此賊可擊。父曰。何與爾邪。堅遂揮刀上岸。東西指麾。若分部人兵。以羅遮賊狀。賊望見以爲官兵。卽委財物散去。堅追斬得一級以還。父大驚。由是知名。郡召署假尉。遷郡司馬。會稽妖賊許昌起句章。謹案。後漢書靈帝紀。熹平元年。會稽人許生自稱越王。通鑑綱目會稽妖賊許生稱帝。惟陳志作許昌起于句章。自稱陽明皇帝。此傳下文堅討許生云云。與漢紀綱目合。而此處仍志作許昌。似與下文不相應。以其父爲越王。自稱陽明皇帝。與其子韶扇動諸縣。衆以萬數。揚州刺史臧旻。丹陽太守陳寅討之。不克。靈帝熹平元年也。

三年冬，堅召募精勇得千餘人，與州郡合兵討許生，大破生於會稽，斬之。臧晏、陳寅列上功狀，詔書除堅鹽漬丞。後徙盱眙丞，又徙下邳丞。所在有稱，吏民親附。鄉里知舊好事，少年從之者常數百人。中平元年，黃巾賊起，帝遣車騎將軍皇甫嵩、中郎將朱儁將兵討之。儁表請堅爲佐軍司馬，堅率鄉里子弟又募諸商旅及淮泗精兵合千餘人，從儁奮擊所向無前。原注：吳書：堅乘勝深入于西華，失利。堅被創，墮馬，臥草十數日。創少愈，乃復出戰。汝穎賊困迫，走保宛城。堅自當一面，登城先入衆，乃蟻附，遂大破之。儁具以聞。拜堅別部司馬。邊章、韓遂作亂涼州，中郎將董卓拒討無功。二年，詔遣司空張溫行車騎將軍西討章等。溫表請堅參軍事，屯長安。張溫以詔書召卓，卓良久乃詣溫。溫責讓卓，卓應對不順。謹案：今志作對，應與此合。宋本作應對。堅時在坐，耳語溫曰：「卓不怖罪而鳴張大語，宜以召不時至，陳軍法斬之。」溫曰：「卓素著威名於隴蜀，今日殺之，西行無依。」堅曰：「明公親率王師，謹案：今陳志作天兵。宋本作王兵。威震天下，何賴於卓？觀卓所言，不假明公，輕上無禮，一罪也。章遂跋扈經年，當以時進討，而卓云未可沮軍疑衆，二罪也。卓受任無功，應召稽留，而軒昂自高，三罪也。古之名將，仗鉞臨衆，未有不斷斬以示威者也。是以穰苴斬賈，魏絳戮揚干，今明公垂意於卓，不忍加誅，虧損威刑，是在矣。溫不忍發，乃曰：「君且還。」卓將疑人，堅因起出居，無何遂殺章，黨衆離散。溫還，議者以軍未臨敵，不斷功賞，然聞堅數卓三罪，勸溫斬之，無不歎息。拜堅議郎。四年冬，長沙賊區星自稱將軍，衆萬餘人，攻圍城邑。乃以堅爲長沙太守，到郡，勅吏曰：「謹遇良善，治官曹文書，必循法，以盜賊

付太守遂帥將士施設方略旬月之間克破星等周朝郭石亦帥徒衆起於零桂與星相應堅越境尋討三郡肅清廬江太守陸康從子爲宜春長爲賊攻圍遣使求救堅整嚴救之主簿進諫堅曰太守無文德以征伐爲功越界攻討以全異境獲罪何愧乃進兵賊聞之解走朝廷錄前後功封堅烏程侯六年靈帝崩董卓擅朝政初平元年卓弑宏農王劫遷獻帝於長安諸州郡並興義兵討卓堅聞之拊膺歎曰張公昔從吾言國家無此難也遂亦舉兵荊州刺史王叡先與堅共擊零桂賊以堅武官言頗輕之及叡舉兵欲討卓素與武陵太守曹寅不相能揚言當先殺寅寅懼詐作案行使者光祿大夫溫毅檄移堅說叡罪過令收行刑訖以狀上堅承檄卽勒兵襲叡叡聞兵至登樓遣問欲何爲堅前部答曰兵久戰勞苦欲詣使君乞貲直爾叡曰刺史豈有所吝便開庫藏使自入視之知有所遺不兵進及樓下叡見堅驚曰兵自求賞孫府君何以在其中堅曰被使者檄誅君叡曰我何罪堅曰坐無所知叡窮迫刮金飲之而死盡收叡兵鼓行而北比至南陽衆數萬人南陽太守張咨聞軍至晏然自若原注。獻帝春秋。袁術表堅假中郎將。堅到南陽。移檄太守請軍糧。咨以問綱紀。綱紀曰。聖鄉郡二千石不應調發。咨遂不與。堅故以牛酒禮咨咨明日亦答詣堅酒酣長沙主簿推問意故咨大懼欲去兵陳四周不得出有頃主簿復入白堅南陽太守稽停義兵使賊不時討請收出案軍法便牽咨於軍門斬之郡中震慄無求不獲原注。初堅至南陽。咨既不給軍糧。又不肯見堅。堅欲進兵。恐有後患。乃詐得急疾。舉軍騎五六百人詣營省堅。堅臥與相見。無何。卒然而起。按劍罵咨。遂執斬之。此語與本傳不同。前到魯陽與袁術合兵術由是得據南陽表堅行破虜將軍

領豫州刺史遂治兵於魯陽二年春進軍討卓遣長史公仇稱

謹案陳志稱字下有將兵從事四字

還州督促軍糧施帳幔

於城東門外祖道送稱官屬並會卓時據雒陽遣步騎數萬人逆堅輕騎數十先到堅方行酒談笑敕部曲整頓行陳無得妄動後騎漸益堅徐罷坐導引入城乃謂左右曰向堅所以不卽起者恐兵相蹈藉諸君不得入爾卓兵見堅士衆整不敢攻引還堅移屯梁東大爲卓軍所攻堅與數十騎潰圍而出堅常著赤罽幘乃脫幘令親近將祖茂著之卓騎爭逐茂故堅從間道免茂困迫下馬以幘冠冢間燒柱因伏草中卓騎圍繞數重覺其爲柱乃去堅復收散卒進屯陽人卓遣陳郡太守胡軫爲大督護呂布爲騎督率步騎五千擊堅軫性躁急與布不相得先宣言曰此行要當斬一青綬乃整齊爾布與諸將惡之軍到廣城去陽人數十里人馬疲極軫欲按兵止宿布謂賊已走便當追襲師無成命堅夜出掩擊大破之斬其都督華雄或問堅于袁術曰堅若得雒不可復制此爲除狼而得虎也術懷疑不運軍糧陽人去魯陽百餘里堅夜馳見術畫地計曰所以出身不顧上爲國家討賊下爲將軍家門之私堅與卓非有骨肉之怨也而將軍受浸潤之言還相嫌疑大勳垂捷而軍糧不繼此吳起所以歎息于西河樂毅所以遺恨于垂成也

原注

史記吳起爲西河守而秦兵不敢東鄉韓魏實從公叔爲相而

害吳起讒之武侯武侯疑之起懼得罪遂去之楚樂毅事見前注願將軍深思之術蹈踏卽調發軍糧堅還卓憚堅猛壯乃遣將軍李傕等來求和令堅列疏子弟任刺史郡守者許表用之堅曰卓逆天無

道蕩覆王室今不夷汝三族縣示四海則吾死不瞑目豈將與乃和邪復進軍大谷拒雒九十里卓遂自

出與堅戰諸陵間卓敗走焚燒雒陽卻屯澠池聚兵於陝堅進至雒陽時京邑荒空數百里中無烟火堅入城惆悵流涕乃掃除宗廟祠以太牢修塞卓所發諸陵得傳國璽於城南甄官井中分軍出新安澠池間以邀卓卓謂長史劉艾曰關東軍敗數矣皆畏孤無能爲也惟孫堅小戇頗能用人當語諸將使知忌之孤昔與周慎西征慎圍邊韓於金城孤語張溫求引所將兵爲慎作後駐溫不聽孤時上言其形勢知慎必不克臺今有本末事未報溫又使孤討先零叛羌以爲西方可一時蕩定孤皆知其不然而不得止遂行畱別部司馬劉靖將步騎四千屯安定以爲聲援叛羌便還謹案便還陳志注作更還欲截歸道孤小擊輒開畏安定有兵故也虜謂安定當數萬人不知但靖也時又上章言狀而孫堅隨周慎行謂慎求將萬兵遣金城使慎以二萬作後駐邊韓城中無宿穀當於外運畏慎大兵不敢輕與堅戰而堅兵足以斷其運道兒曹用其言謹案陳志注兒曹用下無其言二字必還羌谷涼州或能定也溫旣不能用孤慎又不用堅自攻金城壞其外垣馳使語溫自以克在旦夕溫時亦自以計中也而渡遼兒果斷蔡圍慎棄輜重走果如孤策臺以此封孤都鄉侯堅以佐軍司馬所見與人同自爲可耳但無故從諸袁兒終亦殆爾謹案陳志注無但無故從諸袁兒十一字艾曰堅雖時見計故自不如李傕郭汜聞在美陽亭北將騎步與虜合謹案陳志注騎步上有千字殆死亡失印綬此不能爲也卓曰堅時烏合義從兵不如虜精且戰有利鈍但當論山東大勢終無所至爾艾曰山東兒驅略百姓以作寇逆其鋒不如人堅甲利兵彊弩之用又不如人亦安得久卓曰然但殺二袁劉表孫堅天下自服從

孤爾夏四月卓遂引兵還長安堅亦還屯魯陽時關東州郡務相兼并以自彊大袁紹遣會稽周暉爲豫

州刺史來襲取州堅慨然歎曰同舉義兵將救社稷逆賊垂破而各若此吾當誰與戮力乎言發泣下術

與袁紹有隙謹案陳志術與袁紹有隙上有初平三年四字此刪去則事連上文而孫堅之死在二年矣考孫策傳

表云十七則爲不符張璠漢紀與吳歷並以堅初平二年死此爲是而本傳誤也據此則郝書之刪去初平三年

者蓋據裴注之議通鑑綱目書表軍射殺孫堅事亦在初平二年志注引英雄記所載年月更與諸書不符矣紹連劉

表冬十月術使堅擊劉表表遣其將黃祖逆於樊鄧之間堅擊破之追渡漢水遂圍襄陽祖還逆戰堅復

敗之祖竄入峴山中堅乘勝夜追祖祖兵從竹木間射堅殺之原注英雄記堅以初平四年正月七日死劉表

石中堅頭應時騰出物故其不同如此也謹案後漢書劉表傳注引英雄記呂公作呂介時年三十七堅所舉孝廉長沙桓階詣表請堅喪表義而許之

兄子賁帥將士衆就術術復表賁爲豫州刺史堅四子策權翊匡權稱尊號諡堅曰武烈皇帝廟曰始祖

墓曰高陵原注志林堅有五子策權翊匡吳氏所生少子朗庶生也一名仁

孫策字伯符堅初興義兵畱家壽春策年十餘歲姿度英發已結交知名舒人周瑜與策同年亦英達夙

成自舒造策推結分好勸策徙居舒策遂將母及諸弟遷舒與瑜收合士大夫江淮間人咸向之堅卒策

年十七還葬曲阿己乃渡江居江都原注魏書策當嗣侯讓子弟匡結納豪俊有復讎之志而徐州牧陶謙深忌策丹陽

太守周昕與袁術相惡術以策舅吳景領丹陽太守攻昕奪其郡以策從兄賁爲丹陽都尉策乃以母弟

託廣陵張紘徑到壽春見袁術涕泣言曰亡父昔從長沙入討董卓與明使君會於南陽同盟結好不辛

遇難勳業不終。策感惟先人舊恩，欲自憑結。惟明使君垂察其誠，術甚奇之。然未肯還其父兵。謂策曰：「孤用貴舅爲丹陽太守，賢從兄爲都尉，彼精兵之地，可還招募。召策遂與汝南呂範及族人孫河迎其母弟詣曲阿就景，因緣召募得數百人，而爲涇縣大帥祖郎所襲，幾至殆危。興平元年，復往見術。術以堅餘兵千餘還策。太傅馬日磾杖節安集關東，在壽春以禮辟策，表拜懷義校尉。術大將喬蕤、張勳皆傾心敬焉。術常歎曰：「使術有子如孫郎，死復何恨？」策騎士有罪，逃入術營，隱於內廩。策指使人斬之，訖詣術謝。術曰：「兵人好叛，當共疾之，何爲謝也？」由是軍中益畏憚之。術初許策爲九江太守，已而更用丹陽陳紀。後術欲攻徐州，從廬江太守陸康求米三萬斛，康不與。術大怒，策昔曾詣康不見，使主簿接之。策常銜恨，術遣策攻康，謂曰：「前錯用陳紀，每恨本意不遂，今若得康，廬江真卿有也。」策攻康，拔之。術復用其故吏劉勳爲太守，策益失望。先是劉繇爲揚州刺史，州舊治壽春，壽春術已據之，繇欲南渡江，吳景孫賁迎置曲阿，及策攻廬江，繇聞之，以景賁本術所置，懼爲袁孫所并，遂構嫌隙，迫逐景賁。景賁退屯歷陽，繇遣樊能于糜陳橫屯江津，張英屯當利口以拒之。術自用故吏琅邪惠衢爲揚州刺史，更以景爲督軍中郎將，與賁共將兵擊英等。二年初，丹陽朱治嘗爲孫堅校尉，見袁術德政不立，勸策歸取江東。策乃說術曰：「家有舊恩，在東，願助舅討橫江。橫江拔因投本土召募，可得三萬人，足以平定江東。」佐明使君匡濟漢室。術知其恨，而以劉繇據曲阿，王朗在會稽，謂策未必能定，故許之。術表策爲折衝校尉，兵纔千餘，騎數十匹，賓客願從。

者數百人。比至歷陽，衆五六千。策母先自曲阿徙歷陽。至是，策又徙母阜陵。時周瑜從父尚爲丹陽太守，瑜將兵迎之，仍助以貲糧。策大喜曰：「吾得卿，諧也。」冬，進攻橫江，當利皆拔之。樊能、張英敗走。策渡江，轉鬪所向皆破。莫敢當其鋒者。百姓聞孫郎至，皆失魂魄。長吏委城郭，竄伏山草。而軍令整肅，所至軍士不敢虜掠。雞犬菜茹，一無所犯。民乃大悅。競以牛酒勞軍。策爲人美姿顏，好笑語，性闊達，聽受善於用人。是以士民見者，莫不盡心樂爲致死。策攻劉繇牛渚營，盡得邸閣糧穀戰具。時彭城相薛禮下邳相笮融，依繇爲盟主。禮據秣陵城，融屯縣南。策皆擊破之。而樊能于廩等復合衆襲奪牛渚屯。策還攻破能，獲男女萬餘口。融仍據縣南。策復攻之，爲流矢所中，輿還牛渚。或告融孫郎中箭死矣。融大喜，遣兵於茲鄉攻策。策遣步騎數百挑戰，設伏於後。融兵出，鋒刃未接，而策兵僞走。融兵追入伏中，合擊大破之，斬首千餘級。策裹創抵融營，令左右大呼曰：「孫郎竟云何？」融更深溝高壘，繕治守備，不復出。策乃舍去。攻破繇別將于海陵，轉攻湖孰。江乘皆下之。進攻繇于曲阿。繇使太史慈出覘策，遇策於神亭。策與戰，幾禽慈。繇悉衆出戰，敗走。丹徒策入曲阿，勞賜將士，發恩布令，告諭諸縣。其劉繇笮融等故鄉部曲來降首者，一無所問。樂從軍者，一身行復除門戶，不樂者勿強也。旬日之間，四面雲集，得見兵二萬餘人，馬千餘匹。威震江東。遣其將陳寶詣阜陵迎母與弟。袁術表策行殄寇將軍。策乃以張紘爲正議校尉，彭城張昭爲長史，常令一人居守，一人從征。待以師友之禮。廣陵秦松、陳端等亦參謀議。賓僚始盛。賢能之士多歸之。吳人嚴白虎、鄒

他錢銅及前合浦太守嘉興王晟等衆各萬餘人所在屯聚朱治逐吳郡太守許貢據其郡貢南依嚴白虎吳景等欲先擊破虎等乃至會稽策曰虎等羣盜非有大志此成禽耳建安元年秋策引兵徑渡浙江攻會稽功曹虞翻說太守王朗曰策善用兵不如避之朗不從發兵拒策於固陵策數渡水戰不能克策叔父靜勸策分兵投查瀆道襲高遷屯朗大驚遣故丹陽太守周昕等帥師逆戰策破昕等斬之朗委城遁浮海至東冶策追擊大破之朗詣策降鄒他王晟等應時撲滅策自討嚴白虎白虎堅壁自守使其弟興請和許之興請獨與策面約誓既會策引刀斫席興體動策笑曰卿能坐躍勁捷不常聊戲卿爾興曰我見刀乃然策知其無能爲也乃手戟投之立死興有勇力白虎衆知其死奪氣進攻破之白虎奔餘杭投許昭初吳郡太守盛憲舉高岱孝廉許貢來領郡岱將憲避難于許昭家至是白虎復依之程普請擊昭策曰許昭有義于舊君有誠于故友此丈夫之志也乃舍之原注。裴松之曰。案許昭有義於舊君。謂濟盛憲也。有誠於故友。則受嚴白虎也。恩威並著浙右肅清盡更置長吏策自領會稽太守復以吳景爲丹陽太守朱治爲吳郡太守遣奉正都尉劉由五官掾高承奉章詣許獻方物策聞袁術潛謀僭逆令張紘爲書責而絕之術始自以有淮南之衆策據江東必與己合及得書愁沮發疾二年夏曹操遣議郎王誦誦案。王誦。志注作王輔。宋本作誦。與此合。下同。奉戊辰詔書曰董卓逆亂凶國害民先將軍堅念在平討雅意未遂厥美著聞策遵善道求福不回今以策爲騎都尉襲爵烏程侯領會稽太守又詔曰故左將軍袁術不顧朝恩坐創凶逆造合虛僞欲因兵亂詭詐百姓聞

其言以為不然。定得使持節平東將軍領徐州牧溫侯布上術所造惑眾妖妄。知術鳴臯之性。遂其無道。修治王宮。署置公卿。郊天祀地。殘民害物。為禍深酷。布前後上策。乃心本朝。欲還討術。為國效節。乞加顯異。夫縣賞俟功。惟勤是與。故便寵授。承襲前邑。重以大郡。榮耀兼至。是策輸力竭命之秋也。其亟與布及行吳郡太守安東將軍陳瑀戮力一心。同時赴討。策自以統領兵馬。但以騎都尉領郡為輕。欲得將軍號。乃使人諷誦。誦便承制假策。明漢將軍。是時陳瑀屯海西。策奉詔治嚴。當與布瑀參同形勢。行到錢塘。瑀

陰圖襲策。謹案。今志作陰襲圖策。宋遣都尉萬演等密渡江。使持印傳三十餘紐。組今志本志陰圖襲策。與此合。賊與丹陽

宣城涇陵陽始安黔。原注。音伊。歙。音攝。諸險縣大帥祖郎焦己及吳郡烏程嚴白虎等使為內應。伺策軍

發。欲攻取諸郡。策覺之。遣呂範徐逸攻瑀於海西。大破之。獲其吏士妻子四千人。瑀單騎走冀州。自歸袁

紹。策表謝曰。臣以固陋。孤持邊陲。陛下廣播高澤。不遺細節。以臣襲爵。兼典名郡。仰榮顧寵。謹案。志注作顧寵。宋本作此合。與所不克堪。興平二年十二月二十日。於吳郡曲阿得袁術所呈表。以臣行殄寇將軍。至被詔書。乃

知詐擅。雖輒捐棄。猶用悚悸。臣年十七。喪失所怙。懼有不任堂構之鄙。以忝析薪之戒。誠無去病十八建

功。世祖列將弱冠佐命。臣初領兵。年未弱冠。雖驚懦不武。然思竭微命。惟術狂惑。為惡深重。臣憑威靈。奉

辭伐罪。庶必獻捷。以報所授。三年。策遣張紘獻方物。初曹操聞策平定江東。曰。獠兒難與爭鋒也。且袁紹

方強。力未能逞。姑欲撫策。乃表策為討逆將軍。封吳侯。以弟女配策。小弟匡。又為子彰。謹案。彰即郡陵侯

今志作章。誤。

取孫賁女。禮辟策弟權。又命揚州刺史嚴象舉權茂才。以張紘爲侍御史。袁術以周瑜爲居巢長。魯肅爲東城長。肅瑜知術無所成。皆棄官渡江從策。策以瑜爲建威中郎將。曹操表徵王朗。策遣朗還。袁術深怨策。遣間使齋印綬丹陽太守。謹案。丹陽太守句疑脫誤。據陳志。孫輔傳注。作齋印綬與丹陽宗帥陵陽祖郎等。使激勸山越。策已定宣城以東。惟涇已西六縣未服。太史慈因進住涇縣。大爲山越所附。策乃自將討祖郎於陵陽。禽郎。策謂郎曰。爾昔襲孤。斫孤馬鞍。今創軍立事。除棄宿怨。惟取能用與天下通爾。非但汝。汝勿怖也。郎叩頭謝。又禽太史慈於勇里。策曰。寧識神亭時邪。亦解其縛。署郎門下賊曹。慈門下督軍還。郎慈俱在前導。人以爲榮。會劉繇卒。豫章華歆無他方。規自守而已。策遂有兼并之志。四年。策被詔與司空曹操。衛將軍董承。益州牧劉璋等并力討袁術。劉表軍嚴當進會。術死。乃西討表。術從弟允。女婿黃琦等畏曹操。不敢守壽春。乃共舁術棺。率其妻子部曲奔廬江。太守劉勳於皖城。術長史楊宏大將張勳將其衆欲就策。勳要擊。悉虜之。收其珍寶以歸。勳以袁術部曲衆多乏食。不能贍賑。遣從弟偕告糴于豫章太守華歆。郡素少穀。遣吏將偕就海昏上繚使諸宗帥共出米三萬斛與偕。歷月纔得數千斛。偕乃報勳使襲之。策惡勳阻兵。全活逆類。欲討之。乃僞卑辭以事勳曰。上繚宗民數欺鄙郡。欲擊之路不便。上繚富實。願君伐之。請出兵以爲援。且以珠寶葛越賂勳。勳大喜。遂伐上繚。至海昏。宗帥知之。皆空壁逃遷。了無所得。時策方討表將黃祖。及石城。聞勳在海昏。分遣從兄賁輔率八千人於彭澤待勳。自與周瑜將二萬人襲皖城克之。得術助妻子及百工鼓吹部曲。

三萬餘人表汝南李術爲廬江太守給兵三千人以守皖城徙所得人衆詣吳助還至彭澤賁輔邀擊大破之助聞策已克皖城走投西塞保流沂謹案志注作至沂築壘自守告急於劉表求救於黃祖祖遣其子射率舟師

五千助策復擊破之助北歸曹操射亦遁去策收助兵二千餘人船千艘進兵夏口攻黃祖劉表遣從

子虎及南陽韓晞將長矛五千救祖策泝流奮擊大破之斬晞祖脫身走獲其妻子及船六千艘士卒溺

死者數萬人表上其事曰臣討黃祖以十二月八日到祖所屯沙羨縣劉表遣將助祖并來趣臣以十

一日平旦部所領江夏太守行建威中郎將周瑜領桂陽太守行征虜中郎將呂範領零陵太守行盪寇

中郎將程普行奉業校尉孫權行先登校尉韓當行武鋒校尉黃蓋等同時俱進身跨馬櫟陳謹案志注作櫟陳

手擊急鼓以齊戰勢吏士奮激踊躍百倍心精意果各競用命越渡重塹迅疾若飛火放上風兵激煙

下弓弩並發流矢雨集日加辰時祖乃潰爛鋒刃所截原注甫火所焚前無生寇惟祖迸走獲男女七

人斬虎狼韓晞以下謹案上文云劉表遣從子虎南陽韓晞救祖此云斬虎狼韓晞疑有誤二萬餘級謹案志注作一萬與此合其赴水溺

死者二萬餘口船六千餘艘財物山積雖表未禽祖宿狡猾爲表腹心出作爪牙表之鴟張以祖氣息而

祖家屬部曲掃地無餘表孤特之虜成鬼行尸誠皆聖朝神武遠振臣討有罪得效微勤策盛兵將徇豫

章屯於椒丘謂功曹虞翻曰華子魚自有名字然非吾敵也若不開門讓城金鼓一震不得無所傷害卿

便在前具宣孤意翻乃往見華歆曰竊聞明府與鄙郡故王府君齊名中州海內所宗雖在東垂常懷瞻

仰歆曰：孤不如王會稽。翻復曰：不審豫章資糧器仗士民勇敢孰與鄙郡。歆曰：大不如也。翻曰：明府言不如王會稽，謙光之談爾。精兵不如會稽，實如尊教。孫討逆智略超世，用兵如神。前走劉揚州，君所親見。南定鄙郡，亦君所聞也。今欲守孤城，自料資糧已知不足，不早爲計，悔無及也。今大軍已次椒丘，僕便還去。明日日中迎檄不到者，與君辭矣。歆曰：久在江表，常欲北歸，孫會稽來，吾去也。原注：裴松之曰：王華二公，非所能。歆之名德，實高於明。而江表傳述翻說華云：海內名聲，孰與於王。此言非也。然王公拒戰，華逆請服，實由孫策初起，名微衆寡，故王能舉兵，豈武勝哉。策後威力轉盛，勢不可敵。華量力而止，非必用仲翔之說也。若使易地而居，亦華戰王服爾。乃夜作檄，明旦遣吏齎迎策至。脩子弟之禮，卽向歆拜禮爲上賓。策分豫章爲廬陵郡，以孫賁爲豫章太守，孫輔爲廬陵太守。會僮芝病，輔遂進取廬陵，畱周瑜鎮巴丘。策之克皖城也，撫視袁術妻子，及入豫章，收載劉繇喪，善遇其家。士大夫以是稱之。五年，曹操與袁紹相拒於官渡，策陰欲襲許，迎獻帝都江南，密治兵部署諸將，未發。廣陵太守陳登治射陽，登瑀之從兄子也。策之擊黃祖，登復遣使齎印綬，誘嚴白虎等餘黨以報瑀讐。至是，恐登復擾於內，故先擊登軍。到丹徒，須待糧運，初吳郡太守許貢畏策威名，密表策威雄如項籍，宜詔還京邑。若縱之於外，必爲世患。策候吏得貢表，及破嚴白虎，獲貢，以表示貢，殺之。貢奴客潛民間，欲爲貢報讐，策性好獵，數出驅馳，所乘馬精駿，從騎絕不能及。卒遇貢客三人，射策中頰，後騎尋至，皆殺之。原注：江表傳：許貢奴客潛民間，欲爲貢報讐。獵日卒有三人，卽貢客也。策問爾等何人。餘二人怖，急便舉弓射策。中頰，後騎尋至，策皆殺之。九州春秋：策聞曹公北征柳城，悉起江南之衆，自號大司馬，將北襲許，恃其勇，行不設備，故及於難。孫盛異同評曰：凡此數書，各有所失。孫策雖威行江外，略有六郡，然黃

祖乘其上流。陳登聞其心腹。且深險強宗。未盡歸復。曹袁虎爭。勢傾山海。策豈暇遠師汝穎而遷帝於吳越哉。斯蓋庸人之所覓見。陳策達於事勢者乎。又案袁紹以建安五年至黎陽。而策以四月遇害。則志曰策與紹相拒于官渡。謬矣。伐登之言為有證也。又江表傳說策悉識韓當軍士。疑此為詐。便射殺一人。夫三軍將士。或有新附。策為大將。何能悉識。以所不識便射殺之。非其論也。又策見殺在五年。柳城之役在十二年。九州春秋非錯。尤甚矣。裴松之曰。案傳子亦云曹公征柳城。將襲許。記述若斯。何其疎哉。然孫盛所議。未為悉是。黃祖始被策破。魂氣未反。但劉表君臣本無兼并之志。雖在上流。何辨規擬吳會。策之此舉。理應先圖陳登。但舉兵所在。不止登而已。于時強宗驍帥。耶嚴虎之徒。禽滅已盡。所餘山越。蓋何足慮。然則策之所規。未可謂之不暇也。若使策志獲從。大權在手。淮泗之間。所在皆可都。何必畢志江外。其當遷帝于揚越哉。案魏武紀。武帝以建安四年已出屯官渡。策未死之前。久與袁紹交兵。則國志所云。不為謬也。許貢客無聞之小人。而能感識恩遇。臨義志生。策嘗殺方士于吉。每獨坐彷彿見吉意。率然奮發。有倅古烈矣。詩云。君子有微猷。小人與屬。貢客其有焉。

深惡之。頗失常度。治創方愈。而引鏡自照。見吉在鏡中。因撲鏡大叫。創復崩裂。遂增劇。原注。吳歷。策既被自將護。百日勿動。策引鏡自照。謂左右曰。面如此。倘可復建功立事乎。推几大奮。創皆分裂。其夜卒。謂張昭等曰。中國方亂。夫以吳越之衆。三江之固。足以觀

成敗。公等善相吾弟。呼權佩以印綬。謂曰。舉江東之衆。決機于兩陳之間。與天下爭衡。卿不如我。舉賢任能。各盡其心。以保江東。我不如卿。至夜卒。時年二十六。權稱尊號。追諡策曰長沙桓王。封子紹為吳侯。復

改封上虞侯。紹卒。子奉嗣。孫皓時。訛言奉當立。誅死。原注。陳壽評曰。孫堅勇鷲剛毅。孤微發迹。寧溫戮卓。山

志陵中夏。然皆輕佛果躁。隕身致敗。且割據江東。策之基兆也。而權尊崇未至。子止侯爵。於義儉矣。孫盛曰。孫氏兄弟。皆明略絕羣。創基立事。策之由也。且臨終之日。顧命委權。夫意氣之間。猶有刎頸。況天倫之篤愛。豪達之英

豐之良謀。是故曹隱矜義。終致羽父之禍。宋宣懷仁。卒有殤公之哀。皆心存小善。而不達經綸之圖。求譽當年。而思貽厥之謀。可謂輕千乘之國。蹈道則未也。孫氏因擾攘之際。得奮其從橫之志。業非積德之基。邦無磐石之固。勢一則祿祚可終。情乖則禍亂塵起。安可不防微於未兆。慮難於將來。壯哉策為首事之君。有吳開國之主。將相在列。勢其舊也。而嗣子弱劣。析薪弗荷。奉之則魯桓田市之難作。崇之則與夷子馮之禍興。是以正名定本。使貴賤殊適。然後國無陸肆之責。後嗣罔猜忌之嫌。羣情絕異端之論。不逞杜觀觀之心。於情雖遠。至於括囊遠圖。永保維城。

可謂爲之于其未有。治之于其未亂者也。陳氏之評。其未達乎。

議曰。破虜以雄材壯略。遭漢衰末。慨然有撥定之志。崛起吳會。陵蹈中原。討滅黃巾。勸誅董卓。識度遠矣。逮卓廢立劫遷。奮其忠烈。以偏師追亡逐北。使不敢東。修塞園陵。保完漢璽。威震函雒。嚮非袁術掣肘。扶義而西。漢未必亡。討逆以孤童子。嶽嶽傑立。高視闊步。仗馬箠以下江東。收攬豪俊。關地建侯。有吳之基兆定矣。而皆殞折非橫。豈天欲啓權。奪去父兄而與之歟。

贊曰。秦政東游。氣猶未驗。

原注。漢書。始皇曰。東南有天子氣。於是東游以厭當之。

籍驕澤險。鼓光揭焰。金埋益固。瓜分啓僭。

原注。楚威王以其地有

王氣。埋金鎮之。故曰金陵。

武烈拓迹。挺身孤劍。崛起三吳。橫挑八維。揮戈指日。

原注。淮南子。魯陽公與韓戰。日暮援戈而揮之。日爲之反三舍。

抗旌

纓霓卓岫布走。迅清京畿。塞陵哭廟。涕泗交頤。義聲方振。天乃遽奪。討逆繼起。虎子龍躍。國士納交。僞罟褫脫。宇量傑邁。志度宏豁。收攬豪俊。平定江東。班圭析爵。建社分封。決義制勝。莫嬰其鋒。其兆已定。稟命弗融。

續後漢書卷第五十

列傳第四十七

吳

孫權大帝

孫權字仲謀。堅爲下邳丞。生權。方頤大口。目有精光。堅亡。兄策起事江東。權常在左右。性度宏朗。仁而能斷。好俠下士。每參計謀。策甚奇之。自以爲不及也。嘗會賓客。顧權曰。此皆汝之將也。於是聲望侔於父兄矣。策旣定諸郡。權年十五。以爲陽羨長。郡察孝廉。州舉茂才。行奉義校尉。朝廷以策遠修貢職。遣使者劉琬加錫命。琬語人曰。吾觀孫氏兄弟。雖各才秀明達。然皆祿祚不終。惟中弟孝廉形貌奇偉。骨體不恆。有大貴之表。年又最壽。爾當識之。

建安四年。從策征廬江太守劉勳。勳破。進討黃祖於沙羨。五年。策卒。以事授權。權哭未及息。策長史張昭謂權曰。孝廉此寧哭時耶。扶權易服上馬。撫巡軍將。上表朝廷。下移屬郡。周瑜自巴丘將兵赴喪。權喟之。以中護軍與張昭共掌衆事。是時惟有會稽吳郡丹陽豫章廬陵。然深險之地。猶未盡從。而天下英豪布在州郡。賓旅寄寓之士。以安危去就爲意。未有君臣之固。張昭周瑜等謂權可與共成大業。故委心服事。

焉。冬十月，曹操聞策卒，欲因喪伐之，以定吳會。張紘諫操，乃表權爲討虜將軍，領會稽太守，襲封吳侯。仍遣紘還吳佐權，使內附。權委紘與張昭共掌機務，使丞之郡行文書事，待張昭以師傅之禮，而周瑜、程普、呂範等爲將率，招延俊秀，聘求名士，魯肅、諸葛瑾等始爲賓客，分部諸將，鎮撫山越，討不從命。初，策表用李術爲廬江太守，策亡，攻殺揚州刺史嚴象，又不事權，而多納其叛亡。權移書求索，術報曰：「有德則歸，無德則去，不應復還。」權大怒，以狀白曹操曰：「嚴刺史昔爲公用，又是州舉將，而李術凶惡，輕犯漢制，殘害州司，肆其不道，宜速誅滅，以懲醜類。」今欲討之，進爲國朝掃除鯨鯢，退爲舉將報塞怨讎，此天下達義。夙夜所甘心，術必懼誅，復詭說求救。明公居阿衡之任，海內所瞻，願敕執事勿復聽受，乃舉兵攻術于皖城。術閉門自守，求救於操，操不救，仍遣沛國劉馥爲揚州刺史，術糧盡，丸土而吞，權屠其城，梟術首，徙其部曲三萬餘人於吳。廬陵太守孫輔恐權不能保江東，陰遣人齎書呼曹操，行人以告，權悉斬輔親近，分其部曲，徙輔置江東。

七年夏，曹操下書責權任子，權召羣僚議，張昭、秦松等猶豫不決，權引周瑜詣吳夫人前定議，遂不送質。八年冬，權西伐黃祖，破其舟師，惟城未克，而山寇復動，還過豫章，使呂範平鄱陽會稽，程普討樂安，太史慈領海昏，韓當、周泰、呂蒙等爲劇縣令，長討山越，悉平之。建安漢興，南平民作亂，權使賀齊進討，復立縣邑，料出兵萬人。

九年冬十二月丹陽大都督嬀覽郡丞戴員殺權弟丹陽太守翊翊妻徐氏討覽員斬之權以從兄瑜代翊爲丹陽太守。

十年權使賀齊討上饒分爲建平縣。

十一年權擊山賊麻保二屯平之。

十二年西伐黃祖虜其人民而還冬十一月權母夫人吳氏卒。

謹案·陳志·孫權傳書權母吳氏薨在七年·吳夫人傳亦在七年·注引志林曰·案會稽貢舉簿·建

安十二年到十三年闕無舉者云·府君遭憂·此則吳后以十二年薨也·八年九年皆有貢舉·斯甚分明·郝書據此改·

十三年初巴郡甘寧依黃祖祖不能用亡奔權因獻攻祖之策權遂伐祖祖先遣舟兵拒軍都尉呂蒙破其前鋒而凌統董襲等盡銳攻之遂屠其城祖挺身逸騎士馮則追梟其首虜其男女數萬口是歲使賀齊討黠歙分歙爲始新新定以六縣爲新都郡荊州牧劉表卒魯肅請奉命弔表二子且以觀變肅未到曹操已臨其境表子琮舉衆降操昭烈欲南濟江肅與相見因宣權旨爲陳成敗昭烈進住夏口使諸葛亮詣權求救時曹操新得表衆形勢甚盛移權書曰近者奉辭伐罪糜旌南指劉琮束手今治水軍八十萬衆方與將軍會獵于吳權以書示諸將莫不響震失色多勸權迎操惟周瑜魯肅執拒之之議與權意同乃以周瑜程普爲左右督各領萬人援昭烈攻操於赤壁大破之操燒船遁士卒死者太半昭烈與瑜等追至南郡操遂北還留曹仁徐晃於江陵使樂進守襄陽時甘寧在夷陵爲仁黨所圍用呂蒙計留凌

統以拒仁。以其半救寧軍。以勝反。權自率衆圍合肥。使張昭攻九江之當塗。昭兵不利。權攻城踰月。不能下。操遣張喜將騎赴合肥。未至。權退。十四年。瑜仁相守歲餘。所殺傷甚衆。仁委城走。權以瑜爲南郡太守。昭烈表權行車騎將軍。領徐州牧。權表昭烈領荊州牧。屯公安。以妹妻昭烈。

十五年。昭烈詣京見權。求都督荊州。周瑜上疏請留昭烈。權以曹操在北方。當廣擊英雄。不從。遂以荊州借昭烈。周瑜請進取蜀漢。未行而卒。分豫章爲鄱陽郡。謹案。豫章古今記曰。分鄱陽。歷陽。餘干。漢昌郡。以魯肅爲太守。屯陸口。代瑜。權欲遂取蜀漢。遣使告昭烈。昭烈不從。權令周瑜率水軍住夏口。昭

烈不聽軍過。使忠義屯江陵。張飛屯秭歸。諸葛亮據南郡。昭烈自住孱陵。權不得已。召瑜還。以步隲爲交州刺史。前交趾太守士燮率兄弟奉承節度。權以燮爲左將軍。嶺南始服屬于權。

十六年初。張紘以秭陵山川形勝。勸權以爲治所。及昭烈東過秭陵。亦勸權居之。權乃徙治秭陵。

十七年春。城石頭。改秭陵爲建業。秋九月。聞曹操來侵。作濡須塢。

十八年春正月。曹操進軍濡須口。號步騎四十萬。攻權江西營。獲其都督公孫陽。權率衆七萬禦之。操出濡須。作油船夜渡洲上。權圍取之。得三千餘人。溺死者復數千人。權數挑戰。操堅守不出。權乃自乘輕船從濡須口入操軍。諸將以爲挑戰者。操曰。此必權也。欲身見吾軍部伍爾。敕弓弩亂發。箭著權船。偏重將覆。因回船復以一面受箭。箭均船平。行五六里。作鼓吹而還。操見其舟船器仗整肅。歎曰。生子當如孫仲

謀如劉景升兒子豚犬爾。權爲賤與操說春水方生。公宜速去。別紙言足下不死。孤不得安。操語諸將曰。孫權不欺孤。乃徹軍還。操恐江濱郡縣爲權所略。徵令內移民轉相驚。自廬江九江。蘄春。廣陵。戶十餘萬。皆東渡江。江西遂虛。合肥以南。惟有皖城。

十九年夏五月。權攻皖城。閏月克之。獲廬江太守朱光及參軍董和男女數萬口。是歲昭烈取蜀。二十年。權以昭烈已得益州。令諸葛瑾從求荊州諸郡。昭烈不許曰。吾方圖涼州。涼州定。乃盡以荊州相與爾。權曰。此假而不反。而欲以虛辭引歲也。遂置南三郡長吏。忠義盡逐之。權大怒。乃遣呂蒙督鮮于丹。徐忠。孫規等兵二萬取長沙。零陵。桂陽三郡。使魯肅以萬人屯巴丘以禦忠義。權住陸口爲諸軍節度。蒙到二郡皆服。惟零陵太守郝普未下。會昭烈到公安。使忠義將三萬兵至益陽。權乃召蒙等使還助肅。蒙使人誘普。普降。盡得三郡將守。因引軍還。與孫皎。潘璋并魯肅兵並進拒漢於益陽。未戰。會操入漢中。昭烈懼失益州。使使求和。權令諸葛瑾報命。更尋盟好。遂分荊州。長沙。江夏。桂陽以東屬權。南郡。零陵。武陵以西屬昭烈。昭烈歸而操已還。權反自陸口。遂攻合肥。合肥未下。徹軍還。兵皆就路。權與凌統。甘寧等在逍遙津北。爲魏將張遼所襲。統等以死扞。權乘駿馬上津橋。橋南已徹。丈餘無版。親近監谷利在馬後。使權持鞍緩控。利於後著鞭。遂得越度。賀齊率三千人在津南迎權。權由是得免。張遼問所獲吳人。向有紫髯將軍。長上短下。便馬善射。是何將也。曰。孫會稽。遼謂樂進曰。恨不早知之。急追自得矣。舉軍歎恨。

二十一年冬。曹操治兵于譙。

譙案。陳志孫權傳。二十一年冬。曹公次於居巢。遂攻濡。須。武紀在二十二年。此據通鑑綱目改書。二傳相應矣。

權保濡須。操進兵攻之。不克。

引軍還。使夏侯惇等屯居巢。權令都尉徐詳詣操請降。操報使修好。誓重結婚。丹陽賊帥費棧以山越作

亂。權令陸遜討平之。

二十三年冬十月。權將如吳。親乘馬射虎於廐。原注。廐。亭。馬爲虎所傷。權投以雙戟。虎卻廢。常從張世擊

以戈獲之。

二十四年。忠義圍曹仁於襄陽。曹操遣于禁救之。禁軍沒於漢水。漢虜禁等步騎三萬送江陵。殺其將龐

諶。惟城未拔。權內憚漢。外欲以爲己功。牋與曹操。乞以伐漢自效。操欲使漢與權相持以鬪之。驛傳權書。

使曹仁以弩射中軍。中軍猶豫不能去。閏月。權規襲漢。先遣呂蒙襲公安。獲將軍傅士仁。蒙到南郡。太守

糜芳以城降。蒙據江陵。撫其老弱。釋于禁之囚。陸遜別取宜都。獲穉歸枝。江夷道。還屯夷陵。守峽口。以備

蜀。忠義還當陽。西保麥城。權使誘之。遂僞降立幡旗。爲象人於城上。因遁走。兵皆解散。僅十餘騎。權先使

朱然。潘璋斷其徑路。十二月。璋司馬馬忠獲羽及其子平都督趙累等於章鄉。斬之。遂定荊州。是歲大疫。

盡除荊州民租稅。曹操表權爲驃騎將軍。假節領荊州牧。封南昌侯。權遣校尉梁寓入貢于操。原注。魏略

儒。吳人也。權遣寓觀望曹公。曹公因以爲掾。尋遣還南。及令王惇等市馬。又遣朱光等歸上書稱臣於操。稱說天命。勸操廢漢自立。

二十五年春正月曹操卒子丕嗣爲魏王秋七月權遣使奉獻于魏魏將梅敷使張儉求見撫納南陽陰
鄴筑原注音逐陽山都中廬五縣民五千家來附冬曹丕廢漢帝爲山陽公僭稱尊號改元黃初章武元年

夏四月昭烈卽皇帝位于蜀權聞曹丕稱帝昭烈嗣漢呼問知星者已分野星氣何如遂有僭意以名位

尙卑無以厭衆欲先卑而後踞之先卑則可以假寵後踞則必致討致討然後可以怒衆衆怒然後可以

自大故深絕漢而專事魏自公安徙都鄂改名武昌謹案水經注曰孫權自公安徙此改曰武昌縣鄂縣徙治于袁山東又以其年立爲江夏郡分建業之民千家以益

之以武昌下雒尋陽陽新柴桑沙羨六縣爲武昌郡秋八月城武昌下令諸將曰夫存不忘亡安必慮危

古之善教昔雋不疑漢之名臣於安平之世而刀劍不離於身蓋君子之於武備不可以已況今處身疆

畔豺狼交接而可輕忽不思變難哉頃聞諸將各尙謙約不從人兵甚非備慮愛身之謂夫保己遺名以

安君親孰與危辱宜深警戒務崇其大副孤意焉昭烈以權襲殺忠義自將討權權懼復遣使稱臣于魏

并送于禁等還冬十一月魏遣太常邢貞策命權曰蓋聖王之法以德設爵以功制祿勞大者祿厚德盛

者禮豐故叔旦有夾輔之勳太公有鷹揚之功並啓土宇復受備物所以表章元功殊異賢哲也近漢高

祖受命之初分裂膏腴以王八姓原注楚王韓信梁王彭越九江王英布韓王信趙王張耳燕王盧縮長沙王吳芮越王無諸斯則前世之懿事後王之

元龜也朕以不德承運革命君臨萬國秉統天機思齊先代坐而待旦惟君天資忠亮命世作佐深觀歷

數達見廢興遠遣行人浮于潛漢望風影附抗疏稱藩兼納織絺南方之貢普遣諸將來還本朝忠肅內

發款誠外昭。信著金石。義蓋山河。朕甚嘉焉。今封君爲吳王。使使持節太常高平侯貞授君璽綬策書。金虎符第一至第五。左竹使符第一至第十。以大將軍使持節督交州領荊州牧事。錫君青土。苴以白茅。對揚朕命。以尹東夏。其上故驃騎將軍南昌侯印綬策符。今又加君九錫。其敬聽後命。以君綏安東南。綱紀江外。明夷安業。無或攜貳。是用錫君大輅戎輅各一元。牡二駟。君務財勸農。倉庫盈積。是用錫君衮冕之服。赤烏副焉。君化民以德。禮教興行。是用錫君軒縣之樂。君宣導休風。懷柔百越。是用錫君朱戶。以居君運其才謀。官方任賢。是用錫君納陛。以登君忠勇。並奮清除姦慝。是用錫君虎賁之士百人。君振威陵邁。宣力荆南。梟滅凶醜。罪人斯得。是用錫君鈇鉞各一。君文和於內。武信於外。是用錫君彤弓一。彤矢百。琕弓十。琕矢千。君以忠肅爲基。恭勤爲德。是用錫君秬鬯一卣。圭瓚副焉。欽哉。敬敷訓典。以服朕命。以勗相我國家。永終爾顯烈。權羣臣議以爲宜。稱上將軍九州伯。不應受魏封。權曰。九州伯於古未聞也。昔沛公亦受項羽封爲漢王。此蓋時宜爾。復何損邪。遂受之。原注。孫盛曰。昔伯夷叔齊。不風有周。魯仲連不爲秦民。三其節。或臣或否乎。余觀吳蜀咸稱奉漢。至於漢代。莫能固秉臣節。君子是以知其不能克。昌厥後。卒見吞于大國也。向使權從羣臣之議。終身稱漢將。豈不義悲六合。仁感百世哉。昭烈大軍東下。至巫山。祕歸使使誘導武陵蠻夷。假與印傳。許之封賞。於是諸縣及五谿民皆反爲漢。權以陸遜爲督。督朱然。潘璋等。以拒之。遣都尉趙咨使魏。咨還言。北朝終不能守盟誓。勸稱尊號。權納之。曹丕遣使求雀頭香。大貝明珠。象牙。犀角。玳瑁。孔雀。翡翠。鬪鴨。長鳴雞。羣臣奏曰。荆揚二州。貢有常典。魏所求珍玩之物。非禮也。宜

勿與。權曰：昔惠施尊齊爲王，客難之曰：公之學去尊，今王齊何其倒也？惠子曰：有人於此，欲擊其愛子之頭，而石可以代之，子頭所重而石所輕，以輕代重，何爲不可乎？方有事于西北，江表元元恃主爲命，非我愛子邪？彼所求者，於我瓦石爾，孤何惜焉？彼在諒闇之中，而所求若此，寧可與言禮哉？皆具以與之，不欲封權子，登爲萬戶侯，權以登年幼，上書辭封，遣西曹掾沈珩陳謝，并獻方物，立登爲王太子。

黃武元年，漢章武二年也。春正月，陸遜部將宋謙等攻漢五屯，皆破之。漢軍分據險地，前後五十餘營，遜隨輕重以兵應拒。自正月至閏月，大破之。臨陳所斬及投兵降者數萬人，昭烈退走。權使具上破漢所獲印綬首級土地，并表將吏功勩，宜加爵賞之意。于魏曹丕，詔答曰：老虜邊窟，越險深入，曠日持久，內迫罷弊，外困智力，故見身於雞頭，分兵擬西陵，其計不過謂可轉足前迹。謹案：今志注作轉是。宋本作轉足，與此合。以搖動江東，根

未著地，摧折其枝，雖未剝備五藏，使身首分離，其所降誅，亦足使虜部衆兇懼。昔吳漢先燒荊門，後發夷陵，而子陽無所逃其死，來歙始襲略陽，文叔喜之，而知隗囂無所施其巧，今討此虜，正似其事。將軍勉建方略，務全獨克，并遣報使，致驪子裘，明光鎧，駢馬，又以素書所作典論及詩賦賜權。初，權外託事魏而誠心不款，魏欲遣侍中辛毗尙書桓階往與盟誓，并徵任子權辭讓不受。魏羣臣奏曰：臣聞枝大者披心，尾大者不掉，有國有家之所慎也。昔漢承秦弊，天下新定，大國之王，臣節未盡，以蕭張之謀，不備錄之，至於六王前後反叛，已而伐之，戎車不輟。又文景守成忘戰，戢役驕縱，吳楚養虺成蛇，旣爲社稷大憂，蓋前事

之不忘後事之師也。孫權小子幼豎，無尺寸之功，遭遇兵亂，因父兄之緒，少蒙翼卵煦伏之恩，長含鳴臯反逆之性，背棄天施。譚案。今志注作天地。宋本作天施。與此合。罪惡積大，復與忠義更相覘伺，逐利見便，挾爲卑辭。先帝知權譚案。不字，竊以求用，時以于禁敗於水災，方當譚案。志注討漢，因以委權。先帝委裘下席，權不盡心，誠不志注作在。惻怛，欲因大喪，寡弱王室，希託董桃傳先帝令，乘未得報許，擅取襄陽，及見驅逐，乃更折節，邪辟之態，巧言如流，雖重驛累使，發遣禁等，內包隗囂顧望之姦，外欲緩誅，支仰蜀賊，聖朝含宏，既加不忍，優而赦之，與之更始，猥乃割地王之，使南面稱孤，兼官累位，禮備九命，名馬百駟，以成其勢，光寵顯赫，古今無二，以犬羊之姿，橫被虎豹之文，不思精力致死之節。譚案。精力今志注作靜力。以報無量不世之恩，臣每見所下權前後章表，又以愚意探察權旨，自以阻帶江湖，負固不服，譚案。今志注作狃狃。宋本作狃狃。與此合。累世詐爲譚案。今志注作詐僞。，成功上，有尉佗英布之計，下誦伍被屈彊之辭，終非不侵不叛之臣，以爲晁錯不發，削弱王侯之謀，則七國同衡，禍久而大，蒯通不決，襲歷下之策，則田橫自慮，罪深變重，臣謹考之，周禮九伐之法，平權凶惡，逆節萌生，見罪十五，昔九黎亂德，黃帝加誅，項羽罪十，漢祖不捨，權所犯罪，覺明白，非仁恩所養，宇宙所容，臣請免權官鴻臚，削爵土，捕治罪，敢有不從，移兵進討，以明國典好惡之常，以靜三州元元之苦，不遂決策伐吳，劉曄諫不聽，秋七月，以孫邵爲丞相，九月，丕命曹休、張遼、臧霸出洞口，曹仁出濡須，曹真、夏侯尚、張郃、徐晃圍南郡，權遣呂範等督五軍，以舟軍拒休等，諸葛瑾、潘璋、楊粲救南郡，朱桓以濡須督拒仁，時揚越蠻

夷多未平集內難未弭故權卑辭上書求自改厲若罪在難除必不見置當奉還土地民人寄命交州以終餘年不報曰君生於擾攘之際本有從橫之志降身奉國以享茲祚自君策名以來貢獻盈路討備之功國朝仰成理而掘之古人之所恥原注國語狐埋之是以無成功朕之與君大義已定豈樂勞師遠臨江漢廊廟之議王者所不得專三公上君過失皆有本末朕以不明雖有曾母投杼之疑猶冀言者不信以爲國福故先遣使犒勞又遣尙書侍中踐修前言以定任子君遂設辭不欲使進議者怪之又前都尉浩周勸君遣子乃實朝臣交謀以此卜君君果有辭外引隗囂遣子不終內喻竇融守忠而已世殊時異人各有心浩周之還口陳指麾益令議者發明衆嫌終始之本無所據仗故遂俛仰從羣臣議今省上事款誠深至心用慨然悽愴動容卽日下詔敕諸軍但深溝高壘不得妄進若必效忠節以解疑議登身朝到夕召兵還此言之誠有如大江權遂改元黃武臨江拒守冬十一月大風範等兵溺死者數千餘軍還江南曹休使臧霸以輕船五百敢死萬人襲攻徐陵燒攻城車殺略數千人將軍全琮徐盛追斬魏將尹盧殺獲數百十二月權旣拒魏復欲與漢修好令作書聘漢曰前所以名西爲蜀者以漢帝尙存故爾今漢已廢自可名爲漢也遂使太中大夫鄭泉聘昭烈于白帝始復通也然猶與曹丕相往來至後年乃絕是歲改夷陵爲西陵將軍孫盛據江陵中州以爲南郡外援

二年漢建興元年也春正月曹真分軍奪據江陵中州城江夏山改四分用乾象歷推五德之運以爲土

行用未祖辰臘。

原注。志林。土行以辰臘。得其數矣。土盛於戊。而以未祖。其義非也。土生於未。故未有坤初。是以月令建未之月。祖黃精於郊。祖用其盛。今祖用其始。豈應運乎。

三月曹仁遣

將軍常彫等以兵五千乘油船晨渡濡須中州。仁子泰因引軍急攻朱桓。桓率兵拒之。遣將軍嚴圭擊破

彫等。魏軍皆退。夏四月。羣下勸權稱尊號。權不許。曰：漢家湮替。不能存救。亦何心而競乎。羣臣稱天命符

瑞。固請。權不許。而謂將軍曰：往年孤以元德方向西鄙。故先命陸遜選衆以待之。聞北部分欲以助孤。孤

內嫌其有挾。若不受其拜。是相折辱。而趣其速發。便當與西俱至。二處受敵。於孤爲劇。故自抑按。就其封

王。低屈之趣。諸君似未之盡。今故以此相解爾。昭烈崩于白帝。權使立信都尉馮熙弔祭于漢。先是。戲口

守將晉宗殺其將王直。以衆叛降魏。魏以爲蘄春太守。數犯邊境。六月。權令將軍賀齊督糜芳。劉邵等襲

蘄春。生獲宗。冬十一月。漢使中郎將鄧芝來聘。原注。吳歷。蜀致馬二百匹。錦千端及方物。自是之後。聘使往來

元年秋七月。遣尙書郎鄧芝修好于吳。通鑑綱目作尙書鄧芝

芝本傳于時正入爲尙書。此作中郎將。蓋沿陳志之訛。以爲常。吳亦致方土所出以答其厚意焉。

謹案。末帝紀。建興

三年夏。遣輔義中郎將張溫聘于漢。報鄧芝也。秋八月。赦死罪。九月。曹丕出廣陵。安東將軍徐盛令植木

衣葦爲疑城。假樓自石頭。至於江。乘聯亘數百里。一夕而成。又大浮舟艦於江。時江水盛長。丕臨望歎曰：

魏雖有武騎千羣。無所用之。彼有人焉。未可圖也。乃還。漢復遣鄧芝來聘。重結盟好。權謂芝曰：山民作亂。

江邊守兵多微。慮曹丕乘空弄態。而反求和議者。以爲內有不暇。幸來求和。於我有利。宜當與通。以自辨

定。恐西州不能明孤赤心。用致嫌疑。孤土地邊外。間隙萬端。而長江巨海。皆當防守。不觀覺而動。惟不見

定。恐西州不能明孤赤心。用致嫌疑。孤土地邊外。間隙萬端。而長江巨海。皆當防守。不觀覺而動。惟不見

便寧得忘。此復有他圖。

四年夏五月。丞相孫邵卒。六月。以太常顧雍爲丞相。冬十月。曹丕復至廣陵。臨江觀兵。戎卒十餘萬。旌旗數百里。有渡江之志。權嚴設守備。時大寒。冰舟不得入江。丕見波濤洶湧。歎曰。嗟乎。固天所以限南北也。遂歸。孫韶遣將高壽等。率敢死士五百人。於徑路夜要丕。丕大驚。獲其副車羽蓋。以還。十二月。鄱陽賊彭綺。自稱將軍。攻沒郡縣。衆數萬人。

五年春。令曰。軍興日久。民離農畔。父子夫婦。不能相恤。孤甚愍之。今北虜縮竄。方外無事。其下州郡。有以寬息。秋七月。權聞曹丕卒。遂伐其喪。攻江夏。不克而還。遣諸葛瑾等圍襄陽。魏將司馬懿擊敗之。殺部將張霸。分三郡惡地十縣置東安郡。以全琮爲太守。平討山越。冬十月。陸遜陳便宜。勸以施德。緩刑。寬賦息調。又云。忠讜之言。不能極陳。求容小臣。數以利聞。權報曰。夫法令之設。欲以遏惡防邪。儆戒未然也。焉得不有刑罰。以威小人乎。此爲先令。後誅。不欲使有犯者爾。君以爲太重者。孤亦何利其然。但不得已而爲之爾。今承來意。當重諮謀。務從其可。且近臣有盡規之諫。親戚有補察之箴。所以匡君主。明忠信也。書載子違汝弼。汝無面從。孤豈不樂忠言。以自裨補邪。而云不敢極陳。何得爲忠讜哉。若小臣之中。有可納用者。寧得以人廢言。而不採擇乎。但諂媚取容。雖聞亦所明識也。至於調發者。徒以天下未定。事以衆濟。若徒守江東。修崇寬政。兵自足用。何用多爲。顧坐自守。可陋耳。若不豫調。恐臨時未可使用也。又孤與君

分義特異。榮咸實同。來表云不敢隨衆容身苟免。此實甘心所望於君也。於是令有司盡寫科條。使郎中褚逢齋以就遜及諸葛瑾意所不安。令損益之。是歲權于武昌新裝大船。名爲長安。試泛之釣臺。泝時風大盛。谷利令柁工取樊口。權曰。當張頭取羅州。利拔刀向柁工曰。不取樊口者斬。工卽轉柁入樊口。風遂猛。不可行。乃還。權曰。阿利畏水何怯也。利跪曰。大王萬乘之主。輕于不測之淵。戲于猛浪之中。船樓裝高。邂逅顛危。奈社稷何。是以利輒敢以死爭。權歎重之。不復稱名。常呼曰谷云。謹案。太平御覽引吳志曰。權與風。權遣舵工張頭取羅州。谷利拔劍擬舵工急取樊口。未及至口。船中。船破。因名敗船灣。江夏記曰。敗船灣在縣西北七里。交趾太守士燮卒。交州刺史呂岱殺士燮子徽。

等兄弟六人。徼外扶南。林邑。堂明皆入貢。

六年春正月。鄱陽太守周魴等擊彭綺。獲之。閏月。韓當子琮。謹案。當子琮見韓當傳。此作琮。蓋沿志訛。以其衆叛降魏。

七年春三月。封子慮爲建昌侯。夏五月。鄱陽太守周魴僞叛。誘魏將曹休。秋七月。權至皖口。使將軍陸遜督諸將大破休于石亭。大司馬呂範卒。將軍翟周叛降魏。權恐將軍畏罪而亡。乃下令自今諸將有罪三。然後議之。

黃龍元年春。公卿百司皆勸權正尊號。夏四月。夏口武昌並言黃龍鳳凰見。丙申。南郊遂稱帝。策告天地曰。皇帝臣權。敢用元牡。昭告于皇皇后帝。漢享國二十有四世。歷年四百三十有四。行氣數終。祿祚運盡。普天弛絕。率土分崩。孽臣曹丕。遂奪神器。丕子叡繼世作慝。淫名亂制。權生於東南。遭值期運。承乾秉戎。

志在平世。奉辭行罰。舉足爲民。羣臣將相州郡百城執事之人。咸以爲天意已去於漢。漢氏已絕祀於天。皇帝位虛。郊祀無主。休徵嘉瑞。前後雜沓。歷數在躬。不得不受。權畏天命。不敢不從。謹擇元日。登壇燎祭。卽皇帝位。惟爾有神。左右有吳。永終天祿。是日大赦。改元。追尊父破虜將軍。堅爲武烈皇帝。母吳氏爲武烈皇后。兄討逆將軍。策爲長沙桓王。太子登爲皇太子。將吏皆進爵加賞。初。與平中吳中童謠曰。黃金車。斑闌耳。闔昌門。出天子。原注。裴松之曰。昌門。吳西郭門。夫差所作。五月。使校尉張剛。管篤之遼東。遣使以並尊二帝。告于漢。六月。漢遣衛尉陳震。賀權踐阼。權乃中分天下。豫青徐幽屬吳。兗冀并涼屬漢。其司州之土。以函谷關爲界。盟曰。天降喪亂。皇綱失敘。逆臣承釁。劫奪國柄。始于董卓。終于曹操。窮凶極惡。以覆四海。至令九州幅裂。普天無統。民神痛怨。靡所戾止。及操子丕。桀逆遺醜。薦作姦回。偷取天位。而叡尋丕凶蹟。阻兵盜土。未伏厥誅。昔共工亂象而高辛行師。三苗干度而虞舜征焉。今日滅叡。禽其徒黨。非漢與吳。將復誰在。夫討惡翦暴。必聲其罪。宜先分裂。奪其土地。使士民之心。各知所歸。是以春秋晉侯伐衛。先分其田。以畀宋人。斯其義也。且古建大事。必先盟誓。故周禮有司盟之官。尙書有告誓之文。漢之與吳。雖信由中。然分土裂境。宜有盟約。諸葛丞相德威遠著。翼戴本國。典戎在外。信感陰陽。誠動天地。重復結盟。廣誠約誓。使東西士民。咸共聞知。故立壇殺牲。昭告神明。再歃加書。副之天府。天高聽下。靈威斐謚。司慎司盟。羣臣羣祀。莫不臨之。自今日漢吳旣盟之後。戮力一必。同討魏賊。救危卹患。分災共慶。好惡齊之。無或攜貳。若有害漢則。

吳伐之。若有害吳則漢伐之。各守分土。無相侵犯。傳之後葉。克終克始。凡百之約。皆如載書。信言不絕。實居于好。有渝此盟。創禍先亂。遠貳不協。愒慢天命。神明上帝。是討是督。山川百神。是糾是殛。俾墜其師。無克祚國。于爾大神。其明鑒之。秋九月。權遷都建業。因故府不改館。徵上大將軍陸遜。輔太子登。掌武昌軍。事以張昭爲輔。吳將軍。

二年春正月。魏作合肥新城。詔立都講祭酒以教學諸子。遣將軍衛溫諸葛直將甲士萬人浮海求夷洲及亶洲。亶洲在海中不可得至。但得夷洲數千人還。遣諸軍攻魏合肥。不克而還。廷尉監隱蕃作亂。伏誅。三年春二月。遣太常潘濬率衆五萬討武陵蠻夷。衛溫諸葛直皆以違詔無功下獄。誅。夏。由拳野稻自生。改爲禾興縣。中郎將孫布詐降。以誘魏將王淩。淩以軍迎布。冬十月。權伏兵於阜陵。邀擊淩敗之。會稽南始。平言。嘉禾生。十二月丁卯大赦。改明年元。

嘉禾元年春正月。建昌侯慮卒。三月。遣將軍周賀校尉裴潛乘海之遼東。求馬於公孫淵。放騎都尉虞翻於蒼梧。秋九月。公孫淵遣校尉宿舒郎中令孫綜謹案。今志作閔中令。此作郎中令。與通鑑合。稱藩。并獻豹馬。冬十月。魏將田

豫邀擊賀于成山。斬賀。謹案。陳志田豫擊賀事在九月。此移十月。舒綜至。權大悅。遂議加淵爵位。十二月。陸遜攻魏廬江。不克。

二年春正月。詔曰。朕以不德。肇受元命。夙夜兢兢。不遑假寢。思平世難。救濟黎庶。上答神祇。下慰民望。是以眷眷勤求俊傑。將與戮力。共定海內。苟在同心。與之偕老。今使持節督幽州領青州牧遼東太守燕王。

久脅賊虜。隔在一方。雖乃心於國。其路靡緣。今因天命。遠遣二使。款誠顯露。章表殷勤。朕之得此。何喜如之。雖湯遇伊尹。周獲呂望。世祖未定。而得河右。方之今日。豈復是過。普天一統。於是在矣。書不云乎。一人有慶。兆民賴之。其大赦天下。與之更始。布告州郡。咸使聞知。特下燕國。奉宣詔恩。令普天率土。備聞斯慶。三月。遣舒綜還。使太常張弼。執金吾許宴。將軍賀達等。將兵萬人。金寶珍貨。九錫備物。乘海授淵。燕王。自丞相顧雍以下。皆諫。以爲淵未可信。而寵待太厚。但可遣吏兵數百。護送舒綜。權終不聽。原注。裴松之曰。淵意了。非有攻伐之規。重復之慮。宣達錫命。乃用萬人。是不愛其民。皆虐之甚乎。此一役也。非惟閭塞。實爲無道。淵果斬弼等。送其首于魏。沒其兵資。權大怒。欲自征。淵曰。朕年六十。世事難易。靡所不嘗。近爲鼠子所前。卻令人氣踊如山。不自截鼠子頭。以擲于海。無顏復臨漢國。就令顛沛。不以爲恨。尙書僕射薛綜等切諫。乃止。冬十二月。權向合肥新城。遣將軍全琮攻六安。皆不克還。

三年春正月。詔曰。兵久不輟。民困于役。歲或不登。其寬諸逋。勿復督課。漢丞相亮約同時大舉伐魏。夏五月。權遣陸遜。諸葛瑾等屯江夏沔口。孫韶張承等向廣陵淮陽。權率大衆圍合肥新城。時亮出武功。權謂曹叡不能遠出。而叡遣兵助司馬懿拒亮。自率水軍東出。未至壽春。權退還。孫韶亦罷。秋八月。以諸葛恪爲丹陽太守。討山越。潘濬平武陵蠻。還武昌。冬十一月。詔復曲阿爲雲陽。丹徒爲武進。廬陵賊李桓羅厲等爲亂。

四年夏遣呂岱討桓等。秋魏使以馬求易珠璣翡翠瑇瑁。權曰：此皆孤所不用，而可得馬，何苦而不聽？皆與之。

五年春三月，輔吳將軍張昭卒。中郎將吾粲獲李桓將軍唐咨、獲羅厲等，鄱陽賊彭旦等爲亂。

六年春正月，公孫淵自稱燕王，聞魏將來討，復稱臣，乞兵北伐以自救。權欲戮其使，羊衝曰：不可。是肆匹夫之怒而捐霸王之計也。不如因而厚之，遣奇兵潛往，以要其成。若魏伐淵不克，而我軍遠赴，是恩結遐夷，義蓋萬里。若兵連不解，首尾離隔，則我虜其傍郡，驅略而歸，亦足以致天之罰。報雪曩事矣。權曰：善。乃勒兵大出，謂淵使曰：請俟後問，當從簡書，必與弟同休戚共存亡。雖損于中原，吾所甘心也。又曰：司馬懿所向無前，深爲弟憂也。二月，陸遜討彭旦等，皆破之。冬十月，遣衛將軍全琮襲魏六安，不克。諸葛恪平山越還，北屯廬江。

赤烏元年夏，呂岱討廬陵賊平之。秋八月，魏將司馬懿克襄平，斬公孫淵。武昌言麒麟見，有司奏言麒麟者太平之應，宜改年號。詔曰：聞者赤烏集于殿前，朕所親見，若神靈以爲嘉祥者，改年宜以赤烏爲元。羣臣奏曰：昔武王伐紂，有赤烏之祥，君臣觀之，遂有天下。聖人書策載述最詳者，以爲近事，旣嘉親見，又明也。于是改元。步夫人卒，追贈皇后。初，權信任校事呂壹，壹性苛慘，用法深刻，太子登數諫，權不納。大臣由是莫敢言，後壹姦罪發露，伏誅。權引咎責躬，乃使中書郎袁禮告謝諸大將，因問時事所當損益，禮還復。

有詔責數諸葛瑾步隲朱然呂岱等曰袁禮還云與子瑜子山義封定公相見並以時事當有所先後各自以不掌民事不肯便有所陳悉推之伯言承明伯言承明見禮泣涕懇惻辭旨辛苦至乃懷執危怖有不自安之心聞此悵然深自刻怪何者夫惟聖人能無過行明者能自見爾人之舉措何能悉中獨當己有以傷拒衆意忽不自覺故諸君有嫌難爾不爾何緣乃至於此乎自朕興軍五十年所賦役凡百皆出於民天下未定孽類猶存士民勤苦然勞百姓事不得已爾與諸君從事自至少至長髮有二色以謂表裏足以明露公私分計足用相保盡言直諫所望諸君拾遺補闕昔衛武公年過志壯勤求輔弼每獨歎責原注江表傳權又云天下無粹白之狐而有粹白之裘衆之所積也夫能以駁致純不惟積乎故能用衆力則無敵於天下矣能用衆志則無畏於聖人矣且布衣韋帶相與交結分成好合尙污垢不異今日諸君與朕從事雖君臣義存猶謂骨肉不復是過榮福喜戚相與共之忠不匿情智無遺計事統是非諸君豈得從容而已哉同船濟水將誰與易齊桓諸侯之霸者爾有善管子未嘗不歎有過未嘗不諫諫而不得終諫不止今朕自省無桓公之德而諸君諫爭未出於口仍執嫌難以此言之朕於齊桓良優未知諸君於管子何如爾久不相見因事當笑共定大業整齊天下當復有誰凡百事要所當損益樂聞異計匡所不逮

二年春正月詔曰郎吏者宿衛之臣古之命士也閒者所用頗非其人自今選三署皆依四科不得以虛辭相飾三月遣使者羊衡鄭胄將軍孫怡之遼東擊魏守將張特高慮等譚案張特虜其男女而還原注

裴松之曰。聞孫怡者。東川人。非權之宗也。夏五月。城沙羨。冬十月。將軍蔣祕南討夷賊。祕所領都督廖式。殺臨賀太守嚴綱等。自稱平南將軍。與弟潛共攻零陵。桂陽。及搖動交州。蒼梧。鬱林諸郡。衆數萬人。遣將軍呂岱。唐咨討之。歲餘皆平。

三年春正月。詔曰。蓋君非民不立。民非穀不生。頃者以來。民多征役。歲又水旱。年穀有損。而吏或不良。案今志作吏不良。宋本多或字。與此合。侵奪民時。以致饑困。自今以來。督諸郡守其謹察非法。當農桑時。以役事擾民者。舉正

以聞。夏四月。大赦。詔諸郡縣治城郭。起譙樓。穿塹發渠。以備盜賊。冬十一月。民饑。詔開倉廩。以賑貧民。

四年夏四月。遣衛將軍全琮略淮南。決芍陂。燒安城邸閣。收其人民。威北將軍諸葛恪攻六安。琮與魏將

王淩戰于芍陂。中郎將秦晃等十餘人戰死。車騎將軍朱然圍樊。大將軍諸葛瑾攻祖中。原注。襄陽記。祖

祖中在上黃界。去襄陽一百五十里。魏時。亮王梅數兄弟三人。部曲萬餘家屯此。分布在中廬。音如租稅之租。宜城。西山。隔沔二谷中。土地平敞。宜桑麻。有水陸良田。沔南之膏腴沃壤。謂之祖中。五月。太子登卒。魏太傅

司馬懿救樊。六月。軍還。閏月。大將軍諸葛瑾卒。陸遜城郟。謹案。陸上志有秋八月三字。

五年春正月。立子和為太子。大赦。改禾興為嘉興。百官奏立皇后。及諸王。詔曰。今天下未定。民物勞瘁。且

有功者或未錄。飢寒者尙未卹。猥割土壤。以豐子弟。崇爵位。以寵妃妾。朕甚不取。其釋此議。夏四月。禁進

獻御。減太官膳。秋七月。有司又奏立后。及諸王。八月。立子霸為魯王。

六年春正月。諸葛恪襲魏六安。破魏將謝順營。虜其民人而還。冬十月。丞相顧雍卒。十二月。魏司馬懿將

兵入舒。諸葛恪自皖遷于柴桑。

七年春正月。以上大將軍陸遜爲丞相。領武昌事如故。是歲步騭、朱然等各上疏謂自蜀還者。咸言背盟與魏交通。多作舟船。繕治城郭。又蔣琬守漢中。聞司馬懿南向。不出兵乘虛以掎角之。反委漢中還成都。事已彰灼。無所復疑。宜爲之備。權曰。吾待蜀不薄。聘享盟誓。無所負之。何以致此。又司馬懿前來入舒。旬日便退。蜀在萬里。何知緩急而便出兵乎。昔魏欲入漢川。此間始嚴。亦未舉動。會聞魏還而止。蜀寧可復以此有疑邪。又人家治國。舟船城郭。何得不獲。譎案。監本陳志作不。今本改作不獲。今此間治軍。寧復欲以禦蜀邪。人言苦不可信。譎案。苦今志作者。宋本作苦。與此合。爲諸君破家保之。漢竟自無謀。如權所籌。詔曰。督將亡叛而殺其妻子。是使妻棄夫。子棄父。甚傷義教。自今勿殺也。

八年春正月。太子和魯王霸二宮黨與交爭。權殺揚武將軍張休。太子太傅吾粲放。太常顧譚及其弟奮。威將軍承於交州。二月。權欲廢太子和。丞相陸遜諫不聽。遜憤恚。卒于武昌。將軍馬茂本淮南鍾離長。而爲王凌所失來歸。以爲征西將軍。九江太守外部督封侯領千兵。權數出苑中。與公卿諸將射。茂與兼符節令朱貞。無難督虞欽。牙門將朱志等合計。伺權在苑中。譎案。今志作苑守。宋本作苑中。與此合。公卿諸將。將在門。未入。令貞持節稱詔。悉收縛之。茂引兵入苑。擊權。分據宮中。及石頭塢。遣人報魏。事覺。秋七月。皆夷三族。八月。大赦。遣校尉陳助將屯田。及作士三萬人。鑿句容中道。自小其至雲陽。西城通會市。作邸閣。

九年春二月車騎將軍朱然侵魏祖中斬獲千餘秋九月以驃騎將軍步騭爲丞相車騎將軍朱然爲左大司馬衛將軍全琮爲右大司馬鎮南將軍呂岱爲上大將軍威北將軍諸葛恪爲大將軍

十年春正月右大司馬全琮卒權遣諸葛壹僞叛以誘諸葛誕誕以步騎二萬謹案陳志作一萬迎壹於高山權

出涂中遂至高山潛軍以待之誕覺而退二月詔曰建業宮乃朕從京來所作將軍府寺爾材柱率細皆

已腐朽常恐損壞今未復西可徙武昌宮材瓦更繕治之有司奏立武昌宮已二十八歲恐不堪用宜下

所在通共伐致謹案通共今志作通更權曰大禹以卑宮室爲美今軍事未已所在多賦若便通伐妨損農桑徒武

昌材瓦自可用也遂徙居南宮三月改作大初宮令諸將及州郡皆義作夏五月丞相步騭卒冬十月赦

死罪

十一年春正月朱然城江陵二月地仍震詔曰朕以寡德過奉先祀洩事不聰獲譴靈祇夙夜祇戒若不

終日羣僚其各厲精思朕過失勿有所諱三月宮成夏五月鄱陽言白虎仁詔曰古者聖王積行累善修

身行道以有天下故符瑞應之所以表德也朕以不明何以臻茲書云雖休勿休公卿百司其勉修所職

以匡不逮

十二年春三月左大司馬朱然卒夏四月丙寅驃騎將軍朱據領丞相六月戊戌寶鼎出臨平湖

十三年秋八月丹陽句容及故鄣寧國諸山崩鴻水溢詔原逋責給貸種食廢太子和處故鄣殺魯王霸

及車騎將軍朱據冬十月魏將文欽僞叛以誘朱異。權遣呂據就異以迎欽。異等持重。欽不敢進。十一月立幼子亮爲太子。遣軍十萬作堂邑涂塘以淹北道。十二月魏大將軍王昶圍南郡。荊州刺史王基攻西陵。起敗績於江陵。遣將軍戴烈陸凱往救之。皆引還。原注。庾闡揚都賦注。烽火以炬。置孤山頭。皆緣江相望。或百里或五十三里。寇至則舉以相告。一夕可行萬里。孫權時令暮舉火於西陵。鼓三竟達吳郡之南沙。是歲神人授書。告以改年立后。

太元元年夏五月立潘氏爲后。大赦改元。初臨海羅陽縣有神自稱王表。周旋民間。語言飲食。與人無異。然不見其形。又有一婢名紡績。是月遣中書郎李崇齋輔國將軍羅陽王印綬迎表。表隨崇俱出。與崇及所在郡守令長談論。崇等無以易。所歷山川輒遣婢與其神相聞。秋七月崇與表至。權于蒼龍門外爲立第舍。數使近臣齋酒食往來。譚案。志作往表。說水旱小事往往有驗。原注。孫盛曰。盛聞國將興。聽于民。國將亡。聽求福妖邪。將亡之兆。不亦顯乎。冬十一月大赦。權祭南郊。還得風疾。驛徵大將軍諸葛恪拜爲太子太傅。總統國事。詔省繇役。減征賦。除民所患苦。

二年春正月立故太子和爲南陽王。居長沙。子奮爲齊王。居武昌。子休爲琅邪王。居虎林。二月大赦。改元神鳳。內人弑潘后。諸將吏數詣王表請福。表亡去。夏四月權卒。年七十一。諡曰大皇帝。秋七月葬蔣陵。原注。傅子曰。孫策爲人。明果獨斷。勇蓋天下。以父堅戰死。少而合其兵將以報讐。轉鬪千里。盡有江南之地。誅其名豪。威行鄰國。及權繼其業。有張子布以爲腹心。有陸遜。諸葛瑾。有呂範。朱然以爲爪牙。分任受職。承間伺隙。兵不妄動。故戰少敗而江南安。陳壽評曰。孫權風身忍辱。任才尙計。有句踐之奇。英人之傑矣。故能自擅江表。成鼎峙之業。然性多嫌忌。果於殺戮。暨臻末年。彌以滋甚。至于讒說殄行。尤嗣廢黜。豈所謂詭賊孫謀以燕翼子

者哉。其後葉陵遲。遂至覆國。未必不由此也。裴松之曰。孫權橫廢無罪之子。雖爲兆亂。然國之傾覆。自由暴暗。若權不廢和。皓爲世適。終至滅亡。有何異哉。此則喪國由于昏虐。不在於廢黜也。設使亮保國祚。休不早死。則皓不得立。皓不得立。則吳不亡矣。

議曰。吳楚國于荆揚二州之域。連高夾深。以江山爲城隍。負固恃險。割于中夏。尙矣。書稱苗民逆命。詩載奮伐荆楚。皆夏殷盛王之時。至於周公之懲荆舒。召公之平淮夷。亦成王宣王太平中興之日。矧於王道衰。禮義廢。中國寢微之後乎。周室之東。吳楚始皆僭王。薦食諸姬。啓土上國。與齊晉更霸爭長。楚復并吳。至地方七千餘里。而天下莫彊。終春秋戰國之世。橫肆者五百餘年。漢興。項羽以江東兵殘滅諸侯。屠咸陽。慶秦民。自稱西楚霸王。擅號令於天下五年。始自刃。孝景時。吳楚七國復仰關而攻漢。幾危劉氏。世爲中國患者如此。剽輕好亂。殆天性然。東漢之衰。孫權乘父兄之烈。尊禮英賢。撫納豪右。誅黃祖。走曹操。襲關侯。遂奄有荆揚。今年出濡須。明年戰合肥。嶷然勢常北嚮。而以守爲攻。稱臣于魏。結援于漢。始忍句踐之辱。終爲熊通之僭。保據江淮。奄征南海。卒與漢魏鼎峙而立。先起而後亡。非惟智勇足抗衡。亦國勢便利然也。及晉混合。不再傳。亟走江孺。而遺棄中國。宋齊梁陳承之後。三百餘年而後亡。豈天之設險。終使限南北乎。

贊曰。慟哭統衆。收淚結綬。英威復振。雄業載構。討賊定霸。指江誓天。整領志烈。驅率時賢。割裂東南。包舉荆楚。走操卻丕。立國啓土。黃龍獻瑞。金陵始王。遂帝三州。終顯大象。

續後漢書卷第五十一

列傳第四十八

吳

孫亮候官

孫休景帝

孫皓歸命

孫亮字子明。權少子也。權春秋高而亮最少。故尤見愛。姊全公主嘗譖太子和。和子母不自安。因倚權意。欲豫自結。數稱述全尚女。勸為亮納之。赤烏十三年。和廢。遂立亮為太子。以全氏為妃。太元元年夏。亮母潘氏立為皇后。冬。權寢疾。徵大將軍諸葛恪為太子太傅。會稽太守滕允為太常。並受遺詔輔政。明年四月。權卒。亮立。大赦。改元建興。謹案。陳志改元下不書建興二字。以下亦無建興字。似為脫漏。漢延熙十五年也。閏月。諸葛恪殺中書令孫宏。以恪為太傅。允為衛將軍。領尚書事。上大將軍呂岱為大司馬。諸文武在位皆進爵班賞。冗官加等。冬十月。諸葛恪帥師遏原注。祖了反。湖。城東興。使將軍全端守西城。都尉雷略守東城。魏將諸葛誕。胡遵等步騎七萬圍東興。王昶攻南郡。毋丘儉向武昌。甲寅。恪以大兵赴敵。戊午。戰於東興。大破魏軍。殺將軍韓綜。程

嘉等。
二年春正月丙寅。立全氏為后。大赦。庚午。王昶等皆退。二月。諸葛恪至自東興。大行封賞。三月。恪復帥師

伐魏夏四月圍新城大疫兵士死者大半秋八月恪引軍還冬十月大饗羣臣武衛將軍孫峻伏兵殺恪於殿堂大赦以峻爲丞相廢齊王奮爲庶人殺南陽王和和妃張氏死之十一月有大鳥五見于春申改明年元曰五鳳

五鳳元年秋司馬桓慮謀殺孫峻立太子登之子不克皆自殺

二年春正月魏鎮東將軍毋丘儉前將軍文欽舉兵討司馬師來請兵閏月壬辰孫峻及驃騎將軍呂據左將軍留贊將兵襲壽春至東興聞欽等敗壬寅進至橐泉欽詣峻降淮南餘衆數萬口來奔魏諸葛誕入壽春峻引軍還二月及魏將曹珍遇於高亭與戰珍敗績誕別將蔣班敗留贊於菰陂贊及將軍孫楞蔣修等死之以文欽爲都護鎮北大將軍幽州牧三月使鎮南將軍朱異襲魏安豐不克秋七月將軍孫儀張怡林恂謹案陳志孫峻傳作張邵糾恂等謀殺峻不克死者數十人峻殺朱公主任衛尉馮朝城廣陵以將軍吳穰爲廣陵太守留略爲東海太守以馮朝爲監軍使者謹案馮朝監軍事陳志書在十二月督徐州諸軍事民飢軍士怨畔

功費甚衆竟不克城

太平元年秋用文欽計將伐魏八月先遣欽及驃騎將軍呂據車騎將軍劉纂鎮南將軍朱異前將軍唐咨自江入淮泗九月丁亥孫峻卒從弟偏將軍繚自爲侍中武衛將軍領中外諸軍事召據等還己丑大司馬呂岱卒據欽咨等表薦衛將軍滕允爲丞相繚不聽癸卯更以允爲大司馬代呂岱駐武昌據引兵

還欲討琳。琳遣使以詔書告喻欽咨等，使取據。冬十月丁未，遣孫憲及丁奉、施寬等以舟兵逆據於江都。遣將軍劉丞督步騎攻允，允兵敗，死之。己酉，大赦。改元辛亥。獲呂據於新州，皆夷三族。十一月，琳自爲大將軍，假節封永康侯。孫憲與將軍王惇謀殺琳，不克，死之。十二月，使五官中郎將刁元告亂於漢。

二年夏四月，大赦。亮始親政。琳所表奏，多見難問。又科兵子弟年十八以下十五以上，得三千餘人。選大將軍子弟年少有勇力爲之將帥。亮曰：「吾立此軍，欲與之俱長，日於苑中習焉。」亮數出中書視權時故事。

問左右侍臣曰：「先帝數有特制，今大將軍問事，但令我書可邪？」亮後出西苑，食生梅，使黃門至中藏取蜜漬梅，持銀盃并蓋往。黃門嘗從藏吏索宮中莞席，吏言宮席有數，不敢與，銜之，乃投鼠矢蜜中。亮問黃門曰：「此器既蓋覆，何緣有此？」召問藏吏，吏叩頭。亮曰：「向黃門從汝有私求邪？」吏曰：「求宮席，臣不與也。」黃門不

服，侍中刁元、張邪啓黃門藏吏辭語不同，請付獄推竟。亮曰：「此易知爾。」令破矢，矢中燥。亮大笑謂元、邪曰：「若矢先在蜜中，中外當俱溼，今外溼中燥，黃門所爲也。」黃門首服。左右莫不驚悚。

原注：裴松之曰：「鼠矢新者亦表裏皆溼。」黃門取新矢則無以得其姦也。綠五月，魏征東大將軍諸葛誕舉兵討司馬昭，遣將軍朱成稱臣。上疏又遣子覲長史

吳綱、諸牙門子弟爲質。六月，使文欽、唐咨、全端等步騎三萬援誕。魏師圍壽春，朱異自虎林率衆襲夏口。夏口督孫壹奔魏。秋七月，孫琳率衆救壽春。次於鑊里，朱異至自夏口。琳使異爲前部督，與丁奉等將介

士五萬解圍。八月，會稽南部反，殺都尉。都陽新郡民爲亂，廷尉丁密、步兵校尉鄭胄、將軍鍾離牧率軍討

之。朱異以軍士乏食，引還。繇怒，九月己巳，殺異於鑊里。辛未，繇自鑊里還建業。甲申，大赦。十一月，全緒子禕儀以其母奔魏。十二月，全端憚等自壽春詣魏師降。

三年春正月，諸葛誕殺文欽。三月，魏師克壽春。誕及左右戰死。將吏已下皆降魏。秋七月，封故齊王奮爲章安侯，詔州郡伐宮材。自八月沈陰不雨四十餘日，亮以孫繇專恣，與太常全尚、將軍劉丞謀誅繇。九月戊午，繇以兵取尚，遣弟恩政殺丞於蒼龍門。外召大臣會宮門，黜亮爲會稽王，立孫休。永安三年，會稽郡謠言王亮當還爲天子，而亮宮人告亮使巫禱祠有惡言，有司以聞，黜爲候官侯，遣之國。道鳩殺之。時年十九。衛送者伏罪。晉太康中，吳故少府丹陽戴容迎亮喪葬之，賴鄉。

孫休字子烈，權第六子也。年十三，從中書郎射慈郎中盛冲受學。太元二年，封琅邪王，居虎林。夏四月，權卒。休弟亮立，諸葛恪秉政，不欲諸王在濱江兵馬之地，徙休於丹陽。太守李衡數以事侵休，休上書乞徙他郡，詔徙會稽。居數歲，夢乘龍上天，顧不見尾，覺而異之。亮廢孫繇，使宗正孫楷與中書郎董朝迎休。休初聞，問意，疑楷朝具述繇等所以奉迎意，留一日二夜，遂發。十月戊寅，行至曲阿，有老公見休。譚案：今志本作於休。此作見休。較明晰。叩頭曰：「事久變生，天下喁喁，願陛下速行。」休善之。是日進及布塞亭，武衛將軍恩行丞相

事，率百僚以乘輿法駕迎於永昌亭，築宮以武帳爲便殿，設御坐。己卯，休至，望便殿止住，使孫楷先見恩。楷還，休乘輦進，羣臣再拜稱臣。休升便殿，謙不卽御坐，止東廂。戶曹尚書前卽階下，讚奏丞相奉璽符，休

三讓羣臣三請休曰將相諸侯咸推寡人寡人敢不承受璽符羣臣以次奉引休就乘輿百官陪位繚以兵千人迎於半野拜於道側休下車答拜即日御正殿大赦改元永安漢景耀元年也謹案陳志此下有冬十月壬午封孫繇等詔恐係脫漏冬十月己丑封南陽王和子皓爲烏程侯德錢唐侯謙永安侯羣臣請立皇后太子休詔曰

似不應制朕以寡德奉承洪業洩事日淺恩澤未敷加后妃之號嗣子之位非所急也有司又固請謙抑不許十一月甲午風四轉五復蒙霧連日孫繇一門五侯皆典禁兵權傾人主有所陳述敬而不違於是益恣休恐其有變數加賞賜丙申詔曰大將軍忠款內發首建大計以安社稷卿士內外咸贊其議並有勤勞昔霍光定計百寮同心無復是過亟案前日與議定策告廟人名依故事應加爵位者促施行之戊戌詔曰大將軍掌中外諸軍事事統煩多其加衛將軍御史大夫恩侍中與大將軍分省諸事壬子詔曰諸吏家有五人三人兼重爲役父兄在都子弟給郡縣吏既出限米軍出又從至於家事無經護者朕甚愍之其有五入三人爲役聽其父兄所欲畱爲畱一人除其米限軍出不從又曰諸將吏奉迎陪位在永昌亭者皆加位一級頃之休聞繇逆謀陰與張布圖計十二月戊辰臘百寮朝賀公卿升殿詔武士縛繇即日伏誅

謹案困學紀聞曰孫休之遺李衡有入君之度其討孫繇有叔孫昭子之斷己巳詔以左將軍張布討姦臣加布爲中軍督封布弟惇爲都亭侯給

兵三百人惇弟恂爲校尉詔曰古者建國教學爲先所以道世治性爲時養器也自建興以來時事多故吏民頗以目前趨務去本就末不循古道夫所尚不惇則傷化敗俗其案古置學官立五經博士核取應

選。加其寵祿。科見吏之中。及將吏子弟。有志好者。各令就業。一歲課試。差其品第。加以位賞。使見之者樂其榮。聞之者羨其譽。以敦王化。以隆風俗。

二年春三月。備九卿官。詔曰。朕以不德。託於王公之上。夙夜戰戰。忘寢與食。今欲偃武修文。以崇大化。推此之道。當由士民之贍。必須農桑。管子有言。倉廩實。知禮節。衣食足。知榮辱。夫一夫不耕。有受其飢。一婦不織。有受其寒。飢寒並至。而民不爲非者。未之有也。自頃年以來。州郡吏民。及諸營兵。多違此業。皆浮船長江。賈作上下。良田漸廢。見穀日少。欲求大定。豈可得哉。亦由租入過重。農人利薄。使之然乎。今欲廣開田業。輕其賦稅。差科彊羸。課其田畝。務令優均。官私得所。使家給戶贍。足相供養。則愛身重命。不犯科法。然後刑罰不用。風俗可整。以羣僚之忠賢。若盡心於時。雖太古盛化。未可卒致。漢文升平。庶幾可及。及之則臣主俱榮。不及之則損削侵辱。何可從容俯仰而已。諸卿尙書。可共咨度。務取便佳。田桑已至。不可後時。事定施行。稱朕意焉。

三年秋。用都尉嚴密議。作浦里塘。休殺其故主候官侯亮。是歲得大鼎於建德縣。

四年秋八月。遣光祿大夫周奕。石偉。巡行風俗。察將吏清濁。民所疾苦。爲黜陟之詔。

五年秋八月乙酉。立朱氏爲后。戊子。立子翬爲太子。詔曰。人之有名。以相紀別。長爲作字。憚其名爾。禮名子欲令難犯。易避。五十稱伯仲。古或一字。今人競作好名好字。又令相配。所行不副。此警字伯明者也。朕

常晒之。或師友父兄所作。或自己爲師友尙可。父兄猶非。自爲最不謙。朕今爲四男作名字。太子名翬。羣

音如湖水灣溪之灣。字商。商音如迄今之迄。次子名翼。翼音如兕觥之觥。字羿。羿音如元磬首之磬。原注

·研反。次子名鉅。鉅音如草莽之莽。字盪。盪音如舉物之舉。次子名翳。翳音如褻衣下寬大之褻。字燹。燹音

如有所擁持之擁。此都不與世所用者同。故鈔舊文。會合作之。夫書八體損益。因事而生。今造此名字。既

不相配。又字但一庶易忌避。其普告天下。咸使聞知。原注。裴松之曰。傳稱名以制義。義以出禮。禮以體政。政

·休欲令難犯。何患無名。而乃造無說之字。制不典之音。違明詔於前修。垂蚩。冬十月。以衛將軍漢陽興爲丞相。

·駮於後代。不亦異乎。是以墳土未乾。而妻子夷滅。師服之言。於是乎微矣。

·休欲令難犯。何患無名。而乃造無說之字。制不典之音。違明詔於前修。垂蚩。冬十月。以衛將軍漢陽興爲丞相。

·駮於後代。不亦異乎。是以墳土未乾。而妻子夷滅。師服之言。於是乎微矣。

·休欲令難犯。何患無名。而乃造無說之字。制不典之音。違明詔於前修。垂蚩。冬十月。以衛將軍漢陽興爲丞相。

·駮於後代。不亦異乎。是以墳土未乾。而妻子夷滅。師服之言。於是乎微矣。

·休欲令難犯。何患無名。而乃造無說之字。制不典之音。違明詔於前修。垂蚩。冬十月。以衛將軍漢陽興爲丞相。

·駮於後代。不亦異乎。是以墳土未乾。而妻子夷滅。師服之言。於是乎微矣。

·休欲令難犯。何患無名。而乃造無說之字。制不典之音。違明詔於前修。垂蚩。冬十月。以衛將軍漢陽興爲丞相。

悟爾。何至叩頭乎。如君之忠誠。遠近所知。往者所以相感。今日之巍巍也。詩云。靡不有初。鮮克有終。終之實難。君其終之。初休爲王時。布爲左右將督。素見信愛。及至踐阼。厚加寵待。專擅國勢。多行無禮。自嫌瑕短。故尤患忌。休雖解此旨。心不能悅。更恐其疑懼。竟如布意。廢其講業。不復使冲等入。是歲使察戰鄧恂入交趾。調孔爵大猪。原注。裴松之曰。察戰吳官號。今揚郡有察戰巷。

六月夏四月。交趾郡吏呂興等反。殺太守孫譚。譚先是科郡上手工二千餘人送建業。而鄧恂調孔雀一二十頭。復使郡民送之。民憚遠役。故興等扇動兵民。招誘諸夷爲亂。冬十月。漢以魏大舉入寇來告。甲申。使大將軍丁奉督諸軍向壽春。將軍留平就施績於南郡。議兵所向。將軍丁封孫異如河中。以救漢。漢末帝降魏。然後罷。呂興既殺孫譚等。使使如魏。請太守及兵。九真日南皆應之。丞相濮陽興建取屯田萬人以爲兵。

七年春正月。大赦。二月。鎮軍將軍陸抗。撫軍將軍步協。征西將軍留平。建平太守盛曼。率衆圍漢巴東守將羅憲。夏四月。魏將新附督王稚。浮海入句章。略長吏貲財及男女二百餘口。將軍孫越微得一船。獲三十人。秋七月。海賊破海鹽。殺司鹽校尉駱秀。使中書郎劉川發兵。廬陵豫章民張節等爲亂。衆萬餘人。魏使將軍胡烈步騎二萬侵西陵。以救羅憲。陸抗等引軍退。壬午。大赦。休寢疾不能言。手書呼丞相濮陽興。入令太子靈拜之。休把輿。託之。癸未。休卒。時年三十。諡景皇帝。

原注。裴松之載抱朴子曰。吳景帝時。成將於廣陵掘諸冢。取版以治城。所壞甚多。後

發一大冢。內有重閣戶扇。皆樞轉可開閉。四周爲徹道通車。其高可以乘馬。又鑄銅爲人數十枚。長五尺。皆大冠朱衣。執劍。列侍靈座。皆刻銅人背後石壁。言殿中將軍。或言侍郎常侍。似公王之冢。破其棺。棺中有人。髮已斑白。衣冠鮮明。面體如生人。棺中雲母厚尺許。以白玉鑿三十枚藉戶。兵人輩共舉出死人以倚家壁。棺中有一玉長一尺許。形似冬瓜。從死人懷中透出墮地。兩耳及鼻孔中皆有黃金如棗許大。此則骸骨有假物而不朽之效也。

孫皓字元宗。南陽王和長子也。一名彭祖。字皓宗。孫休立。封皓爲烏程侯。遣就國。西湖民景養相皓當大貴。皓陰喜而不敢泄。休卒。羣臣尊朱后爲皇太后。時漢初亡。交趾攜叛。國內震懼。欲立長君。左典軍萬彧昔爲烏程令。與皓相善。稱皓才識明斷。長沙桓王之儔也。又加之好學。奉遵法度。屢言之於丞相。漢陽興左將軍張布。與布說朱后欲以皓爲嗣。朱后曰。我寡婦人。安知社稷之慮。苟吳國無隕。宗廟有賴可矣。於是遂迎立皓。時年二十三。改元大赦。

元興元年秋八月。以上大將軍施績大將軍丁奉爲左右大司馬。張布爲驃騎將軍。加侍中。諸增位班賞。一如舊章。九月。黜朱后爲景皇后。追諡父和曰文皇帝。母何爲太后。冬十月。封休太子璽爲豫章王。次汝南王。次梁王。次陳王。立滕氏爲后。皓初立。發優詔。恤士民。開倉廩。振貧乏。科出宮女。以配無妻者。禽獸擾於苑者。皆放之。當時翕然稱爲明主。及旣得志。麤暴驕淫。多忌諱。好酒色。大小失望。與布竊悔之。或譖諸皓。十一月。殺興布夷三族。十二月。葬孫休於定陵。封后父滕牧爲高密侯。原注。吳歷牧本名密。避丁密改名牧。丁密避牧改名爲固。舅何

洪等三人皆列侯。是歲魏置交趾太守。司馬昭爲魏相國。遣壽春降將徐紹。孫彧銜命齎書喻皓。甘露元年。晉泰始元年春三月。皓遣使隨紹彧報書曰。知以高世之才。處宰輔之任。漸導之功。勤亦至矣。

孤以不德階承統緒。思與賢良共濟世道。而以壅隔。未有所緣。嘉意允著。深用依依。今遣光祿大夫紀陟。五官中郎將宏璆。宣明至懷。書首尾稱皓白。而不著姓。紹行到濡須。召還殺之。徙其家屬建安。有白紹稱美中國者。故也。夏四月。蔣陵言甘露降。於是改元大赦。秋七月。皓殺朱太后。不置柩正殿。於苑中小屋治喪。衆莫不悼痛。又送休四子於吳小城。尋復追殺長者二人。冬十月。西陵督步闡上表請徙都武昌。皓從之。使御史大夫丁固。右將軍諸葛靚。鎮建業。陟璆至雒。遇司馬昭卒。十一月。乃遣還。皓至武昌。又大赦。十二月。晉武帝廢曹奐自立。魏亡。

寶鼎元年春正月。遣大鴻臚張儼。五官中郎將丁忠。弔祭司馬昭。及還。儼道病死。忠說皓曰。北方守戰之具不設。弋陽可襲。而取皓訪羣臣。鎮西大將軍陸凱曰。夫兵不得已而用之。爾。且三國鼎立以來。更相侵伐。無寧歲。今彊敵新并巴蜀。有兼士之實。而遣使求親。欲息兵役。不可謂其求援於我。今敵形勢方彊。而欲徼幸求勝。未見其利也。車騎將軍劉纂曰。天生五材。誰能去兵。譎詐相雄。有自來矣。若其有闕。庸可棄乎。宜遣間諜以觀其勢。皓陰納纂言。遂與晉絕。三月。殺散騎常侍王蕃。八月。所在言得大鼎。於是改元大赦。以陸凱爲左丞相。常侍萬彊爲右丞相。冬十月。永安山賊施但等劫皓庶弟永安侯謙作亂。至建業。丁固諸葛靚逆擊。大破之。獲謙。皓并其弟俊皆殺之。初。望氣者云。荆州有王氣。當破揚州。而建業宮不利。故皓徙武昌。遣使者發民掘荆州界大臣冢。冢與山岡連者以厭之。及但反。自以爲徙土得計。使數百人

鼓譟入建業。殺但妻子。云天子使荊州兵來破揚州賊。詔曰：古者分土建國，所以褒賞賢能。廣樹藩屏，秦毀五等爲三十六郡。漢室初興，闔立乃至百五。因事制宜，蓋無常數。今吳郡陽羨、永安、餘杭、臨水及丹陽、故鄣、安吉、原鄉，於潛諸縣，地勢水流之便，悉注烏程。旣宜立郡，以鎮山越，且以藩衛明陵。奉承大祭，亦不可乎。其亟分此九縣爲吳興郡。治烏程。又以零陵北部爲邵陵郡。十二月，皓還都建業。衛將軍滕牧留鎮武昌，未幾放牧於蒼梧，道死。皓使黃門徧詣州郡，科取將吏家女，其二千石大臣之女皆歲歲言名。年十六一簡閱，不中乃得出嫁。後宮以千數，而采擇不已。

二年春，大赦。右丞相萬彧上鎮巴丘。夏六月，起昭明宮。初，權爲太初宮，方三百丈。皓隘之，故起昭明宮，方五百丈，號曰新宮。二千石以下皆自入山督攝伐木。又破壞諸營，大開園囿，起土山樓觀，窮極伎巧。皓移居之。以孟仁守丞相，奉法駕，東迎其父和神於明陵，祀於太廟。

三年春二月，以左御史大夫丁固爲司徒，右御史大夫孟仁爲司空。秋九月，皓出東關，使丁奉出合肥，施續入江夏。萬彧入襄陽。晉荊州刺史胡烈拒續，破之。丁奉諸葛靚攻合肥，不克。晉將軍毛吳擊殺交州刺史劉俊，前部督修則。

建衡元年春正月，立子瑾爲太子及淮陽東平王。原注：陳志：皓諸王皆無名，今不可考。冬十月，改元。大赦。十一月，左丞相陸凱卒。皓銜其直諫，徙其家。

建衡二年春丁奉入渦口。晉揚州刺史牽宏擊走之。萬彊還建業。夏四月左大司馬施續卒。以鎮軍大將軍陸抗都督諸軍治樂鄉。殿中列將何定譖少府李勗將軍徐存於皓。皆殺之。夷三族。仍焚勗屍。冬十一月何定將兵獵夏口。都督孫秀以爲襲己。奔晉。十二月大赦。

三年春正月。初丹陽刁元使漢。得司馬徽與劉麋論運命歷數事。元詐增其文曰。黃旗紫蓋。見于東南。終有天下。荆揚之君。又得中國。降人言壽春有童謠云。吳天子當之。皓聞喜曰。此天命也。卽載其母妻及後宮數千。并率大衆出華里。從牛渚陸道西上。云青蓋入雒陽。以順天命。東觀令華覈等固諫。不聽。是月晦大雨雪。道塗陷壞。兵士被甲持仗。百人共引一車。寒凍殆死。皆曰。若遇敵便當倒戈。皓聞之。乃還。晉遣義陽王望統中軍二萬騎三千屯壽春以備之。聞皓退亦罷。夏四月交州刺史陶璜襲晉九真太守董元殺之。秋七月璜盡平交趾。以璜爲交州牧。分交趾爲新昌郡。諸將破扶嚴。置武平郡。九月司空孟仁卒。冬十一月以武昌督范慎爲太尉。右大司馬丁奉卒。西苑言鳳皇集。改明年元。

鳳皇元年秋八月。徵西陵督步闡。闡據城叛降晉。樂鄉都督陸抗拔西陵。闡及同謀數十人皆伏誅。夷三族。大赦。皓旣克西陵。自謂得天助。志益張。大使術士尙廣筮取天下。對曰。吉。庚子歲。青蓋當入雒陽。皓喜。不修德政。專爲兼并之計。冬十二月。殺右丞相萬彊。左將軍留平。大司農樓元。何定姦穢發聞。伏誅。皓以其惡似張布。追改定名布。

二年春三月。以陸抗爲大司馬。荊州牧。夏四月。殺侍中韋曜。司徒丁固卒。秋九月。改封淮陽爲魯。東平爲齊。又封陳留。章陵等九王。凡十一王。王給三千兵。大赦。皓愛妾或使人至市劫奪百姓財物。司市中郎將陳聲素。皓幸臣也。恃皓寵。遇繩之以法。妾以愬皓。皓大怒。假他事燒鋸斷頭。投其身於四望之下。冬。太尉范慎卒。

三年。會稽妖言。章安侯奮當爲天子。臨海太守奚熙與會稽太守郭誕書。非論國政。誕但白熙書。不白妖言。送付建安。作船遣三郡督何植收熙。熙發兵自衛。斷絕海道。熙部曲殺熙。送首建業。夷三族。誅奮及其五子。秋七月。遣使者二十五人分至州郡。科出亡叛。大司馬陸抗卒。天冊元年。吳郡言掘地得銀。長一尺。廣三尺。刻上有年月字。於是改元大赦。殺中書令賀邵。又誅樓元子孫。

天璽元年。夏六月。京下督孫楷叛降晉。秋七月。吳郡言臨平湖自漢末草穢壅塞。今更開通。長老相傳。此湖塞。天下亂。此湖開。天下平。又於湖邊得石函。中有小石。青白色。長四寸。廣二寸餘。刻上作皇帝字。於是改元大赦。會稽太守車浚。湘東太守張詠。不出算緡。就在所斬之。徇首諸郡。尙書熊睦諫皓。使人以刀環撞殺之。八月。歷陽山有七穿。駢羅。穿中色赤黃。俗謂之石印。云石印封發。天下當太平。鄱陽上言石印發。文理成字。凡二十云。楚九州渚。吳九州都。揚州土。作天子。四世治。太平始。皓大喜曰。吳當爲九州作都渚乎。從大皇帝逮朕四世。太平之主。非朕復誰。遣使封其山神爲王。刻石立銘。褒贊至德。又吳興陽羨山有

空石長十餘丈。名曰石室。在所表爲大瑞。乃遣兼司徒董朝兼太常周處。至陽羨縣封禪國山。改明年元大赦。以協石文。天紀元年冬十二月。夏口督孫慎出江夏汝南。燒略居民。初騶子張傲多所譖白。累遷司直中郎將。封侯。甚見寵愛。傲父會稽山陰縣卒。知傲不良。上表云。令用傲爲司直。有罪乞不從坐。皓許之。傲表正彈曲二十人。謹案。表正。今志作表立。宋本作表正。與此合。專糾司不法。于是吏民各以愛憎互相告訐。彈曲承言繫置。犴獄。傲因大爲姦利。暴橫奢淫。娶小妻三十餘人。事發。父子皆車裂。

二年秋七月。立成紀宣威等十一王。王給兵三千。大赦。九月。殺侍中中書令張尙。冬十月。遣兵大佃皖城。欲以襲晉。晉荊州都督杜預大破西陵督張政。皓召政還。遣留憲代之。

三年夏。廣州部曲督郭馬等反。以執金吾滕修爲廣州牧。與交州牧陶璜。徐陵督陶濬。分道討之。秋八月。以軍師張悌爲丞相。牛渚都督何植爲司徒。有鬼目菜生。工人黃耆家。依綠棗樹。長丈餘。莖廣四寸。厚三分。又有買菜生工人吳平家。高四尺。厚三分。如枇杷形。上廣尺八寸。下莖廣五寸。兩邊生葉綠色。東觀漢記名。鬼目作芝草。買菜作平慮草。遂以耆爲侍芝郎。平爲平慮郎。皆銀印青綬。冬。晉命鎮東大將軍司馬卞向。涂中安東將軍王渾。揚州刺史周浚。向牛渚。建威將軍王戎。向武昌。平南將軍胡奮。向夏口。鎮南將軍杜預。向江陵。龍驤將軍王濬。廣武將軍唐彬。浮江東下。大尉賈充爲大都督。冠軍將軍楊濟副之。量宜處要。次于襄陽。爲諸軍節度。陶濬至武昌。爲北軍大出。停駐不前。初。皓每宴會羣臣。無不咸令沈醉。置黃

門郎十人。特不與酒。侍立終日。爲司過之吏。宴罷之後。各奏其闕失。注視之咎。謬言之愆。罔有不舉。大者卽加威刑。小者輒以爲罪。又激水入宮。宮人有不合意者。輒殺流之。或剝人面。或鑿人眼。岑昏險諛。貴幸致位。九列好興功役。衆所患苦。是以上下離心。莫爲盡力。

晉太康元年春正月。

謹案。陳志作四年春。此作晉太康元年者。蓋皓以是年降晉。故不數天紀四年也。

立中山代等十一王。大赦。王濬唐彬破丹陽。監

盛紀死之。進克西陵。都督留憲死之。克荆門夷道。夷道監陸晏死之。杜預克江陵。督將伍延死之。丞相張悌率丹陽太守沈瑩。護軍孫震。副軍師諸葛靚等。拒王渾。戰敗。悌瑩震死之。三月丙寅。殿中親近數百人叩頭請皓曰。北軍日近。而兵不舉刃。陛下將如之何。皓曰。何故。對曰。坐岑昏。皓曰。若爾當以奴謝百姓。衆因曰。唯遂收昏。皓絡繹追止。已屠之矣。皓乃與舅何植書曰。昔大皇帝以神武之略。奮三千之卒。割據江南。席卷交廣。開拓洪基。欲祚之萬世。至朕末德。嗣守成緒。不能懷集黎元。多爲咎闕。以違天度。闇昧之變。反謂之祥。致使南蠻逆亂。征討未克。閉晉大衆。遠來臨江。庶竭勞瘁。衆皆摧退。而張悌不反。喪軍過半。朕甚愧恨。於今無聊。得陶濬表云。武昌以西。並復不守。不守者非糧不足。非城不固。兵將背戰。爾兵之背戰。豈怨兵邪。朕之罪也。天文縣變于上。士民憤歎於下。觀此事勢。危如累卵。吳祚終訖。何其局哉。天匪亡吳。朕所招也。瞑目黃壤。當復何顏見四帝乎。公其勗勉奇謨。飛筆以聞。戊辰。陶濬從武昌還。卽引見問水軍消息。對曰。蜀船皆小。今得二萬兵。乘大船戰。自足擊之。於是合衆授濬節鉞。明日當發。其夜衆悉逃散。而

王濬順流至石頭。司馬卞王渾皆臨近境。皓用光祿勳薛瑩中書令胡冲等計分遣使奉書於濬。卞渾曰。昔漢室失統。九州分裂。先人因時。略有江南。遂分阻山川。與魏乖隔。今大晉龍興。德覆四海。閭閻劣偷。未喻天命。至於今者。猥煩六軍。衡蓋路次。遠臨江渚。舉國震惶。假息漏刻。敢緣天朝。舍宏光大。謹遣私署太常張夔等奉所佩印綬。委質請命。惟垂信納。以濟元元。皓又遣羣臣書曰。朕以不德。忝繼先軌。處位歷年。政教凶悖。遂令百姓久困塗炭。至使一朝歸命。有道社稷傾覆。宗廟無主。慙愧山積。沒有餘罪。自惟空薄。過偷尊號。才瑣質穢。任重王公。故周易有折鼎之戒。詩人有彼其之譏。自居宮室。仍抱篤疾。計有不足。思慮失中。多所荒替。邊側小人。因生酷虐。虐毒橫流。忠順被害。闇昧不覺。尋其壅蔽。孤負諸君。事已難圖。覆水不可收也。今大晉平治四海。務於擢賢。誠冀儻展節之秋也。管仲極讎。桓公用之。良平去楚。入爲漢臣。舍亂就理。非不忠也。莫以移朝改朔。用損厥志。嘉勗休尚。愛敬動靜。夫復何言。投筆而已。壬申。王濬至建業。皓面縛銜璧。輿襯詣濬降。濬解縛焚榭。延請相見。收其圖籍。領州四郡四十三。謹案。陳志注作郡四十二。太平御覽作郡三十三。

此從通鑑綱目。

縣三百一十三。戶五十二萬三千。吏三萬二千。兵二十三萬。男女口二百三十萬。米穀二百八十

萬斛。舟船五千餘艘。後宮五千餘人。卞以皓致印綬於己。遣使送皓。皓舉家西遷。夏四月甲申。詔曰。孫皓窮迫歸降。前詔待之。以不死。今皓垂至。意猶惑之。其賜皓爲歸命侯。進給衣服車乘。田三十頃。歲給穀五千斛。錢五十萬。絹五百疋。綿五百斤。皓太子瑾。拜中郎。諸子爲王者。拜郎中。五月丁亥。皓至雒陽。庚寅。武

帝臨軒大會文武有位及四方使者。國子學生皆預焉。引見皓及吳降人。皓登殿稽顙。帝謂皓曰。朕設此座以待卿久矣。皓曰。臣於南方亦設此以待陛下。賈充謂皓曰。聞君在南方鑿人目。剝人面皮。此何等刑也。皓曰。人臣有弑其君及姦回不忠者。則加此刑爾。充默然甚愧。而皓顏色無怍。侍中庾峻問皓侍中李仁曰。聞歸命侯披人面。別人足。有諸乎。仁曰。以告者過也。君子惡居下流。天下之惡皆歸焉。若使有之。亦不足怪。昔唐虞五刑。三代七辟。肉刑之制。未爲酷虐。皓爲一國之主。謹案。庾峻稱皓爲歸命侯。而李仁斥名其故主。恐無是理。或傳述之訛。乘殺生之柄。罪人陷法。加之以懲。何足多罪。夫受堯誅者不能無怨。受桀賞者不能無慕。此人情也。又問曰。歸命侯惡人橫睛逆視。皆鑿其眼。有諸乎。仁曰。傳之者謬爾。禮曰。視天子由衿以下。視諸侯由頤以下。視大夫由衡。視士則平面。得遊目五步之內。視上於衡則傲。下於帶則憂。旁則邪。以禮視瞻高下。不可不慎。況人君乎。視人君相。是乃禮所謂傲慢。傲慢則無禮。無禮則不臣。不臣則犯罪。犯罪則陷不測矣。君子謂仁爲善諱國惡。四年冬十二月。皓卒於雒陽。年四十二。葬河南縣。原注。陳志評曰。孫亮童孺而無賢輔。其

任用與布。不能拔進良才。改絃易張。雖志善好學。何益救亂乎。又使既廢之亮。不得其死。友于之義薄矣。皓之淫刑所濫。限鬻流黜者。蓋不可勝數。是以羣下人人怖恐。昔日月以冀。朝不謀夕。其獎惑巫祝。交致祥瑞。以爲至急。昔舜禹躬稼。至聖之德。猶或矢誓衆臣。予違汝弼。或拜昌言。常若不及。況皓凶頑。肆行殘暴。忠諫者誅。讒諛者進。虐用其民。窮淫極侈。宜膠首分離。以謝百姓。既蒙不死之詔。復加歸命之寵。豈非曠蕩之恩。過厚之澤也哉。孫盛曰。夫古之立君。所以司牧羣黎。故必仰協乾坤。覆養萬物。若乃淫虐是縱。酷被羣生。則天人殛之。勸絕其祚。奪其南面之尊。加其獨夫之戮。是故湯武抗鉞。不犯不順之讎。漢高奮劍。而無失節之議。何者。誠四海之酷讐。而人神之所擯故也。況皓罪爲通寇。虐過辛癸。梟首素旂。猶不足以謝冤魂。滄室薦社。猶未足以紀暴迹。而乃優以顯命。寵賜仍加。豈襲行天罰。伐罪弔民之義乎。是以知僭逆之不懲。而凶酷之莫戒。詩云。取彼謬人。投畀豺虎。聊齠猶然。矧僭虐

平。且神旗電掃。兵臨僞窟。理勢窮迫。然後請命。不救之罪既彰。三驅之義又塞。極之極道。亦無取焉。

議曰。亮既冲孺。越次而立。雖英猷夙成。有漢昭之風。而付託失人。無霍光之節。且復不密。逼露事幾。不終替位。休明惠敢決。足以有爲。而政柄已移。屯膏弗光。使亮不得其死。蒙受篡殺。踟躕而終。皓有混一之勢。不恐懼修省。爰究爰度。而乃窮兇肆虐。侈浮桀紂。盈貫以速亡宜哉。

贊曰。彊驚制主。江濡涵血。屯膏小貞。竟殫明哲。鍾彼戾侯。烹凶作孽。失險覆宗。居然銜璧。

續後漢書卷第五十二上

列傳第四十九上

吳家人

孫堅吳夫人 弟景

孫權謝夫人 弟承

徐夫人 兄璠

步夫人

王夫人

王夫人

潘后 袁

人

孫亮全后 父尚

孫休朱后

孫和何姬

孫皓滕后

孫堅吳夫人本吳人。徙錢唐。早失父母。與弟景居。堅聞其才貌。欲娶之。吳氏親戚嫌堅輕狡。拒焉。堅甚爲慙恨。夫人謂所親曰。何愛一女子以取禍乎。如或不遇。命也。於是許婚。生四男。策、權、翊、匡。一女。昭烈。孫夫人也。初夢月入懷而生策。及孕權。又夢日入懷。謂堅曰。昔妊男。夢月。今復夢日。何也。堅曰。日月陰陽之精。至貴之象。吾子孫其興乎。夫人明惠有斷。堅中道遇害。策年少。統領部曲。克取江東。殺戮過差。夫人每爲營救。推恩以結將士。策之渡浙江。討鄒他。錢銅、王晟等皆應時撲滅。將戮王晟。夫人曰。晟與汝父有升堂見母之分。今諸子兄弟皆已梟夷。獨遺一老。復何能爲。策遂釋晟。功曹魏騰。迂策將殺之。士大夫憂恐。計無所出。夫人聞之。倚大井。謂策曰。汝新造江南。其事未集。方當優禮賢士。捨過錄功。魏功曹在公。盡規汝。今日殺之。明日人皆叛汝矣。吾不忍見禍之及。當先投此井中爾。策大驚。遽釋騰。及權統業。夫人助治軍。

國多有補益。令權不送質。決計破曹。以女妻昭烈。皆夫人策略也。建安十二年謹案。志作建安七年。此據志林作十二年。引見

張昭等屬以後事。卒合葬高陵。權稱尊號。追尊武烈皇太后。謹案。目錄附弟景傳。今闕。

孫權謝夫人。會稽山陰人也。父嬰。原注久。永反。漢尚書郎徐令權母。吳夫人為權聘。以為婦。特愛幸。後權納姑

孫徐氏。欲令夫人下之。不肯。由是失志。早卒。謹案。目錄附弟承傳。今闕。

徐夫人。吳郡富春人。祖父真。與權父堅相親友。堅以妹妻真。生琨。琨生夫人。初適同郡陸尚。尚卒。權為討

虜將軍。在吳納之。使母養子。登後權以夫人妒忌。廢處吳積十餘年。權為吳王。及稱尊號。登為太子。羣臣

請立夫人為后。權意在步。不許。後以疾卒。謹案。目錄附父琨兄矯。今闕。

步夫人。臨淮淮陰人。與丞相隲同族。漢末其母攜徙廬江。廬江為孫策所破。皆東渡江。以美麗得幸於權。

寵冠後庭。生二女。長曰魯班。字大虎。前配周瑜子循。後配全琮。少曰魯育。字小虎。前配朱據。後配劉纂。原注

吳歷纂先尙權中女。早卒。故又以小虎為繼室。夫人性不妒忌。多所推進。故久見愛待。權為王及稱帝。意欲以為后。而羣臣議在

徐氏。權依違者十餘年。然宮內皆稱皇后。親戚上疏稱中宮。及卒。臣下緣權指請。追正名號。乃贈印綬。策

命曰。惟赤烏元年閏月戊子。皇帝曰。嗚呼。皇后。惟后佐命。共承天地。虔恭夙夜。與朕均勞。內教修整。禮義

不愆。寬容慈惠。有淑懿之德。民臣縣望。遠近歸心。朕以世難未夷。大統未一。緣后雅志。每懷謙損。是以於

時。未授名號。亦必謂后。降年有永。永與朕躬。對揚天休。不寤奄忽。大命近止。朕恨本意不早。昭顯傷后。殂

逝不終天祿。感悼之至。痛於厥心。今使使持節丞相醴陵亭侯雍奉策授號。配食先后。魂而有靈。嘉其寵榮。嗚呼哀哉。葬於蔣陵。

王夫人琅邪人。

原注。吳書夫人父名盧九。

選入宮。黃武中得幸生孫和。寵次步氏。步氏卒。和立爲太子。權將立夫人爲

后。而全公主素憎之。稍稍譖毀。及權寢疾。言有喜色。由是權深責怒。以憂死。和子皓立。追尊夫人曰大懿皇后。封三弟皆爲列侯。

王夫人南陽人。以選入宮。嘉禾中得幸生孫休。及和爲太子。和母貴重。諸姬有寵者皆出居外。夫人出居公安。卒。因葬焉。休立。遣使追尊曰敬懷皇后。改葬敬陵。王氏無後。封同母弟文雍爲亭侯。

潘后會稽句章人。父爲吏坐法死。后與姊俱輸織室。權見而異之。召充後宮。得幸有娠。夢有以龍頭授之者。以蔽膝受之。遂生孫亮。赤烏十三年。亮立爲太子。明年。立后爲皇后。請出嫁其姊。權許之。原注。陳志亮立爲太子。下

接云。請出嫁夫人之姊。權許之。明年立夫人爲皇后。是出嫁其姊在立后之前一年。與此不同。

后性險妒容媚。自始至卒。譖害袁夫人等甚衆。權不豫。后使問

中書令孫宏。呂后專制故事。侍疾疲勞。因以羸疾。諸宮人伺其昏臥。共縊殺之。託言中惡。後事泄。坐死者六七十人。權尋卒。合葬蔣陵。謹案。目錄附袁夫人。今闕。

孫亮全后。全尙女也。尙從祖母公主愛之。每進見輒與俱。及潘后母子有寵。全主自以與孫和母有隙。乃勸權爲潘氏男亮納后。亮遂爲嗣。立爲皇后。以尙爲城門校尉。封都亭侯。代滕允爲太常衛將軍。進封永

平侯錄尙書事。時全氏侯者五人，並典兵馬。其餘爲侍郎、騎都尉、宿衛左右，自吳興、外戚貴盛莫及。魏諸葛誕以壽春來附，而全懌、全端、全禕、全儀等並因此際降魏。全熙謀泄，見殺。由是諸全衰弱。會孫紉廢亮爲會稽王後，又黜爲候官侯。后隨之國，居候官。尙將家屬徙零陵，追殺之。吳平后乃歸，永寧中卒。

孫休朱后，朱據女，休姊公主所生也。

原注：裴松之曰：休妻其甥，事同漢惠。苟悅譏之已當，故不復廣言。

赤烏末，權爲休納以爲妃，休爲琅

邪王居丹陽，建興中孫峻專政，公族皆患之。全尙妻卽峻姊，故惟全主祐焉。初孫和爲太子時，全主譖害王夫人，欲廢太子立魯王。朱主不聽，由是有隙。五鳳中，孫儀謀殺峻，事覺被誅。全主因言朱主與儀同謀，峻枉殺朱主，休懼，遣后還建業，執手泣別。旣至，峻遣還休。太平中，孫亮知朱主爲全主所害，問朱主死意，全主懼曰：我實不知，皆據二子熊損所白。亮殺熊損，損妻、峻妹也。孫緄益忌亮，遂廢亮立休。永安五年立爲皇后，休卒，羣臣尊夫人爲皇太后，孫皓立，月餘，貶爲景皇后，稱安定宮。甘露元年七月見逼，卒。合葬定陵。原注：裴松之載搜神記：孫峻殺朱主，埋於石子岡，歸命卽位，將欲改葬之，冢墓相亞，不可識別，而宮人頗識主亡時所著衣服，乃使兩巫各往一處以伺其靈，使察鑿之，不得相近。久時二人俱入，自見一女人年可三十餘，上著青錦束頭，紫白袷，丹縹絲履，從石子岡上半岡，而以手抑膝長太息，小住須臾，進一冢上便止，徘徊良久，奄然不見。二人之言不謀而同，於是開冢，衣服如之。

孫和何姬，丹陽句容人，父遂，本騎士，孫權嘗遊幸諸營，而何姬觀於道中，權望見異之，命宦者召入，以賜子和，生男權喜，名之曰彭祖，卽皓也。後徙和居新都，遣使賜死，嫡妃張氏自殺。何姬曰：若皆從死，誰當養孤，遂撫育皓及其三弟，皓卽位，尊和爲昭獻皇帝，何姬爲昭獻皇后，稱升平宮。俄改諡和曰文皇帝，后月

餘進爲皇太后。封弟洪永平侯。蔣溧陽侯。植宣城侯。洪卒。子邈嗣。爲武陵監軍。爲晉所殺。植官至大司徒。晉軍至。皓自爲書責己。以與植。吳末昏亂。何氏驕僭。子弟橫放。百姓患之。故民譎言皓久死。立者何氏子云。

孫皓勝后。故太常允之族女也。允夷滅。夫人父牧以疎遠徙邊郡。孫休立。大赦得還。以牧爲五官中郎。皓既封烏程侯。聘牧女爲妃。皓立。立爲皇后。封牧高密侯。拜衛將軍。錄尙書事。後朝士以牧尊戚。頗推令諫爭。而后寵漸衰。皓滋不悅。皓母何恆左右之。又太史言於運歷后不可易。皓信巫覡。故得不廢。常供養升平宮。牧見遣居蒼梧郡。道路憂死。長秋官僚備員而已。受朝賀表疏如故。而皓內諸寵姬佩皇后璽紱者多矣。天紀四年。隨皓遷於雒陽。

議曰。三孫之興。吳夫人屹爲內主。有識斷。造家爲國。非此母能成此子乎。傳曰。並后匹嫡。亂之本也。齊桓公申天子之禁。謂毋易樹子母。以妾爲妻。而內寵遺亂。死不能葬。孫權恐如袁氏。而惑於嬖愛。不立嫡后。終於廢長立幼。以從楚國之舉。大亂三世。皆英明之主也。不能以道制欲。知亂本之在而自樹之。況庸闚乎。亮休。皓皆追尊妾母。而皓後庭往往佩皇后璽紱。其制不足稱也。

贊曰。鵠巢構德。大慶具來。巽蠱離昧。閑則遂乖。始猶正名。終亦僭擬。匪實叨稱。未足爲美。

續後漢書卷第五十二下

列傳第四十九下

孫權五子

孫登宣太子

謝景

孫慮

建昌侯

孫和

南陽王

孫霸

魯王

孫奮

章安侯

謹案孫登傳闕止存附羊衝一篇

羊衝南陽人年二十許爲中庶子時廷尉監隱蕃交結豪傑自衛將軍全琮等皆傾心敬待惟衝及宣詔郎豫章楊迪拒絕不與通時人咸怪之蕃後叛逆衆乃服其先識侍中胡綜作賓友目曰英才卓越超踰倫匹則諸葛恪精識時機達幽究微則顧譚疑辯宏達言能釋結則謝景究學甄微游夏同科則范曄衝乃私駁綜曰元遜才而疏子嘿精而很叔發辯而浮孝敬深而狹所言皆有指趣而衝卒以此見咎不爲恪等所親後四人皆敗如衝所駁衝官至桂陽太守卒

孫慮字子志登弟也少敏惠有才藝權器愛之黃武七年封建昌侯後二年丞相顧雍等奏慮性聰體達所尚日新比方近漢宜進爵稱王權未許久之尙書僕射存上疏曰謹案存字上姓未詳帝王之興莫不褒崇至親以光羣后故魯衛於周寵冠諸侯高帝五王封列於漢所以藩屏本朝爲國鎮衛建昌侯慮稟性聰敏才

秉文武於古典制。宜正名號。陛下謙光未肯如舊。羣寮大小咸用於邑。方今姦寇恣睢。金鼓未弭。腹心爪牙。惟親與賢。輒與丞相雍等議。咸以慮宜爲鎮軍大將軍。授任偏方。以光大業。權乃許之。於是假節開府。治半州。權詔曰。期運擾亂。凶邪肆虐。威罰有序。干戈不戢。以慮氣志休懿。武略夙昭。必能爲國佐定大業。故授以上將之位。加以殊特之榮。寵以兵馬之勢。委以偏方之任。外欲威振敵虜。厭難萬里。內欲鎮撫遠近。慰恤將士。誠慮建功立業。竭命之秋也。慮其內修文德。外經武訓。持盈若沖。則滿而不溢。敬慎乃心。無忝所受。慮以皇子之尊。富於春秋。遠近嫌其不能留意。及至臨事。遵奉法度。敬納師友。過於衆望。年二十。嘉禾元年卒。無子。國除。

孫和字子孝。慮弟也。少以母王夫人有寵。見愛。年十四爲置宮衛。使中書令闕澤教以書藝。好學下士。甚

見稱述。亦烏五年立爲太子。時年十九。澤爲太傅。蔣穎、張純、封備、嚴維等皆從容侍從。原注。吳書。張純字元基。敦之子。吳錄

純少厲操行。學博才秀。切問捷對。容止可觀。謹案。陳志。擢爲太子輔義都尉。和有志意。注作智意。善騎射。承師涉學。精識聰敏。尊敬師傅。拜郎中補廣德令。治有異績。

愛好人。物穎等每朝見進賀。和常降意待之。講校經義。綜察是非。及訪諮朝臣。考績行能。以知優劣。各有

條貫。後諸葛豐僞叛。以誘魏將諸葛誕。權潛軍待之。和以權暴露外次。又戰者凶事。常憂勞慚。不復會

同飲宴。數上諫戒令持重。務在全勝。權還然後敢安。是時有司頗條書問事。和以爲姦妄之人。將因事錯

意。以生禍心。不可長也。表宜絕之。又都督劉寶白庶子丁晏。晏亦白寶。和謂晏曰。文武在事。當能幾人。因

隳構薄。圖相危害。豈有福哉。遂兩釋之。使之從厚。常言當世士人。宜講修術學。校習射御。以周世務。而但京游博奕。以妨事業。非進取之謂。後羣寮侍宴。言及博奕。以爲妨事費日。而無益於用。勞精損思。而終無所成。非所以進德修業。積累功緒者也。且志士惜日愛力。君子慕其大者。高山景行。恥非其次。夫以天地長久。而人居其間。有白駒過隙之喻。年齒已暮。榮華不再。凡所患者。在于人情所不能絕。誠能絕無益之欲。以奉德義之塗。棄不急之務。以修功業之基。其於名行。豈不善哉。夫人情猶不能無嬉娛。嬉娛之好。亦在於飲宴琴書射御之間。何必博奕然後爲歡。乃命侍坐者八人。各著論以矯之。於是中庶子韋曜退而論奏。和以示賓客。時蔡穎好弈。直事在署者頗效焉。故以此諷之。其後王夫人與全公主有隙。謹案。今志作其後王夫人與全公主隙。宋本多有字。與此合。權嘗寢疾。和祠祭於廟。和妃叔父張休居近廟。邀和過所居。全公主使人覘視。因言太子不在廟中。專就妃家計議。又言王夫人見上寢疾有喜色。權由是發怒。夫人憂死。而和寵稍損。懼於廢黜。而魯王霸覬覦滋甚。陸遜。吾粲。顧譚等數陳適庶之義。理不可奪。全寄楊竺爲魯王霸支黨。譖愬日興。粲遂下獄誅。譚徙交州。初權既立。和爲太子。而封霸爲魯王。初拜猶同宮室。禮秩未分。羣公之議。以爲太子國王。上下有序。禮秩宜異。於是分宮別寮。而隙端開矣。自侍御賓客。造爲二端。仇黨疑貳。滋延大臣。丞相陸遜。大將軍諸葛恪。太常顧譚。驃騎將軍朱據。會稽太守滕允。大都督施績。尚書丁密等奉禮而行。宗事太子。驃騎將軍步騭。鎮南將軍呂岱。大司馬全琮。左將軍呂據。中書令孫宏等附魯王。中外官僚。將軍

大臣舉國中分權患之謂侍中孫峻曰子弟不睦臣下分部將有袁氏之敗為天下笑一人立者安得不

亂於是有改嗣之規沈吟者歷年至是遂幽和原注。裴松之曰。袁紹劉表。謂尚璿為賢。本有傳後之意。異於孫權既已立和。而復寵璿。坐生亂階。自構家禍。方之袁劉。昏

悖甚矣。步騭以德度著稱。為吳良臣。而阿附于璿。事同楊竺何哉。和既正位。適庶分定。就使才德不殊。猶將義不黨

庶。况霸實無聞。而和為令嗣乎。夫邪辟之人。豈其舉體無善。但一為不善。衆美皆亡爾。隲果有此事。則其餘不足觀

矣。呂岱全察之徒。蓋所不足論爾。驃騎將軍朱據尚書僕射屈晃率諸將吏泥頭自縛連日詣闕請和權登白爵觀見甚

惡之勅據晃等無事忽忽權欲廢和立亮無難督陳正五營督陳象上書稱引晉獻公殺申生立奚齊晉

國擾亂據晃又固諫不止晃曰太子仁明顯聞四海今三方鼎峙不宜搖動以生衆心願陛下少垂聖慮

老臣雖死猶生之年叩頭流血辭氣不撓權大怒族誅正象牽據晃等入殿杖一百原注。吳歷。孫皓即位。詔曰。故僕射屈晃。

志匡社稷。忠諫忘身。封晃子緒為東陽亭侯。弟立幹恭為義都尉。緒後亦至尚書僕射。晃汝南人。見胡沖答問。張純亦盡言極諫權幽之遂棄市竟徙和於故鄣羣

司坐諫誅放者十數衆咸寃之太元二年正月封和為南陽王遣之長沙行過蕪湖有鵲巢於帆檣故官

寮聞之皆憂慘以為橋末傾危非久安之象或言鵲巢之詩有積行累功以致爵位之言今王至德茂行

復受國土倘神靈以此告寤人意乎及權寢疾意頗感悟欲徵和還立之全公主及孫峻孫宏等固爭乃

止夏四月權卒諸葛恪秉政恪即和妃張之舅也妃使黃門陳遷之建業上疏中宮并致問於恪臨去恪

謂遷曰為我達妃期當使勝他人此言頗泄又恪有徙都意使治武昌宮民間或言欲迎和及恪被誅孫

峻奪和璽綬徙新都又遣使者賜死和與妃張辭別張曰吉凶當相隨終不獨生亦自殺舉邦傷焉孫休

立封和子皓爲烏程侯。自新都之本國休卒皓立。其年追諡和曰文皇帝。改葬明陵。置園邑二百家。令承奉守。後年正月。又分吳郡丹陽九縣爲吳興郡。治烏程。置太守。四時奉祠。有司奏言宜立廟京邑。寶鼎二年七月。使守大匠薛翊營立寢堂。號曰清廟。十二月遣守丞相孟仁、太常姚信等備官寮中軍步騎二千人以靈輿法駕東迎神於明陵。皓引見仁。親拜送於庭。比仁還。中使手詔日夜案志注作曰使。誤。相繼。奉問神靈起居。巫言見和被服顏色如平生。皓悲喜涕泣。悉詔公卿尙書詣闕下受賜。靈輿當至。使丞相陸凱奉三牲祭於近郊。皓於金城外露宿。明日望拜於東門之外。翌日拜廟薦祭。歔歔悲感。比七日三祭。倡妓晝夜娛樂。有司奏言祭不欲數。數則黷。宜以禮斷情。然後止。和四子皓、德、謙、俊。孫休立。封德錢唐侯。謙永安侯。俊拜騎都尉。皓在武昌。永安山賊施但。因民之不堪命。聚衆數千人。劫謙出烏程。取孫和陵。上鼓吹曲蓋。比至建業。衆萬餘人。未至三十里。住。擇吉日遣使以謙命詔丁固。諸葛靚。固靚斬其使。但遂到九里。固靚逆擊於牛屯。大破之。但兵裸身無鎧甲。臨陣皆披散。謙獨坐車中。遂生獲之。固不敢殺。以狀白皓。皓并其母子並皆阼殺之。俊張承外孫。聰辯明惠。爲遠近所稱。皓又殺之。

孫霸字子威。和同母弟也。謹案。吳志孫權王夫人生霸。此傳未云。削基壹爵土。與祖母謝姬俱徙烏傷。則霸出自謝明矣。同母二字疑衍。和爲太子。霸爲魯王。寵愛崇特。與和無殊。頃之。和霸睽閱。權聞之。禁斷往來。假以精學督軍使者羊衝上疏曰。臣聞古之有天下者。皆先顯別適庶。封建子弟。所以尊重祖宗。爲國藩表也。二宮拜授。海內稱宜。斯乃大吳興隆之基。頃聞二宮

並絕賓客。遠近悚然。大小失望。竊從下風。聽採衆論。咸謂二宮智達英茂。自正名建號。於今三年。德行內著。美稱外昭。西北二隅。久所伏聞。謂陛下當副順遐邇。所以歸德勤命。二宮賓延四遠。使異國聞聲。思爲臣妾。今既未垂意於此。而發明詔省。奪備衛。抑絕賓客。使四方禮敬不得復通。雖實陛下敦尚古義。欲令二宮專志於學。不復顧慮。觀聽小宜。期於溫故博物而已。然非臣下傾企喁喁之至願也。或謂二宮不遵典式。此臣所以寢息不寧。就如所嫌。猶宜補察。密加斟酌。不使遠近得容異言。臣懼積疑成謗。久將宣流而西北二隅。去國不遠。異同之語。易以聞達。聞達之日。聲論當興。將謂二宮有不順之愆。不審陛下何以解之。若無以解異國。則亦無以釋境內。境內守疑。異國興謗。非所以育巍巍鎮社稷也。願陛下早發優詔。使二宮周旋禮命如初。則天清地晏。萬國幸甚矣。時全寄吳安孫奇楊竺等陰共附霸。圖危太子。譖毀既行。太子以敗。霸亦賜死。流竺屍於江。兄穆以數諫戒竺。得免大辟。猶徙南州。霸賜死後。又誅寄安奇等。咸以黨霸構和故也。霸二子基。壹。五鳳中。封基爲吳侯。壹宛陵侯。基侍孫亮在內。太平二年。盜乘御馬。收付獄。亮問侍中刁元曰。盜乘御馬罪云何。元對曰。科應死。然魯王早終。惟陛下哀原之。亮曰。法者天下所共。何得阿以親故邪。謹案。陳志阿以親下重親一字。當思惟可以釋此者。奈何以情相迫也。元曰。舊赦有大小。或天下亦有千里五百里。赦隨意所及。亮曰。解人不當爾邪。乃赦宮中。基以得免。孫皓立。追和霸舊隙。削基壹爵土。與祖母謝姬俱徙會稽烏傷縣。

孫奮字子揚，霸弟也。母曰仲姬。太元二年立爲齊王。居武昌，權卒。太傅諸葛恪不欲諸王處江濱，兵馬之地，徙奮於豫章。奮怒，不從命。又數越法度，恪上箋諫曰：「帝王之尊，與天同位，是以家天下，臣父兄，四海之內，皆爲臣妾。仇讎有善，不得不舉；親戚有惡，不得不誅。所以承天理物，先國後身，皆聖人立制。百代不易之道也。昔漢初興，多王子弟，至於太彊，輒爲不軌。上則幾危社稷，下者骨肉相殘。其後懲戒，以爲大諱。自光武以來，諸王有制，惟得自娛于宮內，不得臨民，干與政事。其與交通，皆有重禁。遂以全安，各保福祚。此則前世得失之驗也。近袁紹劉表，各有國土，土地非狹，人衆非弱，以適庶不分，遂滅其宗祀。此乃天下愚智所共嗟痛。大行皇帝覽古戒今，防芽遏萌，慮于千載，是以寢疾之日，分遣諸王，各早就國，詔策殷勤，科禁嚴峻，其所戒敕，無所不至。誠欲上安宗廟，下全諸王，使百世相承，無凶國害家之悔也。大王宜上惟太伯順父之志，中念河間獻王、東海王彊。」原注：漢書河間獻王德好古，實事求是，被服儒術，造次必于儒者。立二十六年薨。中尉常麗以聞。曰：「王身端行治，溫仁恭儉，篤敬愛下，明知深察，惠于鯨寡。」大行令奏諡法曰：「聰明審知曰獻。」宜諡曰獻。」後漢書：東海恭王彊，建武二年立。母郭氏爲后。明知爲皇太子。十七年而郭后廢。彊當感不自安。敕因左右及諸王陳其懇誠，願備藩國。光武不忍，遲回勸歲，乃許焉。十九年封爲東海王。」恭敬之節，下當存抑驕恣，荒亂以爲警戒，而開頃至武昌以來，多違詔敕，不拘制度，擅發諸將兵，治護宮室，又左右常從有罪過者，當以表聞，公付有司，而擅私殺，事不明白。大司馬呂岱親受先帝詔敕，輔導大王，旣不承用其言，令懷憂怖，華錡先帝近臣，忠良正直，其所陳道，當納用之，而聞怒錡有收縛之語，又中書楊融親受詔敕，所當恭肅，云正自不聽，禁當如我何。開此之日，大小驚怪，莫不寒心。里語曰：

明鏡所以照形。古事所以知今。大王宜深以魯王爲戒。改易其行。戰戰兢兢。盡敬朝廷。如此則無求不得。若棄忘先帝法教。懷輕慢之心。臣下寧負大王。不敢負先帝遺詔。寧爲大王所怨疾。豈敢忘尊主之威。而令詔敕不行於藩臣邪。此古今正義。大王所照知也。夫福來有由。禍來有漸。漸生不憂。將不可悔。向使魯王早納忠直之言。懷警懼之慮。享祚無窮。豈有滅亡之禍哉。夫良藥苦口。惟疾者能甘之。忠言逆耳。惟達者能受之。今者恪等悽悽欲爲大王除危殆於萌芽。廣福慶之基原。是以不自知言至。願蒙三思。奮得賤懼。遂移南昌。游獵彌甚。官屬不堪命。及恪誅奮。下住蕪湖。欲至建業。觀變。傅相謝慈等諫奮。奮殺之。原注松之曰。慈字孝宗。彭城人。見禮論譔喪服圖及變除行於世。坐廢爲庶人。徙章安縣。太平三年。亮詔曰。齊王奮前坐殺吏。廢爲庶人。累有赦令。獨不見原。縱未宜復王。何以不侯。又諸孫兄弟作將。列在江渚。吾有兄獨爾云何。有司奏可就拜爲侯。封爲章安侯。建衡二年。孫皓左夫人張氏卒。皓哀念過甚。朝夕哭臨。數月不出。由是民間或謂皓死。訛言奮與上虞侯奉當有者立。奮母仲姬墓在豫章。豫章太守張俊疑其或然。掃除墳塋。皓聞之。車裂俊。夷三族。誅奮及其五子。謹案。五子。陳志作三子。誤。考孫皓傳云。誅奮及其五子。通志亦作五子。與此合。國除。原注。江表傳。豫章吏十人乞代俊死。皓不聽。使男女不得通婚。或年三十四不得嫁娶。奮上表乞自比禽獸。使男女自相配耦。皓大怒。遣察戰齋藥賜奮。奮不受。藥。叩頭千下曰。老臣自將兒子治生求活。無豫國事。乞丐餘年。皓不聽。父子皆飲藥死。裴松之曰。按建衡二年至奮之死。孫皓即位尚猶未久。若奮未被疑之前。兒女年二十左右。至奮死時不得年三十四也。若先已長大。自失時未婚娶。則不由皓之禁錮矣。此雖欲增皓之惡。然非實理。陳壽評曰。孫登居心所存。足爲茂美之德。慮和並有好善之姿。親自砥礪。或短命早終。或不得其死。哀哉。霸以庶干適。奮不遵軌度。固取危亡之道也。然奮之誅夷。橫遇飛禍矣。

議曰。登慮恭肅順善。賢允嗣也。不幸而短折遘凶。和以次爲樹子。孝敬明敏。足以主鬯。失愛見黜。非其罪也。霸奮不軌。自取危亡。權六子。四子不得其死。至皓以庶嫡長孫。翦殘支庶。殆盡。豈其忌刻。果於殺戮。而氣焰有以取之。或者天惡其僭。故奪去而祝之耶。裴松之謂吳之傾國。自由暴皓。若權不廢。和皓爲世嫡。終至滅亡。則其喪國不在廢黜。夫禮國之大閑。存亡之所繫也。立嫡以長。乃爲義嗣。權以和霸黨與。讒慝宏多。不顧禮律。而並廢黜。終於立幼。以紊國本。則其喪敗。職此之由。以皓之暴。而謂和宜廢。難與語禮矣。贊曰。稱王建嫡。青宮多賢。一殞兩廢。統絕本顛。豈意孫宗。竟如袁氏。肉薄骨并。大亂三世。

續後漢書卷第五十三

列傳第五十

諸孫

孫靜子瑜 孫奕孫奕 孫豐孫豐 孫梁孫梁

孫賁子鄴 鄴子震 曾孫孫惠 策族兄香

孫輔 孫翊子松

孫匡子泰 孫秀

孫韶兄楷

孫

桓

孫靜字幼臺。堅季弟也。堅始舉事。靜糾合鄉曲及宗族五六百人以為保障。眾咸附焉。策破劉繇。定諸縣。進攻會稽。遣人請靜。靜將家屬與策會於錢唐。時太守王朗拒策於固陵。策數度水戰不能克。靜說策曰。朗負阻城守。難可卒拔。原注。祖加反。濱南去此數十里。而道之要徑也。宜從彼據其內。所謂攻其無備。出其不意者也。吾當自帥眾為軍前隊。破之必矣。策曰。善。乃詐令軍中曰。頃連雨水濁。兵飲之多腹痛。令促具饘。餉數百口。澄水至。昏暮。羅以然火誑朗。謹案。今志作四維然火。宋本作羅以然火。與此合。通志亦作羅。便分軍夜投查濱道。襲高遷屯。朗大驚。遣故丹陽太守周昕等帥兵前戰。策破昕等。斬之。遂定會稽。原注。會稽典錄。昕字大明。少游京師。推災異。辟太尉府。舉高第。稍遷丹陽太守。曹公起義兵。昕前後遣兵萬餘人助公征伐。袁術之在淮南也。昕惡其淫虐。絕不與通。獻帝春秋。袁術遣吳景攻昕。未拔。景乃募百姓敢從周昕者。死不赦。昕曰。我則不德。百姓何罪。遂散兵還本。表拜靜為奮武校尉。欲授之重任。靜戀墳墓宗族。不樂出身。謹案。陳志作不樂出仕。通志作出身。與此合。求留鎮守。策從

之權統事。就遷昭義中郎將。終於家。五子暲、瑜、皎、免、謙、暲三子綽、超、恭。超爲偏將軍。恭生峻。綽生琳。峻琳

有傳。

謹案。此下
關子瑜皎。

免字季明。兄皎既卒。代統其衆。以揚武中郎將領江夏太守。在事一年。遵皎舊迹。禮劉靖。

李允、吳碩、張梁及江夏閻舉等。並納其善。免訥於造次。而敏於當官。軍民稱之。黃武五年。權攻石陽。免以

地主使所部將軍鮮于丹帥五千人先斷淮道。自帥吳碩、張梁五千人爲軍前鋒。降高城。得三將。大軍引

還。權詔使在前住。駕過其軍。見免軍陳整齊。權曰。初吾憂其遲鈍。今治軍諸將少能及者。吾無憂矣。拜揚

威將軍。封沙羨侯。吳碩、張梁皆裨將軍。賜爵關內侯。免亦愛樂儒生。復命部曲子弟就業。後登朝。列者數

十人。年四十。嘉禾三年卒。子承嗣。以昭武中郎將代統兵領郡。赤烏六年卒。無子。封承庶弟壹。奉免後。

孫霸子亦名壹。疑免
子不當與大帝孫同名。孫峻之誅諸葛恪也。壹與全熙、施績、攻恪弟公安督融。融自殺。壹從鎮南遷鎮軍。假

節督夏口。及孫綝誅滕允。呂據據允皆壹之妹夫也。壹弟封。又知允據謀。自殺。琳遣朱異潛襲壹。異至武

昌。壹知其攻已。率部曲千餘口及允妻奔魏。魏以壹爲車騎將軍。儀同三司。封吳侯。以故主曹芳貴人邢

氏妻之。邢美色妒忌。下不堪命。遂共殺壹及邢氏。

謹案。陳志此下有壹入魏。黃初三年死八字。考曹髦傳。壹以
甘露二年封吳侯。四年爲婢所殺。不得云黃初三年也。故郝書

削去不張梁有算略。孫權尤賞拔。初權在武昌。欲還都建業。慮水道汭流二千里。一旦有警。不相赴。及至

夏口。於塢中大會百僚議之。權曰。諸將吏勿拘位任。各言計策。諸將或言宜立柵柵夏口。謹案。陳志
無下柵字。或言

宜重設鐵鎖者。權皆以爲非。時梁爲小將。越席而進。曰。臣聞香餌引泉魚。重幣購勇士。今宜明樹賞罰。遣

將入河與敵爭利。形勢旣成，彼不敢干也。使武昌有精兵萬人，付智略者常使嚴整。一旦有警，應聲相赴。作甘水城，輕艦數千，諸所宜用，皆使備具。如此開門延敵，敵自不來矣。權以梁計爲得，卽超增梁位，累遷至河中督卒。

孫賁字伯陽，父羌字聖臺。

謹案：聖臺陳志作聖壹。考孫堅字文臺。弟靜字幼臺。賁爲堅兄。則此作聖臺者爲是。

弟

堅同產兄也。賁早失二親，弟輔方孩，賁

自贍育。友愛甚篤，爲郡督郵守長。堅於長沙舉義兵，賁去吏從征伐。堅卒，賁攝帥餘衆，扶送靈柩。後袁術徙壽春，賁又依之。術從兄紹用會稽周昂爲九江太守，紹與術不協，術遣賁攻破昂於陰陵，表賁領豫州刺史，轉丹陽都尉，行征虜將軍，討平山越。爲揚州刺史，劉繇所迫逐，因將士衆還住歷陽。頃之，術復使賁與吳景共擊樊能、張英等，未能拔。及策東渡，助賁景破英能等，遂進擊劉繇。繇走豫章，策遣賁景還壽春報術。值術僭號，署置百官，除賁九江太守，賁不就。棄妻孥還江南。時策已平吳會二郡，賁與策征廬江太守劉勳。江夏太守黃祖軍旋聞繇病死，過定豫章。上賁領太守。時丹陽僮芝自署廬陵太守，策留賁弟輔領兵住南昌。謂賁曰：「兄今據豫章，是扼僮芝咽喉而守其門戶也。但當伺其形使，因令國儀杖兵而進，使公瑾爲作勢援，一舉可定也。」賁聞芝病，卽如策計。周瑜到巴丘，輔遂得進據廬陵。後封賁都亭侯。建安十三年，使者劉隱奉詔拜賁爲征虜將軍，領郡如故。在官十一年卒。子鄰嗣。鄰字公達，性靜敏，幼有令譽。年九歲，代領豫章，進封都鄉侯。在郡垂二十年，討平叛賊，政績修理，召還武昌，爲繞帳督。時太常潘濬掌荆

州事重安長陳留舒變有罪下獄。濬嘗失變欲置之法。論者多爲言之。謹案。今志作多有爲言。監本作多爲有言。此作多爲言之。較明晰。濬

猶不釋。鄰謂濬曰。舒伯膺兄弟爭死。海內義之。以爲美談。仲膺又有奉國舊意。今君殺其子弟。若天下一

統。青蓋北巡。中州士人必問仲膺繼嗣。答者云。潘承明殺之。於事何如。濬意卽解。變用得免。仲膺名劭。初

伯膺親友爲人所殺。仲膺爲報怨。事覺。兄弟爭死。皆得免。故云。鄰遷夏口。河中督威遠將軍。所居任職。亦

烏十二年卒。子苗嗣。苗弟旅及叔父安。熙績皆歷列位。子述爲武昌督。平荊州事。震無難督。諸城門校尉。

歆。樂鄉督。震後禦晉軍。與張悌俱死。策族兄香。字文陽。父儒。字仲孺。堅再從弟也。香從堅征伐有功。拜郎

中。與賁及吳景皆爲袁術所用。香爲汝南太守。景爲廣陵太守。而賁爲將軍。領兵在壽春。策與香等書曰。

今征江東。未知二三君意何如。爾景卽棄守歸賁。困而後免。謹案。注志作因而獲免。監本作因而後免。獨香以道遠不得還。術

僭號。加征南將軍。卒于壽春。

謹案。目錄此下有孫輔傳。今闕。

孫翊字叔弼。權弟也。一名儼。驍悍果烈。有兄策風。太守朱治舉孝廉。司空辟。策臨卒。張昭等謂策當以兵

屬翊。而策呼權佩以印綬。建安八年。以偏將軍領丹陽太守。時年二十。後爲左右邊鴻所殺。鴻亦卽誅。子

松爲射聲校尉。都鄉侯。鎮巴丘。數咨陸遜。以得失。嘗有過。遜面責松。松意色不平。遜曰。君過聽。不以其鄙。

數見訪及。謹案。其鄙。與監本合。今志注作某鄙。是以承意進言。輒變色。何也。松曰。屬亦自忿。行事有此。豈有望邪。黃龍二年。

卒。漢丞相亮與兄瑾書曰：「既受東朝厚遇，依依于子弟，又子喬良器，爲之惻愴，見其所與亮器物，感用流涕，其悼松如此。」由亮養子喬咨述故云。

孫匡字季佐，翊弟也。舉孝廉茂才，未試用卒。時年二十餘。

原注：江表傳：曹休出洞口，呂範率軍禦之。時匡爲定武中郎將，遣範令放火燒損茅芒以乏軍用。範即啓匡爲定武中郎將，既爲定武，非爲未試用。且孫堅以初平二年卒，洞口之役在黃初三年。堅卒至此合三十一年。匡時若

送匡還吳。權別其族爲丁氏。禁錮終身。裴松之曰：案本傳曰：匡未試用卒。時年二十餘。而江表傳云：呂範在洞口，匡爲定武中郎將。既爲定武，非爲未試用。且孫堅以初平二年卒。洞口之役在黃初三年。堅卒至此合三十一年。匡時若尚在。本傳不得云卒時年二十餘也。此蓋權別生弟朗。江表傳誤以爲匡也。朗之名位見三朝錄及虞喜志林也。

子泰，曹氏之甥也。爲長水校尉。嘉禾三年，從權圍新城。

中流矢死。泰子秀爲前將軍，夏口督。秀公室至親，提兵在外。謹案：今志作掘兵在外。監本傳：皓意不能平，建衡二年，皓遣何定將五千人至夏口獵。先是民間僉言秀當見圖，而定遠獵，遂驚夜將妻子親兵數百人奔晉。

晉以秀爲驃騎將軍，儀同三司，封會稽公。皓大怒，遣改秀姓曰厲。秀在晉朝，初聞皓降，羣臣畢賀。秀稱疾不與。南向流涕曰：「昔討逆弱冠，以一校尉創業。今後主舉江南而棄之，宗廟山陵於此爲墟，悠悠蒼天，此何人哉！」吳既平，降爲伏波將軍，開府如故。永寧中卒。追贈驃騎開府，子儉字仲節，給事中。

謹案：目錄此下有孫韶孫桓傳，今闕。

議曰：雲雷構屯，龍蛇起陸，乘運契會，族大而智且勇者勝，優者天飛而爲主，其次叶比攀附而爲侯，爲王各著功烈，享富貴。故孫氏之有江東，自父兄弟外，而諸孫之雄若是焉。足與魏夏侯曹氏抗衡而立國矣。

贊曰鳳翥斗區龍起江臬附翼攀鱗撐挺涵濤勇能將領才堪器使維城增峻玉壁金址

（以下為大量模糊不清的正文內容，包含多個小字註釋）

續後漢書卷第五十四

列傳第五十一

吳臣

張昭子承 張紘子元

張昭字子布彭城人也。少好學。善隸書。從白侯子安受左氏春秋傳。博覽衆書。與瑯琊趙昱東海王朗友善。俱有名。時舉孝廉不就。時汝南主簿應劭議宜爲舊君諱。論者互有異同。昭著論曰。客有見大國之議。士君子之論云。起元建武以來。舊君名諱五十六人。以爲後生不得協也。取乎經論。譬議行事。義高辭麗。甚可羨嘉。愚意褊淺。竊有疑焉。蓋乾坤剖分。萬物定形。肇有父子君臣之經。故聖人順天之性。制禮尙敬。在三之義。君實食之。在喪之哀。君親臨之。厚莫重焉。恩莫大焉。誠臣子所尊仰。萬夫所大特。謹案。志注作天特。焉得而同之哉。然親親有衰。尊尊有殺。故禮服上不盡高祖。下不盡元孫。又傳記四世而總麻。服之窮也。五世袒免。降殺同姓也。六世而親屬竭矣。原注。鄭元注。四世共高祖。五世高祖昆弟。六世以外。親盡無屬名。又曲禮有不逮事之義。則不諱。原注。曲禮。逮事父母。則諱王父。母。不逮事父母。則不諱王父母。不諱者。蓋名之謂。屬絕之義。不拘於協。況乃古君五十六哉。邾子會盟。季友來歸。不稱其名。咸書字者。是魯人嘉之也。原注案。春秋初。邾儀父稱字。其後從齊桓公會盟始稱爵曰子。孔子嘉季友故特書字。皆非魯人嘉之也。何解。臣子爲

君父諱乎。周穆王諱滿。定王時有王孫滿者。其爲大夫。是臣協君也。又厲王諱胡。及莊王之子名胡。其比衆多。夫類事建議。經有明據。傳有徵案。然後進攻退守。萬無奔北。垂示百世。永無咎失。今應劭雖上尊舊君之名。而下無所斷。齊猶歸之疑。云曲禮之篇。疑事無質。觀省上下。闕義自證。文辭可爲。倡而不法。將來何觀。言聲一放。猶拾濟也。過辭在前。悔其可追。州里材士。陳琳等皆稱善之。刺史陶謙舉茂才。不應。謙以爲輕。已遂見拘執。昱等傾身營救。得免。漢末大亂。徐方士民多避難揚土。昭遂南渡江。孫策定江東。以昭爲長史。撫軍中郎將。升堂拜母。待以師友之禮。文武之事。一以委之。昭每得北方士大夫書疏。專歸美於昭。昭欲嘿而不宣。則懼有私宣之則。恐非宜。進退不安。策聞之。笑曰。昔管子相齊。一則仲父。二則仲父。而桓公爲霸者宗。今子布賢我能用之。其功名獨不在我乎。策臨亡。以弟權託昭曰。若仲謀不任事者。君便自取之。正復不克捷。緩步西歸。亦無所慮。昭遂率羣僚立權。權悲感未視事。昭謂權曰。夫爲人後者。貴能負荷先軌。克昌堂構。以成勛業也。且周公立法。而伯禽不師。非欲違父。時不得行也。原注。裴松之曰。按禮年之喪。金革之事無避也者。禮與。初有司與孔子曰。吾聞諸老聃曰。昔者魯公伯禽有爲爲之也。鄭元注曰。周人卒哭而致事。時有徐戎作難。伯禽卒哭而征之。急王事也。昭所云伯禽不師。蓋謂此也。况今天下鼎沸。姦宄競逐。豺狼滿道。乃欲哀親戚。顧禮制。是猶開門而揖盜。未可以爲仁也。乃改易權服。扶令上馬。使出巡軍。昭率僚屬上表朝廷。下移屬郡。中外將校。各令奉職。然後衆心知有所歸。昭復爲權長史。時天下分裂。在所擅命。策洩事日淺。恩澤未洽。一旦傾隕。士民狼狽。頗有異同。昭輔權綏撫百姓。知有生賴。諸侯

賓旅寄寓之士。得用自安。權每出征。畱昭鎮守。領幕府事。黃巾賊復起。昭討平之。權出合肥。命昭別討匡

奇。原注。吳書作琦。按權遣兵圍陳登於匡奇。別無匡琦也。

又督諸將攻破豫章賊帥周鳳等於南城。自是希復將領。謹案。將領與監本陳志合。今志作將帥。

常在左右爲謀畫。進退將吏。賞罰功罪。禮遇甚重。曹操取荊州。順流東下。昭勸權迎操。權不從。遂破操於

赤壁。昭欲權終事漢。非附操也。昭烈表權行車騎將軍。昭爲軍師。權每田獵。常乘馬射虎。虎突前。攀持馬

鞍。昭變色而前曰。將軍何有當爾。夫爲人君者。謂能駕馭英雄。驅策羣賢。豈謂馳逐於原野。校勇於猛獸

乎。有如蹉跌。奈天下笑何。權謝昭曰。年少慮事不遠。以此慙君。然猶不能已。乃作射虎車。爲方目。間不置

蓋。一人爲御。自於中射之。時有逸羣之獸。輒復犯車。而權每手擊以爲樂。昭雖諫諍。常笑而不答。章武元

年。魏遣使者邢貞拜權爲吳王。貞入門不下車。昭謂貞曰。夫禮無不敬。故法無不行。而君敢自尊大。豈以

江南寡弱。無方寸之刃。故乎。貞卽遽下車。拜昭綏遠將軍。封由拳侯。昭與孫紹、滕允、鄭禮等

謹案。陳志孫構傳紹作邵。

禮作

采。周漢典禮。譏定朝儀。權於武昌臨釣臺飲酒大醉。使人以水灑羣臣曰。今日酣飲。惟醉墮臺中。乃

當止爾。昭正色不言。出外車中坐。權遣人呼昭還。謂曰。爲共作樂爾。公何爲怒乎。昭對曰。昔紂爲糟丘酒

池。長夜之飲。當時亦以爲樂。不以爲惡也。權默然。有慙色。遂罷酒。初。權當置丞相。衆議歸昭。權曰。方今多

事。職統者責重。非所以優之也。後孫邵卒。百寮復舉昭。權曰。孤豈爲子布有愛乎。領丞相事煩。謹案。通鑑作顧丞相事。

願。而此公性剛。所言不從。怨答將興。非所以益之也。乃用顧雍。權稱尊號。大會百僚。歸功周瑜。昭舉笏

欲褒贊功德。未及言權曰。如張公計。今已乞食矣。昭大慙。伏地流汗。昭忠饗亮直。有大臣節。權雖推重。所

以終不相昭者。蓋以昔駁周瑜魯肅等議爲非也。原注。裴松之曰。張昭勸迎曹公。所存豈不遠乎。夫其揚休正

輔。是以盡誠匡弼。以成其業。上藩漢室。下保民物。鼎峙之計。本非其志也。曹公仗順而起。功以義立。冀以清一諸

華。拓平荆郢。大定之機。在于此會。若使昭議獲從。則六合爲一。豈有兵連禍結。遂爲戰國之弊哉。雖無功于孫氏。一

大當于天下矣。昔竇融歸漢。與國升降。張魯降魏。賞延于世。況權舉全

吳。望風順服。寵靈之厚。其可測量哉。然則昭爲人謀。豈不忠且正乎。於是昭以老病上還官位及所統領更

拜輔吳將軍班亞三司。改封婁侯。食邑萬戶。在里宅無事。乃著春秋左氏傳解及論語注。權嘗問衛尉嚴

峻寧念小時所誦書不。峻因誦孝經仲尼居。昭曰。嚴峻鄙生。臣請爲陛下誦之。乃誦君子之事上。咸以昭

爲知所重。昭每朝見。辭氣壯厲。義形於色。嘗以直言逆旨。中不進見。後漢使來稱漢德美。而羣臣莫能拒

權歎曰。使張公在坐。彼不折則廢。安復自誇乎。明日遣中使勞問。因請見昭。昭避席謝。權跪止之。昭坐定。

仰曰。昔太后桓王不以老臣屬陛下。而以陛下屬老臣。是以思盡臣節。以報厚恩。使泯沒之後。有可稱述。

而意慮淺短。違逆盛旨。自分幽淪。長棄溝壑。不圖復蒙引見。得奉帷幄。然臣愚心所以事國。志在忠益。畢

命而已。若乃變心易慮。以偷榮取容。臣所不能也。權辭謝焉。權以公孫淵稱藩。遣張彌許晏往遼東拜淵

爲燕王。昭諫曰。淵背魏懼討。遠來求援。非本志也。若淵改圖。欲自明於魏。兩使不反。不亦取笑於天下乎。

權與相反覆。昭意彌切。權不能堪。按刀而怒曰。吳國士人入宮則拜朕。出宮則拜君。朕之敬君亦爲至矣。而數於衆中折朕。朕嘗恐失計。昭熟視權曰。臣雖知言不用。每竭愚忠者。誠以太后臨崩呼老臣於牀下。

遺詔顧命之言故在耳。因泣涕橫流。權擲刀於地。與昭對泣。然卒遣彌晏往。昭忿言之不用。稱疾不朝。權恨之。土塞其門。昭又於內以土封之。淵果殺彌晏。權數慰謝昭。昭固不起。權因出過其門。呼昭。昭辭疾篤。

權燒其門。欲以恐之。昭更閉戶。權使滅火。住門良久。昭諸子共扶昭起。權載以還宮。深自克責。昭不得已。

然後朝會。原注。習鑿齒曰。張昭於是乎不臣矣。夫人臣者三諫不從。則奉身而退。身苟不絕。何忿懣之有。且秦穆遣

之非而求昭。後益迴慮降心。不遠而復。是其善也。昭爲人臣。不度權德。匡其後失。夙夜匪懈。以延來譽。乃迫忿不用。歸罪於君。閉戶拒命。坐待焚滅。豈不悖哉。昭志存漢室。權之僭號。皆所不與。身受付託。不用其言。逞其狂

悖。投萬衆於海孺。則權固無面目以見昭。與權君臣之義已絕矣。習氏乃責昭以不臣。過矣。謹案 年八十一。嘉禾

五年卒。遺令幅巾素棺。斂以時服。權素服臨弔。諡曰文侯。昭容貌矜嚴。有威風。權常曰。朕與張公言。不敢

妄也。舉國憚之。稱爲仲父。其文辭蘊藉典雅。中州人士甚推重之。劉表嘗自作書。欲與孫策。以示禰衡。衡

蚩之曰。如是欲使孫策帳下兒讀之邪。將使張子布見之乎。衡負材蔑物。獨稱昭若此。原注。典略。如正平

。雖然猶自蘊藉典雅。不可謂之無筆述也。加聞吳中稱謂之仲父。如此其人。信一時之良幹。恨其不於嵩岳等資。而乃播殖於會稽。初昭佐策及權。欲平定江淮。以輔漢室。卒之

三方鼎裂。委質偏霸。非其志也。故常迂權。竟不嘗國忠直之氣。老而益篤焉。謹案。昭之始末。具見陳志本傳。初無輔漢之意。其忤孫權謂之忠

吳則可。謂之志存漢室則非也。鄭書取 長子承已。自封侯。少子休襲爵。承字仲嗣。少以才學知名。與諸葛瑾

裴松之一時之論。竄入正史。誤矣。

步隲。嚴峻相友善。權爲驃騎將軍。辟西曹掾。出爲長沙西部都尉。討平山寇。得精兵萬五千人。後爲濡須

都督。奮威將軍。封都鄉侯。領部曲五千人。承爲人壯毅忠讜。能甄識人物。拔彭城蔡款。南陽謝景於孤微

童幼後並爲國士。款爲衛尉。景至豫章太守。

原注。吳錄。款字文德。歷位內外。以清貞顯於當世。後以衛尉領中書令。封留侯。二子條。機。條。孫皓時位至尚書令。太子少傅。

機爲臨川太守。謝景事在孫登傳。

諸葛恪年少時。衆人奇其英才。承言終敗諸葛氏者。元遜也。勤於長進。篤於物類。凡在

庶幾之流。無不在門。年六十七。赤烏七年卒。諡曰定侯。子震嗣。初承喪妻。昭欲爲索諸葛瑾女。承以相與

有好難之權。聞而勸焉。遂爲婚。

原注。裴松之曰。按承與諸葛瑾同以赤烏中卒。計承年小瑾四歲爾。

生女。權爲子和納之。權數令和修敬於承。

執子培禮。震諸葛恪誅時亦死。昭弟子奮年二十。造攻城大攻車。爲步隲所薦。昭不願曰。汝年尚少。何爲

自委於軍旅乎。奮對曰。昔童汪死難。子奇治阿。

原注。禮記戰於郎。公叔禺人與其鄰童汪歸往皆死焉。魯人欲勿殤童汪歸。問於仲尼。仲尼曰。能執干戈以衛社稷。雖欲勿殤也。

不亦可乎。子奇事見前注。

奮實不才爾。於年不爲少也。遂領兵爲將軍。連有功效。至平州都督樂鄉侯。卒。休有傳。謹案

陳志張休附昭傳後。此別入死虐傳。

張紘字子綱。廣陵人。游學京師。事博士韓宗。治京氏易。歐陽尙書。又於外黃從濮陽闔受韓詩禮記。左氏

春秋。還本郡。舉茂才。大將軍何進。太尉朱儁。司空荀爽。三府辟爲掾。皆不就。孫策在江都時。紘有喪。策數

詣紘。咨以世務。曰。方今漢祚中微。天下擾攘。豪傑各擁衆營私。未有能扶危濟亂者也。先君與袁氏共破

董卓。功業未遂。爲黃祖所害。策雖暗稚。竊有微志。欲從袁揚州。求先君餘兵。就舅氏於丹陽。收合流散。東

據吳會。報讐雪恥。爲朝廷外藩。君以爲何如。紘答曰。紘既素空劣。方居衰經之中。無以奉贊盛略。策曰。君

高名播越。遠近懷歸。今日事計。決之於君。何得不紆慮啓告。俾副高山之望哉。若微志得展。血讐得報。皆

君之助也。因涕泣橫流。紘見策忠壯內發。辭令慷慨。乃曰。昔周道淩夷。齊晉並興。王室以寧。諸侯供職。今君紹先侯之軌。有驍武之名。若投丹陽。收兵吳會。則荆揚可一。讐敵可報。據長江。奮威德。誅除羣穢。匡輔漢室。功業侔於桓文。豈徒外藩而已哉。當與君俱南濟也。策曰。今便行矣。以老母弱弟付君。策既定。江東表紘爲正議校尉。與張昭並參謀議。策常令一人居守。一人從征討。後呂布襲取徐州。自爲州牧。不欲令紘從策。追舉茂才。移書令策遣紘。紘惡布反覆。恥爲之屈。策亦重惜紘。欲以自輔。答記不遣。曰。海產明珠。在所爲寶。楚雖有材。晉實用之。英偉之士。所遊見珍。何必本州哉。從討丹陽。策身臨行陳。紘諫曰。夫主將乃籌謀之所自出。三軍之所繫命也。不宜輕脫。自敵小寇。願麾下重天授之姿。副四海之望。無令國內上下危懼。建安四年。策遣紘奉章至許。曹操留爲侍御史。少府孔融等皆與親善。原注。吳書。紘至。與在朝公三郡。風行草偃。加以忠敬款誠。乃心王室。時曹公爲司空。欲加恩厚以悅遠人。至乃優文褒崇。卿及知舊述策才略絕異。平定號加封。辟紘爲掾。舉高第。補侍御史。後以紘爲九江太守。紘心戀舊恩。思還反命。以疾固辭。改操聞策卒。欲因喪伐吳。紘諫以爲乘人之喪。既非古義。若其不克。成讐棄。好不如因而厚之。操從其言。卽表權爲討虜將軍。領會稽太守。操欲令紘輔權內附。出爲會稽東部都尉。權初統業。春秋鼎盛。太夫人吳氏以方外多難。深懷憂勞。數屬紘以輔助之義。紘思惟補察。每有密計及章表書計與四方交結。常與張昭草創。譟作。紘以破虜有破走董卓。扶持漢室之勳。討逆平定江外。建立大業。宜有紀頌。以彰其美。旣成。呈權。權省讀。悲感曰。君誠識孤家門也。遣紘之部。或以紘本受北任。恐有異志。權不聽。初。瑯琊趙昱爲廣陵太守。察紘孝。

廉昱後爲窄融所殺。紘甚傷憤，而力不能討。昱門戶絕滅，及紘在東部，遣主簿至瑯琊設祭，并求親戚爲之置後。以書屬瑯琊相臧宣，宣以趙宗中五歲男奉昱祀。權通江夏，以東部少事，命紘居守。遙領所職。孔融遣紘書曰：聞大軍西征，足下留鎮，不有居者，誰守社稷？深固折衝，亦大勳也。無乃李廣之氣，倉髮益怒，樂一當單于以盡餘憤乎？原注：漢書。大將軍青出塞，捕虜知單于所居，乃自以精兵走之，而令廣并於右將軍。軍乃徙臣出東道。且臣結髮而與匈奴戰。乃今一得當單于。臣願居前，先死單于。大將軍陰受上指，以爲李廣數奇，毋令當單于，恐不得所欲。是時公孫敖漸失侯，爲中將軍。大將軍亦欲使數與俱當單于，故徙廣。南北並定，世將無事。叔孫投戈絳灌，俎豆亦在今日。但用離析，無緣會面，爲愁歎爾。道直途清，相見豈復難哉？權以紘有鎮守之勞，欲論功加賞。紘厚自揖讓，每從容侍燕，微言密指，常有規諷。初權於羣臣，多呼其字，惟呼張昭曰張公。紘曰：東部云後，權以紘爲長史，從攻合肥，城久不拔。紘曰：古之圍城，開其一面，以疑其心，今圍之甚密，攻之又急，彼并命死戰，固難卒拔。及救未至，可小寬之，以觀其變。議者不同，會救騎數至，圍下挑戰。權率輕騎將往突之。紘諫曰：夫兵者凶器，戰者危事。今麾下恃盛壯之氣，忽強暴之虜，三軍之衆，莫不寒心。雖斬將擐旗，威震敵場，此乃偏將之任，非主將之宜也。願抑賁育之勇，懷霸王之計。權乃止。既還，明年將復出軍。紘又諫曰：自古帝王受命之君，雖有皇靈佐於上，文德播於下，亦賴武功，以昭其勳。然而貴於時動，而後爲威耳。今麾下值四百之厄，有扶危之功，宜且隱息師徒，廣開播殖，任賢使能，務崇寬惠。順天以行誅，可不勞而定也。遂不行。紘建計請都秣陵。曰：秣陵，楚武王所置，名爲金陵，地勢岡阜，連帶石

頭訪問父老云。昔秦始皇東巡會稽。經此望氣者謂金陵地形有王者氣。故掘斷連岡。改名秣陵。今處所
具存。地有其氣。天之所命。宜爲都邑。權善其議。未能從也。後昭烈宿於秣陵。周觀地勢。亦勸權都之。權曰。
智者意同。遂都焉。原注。獻帝春秋。劉備至京。謂孫權曰。吳去此數百里。卽有警急。赴救爲難。將軍無意屯京乎。
秣陵有大小江百餘里。可以安大船。吾方理水軍。當移據之。備曰。燕湖近濡須亦佳也。權曰。
吾欲圖徐州。宜近下也。裴松之曰。秣陵之與燕湖。道里所校無幾。於北侵利便。亦有何異。而云
欲闕徐州。倉秣陵近下。非其理也。諸書皆云。劉備勸都秣陵。而此獨云權自欲都之。又爲虛錯。而云令還吳迎家道
病卒。時年六十。臨困授子靖。賤曰。自古有國家者。咸欲修德政。以比隆盛世。至於其治多不馨香。非無忠
臣賢佐。諳於治體也。由主不勝其情。弗能用爾。夫人情憚難。而趨易。好同而惡異。與治道相反。傳曰。從善
如登。從惡如崩。言善之難也。人君承奕世之基。據自然之勢。操八柄之威。甘易同之歡。原注。周禮太宰職曰。
以八柄詔王。馭羣臣。
一曰爵以馭其貴。二曰祿以馭其富。三曰予以馭其幸。四曰置以馭其行。五曰生以馭其福。六曰奪以馭其貧。七曰廢以馭其罪。八曰誅以馭其過。無假取於人。而忠臣挾難進之術。吐逆
耳之言。其不合也。不亦宜乎。雖則有夔巧辯緣。聞眩於小忠。戀於恩愛。賢愚雜錯。長幼失序。其所由來。情
亂之也。故明君寤寐求賢。如飢渴。受諫而不厭。抑情損欲。以義割恩。上無偏謬之授。下無希冀之望。宜加
三思。含垢藏疾。以成仁覆之大。權省書流涕。紘著詩賦銘誄十餘篇。初紘在吳。見柎榘枕。愛其文采。爲作
賦。陳琳在北。見之。以示人曰。此吾鄉里張子綱所作也。後紘見陳琳作武庫賦。應機論。與琳書深歎美之。
琳答曰。自僕在河北。與天下隔。此間率少於文章。易爲雄伯。故使僕受此過差之談。非其實也。今景興在
此。足下與子布在彼。所謂小巫見大巫。神氣盡矣。紘既好文學。又善楷篆。嘗與孔融書。自書之。融遺紘書

曰前勞手筆多篆書。每舉篇見字。欣然獨笑。如復覩其人也。子元清介有高行。官至南郡太守。尙書。初。紘同郡秦松字文表。陳端字子正。並與紘見待於孫策。參與謀謨。各早卒。元子尙有傳。謹案。陳志。張尙附紘傳後。此別入死唐傳。

議曰。國之將興。必有佐命之臣。以建不拔之基焉。孫氏之有張昭近之矣。昭以碩儒元老。願受遺託。忠鯁彊諫。有不可犯之色。與不可奪之節。汲黯蕭望之之流也。雖以嚴見憚。終于疏外。而耆德峻望。殷勤敵國。

增重江表。足以揭桓王之美。明大帝之盛業也。使諫行言聽。有吳功烈。豈止是哉。其勸權迎操。志存漢室。

以王道爲度。初不事夫偏霸也。此昭之所以爲昭。豈淺淺功利之徒所能識哉。謹案。赤壁之戰。諸葛亮周瑜烈創業荆益。鼎峙之勢。皆肇於此。張昭勸迎曹操。自爲失計。經乃謂其志存漢室。以王道爲度。未免立議之偏。孫策以孤童見紘。言議慷慨。紘卽許以桓文之事。而

委質焉。則亦昭烈孔明之舉也。雖其忠直高壯不逮於昭。而文理意思。繾綣縝密。贊襄孫氏。使中州人士見推。亦昭之亞也。其建計請權都秣陵。屹爲江左京邑。而傳繼六代。有奉春君之識焉。

贊曰。中州名流。弛擔江表。逢時啓霸。分辰割曜。把臂挈孤。付託元老。彊直不撓。忠誠矯矯。紘亦時英。潤色吳業。建都定鼎。南紀有截。

續後漢書卷第五十五

列傳第五十二

吳臣

周瑜子九

魯肅子淑

謹案周瑜傳闕

魯肅字子敬。臨淮東城人也。生而失父。與祖母居。肅魁梧有壯節。喜奇計。知天下將亂。乃學擊劍騎射。招聚少年。往來南山中射獵。陰相部勒。講武習兵。家富於財。性好施與。乃大散貨貨。標賣田土。以賑窮弊。結豪右。父老咸曰。魯氏世衰。乃生此狂兒。撞壞之邪。原注。吳書後雄傑並起。中州擾亂。肅乃命其屬曰。中國失綱。疆。可以避害。寧肯相隨。俱至樂土。以觀時變乎。其屬皆從命。乃使細弱在前。灑壯在後。男女三百餘人行。州追騎至。肅等徐行勒兵持滿謂之曰。卿等丈夫。當解大數。今日天下兵亂。有功弗賞。不追無罰。何為相逼乎。又自植盾引弓射之。矢皆洞貫。騎既嘉肅言。且度不能制。乃相率還。肅渡江往見策。策亦雅奇之。周瑜為居巢長。將數百人。故過候肅。并求資糧。肅家有兩困米。各三千斛。肅乃指一困與瑜。瑜益知其奇也。遂相親結。袁術聞其名。就署東城長。肅見術無綱紀。不足與立事。乃攜老弱將輕俠少年百餘人。南到居巢。就瑜。瑜之東渡。因與同行。畱家曲阿。會祖母亡。還葬東城。劉子揚與肅友善。遺肅書曰。方今天下豪傑並起。吾子姿才尤宜今日。急還迎老母。無事滯於東城。近鄭寶

者今在巢湖。擁衆萬餘。處地肥饒。廬江間人多依就之。況吾徒乎。觀其形勢。又可博集。時不可失。足下速之。肅答然其計。葬畢還曲阿。欲北行。會瑜已徙。肅母到吳。肅具以狀語瑜。時孫策已卒。權尙住吳。瑜謂肅曰。昔馬援答光武云。當今之世。非但君擇臣。臣亦擇君。今主人親賢貴士。納奇錄異。且吾聞先哲祕論。承運代。劉氏者必興於東南。推步事勢。當其歷數。終構帝基。以協天符。是烈士攀龍附鳳。馳騫之秋。吾方達此。足下不須以子揚之言介意也。肅從其言。瑜因薦肅才宜佐時。當廣求其比。以成功業。不可令去也。權卽見肅。與語甚悅之。衆賓罷退。權獨引肅。還合榻對飲。因密議曰。今漢室傾危。四方雲擾。孤承父兄遺產。思有桓文之功。君旣惠顧。何以佐之。肅對曰。昔高帝區區欲尊事義帝而不獲者。以項羽爲害也。今之曹操。猶昔項羽。將軍何由得爲桓文乎。肅竊料之。漢室不可復興。曹操不可卒除。爲將軍計。惟有鼎足江東。以觀天下之釁。規模如此。亦自無嫌。何者。北方誠多務也。因其多務。勦除黃祖。進伐劉表。竟長江所極。據而有之。然後建號帝王。以圖天下。此高帝之業也。權曰。今盡力一方。冀以輔漢爾。此言非所及也。張昭非肅謙下不足。頗訾毀之。云肅年少粗疏。未可用。權不以介意。益貴重之。賜肅母衣服。幃帳。居處雜物。富擬其舊。劉表死。肅進說曰。夫荆楚與國鄰接。水流順北。外帶江漢。內阻山陵。有金城之固。沃野萬里。士民殷富。若據而有之。此帝王之資也。今表新亡。二子素不輯睦。軍中諸將。各有彼此。加劉備天下梟雄。與操有隙。寄寓於表。表惡其能而不能用也。若備與彼協心。上下齊同。則宜撫安。與結盟好。如有離違。宜別圖之。

以濟大事。肅請得奉命弔表二子，并慰勞其軍中用事者。及說備使撫表衆，同心一意，共治曹操。備必喜而從命。如其克諧，天下可定也。今不速往，恐爲操所先。權卽遣肅行。到夏口，聞曹操已向荊州，晨夜兼道，比至南郡，而表子琮已降操。昭烈惶懼奔走，欲渡江南。肅往迎之，到當陽長阪，與昭烈會，宣騰權旨，及陳江東強固，勸昭烈與權併力。昭烈甚悅。肅見諸葛亮，謂亮曰：「我子瑜友也。」卽共定交。昭烈遂到夏口，遣亮使權。肅亦反命。原注：裴松之曰：劉備與權併力共拒中國，皆肅之本謀。又語諸葛亮曰：我子瑜友也。則亮已亟聞肅言矣。而蜀書亮傳云：亮以連橫之略說權，權乃大喜。如似此計始出於亮。若二國史官各記所聞，競欲稱揚本國容美，各取其功。今此二書同出一人，而舛誤若此，非載述之體也。初，昭烈見孔明於隆中，孔明卽言孫氏據有江東，可以爲援。及到夏口，遂請奉命求救於孫將軍。肅之勸昭烈與權協力拒操，適與孔明之言合。則結權并操非肅之本謀也。孔明與肅傳各載之，皆其事實不可偏廢。於載述之體也不害。世期譏之，未當。會權得曹操欲東之問，與諸將議，皆勸權迎之，而肅獨不言。權

起更衣。肅追於宇下，權知其意，執肅手曰：「卿欲何言？」肅對曰：「向察衆人之議，專欲誤將軍，不足與圖大事。今肅可迎操爾，如將軍不可也。何以言之？」今肅迎操，操當以肅還付鄉黨，品其名位，猶不失下曹從事。乘

犢車，從吏卒，交游士林，累官故不失州郡也。將軍迎操，將安所歸？願早定大計，莫用衆人之議也。權歎息曰：「此諸人持議，甚失孤望。今卿廓開大計，正與孤同。」此天以卿賜孤也。原注：魏書及九州春秋曰：曹公征荊州

激說權曰：彼曹公者，實敵敵也。新井袁紹，兵馬甚精，乘戰勝之威，伐喪亂之國，克可必也。不知遣兵助之。且送將軍家詣鄴，不然將危。權大怒，欲斬肅。肅曰：今事已急，卽有他圖，何不遣兵助劉備而欲斬我乎？權然之。乃遣周瑜助備。孫盛曰：吳書及江表傳，魯肅一見孫權，便說拒曹公而論帝王之略，劉表之死也。時周瑜受使至鄱陽，肅勸又請使觀變，無緣方復激說勸迎曹公也。又是時勸迎者衆，而云獨欲斬肅，非其論也。時周瑜受使至鄱陽，肅勸

追召瑜，還遂任瑜以行事，以肅爲贊軍校尉，畫方略，操破走，肅卽先還。權大請諸將迎肅，肅將入閣拜。

權起禮之。因謂曰：子敬孤持鞍下馬相迎，足以顯卿未肅趨進。曰：未也。衆人聞之，無不愕然。就坐。徐舉鞭言曰：願至尊威德加乎四海，總括九州，克成帝業，更以安車輓輪徵肅，始當顯爾。權撫掌大笑。後昭烈詣京見權，求都督荊州。呂範勸權留昭烈，肅曰：不可。將軍雖神武命世，曹操威力實重，初臨荊州，恩信未洽，宜假備使撫安之，多操之敵，而自爲樹黨計之上也。權從之。操聞權以土地業昭烈，方作書落筆於地。周瑜病困上疏曰：當今天下方有事役，是瑜乃心夙夜所憂，願至尊先慮未然，然後康樂。今既與曹操爲敵，

劉備近在公安，邊境密邇，百姓未附，宜得良將以鎮撫之。魯肅智略足任，乞以代瑜。瑜隕路之日，所言盡矣。原注：江表傳：初瑜疾困，與權牋曰：瑜以凡才，昔受討逆殊特之遇，委以腹心，遂荷榮任，統御兵馬，志執鞭弭，自效戎行，規定巴蜀，次取襄陽，懇賴威靈，謂若在握，至以不謹，道遇暴疾，昨自醫療，日加無損，人生有死，尚未知終始，此朝土肝食之秋，至尊垂慮之日也。魯肅忠烈，臨事不苟，可以代瑜，人之將死，其言也善，讎或可采。

瑜死不朽矣。裴松之曰：案此牋與本傳所載意旨雖同，其辭乖異耳。即拜肅奮武校尉，代瑜領兵。原注：通鑑綱目：漢獻帝建安十五年，孫權南郡太守周瑜卒，權以魯肅代領其兵。瑜士衆四千餘人，奉邑四縣皆屬焉。令程普領南郡太守，肅初住江陵，後下屯陸口。原注：通鑑綱目：漢獻帝建

備使關侯守江陵，權使魯肅屯陸口。威恩大行，衆增萬餘人。拜漢昌太守，偏將軍。十九年，從權攻皖城，轉橫江將軍。先是，益州牧劉璋網維頽弛，周瑜甘寧並勸權取蜀，權以咨昭烈。昭烈內欲自規，仍僞報拒權。後昭烈西圖璋，留

關侯守荊州，權曰：猾虜乃敢挾詐如此，侯與肅鄰界，數生狐疑，疆場紛錯，肅常以歡好撫之。昭烈既定益州，權求長沙、零、桂，昭烈不承命，權遣呂蒙率衆進取，昭烈聞之，自還公安，遣侯爭三郡。肅住益陽，欲與關

侯會語。諸將疑有變議不可往。肅曰：今日之事，宜相開譬。劉備負國，是非未決，侯亦何敢重欲干命。乃邀侯相見，各駐兵馬百步上。但諸將軍單刀俱會，肅因數責侯以不返三郡。侯曰：烏林之役，左將軍身在行間，寢不脫介，戮力破敵，豈得徒勞無一塊土，而足下來欲收地邪？肅曰：不然。始與豫州覲於長阪。謹案：觀合宋本作覲。與此。通志亦作覲。豫州之衆，不當一校，計窮慮極，志勢摧弱，圖欲遠竄，望不及此。主上矜愍豫州之身，無有處所，不愛土地士民之力，使有所庇廕，以濟其患，而豫州私獨飾情，愆德墮好，今已藉手於西州矣。又欲翦并荆土，斯蓋凡夫所不忍，而況整頓人物之主乎？肅聞貪而棄義，必爲禍階。吾子屬當重任，曾不能明道處分，以義輔時，而負恃弱衆，以圖力爭，師曲爲老，將何獲濟？侯無以答，坐有一人曰：夫土地者，惟德所在，爾何常之有？肅厲聲呵之，辭色甚切。侯操刀起曰：此自國家事，是人何知？目使之去。昭烈遂割湘水爲界，於是罷軍。肅年四十六，建安二十二年卒。原注：通鑑綱目：漢獻帝建安二十二年，孫權陸口守將魯肅卒，權以呂蒙代之。權爲舉哀，又臨其葬。諸葛亮亦爲發哀，權稱尊號，臨壇顧謂公卿曰：昔魯子敬嘗道此，可謂明於事勢矣。肅方嚴寡玩飾，內外節儉，不務俗好，治軍整肅，禁令必行。雖在軍陳，手不釋卷，又善談論，能屬文，志度宏遠，識鑒過人。瑜之後，肅爲之冠。肅遺腹子淑，旣壯，濡須督張承謂終當遠到，永安中爲昭武將軍，都亭侯，武昌督，建衡中假節遷夏口督，所在嚴整，有方幹，鳳皇三年卒。子睦襲爵領兵馬。

議曰：瑜肅磊磊傑器，弱冠而有王霸之略，鄧仲華之儔也。瑜謂操爲漢賊，肅乃方之項羽，是已。有一劉元

德漢室之胄。高光之流。託足無所。瑜必欲去之。肅假之荊州而競奪之。有志於漢。欲爲桓文之事者。若是乎。首止之會。踐土之朝。未之聞也。操安得獨爲漢賊乎。嗚呼。天未忘漢。當其衰亂。羣雄競起。皆欲亡之。以爲己有。是以不得其正焉。表術紹一敗塗地。曹操孫權幸而有成。終爲僭僞。況其臣事之者乎。苟彘佐操。名爲興漢。其實經營篡代爲魏也。周瑜魯肅決策拒操。稱爲漢賊。其實割據江東以爲吳也。惟昭烈君臣。百折存漢。卒得其統。三國人才。孔明爲不可及也。若彘瑜諸子。一時智計之士。語大義則未也。且赤壁之捷。操以全力奔北。狼藉乘勝長驅。則無所逃命。招定中原。漢未必亡。乃遽足厭。垂涎荆土。甘爲三分。天下可爭而不爭。荊州不可爭而邊爭。有一天下之幾而不爲。惜哉。

贊曰。天傾柱折。斗牛構屯。江海會同。再開乾坤。公瑾子敬。定交軍門。情親義合。遂成君臣。烏林燒操。江壁生紅。取威定霸。千載雋功。奄有荆吳。遂帝江東。分漢敵魏。吳臣之宗。

續後漢書卷第五十六

列傳第五十三

吳臣

呂蒙 陸遜

謹案呂蒙傳今闕

陸遜字伯言。吳郡吳人也。本名議。世江東大族。祖紆。謹案。陳志注作祖紆。城門校尉。父駿。九江都尉。遜少孤。隨從祖。廬江太守康在官。袁術與康有隙。將攻康。康遣遜及親戚還吳。遜年長於康子績數歲。為之綱紀門戶。孫權為將軍。遜年二十一。始仕幕府。歷東西曹令史。出為海昌屯田都尉。并領縣事。原注。陸氏祠堂像贊曰。海昌。今鹽官縣也。縣連年亢旱。遜開倉穀以振貧民。勸督農桑。百姓蒙賴。時吳會稽丹陽多有伏匿。遜陳便宜。乞與募焉。會稽山賊大帥潘臨。久為民害。遜召兵討治。突入深險。所向皆服。部曲已有二千餘人。鄱陽賊帥尤突作亂。復往討之。拜定威校尉。軍屯利浦。權以兄策女配遜。數訪世務。遜建議曰。方今英雄基時。豺狼闕望。克敵寧亂。非衆不濟。而山寇舊惡。依阻深地。夫腹心未平。難以圖遠。可大部伍。取其精銳。權納其策。以為帳下右部督。會丹陽賊帥費棧受曹操印綬。扇動山越。為作內應。權遣遜討棧。棧支黨多而往兵少。遜乃益施牙

幢分布鼓角。夜潛山谷間。鼓譟而前。應時破散。遂部伍東三郡。彊者爲兵。羸者補戶。得精卒數萬人。宿惡
盪除。所過肅清。還屯蕪湖。會稽太守淳于式表遜枉取民人。愁擾所在。遜後詣權稱式佳吏。權曰。式白君
而君薦之何也。遜對曰。式意欲養民。是以白遜。若遜復毀式。以亂聖聽。不可長也。權曰。此誠長者之事。願
人不能爲耳。呂蒙稱疾詣建業。遜往見之。謂曰。關侯接境。如何遠下。後不當可憂也。蒙曰。誠如來言。然我
病篤。遜曰。彼矜其驍氣。陵轢于人。始有大功。意驕志逸。但務謹案。今志作得務。通志及宋本陳志俱作但務。與此合。北進。未嫌于我有
相聞病。謹案。今志作兼相聞病。通志作有相。與此合。必益無備。今出其不意。自可禽制。下見至尊。謹案。陳志作共見至尊。通志作下見。與此合。宜好爲
計。蒙曰。彼素勇猛。旣難爲敵。且已據荊州。恩信大行。兼始有功。膽勢益盛。未易圖也。蒙至都。權問誰可代
卿者。蒙對曰。陸遜意思深長。才堪負重。觀其規慮。終可大任。而未有遠名。非彼所忌。無復是過。若用之。當
令外自韜隱。內察形便。然後可克。權乃召遜拜偏將軍。右部督代蒙。遜至陸口。書與關曰。前承觀釁而動。
以律行師。小舉大克。一何巍巍。敵國敗績。利在同盟。開慶拊節。想遂席卷。共獎王綱。近以不敏。受任來西。
延慕光塵。思稟良規。又曰。于禁等見獲。遐邇欣歎。以爲將軍之勳。足以長世。雖昔晉文城濮之師。淮陰拔
趙之略。蔑以尙茲。前聞徐晃等步騎駐旌。闕望塵葆。操猾虜也。忿不思難。恐潛增衆。以逞其心。雖云師老。
猶有驍悍。且戰捷之後。常苦輕敵。古人杖術。軍勝彌警。願將軍廣爲方計。以全獨克。僕書生疏遲。忝所不
堪。喜鄰威德。樂自傾盡。雖未合策。猶可懷也。儻明注仰。有以察之。關覽遜書。有謙下自託之意。意大安。無

復所嫌遜具啓形狀陳其可禽之要權乃潛軍而上使遜與呂蒙爲前部至卽克公安南郡遜徑進領宜都太守拜撫邊將軍封華亭侯漢宜都太守樊友委郡走諸城長吏及蠻夷君長皆降遜請金銀銅印以

假授初附是歲建安二十四年十一月也遜遣將軍李異謝旌等將三千人攻漢將詹晏陳鳳異將水軍

旌將步兵斷絕險要卽破晏等生獲鳳又攻房陵太守鄧輔南鄉太守郭睦大破之秭歸大姓文布謹案今

志作文布毛本作文布鄧凱等合夷兵數千人首尾西方遜復部旌討破布凱布凱脫走漢以爲將遜令

人誘之布帥衆還降前後斬獲招納凡數萬計權以遜爲右護軍鎮西將軍進封婁侯原注吳書曰權嘉遜功德欲殊顯之

雖爲上將軍列侯猶欲令歷本州舉命乃時荊州士人新還仕進或未得所遜上疏曰昔漢高受命招延英異

使揚州牧呂範就辟別駕從事舉茂才

光武中興羣俊畢至苟可以熙隆道教者未必遠近今荊州始定人物未達臣愚懼懼乞普加覆載抽拔

之恩令並獲自進然後四海延頸思歸大化權敬納其言黃武元年昭烈率衆討權權命遜爲大都督假

節督朱然潘璋宋謙韓當徐盛鮮于丹孫桓等五萬人拒之昭烈從巫峽建平連圍至夷陵界立數十屯

以金錦爵賞誘動諸夷使將軍馮習爲大督張南爲前部輔匡趙融廖淳傅彤等各爲別督先遣吳班將

數千人于平地立營欲以挑戰諸將皆欲擊之遜曰此必有誘且觀之原注吳書曰諸將並欲迎擊備遜以爲不可曰備舉軍東下銳氣始盛且乘高守險難可卒攻攻之縱下猶難盡克若有不利損我大勢非小故也今但且焚厲將士廣施方略以觀其變若此間是平地曠野當恐有顛沛交馳之憂今緣山行軍勢不得展自當罷于木石之間徐制其弊耳諸將不解其

以爲遜畏之昭烈知其計不可乃引伏兵八千從谷中出遜曰所以不聽諸君擊班者揣之必有巧故也

各憫憤恨

遜上疏曰。夷陵要害。國之關限。雖爲易得。亦復易失。失之非徒捐一郡之地。荊州可憂。今日爭之。當令必
諧。備于天常。不守窟穴。而敢自送。臣雖不材。憑奉威靈。以順討逆。破壞在近。尋備前後行軍。多敗少成。推
此論之。不足爲戚。臣初嫌之。水陸俱進。今反舍船就步。處處結營。察其布置。必無他變。伏願至尊高枕。不
以爲念也。諸將並曰。攻備當在初。今乃令入五六百里相銜持。經七八月。其諸要害皆已固守。擊之必無
利矣。遜曰。備是猾虜。更嘗事多。其軍始集。思慮精專。未可干也。今住已久。不得我便。兵疲意阻。計不復生。
掎角此寇。正在今日。乃先攻一營。不利。諸將皆曰。空殺兵耳。遜曰。吾已曉破之之術。乃敕各持一把茅。以
火攻拔之。遂並率諸軍同時俱攻。斬張南。馮習。及胡王沙摩柯等首。破其四十餘營。漢將杜路。劉寧等窮
逼請降。昭烈升馬鞍山。陳兵自繞。遜督促諸軍四面蹙之。土崩瓦解。死者萬數。昭烈因夜遁。驛人自擔燒
鏡。鎧斷後。僅得入白帝城。其舟船器械。水步軍資。一時略盡。尸骸漂流。塞江而下。昭烈大慙。悲曰。吾乃爲
遜所折辱。豈非天耶。初。孫桓別攻漢前鋒於夷道。爲漢所圍。求救于遜。遜曰。未可。諸將曰。孫安東公族。見
圍已困。奈何不救。遜曰。安東得士衆心。城牢糧足。無可憂也。待吾計展。欲不救安東。安東自解。及方略大
施。謹案。今志作才略。宋本作方略。與此合。通志亦作方略。昭烈果奔潰。桓後見遜曰。前實怨不見救定。至今日。乃知調度自有方耳。嘗
禦漢時。諸將軍或是孫策時舊將。或公室貴戚。各自矜恃。不相聽從。遜案劍曰。劉備天下知名。曹操所憚。
今在境界。此疆對也。諸君荷國恩。當相輯睦。共翦此虜。上報所受。而不相順。非所謂也。僕雖書生。受命主

上國家所以屈諸君使相承望者。以僕有尺寸可稱。能忍辱負重故也。各任其事。豈復得辭。軍令有常。不可犯也。及破漢兵。計多出遜。諸將乃服。權聞之曰。君何以初不啓諸將違節度者邪。遜對曰。受恩深重。任過其才。又此諸將。或任腹心。或堪爪牙。或是功臣。皆國家所當與共。克定大事者。臣雖驚懦。竊慕相如。寇恂相下之義。以濟國事。權大笑稱善。加拜遜輔國將軍。領荊州牧。卽改封江陵侯。又昭烈既住白帝。徐盛。潘璋。宋謙等各競表言。備必可擒。乞復攻之。權以問遜。遜與朱然駱統以爲曹丕大合士衆。外託助國討備。內實有姦心。謹決計輒還。無幾。昭烈聞魏軍果出。三方受敵。書與遜曰。賊今已在江陵。吾將復東。將軍謂其能然不。遜答曰。但恐軍新破。創夷未復。始求通親。且當自補。未暇窮兵耳。若不推算。欲復以傾覆之餘。遠送以來者。無所逃命。昭烈尋崩于永安。末帝卽位。諸葛亮秉政。與權連和。時事所宜。權輒令遜語亮。并刻權印以置遜所。權每與末帝及亮書。常過示遜。輕重可否。有所不安。便令改定。以印封行之。五年。遜陳便宜。勸權施德。緩刑。寬賦息調。納忠讜之言。察興利之臣。權嘉納之。七年。權使鄱陽太守周魴譚案。今陳志作孫勳。誤。考周魴爲鄱陽太守。譚曹休原注。陸機爲事詳本傳。通志作周魴。與此合。。譚魏大司馬曹休。休果舉衆入皖。乃召遜假黃鉞爲大都督。逆休。原注。陸機爲遜銘曰。魏大司馬曹休。侵我北鄙。乃假公黃鉞。統御六師。及中軍禁衛而攝。休既覺。知恥見欺。誘自恃兵馬精多。行王事。主上執鞭。百司屈膝。吳錄曰。假遜黃鉞。吳主親執鞭以見之。

遂交戰。遜自爲中部。令朱桓全琮爲左右翼。三道俱進。果衝休伏兵。因驅走之。追亡逐北。徑至夾石。斬獲萬餘牛馬騾驢車乘萬兩。軍資器械略盡。休還。疽發背死。諸軍振旅過武昌。權令左右以御蓋覆。遜入出

殿門凡所賜遜皆御物上珍於時莫與爲比遣還西陵黃龍元年拜上大將軍右都護是歲權東巡建業
留太子皇子及尙書九官徵遜輔太子并掌荊州及豫章三郡事董督軍國時建昌侯慮於堂前作鬪鴨
欄頗施小巧遜正色曰君侯宜勤覽經典以自新益用此何爲慮卽時毀撤之射聲校尉松於公子中最
親戲兵不整遜對之髡其職吏南陽謝景善劉廙之先刑後禮之論遜呵景曰禮之長於刑久矣廙以細
辯而詭先聖之教皆非也君今侍東宮宜遵仁義以彰德音若彼之談不須講也遜雖身在外乃心於國
上疏陳時事曰臣以爲科法嚴峻下犯者多頃年以來將吏罹罪雖不慎可責然天下未一當圖進取小
宜恩貸以安下情且世務日興良能爲先自不姦穢入身難忍之過乞復顯用展其力效此乃聖王忘過
記功以成王業昔漢高舍陳平之愆用其奇略終建勳祚功垂千載夫峻法嚴刑非帝王之隆業有罰無
恕非懷遠之宏規權欲遣偏師取夷州及朱崖皆以謫遜遜上疏曰臣愚以爲四海未定當須民力以濟
時務今兵興歷年見衆損減陛下憂勞聖慮忘寢與食將遠規夷州以定大事臣反覆思惟未見其利萬
里襲取風波難測民易水土必致疾疫今驅見衆經涉不毛欲益更損欲利反害又朱崖絕險民猶禽獸
得其民不足濟事無其兵不足虧衆今江東見衆自足圖事但當畜力而後動爾昔桓王創基兵不一旅
而開大業陛下承運拓定江表臣聞治亂討逆須兵爲威農桑衣食民之本業而干戈未戢民有飢寒臣
愚以爲宜養士民寬其租賦衆克在和義以勸勇則河渭可平九有一統矣權遂遣將襲夷州得不補失

及公孫淵背盟權欲討之。遜上疏曰：淵憑險恃固，拘留大使，名馬不獻，實可讎忿。蠻夷猾夏，未染王化，烏窳荒裔，拒逆王師。至令陛下爰赫斯怒，欲勞萬乘，汎輕越海，不慮其危而涉不測。方今天下雲擾，羣雄虎爭，英豪踴躍，張聲大視。陛下以神武之姿，誕膺期運，破操烏林，敗備西陵，禽關荊州，斯三虜者，當世雄傑，皆摧其鋒。聖化所綏，萬里草偃。方蕩平華夏，總一大猷，今不忍小忿而發雷霆之怒，遠垂堂之戒，輕萬乘之重，此臣之所惑也。臣聞志行萬里者，不中道而輟；足圖四海者，匪懷細以害大。彊寇在境，荒服未庭，陛下乘桴遠征，必致闕闕，感至而憂，悔之無及。若使大事時捷，則淵不討自服。今乃遠惜遼東衆之與馬，奈何獨欲捐江東萬安之本業，而不惜乎乞息六師，以成大虜。早定中夏，垂曜將來，權用納焉。嘉禾五年，權北征，使遜與諸葛瑾攻襄陽。遜遣親人韓扁齎表奉報，還遇敵于河中，鈔邏得扁，瑾聞之，甚懼。書與遜云：大駕已旋，賊得韓扁，具知吾闊狹，且水乾，宜當急去。遜未答。方催人種葑豆，與諸將弈碁射戲如常。瑾曰：伯言多智略，其當有以自來見。遜曰：賊知大駕已旋，無所復慮，得專力于吾，又已守要害之處，兵將意勦，且當自定以安之。施設變術，然後出耳。今便示退，賊當謂吾怖，仍來相蹙，必敗之勢也。乃密與瑾定計，令瑾督舟船，遜悉上兵馬，以向襄陽城。敵素憚遜，遽還赴城。瑾便引船出，遜徐整部伍，張拓聲勢，步趨船。敵不敢干。軍到白圍，託言住獵，潛遣將軍周峻、張梁等擊江夏、新市、安陸、石陽、石陽市、盛峻等，奄至，人皆捐物入城。城門噤，不得開。敵乃自斫殺己民，然後得闔，斬首獲生凡千餘人。

原注：臣松之以爲遜慮孫權以遜退，魏得專力于己，既能張拓

形勢。使敵不敢犯。方舟順流。無復怵惕矣。何爲潛復遣諸將奄襲小縣。致令市人駭奔。自相傷害。俘賊千人。未足損魏。徒使無辜之民。橫罹荼酷。與諸葛渭濱之師。何其殊哉。用兵之道既遠。失律之凶宜應。其詐無三世。及孫而滅。豈此之餘。歟。

其所生得。皆加營護。不令兵士干擾侵侮。將家屬來者。使就料視。若亡其妻子者。卽給衣糧。厚加慰勞。發遣令還。或有感慕相攜而歸者。鄰境懷之。原注。臣松之以爲此無異殘林覆巢。而全其遺骸。曲惠小仁。何補大虛。江夏功曹趙濯。弋陽

備將裴生。及夷王梅頤等。並帥支黨來附。遜傾財帛。周贍經恤。又魏江夏太守遠原注。遠音餘。兼領兵馬。

頗作邊害。而與北舊將文聘子休宿不協。遜聞其然。卽假作答式書云。得報懇惻。知與休久結嫌隙。勢不

兩存。欲來歸附。輒以密呈來書表聞。撰衆相迎。宜潛速嚴更。示定期。以書置界上。式兵得書。以見式。式惶

懼。遂自送妻子還洛。由是吏士不復親附。遂以免罷。原注。臣松之以爲邊將爲害。蓋其常事。使遠式得罪。代者亦復如之。自非狡焉思肆。將成大患。何足虧損雅慮。尙爲

小許哉。以斯爲美。又所不取。六年。中郎將周祗乞于鄱陽召募。事下問遜。遜以爲此郡民易動難安。不可與召。恐致賊

寇。而祗固陳取之。郡民吳遠等果作賊殺祗。攻沒諸縣。豫章廬陵宿惡民。並應遠爲寇。遜自開。輒討卽破

遠等。相率降遜。料得精兵八千餘人。三郡平時中書典校呂壹竊弄權柄。擅作威福。遜與太常潘濬同心

憂之。言至流涕。後權誅壹。深以自責。語在權傳。時謝淵謝玄等各陳便宜。欲興利改作。原注。吳歷稱云。謝玄才辨有計術。

以事下遜。遜議曰。國以民爲本。強由民力。財由民出。夫民殷國弱。民瘠國強者。未之有也。故爲國者得民

則治。失之則亂。若不受利而令盡用立效。亦爲難也。是以詩歎宜民宜人。受祿于天。乞垂聖恩。寧濟百姓。

數年之間。國用少豐。然後更圖。赤烏七年。代顧雍爲丞相。詔曰。朕以不德。應期踐運。王塗未一。姦宄充路。

夙夜戰懼。不遑鑿寐。惟君天資聰敏。明德顯融。統任上將。匡國弭難。夫有超世之功者。必膺光大之寵懷。文武之才者。必荷社稷之重。昔伊尹隆湯。呂尚翼周。內外之任。君實兼之。今以君爲丞相。使使持節。守太常。傳常授印綬。君其懋昭明德。修乃懿績。敬服王命。綏靖四方。於乎。總司三事。以訓羣寮。可不敬與。君其勛之。其州牧都護。領武昌事。如故。先是。二宮並闕。中外職司。多遣子弟給侍。全琮報遜。遜以爲子弟苟有才。不憂不用。不宜私出。以要榮利。若其不佳。終爲取禍。且聞二宮勢敵。必有彼此。此古人之厚忌也。琮子寄果。阿附魯王。輕爲交構。遜與琮書曰。卿不師日磾。而宿畱阿寄。終爲足下門戶致禍矣。琮既不納。更以致隙。及太子有不安之義。遜上疏陳太子正統。宜有磐石之固。魯王藩臣。當使寵秩有差。彼此得所。上下獲安。謹叩頭流血。以聞。書三四上。及求詣都。欲口論適庶之分。以匡得失。既不聽許。而遜外生顧譚。顧承。姚信。並以親附太子。枉見流徙。太子太傅吾粲。坐數與遜交書。下獄死。權累遣中使責讓遜。遜憤恚。致卒。時年六十三。家無餘財。初。暨黜造營府之論。遜諫戒之。以爲必禍。又謂諸葛恪曰。在我前者。吾必奉之。同升在我下者。則扶持之。今觀君氣陵其上。意蔑乎下。非安德之基也。又廣陵楊竺。少獲聲名。而遜謂之終敗。勸竺兄穆。令與別族。其先覩如此。長子延早夭。次子抗襲爵。孫休時。追諡遜曰昭侯。

議曰。雲長萬人之敵。而呂蒙襲取。昭烈一世之雄。而陸遜摧破。漢之義師。不復東征。祇保梁益。吳遂蹈跨荆揚。操不可圖。丕乃禪代。曹氏遂有中國。而天下三分。殆非人謀。亦天意也。蒙好謀能斷。軍旅之間。折節

問學。終於文武備足。有國士之風。遜一旦爲大帥。能昭果毅。使諸將聽服。獨當一面。遂成雋功。非有過人之材。能若是乎。至於忠誠懇至。憂國忘身。庶幾社稷之臣。遜死而冢嗣遂廢。貽禍於後。蒙責齋恨。不瞑九泉。權真負遜也哉。

贊曰。子明識斷。駿駿逾敏。學問略奇。足繼公瑾。伯言靜鷲。卻敵安疆。虎臥國門。威深大江。

續後漢書卷第五十七

列傳第五十四

吳臣

孫邵 顧雍子邵 邵子譚 承 雍孫榮

步騭子剛 周昭 諸葛瑾 少子融

孫邵字長緒北海人也。偉風儀，長八尺，為孔融功曹。融稱之曰：廊廟才也。從劉繇于江東。繇沒，遂從孫策及權統事。數陳便宜，以為應納貢聘，權即從之。拜廬江太守，遷車騎長史。黃武初，權初置丞相，以邵為之。兼威遠將軍，封陽羨侯。為張溫暨豔所奏舉，邵辭位請罪，權令復職。四年卒。謹案：孫權傳云：四年五月，丞相孫邵卒。年六十。

三原注：志林·吳之創基，邵為首相，史無其傳，竊嘗怪之。嘗問劉聲叔，聲叔博物君子也，推其名位，自應立傳。項峻吳字時已有注記，此云與張惠恕不能，後韋氏作史，蓋惠恕之黨，故不見書。

謹案顧雍傳闕，止存附傳族人梯、殷禮二篇。

梯，雍族人。字子通，以孝友廉正聞于鄉黨。年十五為郡吏，除郎中，稍遷偏將軍。權末年，嫡庶不分，梯數與驃騎將軍朱據備陳禍福，言辭切直，朝廷憚之，內行尤謹。待其妻如賓，夜歸晨出，希見其面。嘗疾篤，妻出省之，梯命左右扶起，冠帶加襲，趣令妻還。梯父向，歷四縣令，年老致仕，梯每得父書，常灑掃整衣服，更設

几筵舒書其上。拜跪讀之。每句應諾畢。復再拜。若父有疾。問至。則臨書垂涕。聲語哽咽。父以壽終。悌飲漿不入口五日。權爲作布衣一襲。皆摩絮著之。強令悌釋服。雖以公議自割。猶以不見父喪。常畫壁作棺槨象。設神座於下。每對之哭泣。服未闋而卒。悌四子彥。禮。謙。祕。祕。晉交州刺史。祕子衆。尙書僕射。殷禮。謹按陳

志孫權傳注作殷札。誤。考張溫顧雍傳俱作禮。與此書合。字德嗣。幼有令聞。潛識過人。年十九。守吳縣丞。孫權爲王。召除郎中。後與張溫

俱使漢。諸葛亮甚稱歎之。稍遷至零陵太守。赤烏四年。權使全琮略淮南。諸葛恪攻六安。朱然圍樊。諸葛瑾取相中。禮言于權曰。今天棄曹氏。喪誅累見。虎爭之際。而幼童莅事。陛下身自御戎。取亂侮亡。宜滌荆揚之地。舉彊羸之數。使彊者執戟。羸者轉運。西命益州。軍于隴右。授諸葛瑾朱然大衆。取襄陽。陸遜。朱桓別征壽春。大駕入淮陽。歷青徐。襄陽。壽春。困于受敵。長安以西。務對漢軍。許雒之衆。勢必分離。犄角瓦解。民必內應。將帥對向。或失便宜。一軍敗績。則三軍離心。便當秣馬脂車。陵蹈城邑。乘勝逐北。以定華夏。若不悉軍動衆。循前輕舉。則不足大用。易于屢退。民疲威消。時往力竭。非策之善也。權弗能用。禮卒。子基無難督。以才學知名。著通語數十篇。有三子。巨。字元大。有才器。初爲吳偏將軍。統部曲。城夏口。入晉爲蒼梧太守。少子祐。字慶元。吳郡太守。

謹案步騭傳闕。止存附傳李肅一篇。

李肅字偉恭。南陽人。少以才聞。善論議。臧否得中。甄奇錄異。薦述後進。題目品藻。曲有條貫。時服其精鑒。

權擢掌選舉。號稱得才。求出補吏。爲桂陽太守。吏民悅服。徵爲卿。會卒。

諸葛瑾字子瑜。漢丞相亮之兄也。原注。吳書。其先葛氏本瑯琊諸縣人。後徙陽都。陽都先有姓葛者。時人謂之諸葛。因以爲氏。裴松之曰。風俗通。葛嬰爲陳涉將軍。有功而誅。孝文帝追錄。

封其孫諸縣侯。因并氏焉。此與吳書所說不同。

瑾少聰敏。游學京師。治毛詩。尙書。左氏春秋。遭母憂。居喪。後事繼母。皆以孝稱。靈

帝末年。避亂江東。值孫策卒。孫權姊婿曲阿宏咨見而異之。薦於權。與魯肅等並見賓待。後爲權長史。轉中司馬。建安二十年。權遣瑾通好昭烈。與其弟亮公會相見。退無私面。與權談說諫喻。未嘗切愕。徵見風采。粗陳指歸。如有未合。則捨而及他。徐復託事造端。以物類相求。於是權意往往而釋。吳郡太守朱治。權舉將也。權曾有以望之。而素加敬。難自詰讓。忿忿不解。瑾揣知其故。而不敢顯陳。乃乞以意私自問。遂於權前爲書。泛論物理。因以己心遙往忖度之。畢以呈權。權喜笑曰。孤意解矣。顏氏之德。使人加親。豈謂此耶。權又怪校尉殷模。罪至不測。羣下多爲之言。權忿益甚。與相反覆。惟瑾默然。權曰。子瑜何獨不言。瑾避席曰。瑾與殷模等。遭本州傾覆。生類殄盡。棄墳墓。攜老弱。披草萊。來歸聖化。在流隸之中。蒙生成之福。不能躬相督厲。陳答萬一。至令模孤負恩惠。自蹈罪戾。臣謝過不暇。誠不敢有言。權聞之。愴然。乃曰。特爲君赦之。後從攻忠義。封宣城侯。以綏南將軍代呂蒙領南郡太守。住公安。昭烈征權。權求和。瑾與昭烈牋曰。奄聞旗鼓來至。白帝或恐羣臣以吳王侵取此州。謹案。羣臣陳志作議臣。危害關羽。怨深禍大。不宜答和。此用心于小。未畱意于大者也。試爲陛下論其輕重及其大小。陛下若抑威損忿。暫省瑾言者。計可立決。不復咨之。

于羣后也。陛下以關羽之親，何如先帝。荊州大小，孰與海內。俱應仇疾，誰當先後。若審此數，易于反掌。注原

裴松之曰：劉后以庸蜀爲關河，荆楚爲維翰，關羽揚兵河漢，志陵上國。雖臣主定霸，功未可必。要爲威聲遠震，有其經略，孫權潛包禍心，助魏除害，是爲翦宗子勤王之師。行曹公移都之計，拯漢之規，于茲而止。義旗所指，宜其在孫氏矣。瑾以大義責備，答之何患無辭。且備羽相與，有若四體，股肱橫虧，憤痛已深。豈此奢閹之書所能迴駐哉。載之于篇，實爲辭章之費。世期之論，明昭烈之心，正孫權之罪，得之矣。其謂瑾奢閹之書不當載，未當也。夫史之所記，所以著邪正，別誠僞。瑾之志欲弭昭烈之怨，蓋時或言瑾別遣親人與昭烈相聞，權曰：孤與子瑜有死生不孫氏之愆，合二國之好，固非奢閹。載之是已。

易之誓子瑜之不負孤，猶孤之不負子瑜也。然謗言流聞于外，陸遜表明瑾必無此，宜有以散其意。權報曰：子瑜與孤從事積年，恩如骨肉，深相明究，其爲人非道不行，非義不言。元德昔遣孔明至吳，孤嘗語子瑜曰：卿與孔明同產，且弟隨兄，于義爲順，何以不畱孔明。孔明若畱，孤當以書解元德，意自隨人。爾子瑜答孤言：弟亮已失身于人，委質定分，義無二心。弟之不畱，猶瑾之不往也。其言足貫神明，今豈當有此乎。前得妄言文疏，卽封示子瑜，并手書與之，卽得其報。論天下君臣大節一定之分，孤與子瑜可謂神交，非外言所得聞也。知卿意至，輒封來表，以示子瑜，使知卿意。黃武元年，遷左將軍，督公安，假節封宛陵侯。魏曹真、夏侯尚等圍朱然于江陵，又分據中州，瑾以大兵爲之救援。瑾性宏緩，推道理，任計畫，無應卒倚仗之術。兵久不解，權甚望之。及春水生，潘璋等作水城于上流，瑾進攻浮橋，真等退走，終以全師保境爲功。虞翻以狂直流徙，惟瑾屢爲諫說。翻與所親書曰：諸葛敦仁，則天活物，比蒙清論，有以保分。惡積罪深，見忌殷重，雖有祁老之救，德無羊舌，解釋難冀也。瑾爲人有容貌思度，于時服其宏雅，權亦重之。大事咨訪。

又別咨瑾曰。近得伯言表。以爲曹丕已死。毒亂之民。當望旌瓦解。而更靜然。聞皆選用忠良。寬刑罰。布恩惠。薄賦省役。以悅民心。其惠更深于操時。孤以爲不然。操之所行。其惟殺伐。小有過差。及離間人骨肉。以爲酷爾。至于御將。自古少有。丕之于操。萬不及也。今叡之不如丕。猶丕之不如操。其所以務崇小惠。必以其父新死。自度衰微。恐困苦之民。一朝崩沮。故彊屈曲。以求民心。欲以自安住爾。寧是興隆之漸邪。又任陳長文。曹子丹輩。或文人諸生。或宗室戚臣。寧能御雄才虎將。以制天下乎。夫威柄不專。則其事乖錯。如昔張耳陳餘。非不敦睦。至于乘勢後。自還相賊。乃事理使然也。又長文之徒。昔所以能守善者。以操笮其頭。畏操威嚴。故竭心盡意。不敢爲非爾。丕繼業年已長大。承操之後。以恩情加之。用能感義。今叡幼弱。隨人東西。此曹等輩。必當因此弄巧行態。阿黨比周。各助所附。如此之日。姦讒並起。更相陷讞。轉成嫌貳。自爾已往。羣下爭利。主幼不御。其爲敗也。焉得久乎。所以知其然者。自古至今。安有四五人把持刑柄。而不離刺轉相蹄齧者也。彊當陵弱。弱當求援。此亂亡之道也。子瑜卿但側耳聽之。伯言常長於計校。恐此一事小短也。原注。裴松之曰。魏明帝當時明主。政自己出。孫權此論。竟爲無徵。而史載之者。將以主幼國疑。威柄不辭。表之微。一。亂亡之形。有如權言。或當以雖失之於明帝。而事著于齊王。齊王之世。可不謂驗乎。不敢顯斥。抑足權稱尊號。拜大將軍左都護。領豫州牧。及呂壹誅權。又有詔切瑳。瑾輒因事以答。辭順理正。瑾子恪名盛當世。權深器異之。然瑾常嫌之。謂非保家之子。每憂戚。初瑾爲大將軍。而弟亮爲漢丞相。二子恪融。皆典戎馬。督領將帥。封侯族弟。誕又顯名於魏。一門冠蓋三方。天下榮之。瑾才略雖不及亮。而德行尤

純妻死不復娶。愛妾有子不舉。其敦篤如此。赤烏四年。年六十八卒。遺命素棺。斂以時服。事從省約。恪已自封侯。故弟融襲爵。攝兵業。駐公安。融字叔長。生于寵貴。少而驕樂。學爲章句。博而不精。性寬容。多技藝。數以巾褐奉朝請。後拜騎都尉。亦烏中諸郡出部伍。新都都尉陳表。吳郡都尉顧承。各率所領人會佃毘陵。男女各數萬戶。表病死。權以融代表。後代領父部曲。謹按。志作後代父。謹領。攝融部曲。融字疑衍。吏士親附。疆外無事。秋冬則

射獵講武。春夏則延賓高會。休吏假卒。或不遠千里而造焉。每會輒歷問賓客。各言其能。乃合榻促席。量敵選對。博奕擲擲。投壺弓彈。部別類分。肴覈醕茗。閒進迭行。融周流觀覽。終日不倦。融父兄質素。雖在軍

旅。身無采飾。而融錦罽文繡。獨爲奢綺。孫權卒。徙奮威將軍。後恪征淮南。假融節令引軍入沔。以擊西兵。恪既誅。遣無難督施寬。就將軍施績。孫壹。全熙等取融。融卒。聞兵至。惶懼猶豫。不能決計。兵到圍城。飲藥

而死。三子皆伏誅。先是公安有靈鼃鳴。童謠曰。白鼃鳴。龜背平。南郡城中可長生。守死不去。義無成。及融被圍。果刮金印龜服之而死。原注。陳志張昭。顧雍。諸葛瑾。步騭。共一傳。評曰。張昭受遺輔佐。功勳克舉。忠警方直。勳不爲己。而以嚴見。以高見外。既不處宰相。又不登師保。從容闔巷。

世。張承顧邵。虛心長者。好尙人物。周昭之論。稱之甚美。故詳錄焉。譚獻納在公。有忠貞之節。休承修志。咸庶爲善。愛惡相攻。流播南裔。哀哉。

議曰。權初稱王。依放漢制。置丞相。而用孫邵。及稱尊號。顧雍。陸遜。步騭。相繼爲之。皆以德度見器。雍容泰定。有大臣之風焉。諸葛瑾。才猷蘊藉。顯面上將。以功名終。亦其次也。邵。譚忠。清梗亮。克世先烈。步氏有闡

諸葛氏有恪家聲墜矣。
贊曰侃侃相臣。濟威以仁。震霆收聲。澤國生春。元歎德度。沈深穆遠。澄淵以波。龍盤蛟轉。子山純懿。子瑜共肅。贊元將命。共安坤軸。

續後漢書卷第五十八

列傳第五十五

吳臣

程普 黃蓋 韓當 蔣欽 周泰

陳武

子修表

董襲

甘寧

凌統

父操

徐盛

潘璋

丁奉

程普字德謀。右北平土垠人也。初為郡吏。有容貌計略。捷給善應對。從孫堅討黃巾於宛鄧。破董卓于陽人攻城野戰。身被創夷。堅卒。復隨孫策在淮南。從攻廬江。拔之。還俱東渡。策到橫江。當利。破張英。于麋等。轉下秣陵。湖熟。句容。曲阿。普皆有功。增兵二千騎。五十四志案五十四。今志訛作五十四。進破烏程。石門。木波門。陵傳。餘杭。普功為多。策入會稽。以普為吳郡都尉。治錢唐。後徙丹陽都尉。居石城。復討宣城。涇安。吳陵。陽春。穀諸賊。皆破之。策嘗攻祖郎。大為所圍。普與一騎共蔽扞策。驅馬疾呼。以矛突賊。賊披策。因隨出。後拜盪寇中郎將。領零陵太守。從討劉勳于潯陽。進攻黃祖于沙羨。還鎮石城。策卒。與張昭等共輔孫權。遂周旋三郡。平討不服。又從攻江夏。還過豫章。別討樂安。樂安平。代太史慈備海昏。與周瑜為左右督。破曹操于烏林。又進攻南郡。走曹仁。拜裨將軍。領江夏太守。治沙羨。食四縣。先出諸將。普最年長。時人皆呼程公。性

好施與喜士大夫。周瑜卒，領南郡太守，權分荊州與昭烈。普復還領江夏，遷盪寇將軍，獲叛者數百人，皆令投火，即日病癘，百餘日卒。權稱尊號，追論普功，封子咨爲亭侯。

黃蓋字公覆，零陵泉陵人。南陽太守黃子廉之後也。少孤，嬰丁凶難，有壯志，薪芻餘暇，講習書傳，尤精兵事。初爲郡吏，察孝廉，辟公府，孫堅舉義兵，蓋從之。堅南破山賊，北走董卓，拜蓋別部司馬，堅卒，蓋隨策及權，擢甲周旋，蹈刃屠城，諸山越不寶，有寇難之縣，輒用蓋爲守長。石城縣吏特難檢御，蓋乃署兩掾，分主諸曹，教曰：令長不德，徒以武功爲官，不以文吏爲稱，今賊寇未平，有軍旅之務，一以文書委付兩掾，當檢攝諸曹，糾擿謬誤。兩掾所署事入，諾出，若有姦欺，終不加以鞭杖，宜各盡心，無爲衆先。初皆怖威，夙夜恭職，久之吏以蓋不視文書，漸容人事，蓋亦嫌外懈怠，時有所省，各得兩掾不奉法數事，乃悉請諸掾吏賜酒肉，因出事詰問，兩掾辭屈，皆叩頭謝罪。蓋曰：前已相敕，終不以鞭杖相加，非相欺也。遂殺之。縣中震慄，後轉春穀長，潯陽令。凡守九縣，所在平定。遷丹陽都尉，抑強扶弱，山越懷附，蓋姿貌嚴毅，善于撫養，每所征討，士卒皆爭爲先。建安中，隨周瑜拒曹操于赤壁，建策火攻，乘勝追操，爲流矢所中，時寒墮水，爲吳軍人所得，不知其蓋也。置廁牀中，蓋自彊呼韓當，當聞之曰：此公覆聲也。向之垂涕，解易其衣，遂得生。拜武鋒中郎將，武陵蠻夷反亂，攻守城邑，乃以蓋領太守，時郡兵才五百人，自以不敵，因開城門，賊半入，乃擊之，斬首數百，餘皆奔走，盡歸邑落，誅討魁帥，附從者赦之。自春訖夏，寇亂盡平，諸幽邃巴醴，由誕邑侯君。

長皆改操易節。奉禮請見。郡境遂清。後長沙益陽縣爲山賊所攻。蓋又平討。加偏將軍。病卒于官。蓋當官決斷事無罣滯。國人思之。原注。吳書又圖畫蓋形。四時祭祀。及權稱帝。追論其功。賜子柄爵關內侯。

謹案。目錄此下有韓當傳。今闕。

蔣欽字公奕。九江壽春人也。孫策之襲袁術。謹案。孫策傳。無襲袁術事。此仍陳志之文。疑有誤。欽隨從給事。及策東渡。拜別部司

馬。授兵與策周旋。平定三郡。又從定豫章。調授葛陽尉。歷三縣長。討平盜賊。遷西部都尉。會稽治賊呂合。

秦狼等爲亂。欽將兵討擊。遂禽合狼。五縣平定。徙討越中郎將。以涇。謹案。涇。今志作經。通志作涇。與此合。拘昭陽爲奉邑。賀

齊討黜賊。欽督萬兵與齊并力。黜賊平定。從征合肥。魏將張遼襲權于津北。欽力戰有功。遷盪寇將軍。領

濡須督。後召還都。拜津右護軍。典領辭訟。權嘗入其堂內。母疎帳縹被。妻妾布裙。權歎其在貴守約。卽敕

御府爲母作錦被。改易帷帳。妻妾衣服。悉皆錦繡。初。欽屯宣城。嘗討豫章賊。蕪湖令徐盛收欽屯吏表斬

之。權以欽在遠。不許盛。由是自嫌于欽。曹操出濡須。欽與呂蒙持諸軍節度。盛常畏欽。因事害已。而欽每

稱其善。權謂欽曰。盛前白卿。卿今舉盛。欲慕邴奚邪。欽對曰。臣聞公舉不挾私怨。盛忠而勤強。有膽略器

用。好萬人督也。今大事未定。臣當助國求才。豈敢挾私。忿以蔽賢乎。權嘉之。及攻忠義。欽督軍入沔。還道

病卒。權素服舉哀。以蕪湖民二百戶。田二百頃。給欽妻子。子壹封宣城侯。領兵拒昭烈有功。還赴南郡。與

魏交戰。臨陣卒。壹無子弟。休領兵。後有罪失職。

謹案目錄此下有周泰、陳武、董襲、甘寧四傳，今闕。

凌統字公績，吳郡餘杭人也。父操，輕俠有膽氣。孫策初興，每從征伐，常冠軍履鋒，守永平長平治山，越姦猾斂手，遷破賊校尉。及權統事，從討江夏，入夏口，先登破其前鋒，輕舟獨進，甘寧射殺之。

謹案陳志云：中流矢死。此據甘

寧傳。

統年十五，左右多稱述者，權亦以操死國事，拜統別部司馬，行破賊都尉，使攝父兵，復命擊山賊，權

破保屯，先還餘麻屯萬人，統與督張異等圍攻，圍之，刻日當攻。先期統與督陳勤會飲酒，勤剛勇任氣，因督祭酒，陵轢一座，舉罰不以其道，統疾其侮慢，面折不爲用，勤怒，詈統及其父操，統流涕不答，衆因罷出，勤因酒凶悖，又于道路辱統，統不忍，引刀斫勤，數日乃死。及當攻屯，統曰：「非死無以謝罪。」乃率厲士卒，身當矢石，所攻一面，應時披壞，諸將乘勝，遂大破之，還自拘于軍正，權壯其果毅，使得以功贖罪。後權復攻江夏，統爲前鋒，與所厚健兒數十人共乘一船，常去大兵數十里，行入右江，斬黃祖將張碩，盡獲船人，還以白權引軍兼道水陸並集，時呂蒙敗其水軍，而統先搏其城，于是大獲權，以統爲承烈都尉，與周瑜等拒破曹操于烏林，遂攻曹仁，遷爲校尉。雖在軍旅，親賢接士，輕財重義，有國士之風。又從破皖，拜盪寇中郎將，領沛相，與呂蒙等西取三郡，反自益陽，從往合肥，爲右都督，時權徵軍，前部已發，魏將張遼等奄至津北，權使追還前兵，兵去已遠，勢不相及，統率親兵三百人陷圍，扶扞權出，敵已毀橋，橋之屬者兩板，權策馬驅馳，統復還戰，左右盡死，身亦被創，所殺數十人，度權已免，乃還橋，敗路絕，統被甲潛行，權旣御船。

見之驚喜統痛親近無反者。悲不自勝。權引袂拭之。謂曰。公積亡者已矣。苟使卿在。何患無人。原注。吳書統創甚。權遂留統于舟。靈易其衣服。其創賴得卓氏良藥。故得不死。拜偏將軍。倍給本兵時。有薦同郡盛暹于權者。以爲梗槩大節。有過于統。權曰。且令如統足矣。後召暹夜至。時統已臥。聞之。攝衣出門。執其手以入。其愛善不害如此。統以山中人。尙多壯悍。可以威恩誘也。權令東占且討之。命敕屬城。凡統所求皆先給。後聞統素愛士。士亦慕焉。得精兵萬餘人。過本縣。步入寺門。見長吏懷三版恭敬禮。親舊故人。恩義益隆。事畢當出。會病卒。時年四十九。權聞之。拊牀起坐。哀不能自止。數日減膳。言及流涕。使張承爲作銘誄。二子烈。封年各數歲。權養之宮中。愛待與諸子同。賓客進見。呼示之曰。此吾虎子也。及八九歲。令葛光教之讀書。十日一令乘馬。追錄統功。封烈亭侯。還其故兵。後烈有罪。免。封復襲爵領兵。

謹案。目錄此下有徐盛傳。今闕。

潘璋字文珪。東郡發干人也。孫權爲陽羨長。始往隨權。性博蕩嗜酒。居貧好賒酤。債家至門。輒言後豪富相還。權奇愛之。因使召募得百餘人。遂以爲將。討山賊有功。署別部司馬。後爲吳大市刺。盜賊斷絕。由是知名。遷豫章西安長。劉表在荊州。民數被寇。自璋在事。寇不入境。比縣建昌。起爲賊亂。轉領建昌。加武猛校尉。討治惡民。旬月盡平。召合遺散得八百人。將還建業。合肥之役。張遼奄至。諸將不備。陳武鬪死。宋謙徐盛皆披走。璋次在後。便馳進。橫馬斬謙。盛兵走者二人。兵皆還戰。權甚壯之。拜偏將軍。遂領百校屯

半州權征忠義。璋與朱然斷其走道。到臨沮。住夾口。璋部下司馬馬忠禽之。并其子平。都督趙累等。權卽分宜都秭歸二縣爲固陵郡。拜璋爲太守。振威將軍。封溧陽侯。甘寧卒。又并其軍。昭烈出夷陵。璋與陸遜并力拒之。璋部下斬漢護軍馮習等。所殺傷甚衆。拜平北將軍襄陽太守。魏將夏侯尚等圍南郡。分前部三萬人作浮橋。渡百里洲上。諸葛瑾楊粲並會兵赴救。未知所出。而魏兵日渡不絕。璋曰。魏勢始盛。江水又淺。未可與戰。便將所領于洲上流五十里。伐葦數百萬束。縛作大筏。欲順流放火。燒敗浮橋。作筏畢。伺水長當下。尙便引退。璋下備陸口。權稱尊號。拜右將軍。璋爲人粗猛。禁令肅然。好立功。謹按。今志作好立功。此作好立功。語意自明。所領兵馬不過數千。而其所在常如萬人。征伐止頓。便立軍市。他軍所無。皆仰取足。然性奢泰。末年彌甚。服物僭擬。吏兵富者。或殺取其財物。數不奉法。監司舉奏。權惜其功。而輒原不問。嘉禾二年卒。子平以無行徙會稽。璋妻居建業。賜田宅。復客五十家。

謹案目錄此下有丁奉傳今闕

議曰。程普諸將皆江表虎臣。慶兵衛主。攻堅軋敵。興王定霸。孫氏兄弟。卒立國建號。諸將之力也。若黃蓋之水戰。而用火攻。能用奇者也。蔣欽之不挾私怨。而舉徐盛。凌統之親賢下士。輕財重義。陳表傾家養士。妻子露立。並有良將之規。甘寧之奢侈。潘璋之不法。權皆容之。許寧報蘇飛之恩。不使統復父操之讎。馭將之術也。丁奉恃功而驕。不容于虐主。宜哉。孫盛曰。孫權養士。傾心竭思。以求其死力。泣周泰之夷。殉陳

武之妾請呂蒙之命育凌統之孤故仁澤內著而能屈強荆吳然三良從穆秦師以之不征魏妾既出杜回以之僇仆也原注左氏傳秦伯任好卒以子車氏之三子掩息仲行絳虎爲殉皆秦之良權杖計任術以生從

死世祚之促不亦宜乎

贊曰吳將剽輕殆多譎計莫肯下人卒自稱帝摩創撫孤動輒流涕駕馭有術驅策有方果保江東不負桓王

續後漢書卷第五十九

列傳第五十六

吳臣

朱治子才

朱然子施

呂範

朱桓

謹案此卷傳文全闕止存議贊

議曰朱治呂範以勳舊重朱然朱桓以膽勇稱皆隱然敵國有古來大將之風施續沈鷺明略將領有餘峻嶒之亂懼爲魏乘召漢人使兼并而爲之應雖卒不行可謂有撥亂反正之志矣權謂呂範忠篤亮直可方吳漢終以大司馬處之官人以才而不以舊所以能成霸業也贊曰天分鼎裂鷺搏狼抗成霸安疆式資良將形勢深阻江山沈雄勢常北向以守爲攻舟楫是利武騎無用矯矯諸臣功崇信重

續後漢書卷第六十

列傳第五十七

吳臣

薛綜子翊

胡綜徐詳

駱統交俊

陸瑁

是儀

李衡

薛綜字敬文。沛郡竹邑人也。其先齊孟嘗君封薛。高祖定天下，求其後，得陵國二人，欲封之。兄弟相推，莫適立。去之竹邑，遂以薛氏自國。至綜，世典州郡，為著姓。綜明經，善屬文，有異才。少依族人，避地交州。從劉熙學。士燮既附，召綜為五官中郎。除合浦交趾太守。時交土始開，刺史呂岱率師討伐。綜與俱行。越海至九真，事畢還。守謁者僕射。西使張奉於權前，列尚書闕澤姓名，以嘲澤。澤不能答。綜下行酒，因勸酒曰：「蜀者何也？有犬為獨，無犬為蜀。橫目句身，豕入其腹。」奉曰：「不當復列君吳邪？」綜應聲曰：「無口為天，有口為吳。君臨萬邦，天子之都。於是衆坐喜笑而奉無以對。其樞機敏捷皆此類也。」原注：江表傳：費禕聘於吳。陸見葛恪相對嘲難。晉及蜀吳。禕問曰：蜀字云何。恪曰：有水者濁。無水者蜀。橫目句身。豕入其腹。禕復問吳字云何。恪曰：無口者天。有口者吳。下臨滄海。天子帝都。與本傳不同。裴松之曰：諸書本句身或作句身。以為既云橫目。則宜曰句身。呂岱從交州召出。綜懼繼岱者非其人，上疏曰：「昔帝舜南巡，卒於蒼梧。秦置桂林南海象郡，然則四國之內屬也。有自來矣。趙佗起番禺，懷服百越之君，珠官之南是也。漢武帝誅呂嘉，開九郡，設交趾刺史。」

以鎮監之。山川長遠，習俗不齊，言語同異，重譯乃通。民如禽獸，長幼無別，椎結徒跣，貫頭左衽。長吏之設，雖有若無。自斯以來，頗徙中國罪人，雜居其間，稍使學書，粗知言語，使驛往來，觀見禮化。及後錫光爲交趾，任延爲九真太守，乃教其耕犁，使之冠履，爲設媒官，使知聘娶，建立學校，導之經義。由此以降，四百餘年，頗有士類。謹案：士類陳志作似類。誤。自臣昔客始至之時，珠崖、徐州縣嫁娶，皆須八月引戶人民集會之時，男女自相可適，乃爲夫妻。父母不能止，交趾、儋、冷、九真、都龐二縣，皆兄死弟妻其嫂，世以此爲俗。長吏恣聽，不能禁制。日南郡男女裸體，不以爲羞。由此言之，可謂蟲豸。有靦面目，爾然而土廣人衆，阻險毒害，易以爲亂。難使從治。縣官羈縻，示令威服。田戶之租賦，裁取供辦，貴致遠珍名珠、香藥、象牙、犀角、瑇瑁、珊瑚、琉璃、鸚鵡、翡翠、孔雀、奇物，充備寶玩，不必仰其賦入以益中國也。然在九旬之外，長吏之選，類不精覈。漢時法寬，多自放恣，故數反違法。珠崖之廢，起於長吏，覩其好髮，髡取爲髮。及臣所見南海、黃蓋爲日南太守，下車以供說不豐，搃殺主簿，仍見驅逐。九真太守儋萌，爲妻父周京作主人，并請大吏酒酣作樂，功曹番歆起舞，屬京不肯起，歆猶迫彊。萌忿杖歆，亡於郡內。歆弟苗帥衆攻府，毒矢射萌，萌至物故。交趾太守士燮遣兵致討，卒不能克。又故刺史會稽朱符，多以鄉人虞裒、劉彥之徒分作長吏，侵虐百姓。彊賦於民，黃魚一枚，收稻一斛。百姓怨叛，山賊並出。攻州突郡，符走入海。流離喪亡，次得南陽張津，與荊州牧劉表爲隙。兵弱敵彊，歲歲與軍。諸將厭患，去留自在。津小檢攝，威武不足，爲所凌侮。遂至殺沒，後得零陵賴恭先。

輩仁謹不曉時事。表又遣長沙吳巨爲蒼梧太守。巨武夫輕悍。不爲恭服。所取相怨恨。逐出恭。求步騭。是時津故將夷廖錢博之徒尙多。騭以次鉏治。綱紀適定。會仍召出呂岱。既至。有士氏之變。譚案。士氏今志此合。與越軍南征平討之日。改置長吏。章明王綱威加萬里。大小承風。由此言之。綏邊撫裔。實有其人。收伯之任。旣宜清能。荒流之表。禍福尤甚。今日交州雖名粗定。尙有高涼宿賊。其南海。蒼梧。鬱林。珠官。四郡界未綏。依作寇盜。專爲亡叛。逋逃之藪。若岱不復南。新刺史宜得精密。檢攝八郡方略。知計能。稍稍以漸能治高涼者。假以威寵。借之形勢。責其成效。庶幾可補復。如但中人。近守常法。無奇數異術者。則羣惡日滋。久遠成害。故國之安危。在於所任。不可不察也。竊懼朝廷忽輕其選。故敢竭愚情。以廣聖恩。黃龍三年。建昌侯慮爲鎮軍大將軍屯半州。以綜爲長史。外掌衆事。內授書籍。慮卒入守賊曹。尙書遷尙書僕射。時公孫淵降而復叛。權盛怒。欲自征討。綜上疏諫曰。夫帝王者。萬國之元首。天下之所繫命也。是以居則重門擊柝。以戒不虞。行則清道按節。以養威嚴。蓋所以存萬安之福。鎮四海之心。昔孔子疾時。託乘桴浮海之語。季由斯喜。拒以無所取才。漢元帝欲御樓船。薛廣德請刎頸以血染車。何則。水火之險至危。非帝王所宜涉也。諺曰。千金之子。坐不垂堂。況萬乘之尊乎。今遼東戎貊小國。無城池之固。備禦之術。器械銖鈞。犬羊無政。往必禽克。誠如明詔。然其方土寒峭。穀稼不殖。民習鞍馬。轉徙無常。卒聞大軍之至。自度不敵。鳥驚獸駭。長驅奔竄。一人匹馬。不可得見。雖獲空地。守之無益。此不可一也。又加洪流混澗。有成山之難。

海行無常。風波難免。倏忽之間。人船異勢。雖有堯舜之德。智無所施。賁育之勇。力不得設。此不可二也。加以鬱霧冥其上。鹹水蒸其下。善生流腫。轉相汚染。凡行海者。稀無斯患。此不可三也。天生神聖。顯以符瑞。當乘平喪亂。康此民物。嘉祥日集。海內垂定。逆虜凶虐。滅亡在近。中國一平。遼東自斃。但當拱手以待爾。今乃違必然之圖。尋至危之阻。忽九州之固。肆一朝之忿。既非社稷之重計。又開闢以來所未嘗有。斯誠羣僚所傾身側息。食不甘味。寢不安席者也。惟陛下抑雷霆之威。忍赫斯之怒。遵乘橋之安。遠履冰之險。則臣子賴祉。天下幸甚。時羣臣多諫。權遂不行。正月乙未。權敕綜祝祖。不得用常文。綜承詔卒造。文義誠信。辭藻粲爛。謹案。陳志作文義信辭。無誠字。漢字。權曰。復爲兩頭。使滿三也。綜復再祝。辭令皆新。衆咸稱善。赤烏三年。徙選曹尙書。五年爲太子少傅。領選職如故。權賜綜紫綬囊。綜陳讓紫色非所宜服。權曰。太子年少。涉道日淺。君當博之以文。約之以禮。茅土之封。非君而誰。是時綜以名儒居師傅之位。仍兼選舉。甚爲優重。六年春卒。凡所著詩賦。雜論數萬言。名曰私載。又定五宗圖述。二京解。皆傳於世。子翊。孫休時爲五官中郎將。遣至蜀求馬。及還。休問蜀政得失。對曰。主闇而不知其過。臣下容身以求免罪。入其朝不聞正言。經其野民皆菜色。臣聞燕雀處堂。子母相樂。自以爲安也。突決棟焚。而燕雀恬然不知禍之將及。其是之謂乎。累遷威南將軍。伐交趾。還道病卒。翊弟瑩字道言。初爲祕府中書郎。孫休卽位。爲散騎中常侍。數年。以病去官。孫皓初爲左執法。遷選曹尙書。及立太子。又領少傅。建衡三年。皓追歎瑩父綜遺文。且命瑩繼作。瑩獻

詩曰。惟臣之先。昔仕於漢。奕世綿綿。頗涉臺觀。暨臣父綜。遭時之難。卯金失御。邦家毀亂。適茲樂土。庶存子遺。天啓其心。東南是歸。厥初流隸。困於蠻垂。大皇開基。恩德遠施。特蒙詔命。拯擢泥汗。釋放巾褐。受職剖符。作守合浦。在海之隅。遷入京輦。遂升機樞。枯瘁更榮。絕統復紀。自微而顯。非願之始。亦惟寵遇。心存足止。重值文皇。建號東宮。乃作少傅。光華益隆。明明聖嗣。至德謙崇。禮遇兼加。惟渥惟豐。哀哀先臣。念竭其忠。洪恩未報。委世以終。嗟臣蔑賤。惟昆及弟。幸生幸育。託綜遺體。過庭既訓。頑蔽難啓。堂構弗克。志存耨耕。豈悟聖朝。仁澤流盈。追錄先臣。愍其無成。是濟是拔。被以殊榮。翊忝千里。受命南征。旌旗備物。金革揚聲。及臣斯陋。實闇實微。既顯前軌。人物之機。復傳東宮。繼世荷輝。才不逮先。是忝是違。乾德博好。文雅是貴。追悼亡臣。冀存遺類。如何愚允。曾無髣髴。瞻被舊寵。顧此頑虛。孰能忍愧。臣實與居。夙夜反側。克心自論。父子兄弟。累世蒙恩。死惟結草。生誓殺身。雖則灰隕。無報萬分。是歲。何定建議。鑿聖谿。以通江淮。皓令瑩督萬人往。以多盤石。難施功。罷還。出爲武昌左部督。後定被誅。皓追聖谿事。下瑩獄。徙廣州。右國史華覈上疏曰。臣聞五帝三王。皆立史官。敍錄功美。垂之無窮。漢時司馬遷班固。咸命世大才。所撰精妙。與六經俱傳。大吳受命。建國南土。大皇帝末年。命太史令丁孚。郎中項峻。始撰吳書。孚峻俱非史才。其所撰作。不足紀錄。至少帝時。更差韋曜。周昭。薛瑩。梁廣。及臣五人。訪求往事。所共撰立。備有本末。昭廣先亡。曜負恩蹈罪。瑩出爲將。復以過徙。其書遂委滯。迄今未譔。奏臣愚淺才劣。適可爲瑩等記注而已。若使譔合。

必襲乎峻之跡。懼墮大皇之元功。損當世之盛美。瑩涉學既博。文章尤妙。同寮之中。瑩爲魁首。今者見吏雖多。經學記述之才如瑩者少。是以懷悽爲國惜之。實欲使卒垂成之功。編於前史之末。奏上之後。退填溝壑。無所復恨。皓遂召瑩還爲左國史。頃之。選曹尙書同郡繆禕以執意不移。爲羣小所疾。左遷衡陽太守。既拜。又追以職事見詰責。拜表陳謝。因過詣瑩。復爲人所白。云禕不懼罪。多將賓客會聚瑩許。乃收禕下獄。徙桂陽。瑩送廣州。未至。召瑩還復職。是時法政多謬。舉措煩苛。瑩每上便宜。陳綏刑簡役。以濟育百姓。事或施行。遷光祿勳。天紀四年。晉軍征皓。皓奉書於司馬卞王渾。王濬請降。其文瑩所造也。瑩既至雒陽。特先見敍爲散騎常侍。答問處當皆有條理。大康三年卒。或謂吳郡陸喜曰。瑩於吳士當爲第一乎。喜曰。瑩在四五之間。安得爲第一。夫以孫皓無道。吳國之士。沈默其體。潛而勿用者。第一也。避尊居卑。祿以代耕者。第二也。侃然體國。執正不懼者。第三也。斟酌時宜。獻納微益者。第四也。溫恭修慎。不爲諂媚者。第五也。過此以往。不足復數。彼上士多淪沒而遠悔吝。中士有聲位而近禍殃。觀瑩之處身本末。又安得爲第一乎。瑩著書八篇。曰新議。子兼字令長。清素有氣局。歷位二宮。丞相長史。元帝時爲丹陽尹。尙書。太子太傅。自綜至兼三世。傳東宮云。

原注。吳志。于寶晉紀曰。武帝從容問瑩曰。孫皓之所以亡者何也。瑩對曰。歸命侯臣皓之君吳也。昵近小人。刑罰妄加。大臣大將。無所親信。人人憂恐。各不自

保。危亡之聲。實由於此。帝遂問吳士存亡者之賢愚。瑩由以狀對。

胡綜字偉則。汝南固始人也。少孤。母將避難江東。孫策領會稽太守。綜年十四。爲門下循行。置吳與孫權

共讀書策卒。權爲討虜將軍。以綜爲金曹從事。討黃祖。拜鄂長。權爲車騎將軍。召綜還爲書部。與是儀徐詳俱典軍國密事。昭烈下白帝討權。權以見兵少。使綜料諸縣。得六千人。立解煩兩部。詳領左部。綜領右部。督戲口將晉宗。叛歸魏。魏以宗爲蕪春太守。去江東數百里。數爲寇害。權使綜與賀齊輕行掩襲。生虜得宗。加建武中郎將。魏拜權爲吳王。封綜儀。詳皆爲亭侯。黃武八年夏。黃龍見舉口。謹案舉口與毛本合傳。黃龍元年夏口武昌並見黃龍。當以夏口爲是。通志亦作夏口。於是權稱尊號。因瑞改元。又作黃龍大牙。常在中軍。諸軍進退。視其所向。命綜作賦曰。乾坤肇立。三才是生。狼弧垂象。實惟兵精。聖人觀法。是效是營。始作器械。爰求厥成。黃農創代。拓定皇基。上順天心。下息民災。高辛誅共。舜征有苗。啓有甘師。湯有鳴條。周之牧野。漢之垓下。靡不由兵。克定厥緒。明明大吳。實天生德。神武是經。惟皇之極。乃自在昔。黃虞是祖。越歷五代。繼世在下。應期受命。發迹南土。將恢大猷。革我區夏。乃律天時。制爲神軍。取象太一。五將三門。疾則如電。遲則如雲。進止有度。約而不煩。四靈旣布。黃龍處中。周制日月。實曰太常。桀然特立。六軍所望。仙人在上。鑒觀四方。神實使之。爲國休祥。軍欲轉向。黃龍先移。金鼓不鳴。寂然變施。闡謨若神。可謂祕奇。在昔周室。亦烏銜書。今也大吳。黃龍吐符。合契河洛。勳與道俱。天贊人和。僉曰惟休。權與漢使約中。分天下。重申前好。盟載之文。綜所作也。爲時所稱。未幾。詳綜並爲侍中。進封鄉侯。兼左右領軍。時魏降人。或云魏都督河北。振威將軍吳質。頗見猜疑。綜乃僞爲質作降書三條。其一曰。天網弛絕。四海分崩。羣生憔悴。士人播越。兵寇所加。邑無居

民風塵煙火往往而處。自三代以來。大亂之極。未有若今時者也。臣質志薄。處時無方。繫於壤土。不能翻飛。遂爲曹氏執事戎役。遠處河朔。天衢隔絕。雖望風慕義。思託大命。愧無因緣。得展其志。每往來者。竊聽風化。伏知陛下齊德乾坤。同明日月。神武之姿。受之自然。敷演皇極。流化萬里。自江以南。戶受覆燾。英雄俊桀。上達之士。莫不心歌腹詠。樂在歸附者也。今年六月末。奉聞吉日。龍興踐阼。恢宏大猷。整理天綱。將使遺民覩見定主。昔武王伐殷。殷民倒戈。高祖誅項。四面楚歌。方之今日。未足以喻。臣質不勝昊天至願。謹遣所親同郡黃定。恭行奉表。及託降叛間。關求達。其欲所陳。載列於左。其二曰。昔伊尹去夏入商。陳平委楚歸漢。書功竹帛。垂名後世。世主不謂之背誕者。以爲知天命也。臣昔爲曹氏所見交接。外託君臣。內如骨肉。恩義綢繆。有合無離。遂受偏方之任。總河北之軍。當此之時。志望高大。永與曹氏同死俱生。惟恐功之不建。事之不成。爾及曹氏之亡。後嗣繼立。幼沖統政。讒言彌興。同儕者以勢相害。異趣者得聞其言。而臣受性簡略。素不下人。視彼數子。意實迫之。此亦臣之過也。遂爲邪議所見。搆會招致猜疑。誣臣欲叛。雖識眞者。保明其心。世亂讒勝。餘嫌猶在。常懼一旦橫受無辜。憂心孔疚。如履冰炭。昔樂毅爲燕昭王立功於齊。惠王卽位。疑奪其任。遂去燕之趙。休烈不虧。彼豈欲二三其德。蓋爲功名不建。而懼禍之將及也。昔遣魏郡周光。以賈販爲名。託叛南詣。宣達密計。時以倉卒。未敢便有章表。使光口傳而已。以爲天下大歸可見。天意所在。非吳而誰。此方之民。思爲臣妾。延頸舉踵。惟恐兵來之遲。爾若使聖恩少加。信納。當以

河北承望王師。款心赤實。天日是鑒。而光去經年。不聞咳唾。未審此意。竟得達不。瞻望長歎。日月以幾。魯望高子。何足以喻。原注。公羊傳。冬。齊高子來盟。高子者何。齊大夫也。何以不稱使我。無君也。然則何以不名。魯。曾不與師徒。以言而已矣。桓公使高子將南陽之甲。立僖公而城魯。或曰。自鹿門至於爭門者是也。或曰。自爭門至於東門者是也。魯人至今以爲美談。曰。猶望高子也。又臣今日見待稍薄。蒼蠅之聲。綿綿不絕。必受此禍。遲速事爾。臣私度陛下未垂明慰者。必以臣質貫穿仁義之道。不行若此之事。謂光所傳。多虛少實。或謂此中有他消息。不知臣質搆譏見疑。恐受大害也。且臣質若實有罪。自當奔赴鼎鑊。束身待罪。此蓋人臣之宜也。今日無罪。橫見譖毀。將有商鞅白起之禍。尋惟事勢。去亦宜也。死而弗義。不去何爲。樂毅之出。吳起之走。君子傷其遇。未有非之者。願陛下推古況今。不疑怪於臣質也。又念人臣獲罪。當如伍員。奉己自效。不當傲倖。因事爲利。然今與古厥勢不同。南北悠遠。江湖隔絕。自不舉事。何得濟免。是以忘志士之節。而思立功之義也。且臣質又以曹氏之嗣。非天命所在。政弱刑亂。柄奪於臣。諸將專威於外。各自爲政。莫或同心。士卒衰耗。帑藏空虛。綱紀毀廢。上下並昏。想前後數得降叛。具聞此間。兼弱攻昧。宜應天時。此實陛下進取之秋。是以區區敢獻其計。今若內兵淮泗。據有下邳。荆揚二州。聞聲響應。臣從河北席卷而南。形勢一連。根牙永固。關西之兵。繫於所衛。青徐二州。不敢撤守。許雒餘兵。衆不滿萬。誰能來東。與陛下爭者。此誠千載一會之期。可不深思而熟計乎。及臣所在。既自多馬。加以羌胡常以三四月中美草時。驅馬來出。隱度今者可得三千餘匹。陛下出軍。當投此時。多將騎士來就馬爾。此皆

先定所一二。知凡兩軍不能先究虛實。今此間實羸。易可克定。陛下舉動。應者必多。上定洪基。使普天一統。下令臣質。建非常之功。此乃天也。若不見納。此亦天也。願陛下思之。不復多陳。其三曰。昔許子遠舍袁就曹。規畫計較。應見受納。遂破袁軍。以定曹業。向使曹氏不信子遠。懷疑猶豫。不決於心。則今天下袁氏有也。願陛下思之。間開界上將閻浮。趙楫。欲歸大化。唱和不速。以致破亡。今臣款款。遠授其命。若復懷疑。不時舉動。令臣孤絕。受此厚禍。卽恐天下雄夫烈士。欲立功者。不敢復託命陛下矣。願陛下思之。皇天后土。實聞其言。此文既流行。而質已入爲侍中矣。二年。青州人隱蕃有口才。曹叡使詐叛入吳。令求廷尉重案。大臣以離間之。既至上書曰。臣聞紂爲無道。微子先出。高祖寬明。陳平先入。臣年二十二。委棄封域。歸命有道。賴蒙天靈。得自全致。臣至止有日。而主者同之。降人未見精別。使臣微言妙旨。不得上達。於邑三歎。曷惟其己。謹詣闕拜章。乞蒙引見。權卽召入。蕃謝答問。及陳時務。甚有辭觀。綜時侍坐。權問何如。綜對曰。蕃上書大語。有似東方朔。巧捷詭辯。有似禰衡。而才皆不及。權又問。可堪何官。綜對曰。未可以治民。且試以都釐小職。權以蕃盛論刑獄。用爲廷尉監。左將軍朱據。廷尉郝普。稱蕃有王佐之才。普尤與之親善。常怨歎其屈。於是聲名甚盛。車馬雲集。賓客盈堂。蕃遂謀竊發。事覺亡走。捕得。考問黨與。蕃無所言。權使將入。謂曰。何乃以肌肉爲人受毒乎。蕃曰。孫君丈夫圖事。豈無儔伴。烈士死不足相牽爾。遂閉口而死。權謂普曰。卿前盛稱蕃。又爲之怨望朝廷。使蕃反叛。皆汝之由。普自殺。據禁止歷時。乃解。拜綜偏將軍。兼左

執法領辭訟。遼東之事。輔吳將軍張昭以諫權言辭切至。權大怒。其和協彼此使之無隙。綜有力焉。性嗜酒。酒後歡呼極意。或推引杯觴搏擊左右。權愛其才。弗責也。自權統事。諸文誥策命。鄰國書符。皆綜所作也。初以內外多事。特立科長吏。遭喪皆不得去。而數有犯者。權患之。使朝臣下議。綜議以爲宜定科文。示以大辟。行之一人。其後必絕。遂用綜言。由是奔喪乃斷。赤烏六年卒。子冲嗣。冲平和有文幹。天紀中爲中書令。原注。吳錄。冲後仕晉尙書郎吳郡太守。徐詳字子明。吳地記曰。吳主遣徐詳至魏。魏太祖謂詳曰。孤比者願濟橫江之津。是隨亡矣而蹠夫差。恐天下之事去矣。太祖大笑曰。徐生無乃逆詐乎。吳郡烏程人。先綜死。

謹案目錄此下有略統傳今闕止存附傳謝淵一篇

謝淵者字休德。少修德操。躬秉耒耜。舉孝廉。歷官稱職。累遷建武將軍。雖在戎旅。尤垂意人物。統子秀被門庭之謗。衆論狐疑。莫能證明。淵聞之。歎曰。公緒早夭。同盟所哀。聞其子志行明辨。而被闇昧之謗。望諸夫子。烈然高斷。而各懷遲疑。非所望也。秀卒見明。無復瑕玷。終爲顯士。淵之力也。諸案。陳志。謝淵在陸遜傳注。此附略統傳者。以辨略秀事合之耳。

陸瑁字子璋。丞相遜弟也。少好學。篤義。陳國陳融。陳留濮陽逸。沛郡蔣纂。廣陵袁迪等皆單貧有志。就瑁遊處。原注。迪孫暉字思光。作獻帝春秋云。迪與張紘等俱遊江。迪父紘爲太傅掾。張超之討董卓。以紘領廣陵事。瑁割少分甘。與同豐約。及同郡徐原。爰居會稽。

素不相識。臨死遺書託以孤弱。瑁爲起立墳墓。收導其子。又瑁從父績早亡。二男一女。諸案。陸績傳。長子宏次子叙。此云二男與

續傳合·陳志
作一男誤

皆數歲以還。瑁迎攝養。至長乃別。州郡辟舉皆不就。時尙書暨監盛明臧否。差斷三署。頗揚

人闇昧之失。以顯其謫。瑁與書曰。夫聖人嘉善矜愚。忘過記功。以成美化。加今王業始建。將一大統。此乃漢高棄瑕錄用之時也。若令善惡異流。貴汝穎月旦之評。誠可以厲俗明教。然恐未易行也。宜遠模仲尼之汎愛。中則郭泰之宏濟。近有益於大道也。豈不能行。卒以致敗。嘉禾元年。公車徵瑁。拜議郎。選曹尙書。孫權忿公孫淵之巧詐反覆。欲親征之。瑁上疏諫曰。臣聞聖王之御遠夷。羈縻而已。不常保有。故古者制地。謂之荒服。言恍惚無常。不可保也。今淵東夷小醜。屏在海隅。雖託人面。與禽獸無異。國家所爲。不愛貨寶。遠以加之者。非嘉其德義也。誠欲誘納。愚弄以規其馬耳。淵之驕黠。恃遠負命。此乃荒貆常態。豈足深怪。昔漢諸帝亦嘗銳意以事外夷。馳使散貨。充滿西域。雖時有恭從。然其使人見害。財貨并沒。不可勝數。今陛下不忍悄悄之忿。欲越巨海。身踐其土。羣臣愚議。竊謂不安。何者。北寇與國壤地連接。苟有間隙。應機而至。夫所以越海求馬。曲意於淵者。爲赴目前之急。除腹心之疾也。而更棄本追末。捐近治遠。忿以改規。激以動衆。斯乃猾虜所願聞。非大吳之至計也。又兵家之術。以功役相疲。勞逸相待。得失之間。所覺輒多。且沓渚去淵。道里尙遠。今到其岸。兵勢三分。使彊者進取。次當守船。又次運糧。行人雖多。難得悉用。加以單步負糧。經遠深入。賊地多馬。邀截無常。若淵狙詐。與北未絕。動衆之日。唇齒相濟。若實子然無所憑賴。其畏怖遠送。或難卒滅。使天誅稽於朔野。山虜承間而起。恐非萬安之長慮也。權未許。瑁重上疏曰。夫

兵革者。固前代所以誅暴亂。威四夷也。然其役皆在姦雄已除。天下無事。從容廟堂之上。以餘議議之耳。至於中夏鼎沸。九域槃牙之時。率須深根固本。愛力惜費。務自休養。以待鄰敵之闕。未有正於此時。舍近治遠。以疲軍旅者也。昔尉佗叛逆。僭號稱帝。於時天下乂安。百姓殷阜。帶甲之數。糧食之積。可謂多矣。然漢文猶以遠征不易。重興師旅。告喻而已。今凶桀未殄。疆場猶警。雖蚩尤鬼方之亂。故當以緩急差之。謹案。故今志作政。通志作故。與此合。未宜以淵爲先。願陛下抑威住計。暫寧六師。潛神嘿規。以爲後圖。天下幸甚。權再覽瑁卒。子喜涉文籍。好人倫。孫皓時爲選曹尙書。

謹案。目錄此下有是儀傳。今闕。

李衡字叔平。襄陽卒家子也。漢末入吳。爲武昌部民。聞羊衡有人物之鑒。往見之。衡曰。多事之世。尙書劇曹郎才也。時校事郎呂壹操弄權柄。大臣畏偪莫敢言。衡曰。非李衡無能困之者。遂共薦爲郎。權引見。衡口陳壹姦短數千言。權有愧色。數日壹被誅。而衡大見顯擢。後爲諸葛恪司馬。幹恪府事。恪被誅。爲丹陽太守。時孫休在郡治。衡數以法繩之。妻習氏每諫衡。衡不從。會休立。衡憂懼。謂妻曰。不用卿言。以至於此。欲奔魏。妻曰。不可。君本庶民爾。先帝相拔過重。旣數作無禮。而復逆自猜嫌。逃叛求活。以此北歸。何面見中國人乎。衡曰。計何所出。妻曰。琅琊王素好善慕名。方欲自顯于天下。終不以私嫌殺君。可自囚詣獄。表

列前失顯求受罪。如此乃當逆見優饒。非但直活而已。衡從之。休下詔曰。丹陽太守李衡。以往事之嫌。自拘有司。射鈞斬祛。在君爲君。遣衡還郡。勿令自疑。仍加威遠將軍。授以棨戟。衡每欲治家。妻輒不聽。後密遣客十人於武陵龍陽汎洲上作宅。種柑橘千株。臨死敕兒曰。汝母惡吾治家。故窮如是。然吾州里有千頭木奴。不責汝衣食。歲上一匹絹。亦可用矣。原注。元一統志太史公言江陵千株橘。其人與千戶侯等。蓋謂此也。衡亡後。兒以白母。母曰。此當是種柑橘也。汝家失十戶客。來七八年。必汝父遺爲宅。汝父恒稱太史公言江陵千樹橘。當封君家。吾答曰。且人患無德義。不患不富。若貴而能貧。方好爾。用此何爲。吳末。衡柑橘成。歲得絹數千匹。晉咸康中。其宅址枯樹猶存焉。

謹案。此卷議贊闕。

續後漢書卷第六十一

列傳第五十八

吳臣

賀齊子建弟景

全琮子澤緒

呂岱徐原

鍾離牧少子徇

潘濬子肅茂

周魴子處

謹案賀齊傳闕

全琮字子璜。吳郡錢唐人也。父柔。靈帝時舉孝廉。補尚書郎。右丞董卓之亂。棄官歸州。辟別駕從事。詔書就拜會稽東部都尉。孫策到吳。柔舉兵先附。策表柔為丹陽都尉。孫權為車騎將軍。以柔為長史。徙桂陽太守。柔嘗使琮齎米數十斛到吳。有所市易。琮至皆散用。空船而還。柔大怒。琮頓首曰。愚以所市非急。而士大夫方有倒懸之患。故便賑贍。不及啓報。柔更奇之。原注。徐衆評曰。禮子事父無私財。又不敢私施。所以避尊上也。棄命專財而以邀名。未盡父子之禮。裴松之曰。子路問閔斯行諸。子曰。有父兄在。琮輒散父財。誠非子道。然士類縣命。憂在朝夕。權其輕重。以先人急。斯亦馮諼市義汲黯賑救之類。衆謂邀名。或負其心。是在是時中州士人避亂而南。依琮居以百數。琮傾家給濟。與共有無。遂顯名遠近。後權以為奮威校尉。授兵數千人。使討山越。因開募召得精兵萬餘人。出屯牛渚。稍遷偏將軍。建安二十四年。忠義園樊襄陽。琮上疏陳侯可討之計。權時已與呂蒙陰議襲之。恐事泄。故寢琮表不答。及禽侯。權置酒公安。顧謂琮曰。君前陳此。孤雖不相答。今日之捷。

抑君之功也。於是封新陽亭侯。

謹案。吳志作封陽華亭侯。

黃武元年。魏以舟師大出洞口。權使呂範督諸將拒之。軍營

相望。敵數以輕船鈔擊。琮常帶甲仗兵伺候不休。頃之。敵數千人出江中。琮擊破之。梟其將軍尹盧。遷琮

綏南將軍。進封錢唐侯。四年。假節領九江太守。七年。權到皖。使琮與輔國將軍陸遜擊曹休。破之於石亭。

是時。丹陽吳會山民復爲寇賊。攻沒屬縣。權分三郡險地爲東安郡。治富春。琮領太守。至。明賞罰。招誘降

附。數年。得萬餘人。權召琮還牛渚。罷東安郡。琮過錢唐。脩祭墳墓。麾幢節蓋。焜耀閭里。大會宗族六親。故

舊。施散千餘萬。鄉邑以爲榮。黃龍元年。遷衛將軍。左護軍。徐州牧。尙公主。初。琮爲將甚勇決。當敵臨難。奮

不顧身。及作督師。養威持重。每御軍。常任計策。不營小利。權太子登出征。軍次安樂。羣臣莫敢諫。琮密表

曰。古來太子未嘗偏征也。故從曰撫軍。守曰監國。今太子東出。非古制也。臣竊憂疑。權卽命登旋軍。嘉禾

二年。督步騎五萬攻六安。六安民皆散走。諸將欲分兵捕之。琮曰。夫乘危徼倖。舉不百全者。非國家大體

也。今分兵捕民。得失相半。豈可謂全哉。縱有所獲。猶不足以衍弱敵。如或邂逅。虧損非小。與其獲罪。琮寧

以身受之。不敢徼功以負國也。亦烏九年。遷右大將軍。琮爲人恭順。善於承顏納規。言辭未嘗切迂。初。權

將圍珠崖及夷州。皆先問琮。琮曰。以聖朝之威。何向而不克。然殊方異域。隔絕瘴海。水土氣毒。自古有之。

兵入民出。必生疾病。轉相汙染。往者懼不能反。所獲何可多致。猥虧江岸之兵。以冀萬一之利。愚臣有所

不安。權不聽。軍行經歲。士衆疾疫死者十八九。權深愧悔。後言次及之。琮對曰。當是時。羣臣有不諫者。臣

以爲不忠。琮既親重宗族子弟，並蒙寵貴，賜累千金，然猶謙虛，接士貌無驕色。十二年卒，子懌嗣。後襲業領兵救諸葛誕於壽春，出城先降。魏以爲東平將軍，封臨湘侯。懌兄子禕、儀、靜等亦降魏，皆郡守列侯。琮長子緒，幼知名，奉朝請，出授兵，稍遷揚武將軍、牛渚都督。孫亮立，遷鎮北將軍，東關之役，緒與丁奉建議，引兵先出以破魏軍，封一子亭侯。年四十四卒。次子寄坐阿黨，魯王霸死，小子吳孫權外孫也，封都鄉侯。謹案：目錄此下有呂岱鍾離牧傳，今闕。

潘濬字承明，武陵漢壽人也。弱冠從宋仲子受學，爲人聰察，對問有機理。山陽王粲見而異之，由是知名。爲郡功曹，年三十，荊州牧劉表辟爲部江夏從事。時沙羨長賊穢不修，濬按殺之，一部震悚。後爲湘鄉令，治有名績，昭烈領荊州，以濬爲治中從事。及入蜀，留典州事。孫權殺忠義，并荆土，將吏皆歸附，而濬獨稱疾，遣人以牀就家，與致之。濬伏面著牀不起，涕泣交橫，哀哽不自勝。權慰勞與語，呼其字曰承明。昔觀丁父郡俘也，武王以爲軍帥，彭仲爽申俘也，文王以爲令尹，此二人卿荆國之先賢也。初雖見囚，後皆擢用，爲楚名臣，卿獨不肯降意，將以孤異古人之量邪？使親近以手巾拭其面，濬起，下地拜謝，卽以爲治中。荊州諸軍事一以諮之。武陵郡從事謹案：陳志作武陵郡，通志作郡，與此合。樊、鮑誘導諸夷，圖以武陵屬漢，外白差督督萬人往討之。權不聽，特召問濬。濬答以五千兵往，足以擒鮑。權曰：卿何以輕之？濬曰：鮑是南陽舊姓，頗能弄唇吻，而實無辯論之才。臣所以知之者，鮑昔嘗爲州人設饌，比至日中，食不可得，而十餘自起，此亦侏儒觀一

節之驗也。謹案。桓譚新論。侏儒觀一節而長短可知。權大笑而納其言。卽遣濬將五千往果斬平之。拜輔軍中郎將。授以兵。遷

奮威將軍。封常邊亭侯。丙元卒。濬并領元兵屯夏口。權稱尊號。拜少府。進封瀏陽侯。謹案。陳志作劉陽。通志作瀏。與此合。遷

太常。權數射雉。濬諫。權曰。相與別後。時時暫出爾。不復如往也。濬曰。天下未定。萬機務多。射雉非急。弦絕

括破。皆能爲害。乞特爲臣故息置之。濬出見雉翳故在手。自撤壞。權由是不復射雉。五谿蠻夷叛亂盤結。

權假濬節督諸軍討之。信賞必罰。法不可干。斬首獲生以萬數。自是羣蠻衰弱。驃騎將軍步騭屯漚口。求

召募諸郡以增兵。權以問濬。濬曰。豪將在民間。耗亂爲害。加隘有名勢。在所取媚。不可聽也。權從之。中郎

將豫章徐宗。名士也。嘗到京師。與孔融交結。然儒生誕節。部曲寬縱。不奉節度。爲衆作殿。濬遂斬之。降人

隱蕃。以口辯。謹案。降人志注作歸義。通志作歸義人。爲豪傑所善。濬子嘉亦與周旋饋餉之。濬聞大怒。疏責嘉曰。吾受國厚恩。

志報以命。爾輩在都。當念恭順。親賢慕善。何故與降虜交。以糧餉之。在遠聞此。心震面熱。惆悵累旬。疏到

急。就往使受杖一百。促責所餉。當時人咸怪濬。而蕃果圖叛。誅夷衆。乃服其先見。濬姨兄零陵蔣琬爲漢

大將軍。或有間濬於武陵太守衛旉者云。濬遣密使與琬相聞。欲自託旉以啓權。權曰。承明不爲此也。卽

封旉表以示濬。而召旉還。免官。先是。濬與陸遜俱駐武昌。共掌留事。還復故。時校事呂壹操弄威柄。奏按

丞相顧雍。左將軍朱據等皆見禁止。黃門侍郎謝玄語次問壹。顧公事何如。壹答不能佳。玄又問。若此公

免退。誰當代之。壹未答。玄曰。得無潘太常乎。壹良久曰。君語近之矣。玄謂曰。潘太常常切齒於君。但道遠

無因爾。今日代顧公。恐明日便擊君矣。壹大懼。遂解散雍事。濬求朝詣建業。欲盡辭極諫。至聞太子登已數言之而不見從。濬乃大請百寮。欲因會手刃殺壹。以身當之。爲國除患。壹密聞知。稱疾不行。濬乃進見。具陳壹之姦險。由此壹寵漸衰。後遂誅戮。權引咎責躬。因請讓大臣。赤烏二年。濬卒。子翥嗣。濬女配建昌侯慮。翥字文龍。拜騎都尉。代濬領兵。早卒。次子祕。權以姊陳氏女妻之。調湘鄉令。襄陽習溫爲荊州大公平。祕過辭溫。問曰。先君昔日謂君侯。謹案。陳志作先君。昔因君侯。誤。當爲州里議主。今果如其言。不審州里誰當復相代者。溫曰。無過於君。後祕爲尙書僕射。代溫爲公平。甚得州里之譽。芮元字文表。丹陽人。父祕。謹案。祕。陳志作祕。字宜嗣。從孫堅征伐有功。堅表爲九江太守。後轉吳郡。所在有聲。元兄良字文鸞。隨孫策平定江東。策以爲會稽東部都尉。卒。元領良兵。拜奮武中郎將。以功封溧陽侯。權爲子登擇淑媛。羣臣咸稱元父兄並以德義文武顯名三世。故遂聘元女爲妃。黃武五年卒。權甚惜之。

議曰。越爲吳患尙矣。春秋之季。卒仇吳而并之。方孫氏建業。山越潰其腹心。每掣權肘。爲內顧憂。賀齊諸臣。其施方略。終於弭寧。然後畫長江。跨淮漢。立國以爭天下。呂岱公恪。屹然老成。爲國典刑。鍾離牧清儉。蹈長者之規。潘濬方嚴疾惡。義形於色。梗梗有大節。有吳之棟石也。全琮以貴戚揜其忠勳。又以姦子敗惜哉。

謹案。目錄此下有周魴傳。今闕。

續後漢書卷第六十二

列傳第五十九

吳臣

陸凱子祿 弟允

陸抗子晏 景

陸凱字敬風。丞相遜族子。黃武初爲永興諸暨長。所在有治迹。拜建武都尉。領兵。雖統軍衆。手不釋書。好太元論。演其意以箴輒驗。赤烏中。除儋耳太守。討珠崖。斬獲有功。遷爲建武校尉。五鳳二年。討山賊陳恚於零陵。斬恚。拜巴丘督。偏將軍。封都鄉侯。轉爲武昌右都督。與諸將共赴壽春。還。累遷盪魏綏遠將軍。孫休立。拜征北將軍。假節領豫州牧。孫皓立。遷鎮西大將軍。都督巴丘。領荊州牧。進封嘉興侯。孫皓與晉平使者丁忠自北還。說皓弋陽可襲。凱諫止之。寶鼎元年。遷左丞相。皓性不好人視。己羣臣侍見。睛莫敢迂。謹案。睛字陳志作皆。凱說皓曰。君臣無不相識之道。若卒有不虞。不知所赴。皓聽凱自視。皓徙都武昌。揚土百姓。泝流供給。以爲患苦。又政事多謬。黎元窮匱。凱上疏曰。臣聞有道之君。以樂樂民。無道之君。以樂樂身。樂民者。其樂彌長。樂身者。不久而亡。夫民者。國之根也。誠宜重其食。愛其命。民安則君安。民樂則君樂。頃年以來。君威傷於桀紂。君明闕於姦雄。君惠閉於羣孽。無災而民命盡。無爲而國財空。辜無罪。賞無功。天爲作

妖而諸公卿媚上以求愛。困民以求饒。導君於不義。敗政於淫俗。臣竊爲痛心。今鄰國交好。四邊無事。當務息養士。實其廩庫。以待天時。而更傾動天心。騷擾萬姓。使民不安。大小呼嗟。此非保國養民之術也。臣聞吉凶在天。猶影之在形。響之在聲也。形動則影動。形止則影止。此分數乃有所繫。非在口之所進退也。昔秦所以亡天下者。但坐賞輕而罰重。政刑錯亂。民力盡於奢侈。目眩於美色。志濁於財寶。邪臣在位。賢者隱藏。百姓業業。天下苦之。是以遂有覆巢破卵之憂。漢所以彊者。躬行誠信。聽諫納言。惠及負薪。躬請巖穴。廣采博察。以成其謀。此往事之明證也。近者漢之衰末。三家鼎立。曹失綱紀。晉有其政。又益州危險。兵多精彊。閉門固守。可保萬世。而劉氏與奪乖錯。賞罰失所。君姿意於奢侈。民力竭於不急。是以爲晉所伐。君臣見虜。此目前之明驗也。臣聞於大理。文不及義。智慧淺劣。無復冀望。竊爲陛下惜。天下爾。臣謹奏。耳目所聞見。百姓所爲煩苛。刑政所爲錯亂。願陛下惜大功。損百役。務寬盪。忽苛政。又武昌土地實危險。而壻确。非王都安國養民之處。船泊則沈。漂陵居則峻危。且童謠言寧飲建業水。不食武昌魚。寧還建業死。不止武昌居。臣聞翼星爲變。熒惑作妖。童謠之言。生於天心。原注。裴松之載搜神記。吳以草創之國。信不堅固。邊屯守將。皆質其妻子。名曰保質。童子少年以類相與嬉遊者。日有十數。永安二年正月。有一異兒。長四尺餘。年可六七歲。衣青衣。來從羣兒戲。諸兒莫之識也。皆問曰。爾誰家小兒。今日忽來。答曰。見兒羣戲。樂故來爾。詳而視之。眼有光芒。燦燦外射。諸兒畏之。重問其故。兒乃答曰。爾惡我乎。我非人。乃熒惑星也。將以告爾三公。鉏司馬除。諸兒大驚。或走告大人。大人馳往觀之。兒曰。舍爾去乎。踈身而躍。卽以化矣。仰而視之。若引一匹練以登天。大人來者猶及見焉。飄飄漸高。有頃而沒。時吳政峻急。莫敢宣也。後五年而蜀亡。六年而晉興。至是而吳滅。司馬除矣。乃以安居而比死。足明天意。知民所苦也。臣聞國無三年之儲。謂之

非國。而今無一年之畜。此臣下之責也。而諸公卿位處人上。祿延子孫。曾無致命之節。匡救之術。苟進小利於君。以求容媚。荼毒百姓。不爲君計也。自從孫宏造義兵以來。耕種既廢。所在無復輸入。而分一家父子。異役廩食。日張畜積。日耗民有離散之怨。國有露根之漸。而莫之恤也。民力窮困。鬻賣兒子。調賦相仍。日以疲極。所在長吏。不加隱括。加有監官。既不愛民。務行威勢。所在騷擾。更爲煩苛。民苦二端。財力再耗。此爲無益而有損也。願陛下下一息此輩。矜哀孤弱。以鎮撫百姓之心。此猶魚鼈得免毒螫之淵。鳥獸得離羅網之網。四方之民。襁負而至矣。如此民可得保。先王之國存焉。臣聞五音令人耳不聰。五色令人目不明。此無益於政。有損於事者也。自昔先帝時。後宮列女及諸織絡。數不滿百。米有畜積。貨財有餘。先帝崩後。幼景在位。更改奢侈。不蹈先迹。伏聞織絡及諸徒坐。乃有千數。計其所長。不足爲國財。然坐食官廩。歲相承。此爲無益。願陛下料出賦嫁。給與無妻者。如此上應天心。下合地意。天下幸甚。臣聞殷湯取士於商賈。齊桓取士於車轅。周武取士於負薪。大漢取士於奴僕。明皇聖主。取士以賢。不拘卑賤。故其功德洋溢。名流竹素。非求顏色。而取好服捷口容悅者也。臣伏見當今內寵之臣。位非其人。任非其量。不能輔國匡時。羣黨相扶。害忠隱賢。願陛下簡文武之臣。各勤其官。州牧督將。藩鎮方外。公卿尙書。務修仁化。上助陛下。下拯黎民。各盡其忠。拾遺萬一。則康哉之歌。作刑錯之理清。願陛下畱神思。臣愚言時。殿上列將何定。佞巧便辟。貴幸任事。凱面責定曰。卿見前後事。主不忠。傾亂國政。寧有得以壽終者邪。何以專爲佞邪。

穢塵天聽。宜自改厲。不然方見卿有不測之禍矣。定大恨。凱思中傷之。凱終不以爲意。乃心公家。義形於色。表疏皆指事不飾。忠懇內發。建衡元年。疾病。皓遣中書令董朝問所欲言。凱陳何定不可任用。宜授外任。不宜委以國事。奚熙小吏。建起浦里田。欲復嚴密故迹。亦不可聽。姚信、樓元、賀邵、張悌、郭遠、薛瑩、滕修及族弟喜、抗、或清白忠勤。或姿才卓茂。皆社稷之楨幹。國家之良輔。願陛下重留神思。訪以時務。各盡其忠。拾遺萬一。遂卒。時年七十二。子禕。初爲黃門侍郎。出領部曲。拜偏將軍。凱亡後。入爲太子中庶子。右國史。華覈表薦禕曰。禕體質方剛。器幹彊固。董率之才。魯肅不過。及被召當下。徑還赴都。道由武昌。曾不迴顧。器械軍資。一無所取。在戎果毅。臨財有節。夫夏口賊之衝要。宜選明將以鎮戍之。臣竊思惟莫善於禕。初皓常銜凱數犯顏忤旨。加何定譖構。非一。既以重臣難繩以法。謹案。世說曰。孫皓問丞相陸凱曰。卿一宗人。皓曰。盛哉。陸曰。君賢臣忠。國之盛也。父慈子孝。家之盛也。今政荒民弊。覆亡是懼。臣何敢言盛。又陸抗時爲大將在疆場。故以計容忍。抗卒後。竟徙凱家於建安。或曰。寶鼎元年十二月。凱與大司馬丁奉、御史大夫丁固。謀因皓謁廟。欲廢皓。立孫休子。時左將軍韋平領兵先驅。故密語平。平拒不許。誓以不泄。是以所圖不果。太史郎陳苗奏皓。久陰不雨。風氣迴逆。將有陰謀。皓深警懼云。原注。吳錄。魯拜廟。選大將軍領三千兵爲衛。凱欲因此兵圖之。令選曹白用丁奉。皓偶不與丁奉有隙。禕未及得宣凱旨。平語禕曰。開野豬入丁奉營。此凶徵也。有喜色。禕乃不敢言。還因具啓凱。奉輟止。案司馬氏考異曰。世祖武帝泰始元年十二月。吳王還都建業。吳志。陸凱傳。或曰。寶鼎元年十二月。凱與丁奉、丁固。謀因皓謁廟。欲廢皓。立孫休子。時左將軍韋平領兵先驅。故密語平。平拒不許。誓以不泄。是以不果。按凱肅忠執義。必不爲此事。況皓殘酷猜忌。留平庸人。若聞凱謀。必不能不泄。殆虛語爾。今不取。凱欲廢皓以安社稷。乃生平大

節也。以平見拒。故不能行。平之不

泄。亦知言出禍及爾。今從吳志。

凱沒後。子連謹案。陳志作子連。此及傳注並作子連。與志異。

得凱所諫。皓二十事及表云。凱數

表諫。皓不能堪。遣親近趙欽。詔報凱前表曰。孤動必遵先帝。有何不平。君所陳非也。又建業宮不利。故避之。而西宮室宇摧朽。須謀移都。何以不可。徙乎。凱復上疏曰。臣竊見陛下執政以來。陰陽不調。五星失晷。

職司不忠。姦黨相扶。是陛下不遵先帝之所致。

原注。江表傳。載此表曰。臣拜受明詔。心與氣結。陛下何心之難悟。意不聰之甚也。

夫王者之興。受之

於天。脩之由德。豈在宮乎。而陛下不諮之公輔。便盛意驅馳六軍。流離悲懼。逆犯天地。天地以災。童歌其

謠。縱令陛下。一身得安。百姓愁勞。何以用治。此不遵先帝一也。臣聞有國以賢爲本。夏殺龍逢。殷獲伊摯。

斯前世之明效。今日之師表也。中常侍王蕃。黃中通理。處朝忠審。斯社稷之重鎮。大吳之龍逢也。而陛下

忿其苦辭。惡其直對。梟之殿堂。尸骸暴棄。邦內傷心。有識悲悼。咸以吳國夫差復存。先帝親賢。陛下反之。

是陛下不遵先帝二也。臣聞宰相國之柱石。不可不彊。是故漢有蕭曹之佐。先帝有顧步之相。而萬彥瑣

才。凡庸之質。昔從家隸。趨步紫闥。於彘已豐。於器已溢。而陛下愛其細介。不訪大趣。榮以尊輔。越尙舊臣。

賢良憤惋。智士赫咤。是不遵先帝三也。先帝憂民。過於嬰孩。民無妻者。以妾妻之。見單衣者。以帛給之。枯

骨不收。而取埋之。而陛下反之。是不遵先帝四也。昔桀紂滅。由妖婦。幽厲亂。在嬖妾。先帝鑒之。以爲身戒。

故左右不置淫邪之色。後房無曠積之女。今中宮萬數。不備嬪嬙。外多繇夫。女吟於中。風雨逆度。正由此

起。是不遵先帝五也。先帝憂勞萬機。猶懼有失。陛下臨阼以來。游戲後宮。眩惑婦女。乃令庶事多曠。下吏

容姦是不遵先帝六也。先帝篤尚朴素。服不純麗。宮無高臺。物不彫飾。故國富民充。姦盜不作。而陛下徵調州郡。空竭民財。土被元黃。宮有朱紫。是不遵先帝七也。先帝外仗顧陸。朱張。內近胡綜。薛綜。是以庶績雍熙。邦內清肅。今者外非其任。內非其人。陳聲。曹輔。斗筲小吏。先帝之所棄。而陛下幸之。是不遵先帝八也。先帝每宴見羣臣。抑損醇醪。臣下終日無失慢之尤。百寮庶尹。並展所陳。而陛下拘以視瞻之敬。懼以不盡之酒。夫酒以成禮。過則敗德。此無異商辛。長夜之飲也。是不遵先帝九也。昔漢之桓靈。親近宦豎。大失民心。今高通。詹廉。羊度。黃門小人。而陛下賞以重爵。權以戰兵。若江渚有難。烽燧互起。則度等之武不能禦侮。明矣。是不遵先帝十也。今宮女曠積。而黃門復走州郡。條牒民女。有錢則舍。無錢則取。怨呼道路。母子死訣。是不遵先帝十一也。先帝在時。亦養諸王太子。若取乳母。其夫復役。賜與錢財。給其資糧。時遣歸來。視其弱息。今則不然。夫婦生離。夫故作役。兒從後死。家爲空戶。是不遵先帝十二也。先帝歎曰。國以民爲本。民以食爲天。衣其次也。三者孤存之於心。今則不然。農桑並廢。是不遵先帝十三也。先帝簡士。不拘卑賤。任之鄉閭。效之於事。舉者不虛。受者不妄。今則不然。浮華者登。朋黨者進。是不遵先帝十四也。先帝戰士。不給他役。使春惟知農。秋惟收稻。江渚有事。責其死效。今之戰士。供給衆役。廩賜不贍。是不遵先帝十五也。夫賞以勸功。罰以禁邪。賞罰不中。則士民散失。今江邊將士。死不見哀。勞不見賞。是不遵先帝十六也。今在所監司。以爲煩猥。兼有內使。擾亂其中。一民十吏。何以堪命。昔景帝時。交趾反亂。實由茲起。

是爲遵景帝之闕不遵先帝十七也。夫校事士民之仇也。先帝末年雖有呂壹鉞欽尋皆誅夷以謝百姓。

今復張立校曹縱吏言事是不遵先帝十八也。先帝時居官者成久於其位然後考績黜陟。今州縣讀案

志作州郡。宋本作州縣。與此合。

職司或莅政無幾便徵召遷轉迎新送舊紛紜道路傷財害民於是爲甚是不遵先帝十

九也。先帝每察竟解之奏常留心推按是以獄無冤囚死者吞聲今則違之是不遵先帝二十也。若臣言可錄藏之盟府如其虛妄治臣之罪願陛下留意。皓不聽暴戾尤甚。凱知其將亡上表曰。臣聞惡不可積過不可長積惡長過喪亂之原也是以古人懼不聞非故設進善之旂立敢諫之鼓。武公九十思聞警戒詩美其德士悅其行。臣察陛下無思警戒之義而有懷積惡之漸。臣深憂之。此禍兆見矣。故略陳其要。寫盡愚懷。陛下宜克己復禮述修前德不捐棄臣言而放奢意侈情至吏日欺民民離則上不信下下當疑上骨肉相克父子相奔。臣雖愚闇於天命以心審之。敗不過數稔也。臣常忿亡國之人夏桀殷紂亦不可使後人復忿陛下也。臣受國恩奉朝三世復以餘年值遇陛下不能循俗與衆浮沈若比干伍員以忠見戮以正見疑。自謂畢足無所餘恨。灰身泉壤無負先帝願陛下九思則社稷存焉。皓始起宮凱表諫曰。臣聞宮功當起夙夜反側是以頻煩上事。往往留中不見省報於邑歎息企想應罷。昨食時被詔曰。君所諫誠是大趣然未合鄙意如何。此宮殿不利宜當避之。乃可以妨勞役長坐不利宮乎。父之不安子亦何倚。臣拜詔紙伏讀一周不覺氣結於中而涕泣雨集也。臣年已六十九榮祿已重於臣過望復何所冀。所以

勤勤數進苦言者。臣伏念大皇帝創基立業，勞苦勤至，白髮生於鬢膚，黃耆被於甲冑，天下始靜，晏駕早崩，自含息之類，能言之倫，無不歔歔如喪考妣。幼主嗣統，柄在臣下，軍有連征之費，民有彫殘之損，賊臣干政，公家空竭，今彊敵當塗，西州傾覆，孤罷之民，宜當畜養，廣力肆業，以備有虞，且始徙都，屬有軍征，戰士流離，州郡騷擾，而大功復起，徵召四方，斯非保國致治之漸也。臣聞爲人主者，禳災以德，除咎以義，湯遭大旱，身禱桑林，熒惑守心，宋景退殿，是以旱魃消亡，妖星移舍。

原注。桑林事見郅正傳。呂氏春秋。宋景公有疾。司星子章曰。熒惑守心。心宋之分。

野。君當之。若祭可移於相。公曰。相寡人之股肱。豈可除心腹之疾移於股肱乎。曰。可移於民。公曰。民者國之本。國無民。何以爲國。如何傷本而救吾身乎。曰。可移於歲。公曰。歲所以養民。歲不登。何以畜民。子章曰。君善言三。

二十一年。視之信。延命。熒惑必退三舍。

今宮室之不利，但當克己復禮，爲湯宋之至道，愍黎庶之困苦，何憂宮之不安，災之不銷乎。陛下不務修德而修築宮室，若德之不修，行之不實，雖殷辛之瑤臺，秦皇之阿房，何異而不喪身覆

國宗廟作墟乎。夫興土功，高臺榭，既致水旱，民又多疾，其不疑也，爲父長安，使子無倚，此乃子離於父，臣

離于陛下之象也。臣子一離，雖念克骨茅茨不剪，復何益焉。是以大皇帝居於南宮，自謂過於阿房，故先

朝大臣，以爲宮室宜厚，備衛非常。大皇帝曰：逆虜游魂，當愛百姓，何聊趣於不急。然臣下懇惻，由不獲已，

故裁調近郡，苟副衆心，比當就功，猶豫三年，當此之時，寇鈔攝威，不犯我境，師徒奔北，且西阻岷漢，南州

無事，尚猶謙讓，未肯築宮，況陛下危側之世，又乏大皇帝之德，可不慮哉。皓皆不聽，以及於亡。

原注。按陳壽三國志。

謂此表疏吳人多云不聞有此。其文殊甚切。恐非皓之所能堪忍。或以爲凱藏之儆。未及奏上。病困。皓遣董朝省問所。言。因以付之。又按江表傳。凱爲皓大修宮室。復兩表諫。裴松之附於傳後。今按傳載凱所上疏。動以策紂之說爲言。

此諸表疏其切直有過之者。第史失其奏上之次。或暗惡其直。留中不下。故史不得而載。沒後子連始出其遺爾。故皆附於篇末。以著凱之忠。微暗之惡云。故史

郎。太子和聞其名。待以殊禮。會全寄楊竺等阿附魯王。霸與和紛爭。陰相譖構。太子自懼黜廢。而魯王覬

覲益甚。權時見楊竺辟左右論霸之才。竺深述霸有文武英姿。宜為嫡嗣。於是權乃許立焉。有給事伏於

牀下。具聞之。以告太子。允當至武昌。往辭太子。太子不見。而微服至其車上。與共密議。欲令陸遜表諫。既

而遜具表極諫。權疑竺泄之。竺辭不服。權使竺出尋其由。竺曰。頃惟允西行。必其所道。又遣問遜。何由知

之。遜言允所述。召允考問。允為太子隱曰。楊竺向臣道之。遂下竺獄。竺不勝痛毒。服實告允。初權疑竺泄

之。及服。乃斬竺。釋允。後為衡陽督軍都尉。赤烏十一年。交趾九真夷賊攻沒城邑。交部擾動。以允為交州

刺史。安南校尉。允入南界。喻以恩信。務崇招納。高涼渠帥黃吳等支黨三千餘家。皆出降。引軍而南。重宣

誠意。遣以財帛。賊帥百餘人。民五萬餘家。深幽不羈。莫不稽顙。交域清泰。就加安南將軍。復討蒼梧建陵

賊。破之前後出兵八千餘人。以充軍用。永安元年。徵為西陵督。封都亭侯。後轉左虎林。中書丞。華覈表薦

允曰。允天姿聰明。才通行潔。昔歷選曹。遺迹可紀。還在交州。奉宣朝恩。流民歸附。海隅肅清。蒼梧南海。歲

有舊風。瘴氣之害。謹案。今志作舊風。瘴氣。此作瘴字。為是。舊風亦難解。疑作颶風。考投荒雜錄云。嶺南諸郡皆有颶風。風則折木。飛砂轉石。氣則霧鬱。飛鳥不

經。自允至州。風氣絕息。商旅平行。民無疾疫。田家豐稔。州治臨海。海流秋鹹。允又畜水。民得甘食。惠風橫

被。化感人神。遂憑天威。招合遺散。至被詔書。當出。民感其恩。以忘戀土。負老攜幼。甘心景從。衆無攜貳。不

煩兵衛。自諸將合衆，皆脅之以威，未有如允結以恩信者也。銜命在州，十有餘年，賓帶殊俗，寶玩所生，而內無粉黛附珠之妾，家無文甲犀象之珍，方之今臣，實難多得。宜在輦轂，股肱王室，以贊唐虞康哉之頌。

江邊任輕，不盡其才。虎林選督，堪之者衆。若召還都，寵以上司，則天工畢修，庶績咸熙矣。允卒，子式嗣。

陳志此下云爲柴桑督揚武將軍。天策元年與從兄禕俱徙建安。天紀二年召還建業。復將軍侯。何定者，汝南人，本孫權給使也。後出補吏，佞邪僭媚。孫皓立，自

表先帝舊人，求還內侍。皓以爲樓下都尉，典知酤糴事，專爲威福。而皓信任，委以衆事，定爲子求少府李

勗女，不許，挾忿譖勗於皓。皓尺口誅之，焚其尸。定又使諸將各上好犬，皆千里遠求。一犬至，直絹數十疋。

御犬率具纓，直錢一萬。一犬一兵，養以捕兔供廚，所獲無幾。吳人皆仇定，而皓以爲忠，賜爵列侯。陸凱

旣面責定，臨終又陳定姦惡不可用，定大銜恨。卒譖徙凱家。鳳皇元年，姦穢發聞，始伏誅。

陸抗字幼節，孫策外孫，丞相遜次子也。遜卒，時年二十，拜建武校尉，領遜衆五千人，送葬東還，詣都謝恩。

孫權以楊竺所白遜二十事問抗，禁絕賓客，中使臨詰，抗無所顧問。事事條答，權意漸解。赤烏九年，遷立

節中郎將，與諸葛恪換屯柴桑。抗臨去，皆更繕完城圍，葺其牆屋，居廬桑果，不得妄敗。恪入屯，儼然若新。

而恪柴桑故屯，頗有毀壞，深以爲慙。太元元年，就都治病，病差當還，權涕泣與別，謂曰：吾前聽用讒言，與

汝父大義不篤，以此負汝。前後所問一焚滅之，莫令人見也。建興元年，拜奮威將軍。太平二年，魏將諸葛

誕舉壽春降，拜抗爲柴桑督，赴壽春，破魏牙門將偏將軍，遷征北將軍。永安二年，拜鎮軍將軍，都督西陵。

自關侯瀨譚案。陳志脫瀨字。文義不可解。瀨字通志作城。亦誤。事見吳志甘寧傳。

至白帝三年假節孫皓卽位加鎮軍大將軍領益州牧建衡

二年大司馬施績卒拜抗都督信陵西陵夷道樂鄉公安諸軍事治樂鄉抗聞皓政令多闕憂深慮遠乃

上疏曰臣聞德均則衆者勝寡力侔則安者制危蓋六國所以兼并於彊秦西楚所以北面於漢高也今

敵跨制九服非徒關右之地割據九州豈但鴻溝以西而已國家外無連國之援內非西楚之彊庶政陵

遲黎民未乂而議者所恃徒以長川峻山限帶封域此乃書傳譚案。陳志作守國。通志作書傳。與此合。通之末事非智者之所

先也臣每遠惟戰國存亡之符近覽劉氏傾覆之釁考之典籍驗之行事中夜撫枕臨餐忘食昔匈奴未

滅去病辭館漢道未純賈生哀泣況臣王室之出世荷光寵身名否泰與國同感死生契闊義無苟且夙

夜憂怛念至情慘夫事君之義犯而勿欺人臣之節匪躬是殉謹陳時宜十七條如左十七條失本故不

載時何定弄權闒官預政抗上疏曰臣聞開國承家小人勿用靜言庸違唐書攸戒是以雅人所以怨刺

仲尼所以歎息也春秋以來爰及秦漢傾覆之釁未有不由斯者也小人不明理道所見既淺雖使竭情

盡節猶不足任況其姦心素篤而憎愛移易哉苟患失之無所不至今委以聰明之任假以專制之威而

冀雍熙之聲作肅清之化立不可得也方今見吏殊才雖少然或冠冕之貴少漸道教或清苦自立資能

足用自可隨才授職抑黜羣小然後俗化可清庶政無穢也鳳皇元年西陵督步闡據城以叛遣使降晉

抗聞之日部分諸軍令將軍左奕吾彥蔡貢等徑往西陵敕軍營更築嚴圍自赤谿至故市內以圍闡外

以禦寇。晝夜催切。如敵已至。衆甚苦之。諸將咸諫曰。今及三軍之銳。亟以攻關。比晉救至。關必可拔。何事於圍。而以弊士民之力乎。抗曰。此城處勢既固。糧穀又足。且所繕修備禦之具。皆抗所宿規。今反身攻之。既非可卒克。且北救必至。至而無備。表裏受難。何以禦之。諸將咸欲攻關。抗每不許。宜都太守雷譚言至懇切。抗欲服衆。聽令一攻。攻果無利。圍備始合。晉車騎將軍羊祜率師向江陵。諸將咸以抗不宜上。抗曰。江陵城固兵足。無所憂患。假令敵沒江陵。必不能守。所損者小。如使西陵槃結。則南山羣夷。皆當擾動。則所憂慮難可竟言也。吾寧棄江陵而赴西陵。況江陵牢固乎。初江陵平衍。道路通利。抗救江陵。督張咸作大堰。遏水漸漬平中。以絕寇叛。祜欲因所遏水浮船運糧。揚聲將破堰。以通步軍。抗聞使咸亟破之。諸將皆惑。屢諫不聽。祜至當陽。聞堰敗。乃改船以車運。大費損功力。晉巴東監軍徐允率水軍詣建平。荊州刺史楊肇至西陵。抗令張咸固守其城。公安督孫遵巡南岸。禦祜。水軍督留慮鎮西。將軍朱琬拒允。身率三軍。憑圍對肇。將軍朱喬營都督俞贊亡詣肇。抗曰。贊軍中舊吏。知吾虛實者。吾常慮夷兵素不簡練。若敵攻圍。必先此處。卽夜易夷民。皆以舊將充之。明日肇果攻故夷兵處。抗命旋軍擊之。矢石雨下。肇衆傷死者相屬。肇至經月。計屈夜遁。抗欲追之。而慮闡畜力項領。伺視閒隙。兵不足分。於是但鳴鼓戒衆。若將追者。肇衆兇懼。悉解甲挺走。抗使輕兵躡之。肇大破敗。祜等皆引軍還。抗遂陷西陵城。誅夷闡族及其大將吏。其餘皆赦之。修治城圍。東還樂鄉。貌無矜色。謙沖如常。羊祜既歸。增修德信。以懷吳人。陸抗每告其邊。

戊曰彼專爲德我專爲暴是不戰而自服也各保分界而已無求細利於是吳晉之間餘糧栖歛而不犯牛馬逸而入境可宣告而取也吳人獵沔上獲晉人先傷者皆送還之抗遣祜酒祜飲之不疑抗嘗疾求藥于祜祜以成藥與之曰此上藥也近始自作未及服以君疾急故相致抗得而服之諸將或諫抗抗曰豈有醜人羊叔子哉時人以爲華元子反復見於今孫皓聞二境交和以詰於抗抗曰夫一邑一鄉不可以無信義之人而況大國乎臣不如是正足以彰其德耳於祜無傷也原注。習鑿齒曰。理勝者天下之所保。信順者萬人之所宗。雖大敵既喪。義聲久淪。狙詐馳於當塗。權略周乎急務。負力從橫之人。咸獲牧豎之智。未有不憑此以創功。捨茲而獨立者也。是故晉文退舍。而原城請命。穆子圍鼓。訓之以力。治夫獻策。而費人斯歸。樂毅緩攻。而風烈長流。觀其所以服物制勝者。豈徒威力相詐而已哉。自今三家鼎足。四十有餘年矣。吳人不能越淮沔而進取中國。中國不能陵長江以爭利者。力均而智侔。道不足以相傾也。夫殘彼而利我。未若利我而無殘。振武以懼物。未若德廣而民懷。匹夫猶不可以力服。而況一國乎。力服猶不如以德來。而況不制乎。是以羊祜恢大同之略。思五兵之則。齊其民人。均其施澤。振義網以羅疆吳。明衆愛以革暴俗。易生民之視聽。馳不戰乎江表。故能德音悅暢。而襁負雲集。殊鄰異域。義讓交宏。自吳之遇敵。未有若此者也。抗見國小主暴。而晉德彌昌。人積兼已之善。而已無固本之規。百姓憫嚴敵之德。闔境有棄主之慮。思所以鎮定民心。輯寧外內。奮其危弱。抗權上國者。莫若親行斯道。而以俾其勝。使彼德靡加吾而此善流聞。歸重邦國。宏明遠風。折衝於枕席之上。校勝於帷幄之內。傾敵而不以甲兵之力。保國而不浚溝池之固。信義感於寇讐。丹墀體於先日。豈設狙詐以危賢。徇己身之私名。貪外物之重我。關服之而不備者哉。由是論之。苟守局而保疆。一卒之所能。協衆以相危。小人之近事。積詐以防物。咸獲之餘慮。咸勝以求安。明哲之所賤。賢人君子所以拯世垂範。舍此而取彼者。其道良宏故也。加拜都護。聞武昌左部督薛瑩徵下獄抗上疏曰。夫俊父者國家之良寶。社稷之貴資。庶政所以倫斂。四門所以穆清也。故大司農樓元。散騎中常侍王蕃。少府李勗。皆當世秀穎。一時顯器。既蒙初寵。從容列位。而並旋受誅殛。或圯族替祀。或投棄荒裔。蓋周禮有赦賢之辟。春秋有宥善之義。書曰。與其殺不辜。寧失不經。而蕃等罪名未定。大辟以加。心經忠義。身

被極刑。豈不痛哉。且已死之刑。因無所識。至乃焚爍流漂。棄之於水濱。懼非先王之正典。或甫侯之所戒也。是以百姓哀聳。士民同感。蕃勗永已。悔亦靡及。誠望陛下赦召元出。而頃聞薛瑩卒。見逮錄。瑩父綜。納言先帝。傳弼文皇。及瑩承基。內厲名行。今之所坐。罪在可宥。臣懼有司未詳其事。如復誅戮。益失民望。乞垂天恩。原赦瑩罪。哀矜庶獄。清澄刑網。則天下幸甚。時師旅仍動。百姓疲弊。抗上疏曰。臣聞易貴隨時。傳美觀釁。故有夏多罪。而殷湯用師。紂作淫虐。而周武授鉞。苟無其時。玉臺有憂傷之慮。孟津有反旆之軍。今不務富國彊兵。力農畜穀。使文武之才。效展其用。百揆之署。無曠厥職。明黜陟以厲庶尹。審刑罰

北宋本吳志作賞。

以示勸沮。訓諸司以德而撫百姓以仁。然後順天承運。席卷宇內。而聽諸將徇名。窮兵黷武。動

案謂字。

費萬計。士卒彫瘁。寇不爲衰。而我已大病矣。今爭帝皇之資。而昧十百之利。此人臣之姦便。非國家之良策也。昔齊魯三戰。魯人再克。而亡不旋踵。何則。大小勢異也。況今師所克獲。不補所喪哉。且阻兵無衆。古之明鑒。誠宜暫息。進取小規。以畜士民之力。觀釁伺隙。庶無悔吝。二年春。就拜大司馬。荆州牧。三年夏。疾病。上疏曰。西陵建平國之蕃表。既處下流。受敵二境。若敵汎舟順流。舳艫千里。星奔電邁。俄然行至。非可恃援。他部以救倒縣也。此乃社稷安危之機。非徒封疆侵陵小害也。臣父遜昔在西垂。陳言以爲西陵國之西門。雖云易守。亦復易失。若有不守。非但失一郡。則荆州非吳有也。如其有慮。當傾國爭之。臣往在西陵。得涉遜迹。前乞精兵三萬而至者。循常未肯差赴。自步闡以後。益更損耗。今臣所統千里。受敵四處。外

禦疆對內懷百蠻。而上下見兵。才有數萬。羸弊日久。難以待變。臣愚以爲諸王幼沖。未統國事。可且立傅相。輔導賢姿。無用兵馬。以妨要務。又黃門豎宦。開立占募兵。民怨役逋。逃入占。乞特詔簡閱一切。料出以補疆場。受敵常處。使臣所部足滿八萬。省息衆務。信其賞罰。雖韓白復生。無所展巧。若兵不增。此制不改。而欲克諧大事。此臣之所深感也。若臣死之後。乞以西方爲屬。願陛下思覽臣言。則臣死且不朽。秋遂卒。子晏嗣。晏及弟景。元機雲分領抗兵。晏爲裨將軍。夷道監。天紀四年。晉軍伐吳。龍驤將軍王濬順流東下。所至輒克。終如抗慮。景字士仁。以尚公主。拜騎都尉。封毗陵侯。旣領抗兵。拜偏將軍。中夏督。澡身好學。著書數十篇也。原注。文士傳曰。陸景母張承女。諸葛恪外甥。恪誅。景母坐見黜。景少爲祖母所育養。及祖母亡。景爲之心喪三年。二月壬戌。晏爲王濬別軍所殺。癸亥。景亦遇害。時年三十一。景妻孫皓適妹。與景俱張承外孫也。

議曰。孟子曰。所謂故國者。非謂有喬木之謂也。有世臣之謂也。當孫皓暴虐。一朝不能居。有一陸凱。世濟忠貞。危言剴論。劾劘匡直。自以爲龍逢比干。甘心鼎鑊。而不顧。復有一陸抗。世爲虎臣。瞰管國門。內進忠規。外宣威略。屹與晉對。季梁猶在。隨未亡也。抗之與羊祜交歡。推誠任信。恢宏德度。特以術相傾。爾議者謂華元子反。復見於今。華元子反。豈純臣乎。春秋以其成在乎下。而二君不與。故書宋人與楚人平。卿而人之不與其專也。人臣義無私交。聘弓鏃矢。不越境外。束脩之間。不行境中。故抗祜之事。君子不與也。原注。春秋宋人及楚人平。左氏傳。楚子圍宋。申叔時曰。築室反耕者。宋必聽命。從之。宋人懼。使華元夜入楚師。登子反之牀。進之曰。寡君使元以病告曰。敝邑易子而食。析骸以爨。雖然。城下之盟。有以國敵。不能從也。去我三十里。

惟命是聽。子反懼。與之盟而告王。退三十里。宋及楚平。公羊傳。外平不書。此何以書。大其平乎已也。此皆大夫也。其稱人何。貶。曷爲貶。平者在下也。

贊曰。嗟嗟敬風。扞暴彊諫。不能格心。僅僅視面。幼節忠赤。椎坐憂國。虐主知畏。身繫社稷。

續後漢書卷第六十三

列傳第六十

吳臣

諸葛恪孫友

滕允孫峻 孫融華融

漢陽興

孟仁

丁固

范愼

諸葛恪字元遜。大將軍瑾長子也。少有儁才。機辯警速。嘲諷如流。莫與爲對。身長七尺六寸。少鬚眉。折頰廣額。大口高聲。權見而奇之。曰：藍田生玉。真不虛也。弱冠拜騎都尉。與顧譚、張休等侍太子。登講論道藝。並爲賓友。從中庶子轉爲左輔都尉。原注：陳志：恪父瑾而長似驢。孫權大會羣臣。使人牽一驢入。長檢其面。題曰：是爲驢。權又大噱。命恪行酒。至張昭前。昭先有酒色。不肯飲。曰：臣父爲驢。權問其故。對曰：臣父知所事。叔父不知。以之耳。恪難昭曰：昔師尚父九十。乘旄杖鉞。猶未告老也。今軍旅之事。將軍在後。酒食之事。將軍在前。何謂不養老也。昭卒無辭。遂爲盡爵。後蜀使至。羣臣並會。權謂使曰：此諸葛恪雅好騎乘。還告丞相。爲致好馬。恪因下謝。權曰：馬未至而謝。何也。恪對曰：夫蜀者陛下之外廢。今有恩詔。馬必至也。安敢不謝。恪之才捷。皆此類也。恪別傳：權嘗幸蜀使費禕。先逆敕羣臣使至伏食勿起。禕至。權爲饌食。而羣下不起。禕嘲之曰：鳳凰來翔。皆此類也。恪別傳：知。伏食如故。恪答曰：爰植梧桐。以待鳳凰。有何燕雀。自稱來翔。何不彈射。使還故鄉。禕停食餅。索筆作麥賦。問卿何如。膝允。恪答曰：登階躡履。臣不如允。迴籌轉策。允不如臣。恪嘗獻權馬。先鑷其耳。范愼時在坐。嘲恪曰：馬雖六畜。稟氣於天。今殘其耳。豈不傷仁。恪答曰：母之於女。恩愛至矣。穿耳附珠。何傷於仁。太子嘗嘲恪諸葛元遜。可食馬矢。恪曰：願太子食雞卵。權曰：人令卿食馬矢。卿使人食雞卵。何也。恪曰：所出同爾。權大笑。江表傳有白頭烏集殿前。權曰：此何鳥也。恪曰：白頭翁也。張昭自以坐中最老。疑恪以鳥戲之。因曰：恪欺陛下。未嘗聞鳥

名曰白頭翁者。試使恪復求白頭母。恪曰。鳥名鸚鵡。未必有對。試使輔吳。復求鸚鵡。昭不能答。坐中皆歡笑。陳志所載。恪以驢面戲恪父。誠爲事實。則不君之甚。不可以訓。又載贊禕以驢驅諷吳臣僚。恪以燕雀答之。豈二國實主之禮。又載太子登朝恪食馬矢。恪答以雞卵。豈詰副賓友之道。恪又以白頭翁諷張昭。豈新進事大臣之義哉。此真穢史。遺臭千載。故皆削而不錄云。權欲試恪以事。令守節度。節度掌軍

糧穀。文書繁猥。非所好也。原注。江表傳。權爲吳王。初置節度官。使典掌軍糧。非漢制也。初用侍中偏將軍徐詳之。最。僕雖在遠。竊用不安。足下特爲啓至尊轉之。遜以白襜。卽轉恪領兵。恪以丹陽山險。民多果勁。雖前發兵。徒得外縣平民而已。其餘深遠

莫能盡禽。屢白求乞爲官。出之三年。可得甲士四萬。衆議咸以爲丹陽地勢險阻。與吳郡會稽新都鄱陽四郡鄰接。周旋數千里。山谷萬重。其幽邃民人。未嘗入城邑。對長吏。皆仗兵野逸。白首於林莽。逋亡宿惡。咸共逃竄。山出銅鐵。自鑄甲兵。俗好武習戰。高尚氣力。其升山赴險。抵突叢棘。若魚走淵。猿狖騰木。矯捷若飛。時觀間隙。出爲寇盜。每致兵征伐。尋其窟藏。戰則蠶至。敗則鳥竄。自前世以來。莫能羈也。實以爲難。恪父瑾聞之。亦以事終不逮。歎曰。恪不大興吾家。乃大亦吾族也。恪盛陳其必捷。權拜恪撫越將軍。領丹陽太守。授檄戟武騎三百。拜畢。令恪備威儀。作鼓吹。導引歸家。時年三十二。恪到府。乃移書四部屬城長吏。令各保其疆界。明立部伍。其從化平民。悉令屯居。乃分內諸將。羅兵幽阻。但繕藩籬。不與交鋒。候其穀稼將熟。輒縱兵芟刈。使無遺種。舊穀旣盡。新田不收。平民屯居。略無所入。於是山民飢窮。漸次出降。首恪乃復敕下曰。山民去惡從化。皆當撫慰。徙出外縣。不得嫌疑。有所執拘。白陽長胡伉得降。民周遺遺舊惡。民困迫暫出。內圖叛逆。伉縛送諸府。恪以伉違教。遂斬以徇。以狀表上。名聞伉坐。執人被戮。知官惟欲出

之而已。於是老幼相攜而出。歲期人數。皆如本規。恪自領萬人。餘分給諸將。權嘉其功。遣尙書僕射薛綜勞軍。綜先移恪等曰。山越恃阻。不賓歷世。緩則首鼠。急則狼顧。皇帝赫然。命將西征。神策內授。武帥外震。兵不染鏑。甲不沾汗。元惡旣梟。種黨歸義。蕩滌山藪。獻戎十萬。野無遺寇。邑罔殘姦。旣掃兇慝。又充軍用。藜蔕稂莠。化爲善草。魍魎魍魎。更成虎士。雖實國家威靈之所加。亦信元帥臨履之所教也。雖詩美執訊。易嘉折首。周之方召。漢之衛霍。豈足以談功軼古人。勳超前世。主上歡然。遙用歎息。感四牡之遺典。思飲至之舊章。故遣中臺近官。迎致犒賜。以旌茂功。以慰劬勞。拜恪威北將軍。封都鄉侯。恪乞率衆佃廬江皖口。因輕兵襲舒。掩得其民而還。復遠遣斥候。觀相徑要。欲圖壽春。權以爲不可。赤烏中。魏司馬懿謀欲攻恪。權方發兵應之。望氣者以爲不利。於是徙恪於柴桑。與丞相陸遜書曰。楊敬叔傳述清論。以爲方今人物凋盡。守德業者不能復幾。宜相左右。更爲輔車。上熙國事。下相珍惜。又疾世俗好相謗毀。使已成之器。中有損累。將進之徒。意不歡笑。聞之喟然。誠獨擊節。愚以爲君子不求備于一人。自孔氏門徒。大數三千。其異異者七十二人。至於子張。子路。子貢等七十之徒。亞聖之德。然猶各有所短。師辟由嘯。賜不受命。豈況下此而無所闕。且仲尼不以數子之不備而引以爲友。不以人所短棄其所長也。加以當今取士。宜寬於往古。何者。時務縱橫。而善人單少。國家職司。常苦不充。苟令性不邪惡。志在陳力。便可將就。聘其所任。若於小小宜適。私行不足。皆宜闕略。不足縷責。且士誠不可織論苛克。苛克則彼聖賢猶將不全。況其出

入者邪。故曰：以道望人則難，以人望人則易。賢愚可知，自漢末以來，中國士大夫如許子將輩，所以更相謗訕，或至爲禍原，其本起非爲大讎，惟坐克己不能盡如禮，而責人專以正義。夫克己不如禮，則人不服。責人以正義，則人不堪，內不服其行，外不堪其責，不得不相怨，相怨一生，則小人得容其間，得容其間，則三至之言，浸潤之譖，紛錯交至。雖使至明至親者，猶難以自定，況已爲隙且未能明乎？是故張陳至於血刃，蕭朱不終其好。

原注：漢書·耳·餘·始居約時·相然信以死·豈顧問哉·及據國爭雄·卒相滅亡·何鄉者蓋用之有王陽實公·故長安語曰·蕭朱結綬·王實彈冠·言其誠·後相背之藍也·勢利之交·古人蓋之·蓋謂是矣·蕭實少與陳咸朱博爲友·著聞當世·往者相薦達也·實與博後有隙·不能終·故世以交爲難·本由於此而已。夫不捨小過，纖微相責，久乃至於家戶

爲怨，一國無復全行之士也。恪知遜以此嫌，已故遂廣其理而贊其旨也。會遜卒，恪遷大將軍，假節駐武昌，代遜領荊州事。久之，權不豫，而太子少，乃徵恪以大將軍領太子太傅，中書令孫宏領少傅，權疾困，乃議所託付。朝臣咸皆注意於恪，而侍中孫峻表恪器任輔政，可付大事。權嫌恪剛狠自用，峻以當今朝臣皆莫及，遂固保之。乃召恪，宏及太常滕胤、將軍呂據與峻入臥內，受詔牀下。權曰：「吾病困矣，恐不復相見，諸事一以相委。」恪歔歔流涕曰：「臣等皆受厚恩，當以死奉詔，願陛下安精神，損思慮，無以外事爲念。權詔有司諸事一統於恪，惟殺生大事，然後以聞。爲治策館，設衛衛，羣官百司，拜揖之儀，各有品敘，諸法令有不便者，條列以聞。中外翕然，人懷歡欣。翌日，權卒。宏素與恪不平，懼爲恪所治，祕權死問，欲矯詔除恪。峻以告恪，恪請宏咨事於坐中，誅之。乃發喪報服，與弟公安督融書曰：「今月十有六日乙未，大行皇帝委棄。」

萬國羣下大小莫不傷悼。至吾父子兄弟並受殊恩。非徒凡庸之隸。是以悲慟。肝心圯裂。皇太子以丁酉踐尊號。哀喜交并。不知所措。吾身受顧命。輔相幼主。竊自揆度。才非博陸。而受姬公負圖之託。懼忝丞相。輔漢之效。恐損先帝委付之明。是以憂慚惶懼。所慮萬端。且民惡其上。動見瞻觀。何時易哉。今以頑鈍之姿。處保傅之位。艱多智寡。任重謀淺。誰爲唇齒。近漢之世。燕蓋交遘。有上官之變。以身值此。何敢怡豫。邪。又弟所在。與賊犬牙相錯。當於今時。整頓軍具。率厲將士。警備過常。念出萬死。無顧一生。以報朝廷。無忝爾先。又諸將備守。各有境界。猶恐賊虜聞諱恣睢。寇竊邊邑。諸曹已別下約敕。所部督將。不亦妄委所戍。徑來奔赴。雖懷愴怛不忍之心。公義奪私。伯禽服戎。若苟違戾。非徒小故。以親正疏。古今明戒也。恪更拜太傅。於是罷視聽。息校官。原逋責。除關稅。事崇恩澤。衆莫不悅。恪每出入。百姓延頸。思見風采。初黃龍元年。遷都建業。二年。築東興隄。遏湖水。後攻淮南。敗以內船。由是廢不復脩。恪以建興元年十月。會衆於東興。更作大隄。左右結山。夾築兩城。各留千人。使全端留略守之。引軍而還。魏以吳軍入其疆土。恥於受侮。命大將軍胡遵。諸葛誕等。率軍七萬。欲攻圍兩塢。圖壞隄。恪與軍四萬。晨夜赴救。遵等敕諸軍作浮橋。渡陳於隄上。分兵攻兩城。城在高峻。不可卒拔。恪遣將軍留贊。呂據。唐咨。丁奉爲前部。時天寒雪。魏諸將會飲。見贊等兵少。而解置鎧甲。不持矛戟。但兜鍪刀楯。保身緣。恪大笑之。不卽嚴兵。兵得上。便鼓譟亂斫。魏軍驚擾散走。爭渡浮橋。橋壞絕。自投於水。更相踏籍。樂安太守桓嘉等同時棄沒。死者數萬。故叛將韓

綜爲前軍督亦斬之獲車乘牛馬驢騾各數千資器山積振旅而歸進封恪陽都侯加荆揚州牧督中外諸軍事賜金一百斤馬二百匹繪布各萬匹恪遂有輕敵之心以十二月戰克明年春欲復出兵使司馬李衡使漢說姜維令同時並舉曰古人有言聖人不能爲時時至不可失也今曹氏政在私門君臣猜阻兵挫於外而民怨於內自曹操以來彼之亡形未有如今者也若大舉伐之吳攻其東漢入其西彼救西則東虛重東則西輕以練實之軍乘輕虛之敵破之必矣維從之諸大臣以爲數出罷勞同辭諫恪不聽中散大夫蔣延固爭扶出恪乃著論諭衆曰夫天無二日土無二王王者不務兼并天下而欲垂祚後世古今未之有也昔戰國之時諸侯自恃兵強地廣互有救援謂此足以傳世人莫能危恣情縱懷憚於勞苦使秦漸得自大遂以并之此旣然矣近者劉景升在荊州有衆數萬財穀如山不及曹操尙微與之力競坐觀其強大吞滅諸袁北方都定之後操率三十萬衆來向荊州當時雖有智者不能復爲畫計於是景升兒子交臂請降遂爲囚虜凡敵國欲相吞卽仇讎欲相除也有讎而長之禍不在己則在後人不可不爲遠慮也昔伍子胥曰越十年生聚十年教訓二十年之外吳其爲沼乎夫差自恃強大聞此邈然是以誅子胥而無備越之心至於臨敗悔之豈有及乎越小於吳尙爲吳禍況其強大者邪昔秦但得關西耳尙以并吞六國今賊皆得秦趙韓魏燕齊九州之地地悉戎馬之鄉士林之藪今以魏比古之秦土地數倍以吳與蜀比古六國不能半之然今所以能敵之者但以操時兵衆於今適盡而後生者未悉長大

正是賊衰少未盛之時。加司馬懿先誅王凌。續自隕斃。其子幼弱而專彼大任。雖有智計之士。未得施用。當今伐之。是其厄會。聖人急於趨時。誠謂今日若順衆人之情。懷偷安之計。以爲長江之險。可以傳世。不論魏之終始。而以今日遂輕其後。此吾所以長歎息者也。自古以來。務在產育。今者賊民歲月繁滋。但尙小未可得用耳。若復十數年。其衆必倍於今。而國家勁兵之地。皆已空盡。惟有此見衆可以定事。若不早用之。端坐使老。復十數年。略當損半。而見子弟數不足言。若賊衆一倍而我兵損半。雖復使伊管圖之。未可如何。今不達遠慮者。必以此言爲迂。夫禍難未至而豫憂慮。此固衆人之所迂也。及於難至。然後頓顛。雖有智者。亦不能圖。此乃古今所病。非獨一時。昔吳始以伍員爲迂。故難至而不可救。劉景升不能慮十年之後。故無以詒其子孫。今恪無具臣之才。而受大吳蕭霍之任。智與衆同。思不經遠。若不及今日爲國斥境。俛仰年老。而讎敵更強。欲劔頸謝責。寧有補邪。今聞衆人或以百姓尙貧。欲務間息。此不知慮其大危而憂其小勤者也。昔漢祖幸已自有三秦之地。何以不閉關守險。以自娛樂。空出攻楚。身被瘡痍。介胄生蟣蝨。將士厭困苦。豈甘鋒刃而忘安寧哉。慮其長久不得兩存者爾。每覽荆邯說公孫述以進取之圖。近見家叔父表陳與賊爭競之計。未嘗不喟然歎息也。夙夜反側。所慮如此。故聊疏愚言。以達二三君子之末。若一朝隕沒。志畫不立。貴令來世知我所憂。可思於後。衆皆以恪此論欲必爲之辭。然莫敢復難。丹陽太守聶友素與恪善。書諫恪曰。大行皇帝本有遏東關之計。計未施行。今公輔贊大業。成先帝之志。

寇遠自送將士。憑賴威德。出身用命。一旦有非常之功。豈非宗廟神靈社稷之福邪。宜且按兵養銳。觀釁而動。今乘此勢。欲復大出。天時未可。而苟任盛意。私心以爲不安。恪題論後。爲書答友曰。足下雖有自然之理。然未見大數。熟省此論。可以開悟矣。於是違衆出軍。大發州郡二十萬衆。百姓騷動。始失人心。恪意欲曜威淮南。驅略民人。而諸將或難之曰。今引軍深入疆場之民。必相率遠遁。恐兵勞而功少。不如止圍新城。新城困。救必至。至而圖之。乃可大獲。恪從其計。迴軍圍新城。攻守連月。城不拔。士卒疲勞。因暑飲水。泄下流腫。病者大半。死傷塗地。諸營吏日白病者多。恪以爲詐。欲斬之。自是莫敢言。恪內惟失計。而恥城不下。忿形於色。將軍朱異有所是非。恪立奪其兵。都尉蔡林數陳軍計。恪不能用。策馬奔魏。魏知戰士罷病。乃進救兵。恪引軍而去。士卒傷病。流曳道路。或頓仆坑壑。或見略獲。存亡忿痛。大小呼歎。而恪宴然自若。出住江渚。一月。圖起田於潯陽。詔召相銜。徐乃旋師。由此衆庶失望。而怨譟興矣。秋八月。軍還。陳兵導從。歸入府館。卽召中書令孫嘿。厲聲曰。卿等何敢妄數作詔。嘿惶懼辭出。因病還家。恪征行之後。曹所奏署令長職司。罷更選。愈治威嚴。多所罪責。進見者無不悚息。又改易宿衛。用其親近。復敕兵嚴欲向青徐。孫峻因民之多怨。衆之所嫌。構恪欲爲變。與亮謀置酒請恪。恪將見之。夜精爽擾動。通夕不寐。明將盥漱。聞水腥臭。侍者授衣。衣服亦臭。恪怪其故。易水易衣。其臭如初。意惆悵不悅。嚴畢趨出。犬銜引其衣。恪令從者逐犬。遂升車。初。恪將伐淮南。有孝子著衰衣入其閤中。從者白之。令外詰問。孝子曰。不自覺入時。

中外守備亦悉不見。衆皆異之。出行之後，所坐聽事屋棟中折，自新城出住東，與有白虹見。其船還，拜蔣陵。白虹復繞其車，及將見，駐車宮門。峻已伏兵於帷中，恐恪不時入事泄，自出見恪曰：「使君若尊體不安，自可須後。」峻當具白主上，欲以嘗知恪。恪答曰：「當自力人散騎張約、朱恩等密書與恪曰：『今日張設非常，疑有他故。恪省書而去，未出路門，逢太常滕允。恪以約等書示允，允勸恪還。恪曰：『小子輩何能爲邪？』但恐因酒食中人爾。』乃以常服藥酒入行旋。」原注：吳志云：恪曰：卒腹痛不任入，允不知峻陰計，謂恪曰：君自宜當力進，恪躊躇而還。劍履上殿。

謝亮還坐，設酒。恪疑未飲，峻曰：「使君病未善，平當有常服藥酒，自可取之。」恪意乃安。原注：吳志：孫盛評曰：非常大事，勢應示允共謀安危，然恪性強梁，加素侮峻，自不信，故入。豈允微勸便爲之冒禍也乎？

酒數行，亮還內。峻起如廁，解長衣，著短服，出曰：「有詔收諸葛恪。」原注：吳錄：峻持刀稱詔收恪。亮起立曰：非我所爲。乳母引亮還內。吳歷云：峻先引亮入。然後出稱詔。與本傳同。裴松之曰：峻欲稱詔，宜如本傳及吳歷，不得如吳錄所言。恪驚起，拔劍未得，而峻刀交下，張約從旁斫峻，裁傷左手。峻應手斫約，斷右臂。武衛之士皆趨上殿。峻曰：所取者恪也。今已死。

悉令復刃，乃除地更飲。恪時年五十一。先是童謠曰：「諸葛恪，蘆葦單衣，篋鈎絡於何相，求成子閣。成子閣者，反語石子岡也。建業南有長陵，名曰石子岡，葬者依焉。鈎絡者，校飾革帶。世謂之鈎絡帶。果以葦蓆裹其身，而篋束其腰，投之於此岡。恪已被殺，其妻不知。第聞使婢血臭，問之，婢曰：「無頃之，愈劇。」婢忽蹶起，瞪目曰：「諸葛公乃爲孫峻所殺，而吏兵尋至。恪長子綽騎都尉，以交關魯王事，權遣付恪，令教誨。恪耽殺之中子竦、長水校尉少子建、步兵校尉聞恪誅，載其母走。峻遣騎督劉承追斬竦於白都，建得渡江，欲北走。」

魏行數十里。爲追兵所殺。逮恪外甥都鄉侯張震及常侍朱恩等。皆夷三族。初。竦數諫恪。恪不從。常憂懼禍。及亡。臨淮臧均表乞葬恪曰。臣聞震雷電激。不崇一朝。大風衝發。希有極日。然猶繼以雲雨。因以潤物。是則天地之威。不可經日。浹辰。帝王之怒。不宜訖情。盡意。臣以狂愚。不知忌諱。敢冒破滅之罪。以邀風雨之會。伏念故太傅諸葛恪。得承祖考風流之烈。伯叔諸父。遭漢祚盡。九州鼎立。分託三方。並履忠勤。熙隆世業。爰及於恪。生長王國。陶育聖化。致名英偉。服事累紀。禍心未萌。先帝委以伊周之任。屬以萬機之事。恪素性剛愎。矜己陵人。不能敬守神器。穆清邦內。興功暴師。未期三出。虛耗士民。空竭府藏。專擅國憲。廢易由意。假刑劫衆。大小屏息。侍中武衛將軍都鄉侯俱受先帝屬寄。見其姦虐。日月滋甚。特恐蕩搖宇宙。傾危社稷。奮其威怒。精貫昊天。計慮先於神明。智勇百於荆聶。躬持白刃。梟恪殿堂。勛超朱虛。功越東牟。國之元害。一朝大除。馳首徇示。六軍喜踊。日月增光。風產不動。斯實宗廟之神靈。天人之同驗也。今恪父子三首。縣市積日。觀者數萬。詈聲成風。國之大刑。無所不震。長老孩幼。無不畢見。人情之於品物。樂極則哀生。見恪貴盛。世莫與貳。身處台輔。中間歷年。今之誅夷。無異禽獸。視訖情反。能不慤然。且已死之人。與土壤同域。鑿掘斫刺。無所復加。願聖朝稽則乾坤。怒不極旬。使其鄉邑。若故吏民。收以士伍之服。惠以三寸之棺。昔項籍受殞葬之施。韓信獲收斂之恩。斯則漢高發神明之譽也。惟陛下敦三皇之仁。垂哀矜之心。使國澤加於辜戮之體。復受不已之恩。於以揚聲遐方。沮勸天下。豈不宏哉。昔樂布復命彭越。

變布爲梁大夫。使於齊。未反。漢召彭越。貴以謀反。夷三族。梟首洛陽。下詔有收輒捕之。布還奏事。彭越頭下。祠而哭之。吏捕以聞。上乃釋布。拜爲都尉。臣竊恨之不請主上而專名以肆

情。其得不誅。實爲幸爾。今臣不敢章宣愚情。以露天恩。謹伏手書。冒罪陳聞。乞聖朝哀察。於是亮峻聽。恪

故吏斂葬。遂求之於石子岡而葬之。初。權召恪於武昌。大司馬呂岱戒之曰。世方多難。子每事必十思。恪

答曰。昔季文子三思而後行。夫子曰。再斯可矣。今君令恪十思。明恪之劣也。岱無以答。時咸謂之失言。原

虞喜曰。夫託以天下至重也。以人臣行主威至難也。兼二至而管萬幾。能勝之者鮮矣。自非採納羣謀。詢于芻蕘。虛

已受人。常若不足。則功名不成。勳績莫著。況呂侯國之元者。智度經遠。而甫以十思戒之。而乃以示劣見拒。此元遜

之疎。乃機神不具者也。若因十思之義。廣諮當世之務。聞善速於雷動。從諫急於風移。豈得殫首殿堂。死兒豎之刃。

世人奇其英辯。造次可觀。而晒呂侯無對爲陋。不思安危終始之慮。是樂春藻之繁華。而忘秋實之甘口也。昔魏人伐蜀

別。蜀人禦之。精嚴垂發。六軍雲擾。土馬擐甲。羽檄交馳。費禕時爲元帥。荷國任重。而與來敏圍秦。意無厭倦。敏臨

向大敵。所規所圖。惟守與戰。何可矜己有餘。晏然無戚。斯乃性之寬簡。不防細微。卒爲降人郭修所害。豈非兆見

於後而禍成於此哉。往聞長寧之甄文傳。今觀元遜之逆呂侯。二事體同。故並而載之。可以鏡誠于後。永爲世鑒。及

恪輔政。漢張嶷與諸葛瞻書曰。東主初崩。帝實幼弱。太傅受寄託之重。亦何容易。親有周公之才。猶有管

蔡流信之變。霍光受任。亦有燕蓋。上官逆亂之謀。賴成昭之明。以免斯難。爾昔每聞東主殺生賞罰。不任

謹案。陳志張。擲傳作不卒。下人今以垂沒之命。卒召太傅。屬以後事。誠實可慮。加吳楚剽急。乃昔所記。而太傅離少主。

履敵庭。恐非良計。長算也。雖云東家綱紀肅然。上下輯睦。百有一失。非明者之慮也。取古則今。今則古也。自非郎君進忠言於太傅。誰復有盡言者邪。旋軍廣農。務行德惠。數年之中。東西並舉。實爲不晚。願深探

察。恪果以此敗。後孫琳伏誅。朝臣有乞爲恪立碑以銘其勳績者。博士盛沖以爲不應。孫休曰。盛夏出軍。

士卒傷損無尺寸之功不可謂能受託孤之任死於豎子之手不可謂智沖議爲是遂寢恪始退軍還岳友知其將敗書與滕允曰當人強盛山河可拔一朝羸縮人情萬端言之悲歎恪誅後孫峻忌友欲以爲鬱林太守友發病憂死友字文悌豫章人有脣吻少爲縣吏虞翻徙交州縣令友送之翻與語而奇焉爲書與豫章太守謝斐令以爲功曹原注吳錄云郡時見有功曹斐見之問曰縣吏聶友可堪何職對曰此人縣間小吏耳猶可堪曹佐斐曰論友者以爲宜作功曹君其詳之乃用爲功曹郡使至建業諸葛恪友之時論謂顧子嘿子真其間無所復容恪欲以友居其間由是知名後爲將討儋耳還拜丹陽太守至是卒年三十二

滕允字承嗣北海劇人也伯父耽文冑與劉繇州里通家以世擾亂渡江依繇孫權爲車騎將軍拜耽右司馬早卒無嗣冑善屬文權待以賓禮軍國書疏常令損益潤色之亦早卒權爲吳王追錄舊恩封允都亭侯少有節操美容儀每正朔朝會修勤在位大臣見者莫不歎賞弱冠尙公主年三十起家爲丹陽太守上表陳時政多所匡弼權以允故增公主之賜屢加存問允聽辭訟斷罪法察言觀色務盡情理有冤窮悲苦之言則對之流涕徙吳郡會稽所在見稱太元元年權寢疾允詣建業留爲太常與諸葛恪等俱受遺詔輔政孫亮立加衛將軍恪將悉衆伐魏允諫恪曰君以喪亂之際受伊霍之託入安本朝出摧強敵名聲振于海內天下莫不震動萬姓之心冀得蒙君而息今猥以勞役之後興師出征民疲力屈遠主有備若攻城不克野戰無獲足喪前勞而招後責也不如案甲息師觀隙而動且兵者大事事以衆濟衆

苟不悅。君獨安之。恪曰。諸云不可者。皆不見計算。懷居苟安者也。而子復以爲然。吾何望焉。夫以曹芳關
劣。政在私門。彼之民人。固已離心。今吾因國家之資。藉戰勝之威。則何往而不克哉。以允爲督。掌統留事。
允晝接賓客。夜省文書。或通曉不寐。寵任彌高。接士愈下。表奏書疏。皆自經意。不以委人。

謹案。目錄此下闕孫峻傳。止存孫綝華融二附傳。

綝字子通。與峻同祖。綝父綽爲安民都尉。綝始爲偏將軍。及峻死。爲侍中武衛將軍。領中外諸軍事。代知
朝政。呂據聞之大恐。與諸督將連名共表薦滕允爲丞相。綝更以允爲大司馬。代呂岱駐武昌。據引兵還。
使人報允。欲共廢綝。綝聞之。遣從兄憲謹案。陳志作從兄慮。孫權子名慮。綝從兄不得與之同名。考孫亮傳載逆
據於江都及其殺綝事。皆作孫憲。此書下文云。峻從弟憲與亮傳合。而傳
中仍多作慮。傳寫
之訛也。今改正。將兵逆據於江都。使中使敕文欽。劉纂。唐咨等合衆擊據。遣侍中左將軍華融。中書丞丁

晏告允取據。并諭允宜速去意。允自以禍及。因留融。晏勒兵自衛。名典軍楊崇。將軍孫咨告以綝爲亂。迫
融等使遣書難綝。綝不聽。表言允反。許將軍劉丞以封爵。使率兵騎急攻圍允。允又劫融等使詐詔發兵。
融等不從。允皆殺之。允顏色不變。談笑若常。或勸允引兵至蒼龍門。將士見公出。必皆委綝。就公。時夜已
半。允恃與據期。又難舉兵向宮。乃約令部曲說呂侯已在近道。故皆爲允盡死。無遺散者。時大風比曉據
不至。綝兵大會。遂殺允及將士數十人。夷允三族。原注。裴松之曰。孫綝雖兇虐。與滕允宿無嫌隙。允若且順綝
意。出鎮武昌。豈徒免當時之禍。仍將永保元吉。而犯機禍害
悲夫。綝遷大將軍。假節。封永寧侯。負貴倨傲。多行無禮。初峻從弟憲與誅諸葛恪。峻厚之。至右將軍

無難督授節蓋平九官事。綝遇憲薄於峻。憲與將軍王惇謀殺綝。綝殺惇。憲服藥死。魏大將軍諸葛誕舉壽春請降。綝遣文欽、唐咨、全端、全懌等帥三萬人掠之。魏鎮南將軍王基圍誕。欽等突圍入城。魏悉中外軍二十餘萬增誕之圍。朱異帥三萬人屯安豐。城爲文欽勢。魏兗州刺史州泰拒異於陽淵。異敗退。爲泰所追。死傷二千人。綝於是大發卒。出屯饒里。復遣異帥將軍丁奉、黎斐等五萬人攻魏。留輜重於都陸。異屯黎漿。遣將軍任度、張震等募勇敢六千人於屯西六里爲浮橋。夜渡。築偃月壘。爲魏監軍石苞及州泰所破。軍卻退。就高。異復作車箱圍趣五木城。苞、泰攻異。異敗歸。而魏泰山太守胡烈以奇兵五千詭道襲都陸。盡焚異資糧。綝授兵三萬人。使異死戰。異不從。綝斬之于饒里。而遣弟恩救之。會誕敗。引還。綝旣不能拔出。誕而喪敗士衆。自戮名將。莫不怨之。綝以孫亮始親政事。多所難問。甚懼。還建業。稱疾不朝。築室於朱雀橋邊。使弟威遠將軍據入蒼龍宿衛。弟武衛將軍恩。偏將軍幹。長水校尉闔。分屯諸營。欲以專朝。自固。亮內嫌綝。乃推魯育見殺本末。責怒虎林督朱熊。熊弟外部督朱損。不匡。正孫峻。乃令丁奉殺熊於虎林。殺損於建業。綝入諫。不從。亮遂與公主魯班。將軍劉承。議誅綝。全后父尙爲太常衛將軍。亮謂尙子資門侍郎紀曰。孫綝等專勢輕小於朕。朕見救之。使速上岸爲唐咨等作援。而留湖中。不上岸一步。又委罪朱異。擅殺功臣。不先表聞。築第橋南。不復朝見。此爲自任。無復所畏。不可久忍。今規取之。卿父作中軍都督。使密嚴整士馬。朕當自出臨橋。帥宿衛虎騎左右。無難一時取之。作版詔救綝。所領皆解散。不得

舉手正爾自當得之。謹案。志注作正爾自得之。卿去。但當使密爾。卿宜詔語卿父。勿令卿母知之。女人既不曉大事。且

緣同堂姊。邂逅泄漏。誤朕非小也。紀承詔以告尙。尙無遠慮。以語紀母。母使人密語繇。繇以兵襲尙。營執

之。遣弟恩殺劉承於蒼龍門外。比明。遂圍宮。亮大怒。上馬帶韃執弓欲出。曰。朕大皇帝之適子。在位已五

年。誰敢不從者。侍中近臣及乳母共牽攀止之。乃不得出。歎不食。罵皇后曰。爾父憤憤敗我大事。又呼紀

紀曰。臣父奉詔不謹。負上。無面目見上。因自殺。原注。孫盛曰。亮傳。稱亮少聰慧。勢當先與紀謀。不先令要知也。江表傳。說漏泄有由。於事爲詳矣。繇使光祿

勳孟宗告廟。廢亮召羣司議曰。少帝荒病昏亂。不可以處大位。承宗廟。謹案。此下志有以告先帝四字。廢之。諸君若有不

同者。下異議。皆震怖曰。惟將軍令。繇遣中書郎李崇奪亮璽綬。以亮罪狀班告遠近。尙書桓彝不肯署名。

繇怒殺之。原注。漢晉春秋。彝魏尙書階令之弟。吳錄。晉武帝問薛瑩吳之名臣。瑩對稱彝有忠貞之節。典軍施正勸繇徵立瑯琊王休。繇從之。遣宗正楷奉

書於休曰。繇以薄才。見授大任。不能輔導陛下。頃月以來。多所造立。親近劉承。悅於美色。發吏民婦女料

其好者。留於宮內。取兵子弟十八以下三千餘人。習之苑中。連日續夜。大小呼嗟。敗壞藏中。矛戟五千餘

枚。以作戲具。朱據先帝舊臣。子男熊損。皆承父之基。以忠義自立。昔殺小主。自是大主所創。帝不復精其

本末。便殺熊損。諫不見用。諸下莫不側息。帝於宮中作小船三百餘艘。成以金銀師工。晝夜不息。太常全

尙累世受恩。不能督諸宗親。而全端等委城就魏。尙位過重。會無一言以諫陛下。而與敵往來。使傳國消

息。懼必傾危社稷。推案舊典。運集大王。竊以今月二十七日。擒尙斬承。以帝爲會稽王。遣楷奉迎。百寮喁

喟立住道側。綝遣將軍孫耽送亮之國。徙尙於零陵。遷公主於豫章。綝意彌溢。侮慢民神。遂燒大橋頭伍子胥廟。又壞浮屠祠。斬道人。休旣卽位。稱草莽。臣詣闕上書曰。臣伏自省。才非幹國。因緣肺腑。位極人臣。傷錦敗駕。罪負彰露。尋愆惟闕。夙夜憂懼。臣聞天命業謫。必就有德。是以幽厲失度。周宣中興。陛下聖德纂統大業。宜得良輔。以協雍熙。雖堯之盛。猶求稷契之佐。以協明聖之德。古人有言。陳力就列。不能者止。臣雖自展竭。無益庶政。謹上印綬節鉞。退還田里。以避賢路。休引見慰喻。又下詔曰。朕以不德。守藩於外。值茲際會。羣公卿士。暨於朕躬。以奉宗廟。朕用憊然。若涉淵冰。大將軍忠計內發。扶危定傾。安康社稷。功勳赫然。昔漢孝宣踐阼。霍光尊顯。褒德賞功。古今之通義也。其以大將軍爲丞相。荊州牧。食五縣。恩爲御史大夫。衛將軍。據右將軍。皆縣侯。幹雜號將軍。亭侯。綝一門五侯。皆典禁兵。權傾人主。自吳國朝臣。未嘗有也。綝奉牛酒詣休。休不受。齋詣左將軍張布。酒酣出怨言曰。初廢少帝時。多勸吾自爲者。吾以陛下賢明。故迎之。帝非我不立。今上禮見拒。是與凡臣無異。當復改圖爾。布以言聞休。休銜之。恐其有變。數加賞賜。又復加恩侍中。與綝分省文書。或有告綝懷怨。侮上。欲圖反者。休執以付綝。殺之。由是愈懼。因孟宗求出屯武昌。休許焉。盡敕所督中營精兵萬餘人。皆令裝載。所取武庫兵器。咸令給與。又求中書兩郎。典知荊州諸軍事。主者奏中書不應外出。休特聽之。將軍魏逸說休曰。綝居外必有變。武衛士施朔又告綝欲反。有徵休密問張布。布與丁奉謀於會。殺綝。永安元年十二月丁卯。建業中謠言明會有變。綝聞之。不悅。

夜大風發木揚沙。緄益恐。戊辰臘會。緄稱疾。休強起之。使者十餘輩。緄不得已。將入。衆止焉。緄曰。國家屢有命。不可辭。可豫整兵。令府內起火。因是可得速還。遂入。尋而火起。緄求出。休曰。外兵自多。不足煩丞相也。緄起離席。奉布目左右縛之。緄叩首曰。願徙交州。休曰。卿何以不徙。滕允呂據。緄復曰。願沒爲官奴。休曰。何不允據爲奴乎。遂斬之。以緄首令其衆曰。諸與緄同謀皆赦。放杖者五千人。闔乘船欲北降。追殺之。夷三族。發孫峻棺。取其印綬。斲其木而埋之。以殺魯育等故也。緄時年二十八。休恥與峻。緄同族。特除其屬籍。稱之曰故峻。故緄云。休又下詔曰。諸葛恪。滕允。呂據。盡以無罪爲峻。緄兄弟所見殘害。可爲痛心。促皆改葬。各爲祭奠。其罹恪等事見遠徙者。一切召還。華融字德蕤。廣陵江都人。祖父避亂居山陰。蕤原山下。皇象亦寓居山陰。吳郡張溫來就象學。欲得所舍。或告溫曰。蕤山下有華德蕤者。雖年少。有令志。可舍也。溫遂詣融家。朝夕談講。俄而溫爲選部尙書。乃擢融爲太子庶子。知名顯達。

謹案目錄此下有濮陽興傳今闕

孟仁字恭武。江夏人也。本名宗。避皓字易焉。少從南陽李肅學。其母爲作厚蓐大被。或問其故。母曰。小兒無德致客。學者多貧。故爲廣被。庶可得與氣類接也。其讀書夙夜不懈。肅奇之曰。卿宰相器也。宗母嗜筍。多節將至。而筍未生。宗入竹林哭泣。筍爲之出。得以供母。人以爲孝感所致。初爲驃騎將軍朱據軍吏。將母在營。旣不得志。又夜雨屋漏。因起涕泣以謝其母。母曰。但當勉之。何足泣也。據亦稍知之。除爲鹽池司。

馬自能結網以捕魚作鮓寄母。母還之曰：汝爲魚官，而作鮓寄我，非廉子也。而我受之，是貪母也。何以爲訓？遷吳令，時皆不得將家之官，每得時物，以母未食而卒不食，及母亡，犯禁，委官奔喪，已而自拘聽刑。陸遜陳其素行，因爲之請，權乃特爲減死一等，復使爲官。孫皓時，累遷光祿助，遂爲司空，卒于位。

丁固字子賤，會稽人也。父覽字孝連，八歲而孤，清身立行，用意不苟，推財從弟，以義讓稱。虞翻折輩行與之交，遂顯名於時。仕郡爲功曹，守始平長。孫權深器待之，未及擢用，會病卒。固本名密，避滕密，改作固。固在襁褓中，闕澤見而異之，曰：此兒後必致公輔，早喪其父，獨與母居，家貧守約，色養致敬，族弟孤弱，與同寒溫。虞翻與固同輩，書曰：丁子賤寒淵好德，堂構克舉，野無遺薪，斯之爲懿，其美優矣。令德之後，惟此君嘉爾。其後仕宦顯達。孫休時爲左御史大夫，孫皓立，遷司徒。初固爲尙書，夢松生腹上，謂人曰：松文十八。公後十八歲，吾其爲公乎？至是果爲公。皓悖逆不道，固與陸凱、孟宗同心憂國，多所匡正。鳳皇二年卒于位。年七十六。子彌字欽遠，仕晉至梁州刺史。孫潭，光祿大夫。

范曄字孝敬，廣陵人，性純直，天姿忠篤。問學該貫，早有令名。著論二十篇，名曰矯非，後爲侍中，出補武昌左部督，治軍整頓，孫皓移都，甚憚之，詔曰：曄助德俱茂，朕所敬憑，宜登上公，以副衆望，以爲太尉。曄自恨久爲將，遂託老耄，軍士戀之，舉營爲之殞涕。鳳皇三年卒。子耀嗣。

議曰：權置丞相，雍容優禮，而不畀政柄，是以大綱不立。如東漢之世，臨終而遽託國於新進之恪，豈能厭

國人之心哉。器非宏毅。驕吝專復。矜己陵人。能無敗乎。亦屢出師爲孔明之事。疲民以逞。僭軍殺身。復誰各哉。大臣首亂。兇豎繼起。放弑誅殺。涵血江壖。鍾毒於皓。竟亡其國。皆恪啓之也。恪死而滕允猶保富貴。得無及乎。興居宰輔。不爲經國遠圖。協張布之邪。納萬彘之說。輒廢家適。援立支孽。誅夷宜矣。仁固慎。皆以德望器度。爲皓三公。脫命暴朝。得死於位。幸哉。

贊曰。吳楚剽悍。氓俗喜殺。元遜弗靖。能免衷甲。國賊嘻笑。亂臣手搯。原注。如刃擲首。更相傾軋。竟啓虐酷。酷罰淫刑。國亡毒流。六代血腥。

續後漢書卷第六十四

列傳第六十一

吳臣

陶璜

父基
孫綬

子威

吾彥

滕修

子並

陶璜字世英。丹陽秣陵人也。父基交州刺史。孫皓時。交趾太守孫贇貪暴爲百姓患。會察戰鄧荀至。擅調孔雀三千頭。遣送秣陵。既苦遠役。咸思爲亂。郡吏呂興殺請及荀。以郡附晉。武帝拜興安南將軍。交趾太守尋爲其功。曹李統所殺。帝更以建寧鬱谷爲交趾太守。谷又死。更遣巴西馬融代之。融病卒。南中監軍霍弋又遣韃爲楊稷代融。與將軍毛晃。九真太守董元。牙門孟幹。孟通。李松。王業。爨能等自蜀出交趾。破吳軍于古城。斬大都督修則。交趾刺史劉峻。吳遣虞汜爲監軍。薛翊爲威南將軍。大都督璜爲蒼梧太守。距稷戰于分水。璜敗。退保合浦。亡其二將。翊怒謂璜曰。若自表討賊而喪二帥。其責安在。璜曰。下官不得行意。諸軍不相順。故敗爾。翊欲引軍還。璜夜以數百兵襲董元。獲其寶物。船載而歸。翊乃謝之。以璜領交州爲前部督。璜從海道出於不意。徑至交趾。元距之。諸將將戰。璜疑斷牆內有伏兵。列長戟於其後。兵纔接。元僞退。璜追之。伏兵果出。長戟逆之。大破元等。以前所得寶船上錦物數千匹。遣扶嚴賊帥梁奇。奇

將萬餘人助璜。元有勇將解繫在城中。璜誘其弟象使爲書與繫。又使象乘璜輅車鼓吹導從行。元等曰：象若此，繫必有去志，乃就殺之。璜遂克交趾。皓因用璜爲交州刺史。璜有謀策，周窮好施，能得人心。滕修數討南賊，不能制。璜曰：南岸仰吾鹽鐵，斷勿與市，皆壞爲田器。如此二年，可以一戰而滅也。修從之。果破南賊。初，霍弋之遣稷、吳等與之誓曰：若賊圍城，未百日而降者，家屬誅。若過百日，救兵不至，吾受其罪。稷等守未百日，糧盡乞降。璜不許，給其糧使守。諸將並諫。璜曰：霍弋已死，不能救稷等必矣。可須其日滿，然後受降，使彼得無罪。我受有義。內訓百姓，外懷鄰國，不亦可乎？稷等糧盡，救兵不至，且踰百日，城中死亡者半。將軍王約反攻稷，稷復請降，乃納之。謹案：孫皓傳注作王約反降。吳人得入城。獲稷、吳，皆囚之。與此不同。修則旣爲毛、吳所殺，則子允隨璜城旣降，允求復讎，璜不許。吳密謀襲璜。謹案：孫皓傳注。作吳亦不爲璜等屈。不言謀襲璜。事覺，收吳呵曰：晉賊。謹案：孫皓傳注作晉兵賊。吳厲聲曰：吳、狗何等爲賊！允剖其腹曰：復能作賊不？吳猶罵曰：吾志殺汝，孫皓汝父何死？狗也。璜禽稷等，送之稷至合浦，嘔血死。孟幹、爨能、李松等至建業，皓將殺之。或勸皓，幹等忠於所事，宜宥之。以勸事君。皓從其言，將徙之臨海。幹等志欲北歸，慮東徙轉遠，以吳人愛蜀，側竹弩言能作之。皓留村作部，後幹逃至雒陽。松能爲皓所殺。幹、陳伐、吳之計。武帝乃厚加賞賜，以爲日南太守。九真郡功曹李祚保郡附晉。璜遣將攻之，不克。祚、舅黎晃隨軍勸祚。答曰：舅自吳將，祚自晉臣，惟力是視。爾踰時乃拔。皓以璜爲使持節都督交州諸軍事，前將軍交州牧。武平、九德、新昌土地阻險，夷獠勁悍，歷世不賓。璜皆討平之，開置三郡及

九真屬國三十餘縣。徵瑁爲武昌都督。以合浦太守謹案。晉書作太中誤。修允代之。交土人請留瑁者以千數。於是

遣還。皓既降晉。手書遣瑁歸晉。流涕數日。遣使送印綬詣雒陽。武帝詔復其本職。封宛陵侯。改爲冠軍將

軍。吳平。罷省州郡兵。瑁上言曰。交土荒裔。斗絕一方。重譯而言。連帶山海。又南郡去州海行千有餘里。外

距林邑纔七百里。夷帥范熊世爲逋寇。自稱爲王。數攻百姓。且連接扶南。種類猥多。朋黨相倚。負險不賓。

往隸吳時。數作寇逆。攻破郡縣。殺害長吏。臣以厓驚。昔爲故國所採。偏戍在南。十有餘年。雖前後征討。翦

其魁傑。深山僻穴。尙有逋竄。又臣所統之卒。本七千餘人。南土溫溼。多有氣毒。加累年征討。死亡減耗。其

見在者二千四百二十八人。謹案。今晉書作二千四百二十八人。無八字。今四海混同。無思不服。當卷甲消刃。禮樂是務。而此州

之人。識義者寡。厭其安樂。好爲禍亂。又廣州南岸周旋六千餘里。不賓屬者乃五萬餘戶。及桂林不羈之

輩。復萬戶。至於服從官役。纔五千餘家。二州唇齒。惟兵是鎮。又寧州與古接壤。上流去交趾郡千六百里。

水陸並通。互相維衛。州兵未宜約損。以示單虛。夫風塵之變。出於非常。臣亡國之餘。議不足采。聖恩廣大。

猥垂飾擢。蠲其罪釁。改授方任。去辱卽寵。拭目更視。誓念投命。以報所受。臨履所見。謹冒瞽陳。又以合浦

郡土地磽确。無有田農。百姓惟以采珠爲業。商賈去來。以珠貨米。而吳時珠禁甚嚴。慮百姓私散好珠。禁

絕來去。人以飢困。又所調猥多。限每不充。今請上珠三分輸二。次者輸一。蠲除自十月訖二月。非採

上珠之時。聽商旅往來如舊。並從之。在南三十年。威恩著于殊俗。及卒。舉州號哭。如喪其親。晉朝乃以員

外散騎常侍吾彥代璜。彥卒。又以員外散騎常侍顧祕代彥。祕卒。州人逼祕子參頌州事。參弟壽求頌州人不聽。固求之。遂頌州。壽乃殺長史胡肇等。又將殺帳下督梁頌。頌走得免。起兵討壽。擒之。付壽母令鳩殺之。頌乃迎璜子蒼梧太守威領刺史。在職甚得百姓心。三年卒。威弟淑子綏。後並爲交州。自甚至綏四世爲交州者五人。璜弟濬。吳鎮南大將軍荊州牧。濬弟抗。太子中庶子。濬子湮。猷。並有名。湮至臨海太守黃門侍郎。猷宣城內史。王導右軍長史。湮子馥。子湖令。爲韓晃所殺。追贈廬江太守。

謹案。目錄此下有吾彥傳。今闕。

滕修字顯先。南陽西鄂人也。以材勇爲將。封西鄂侯。孫皓時代。熊睦爲廣州刺史。甚有威惠。原注。王隱交

置廣州。以南陽滕修爲刺史。或語修蝦鬚長一丈。修不信。其人果至。東海取蝦鬚長四丈四尺。封以示修。修乃服之。徵爲執金吾。進位司空。未拜。廣州郭馬等爲亂。馬本

合浦太守。修允部曲督。允轉桂林太守。疾病住廣州。先遣馬將五百兵至郡。安撫民夷。允卒。兵當分給諸

將。馬等累世舊軍。不樂離別。皓時又科實廣州戶口。馬與部曲將何典。王族。吳述。殷興等。因此恐動。兵民

聚徒衆。攻殺廣州督虞授。馬自號都督交廣二州諸軍事。安南將軍。與廣州刺史。述。南海太守。典。攻蒼梧。

族。攻始興。先是。吳有說識者曰。吳之敗。兵起南裔。亡吳者。謹案。志注作世亡者誤。公孫也。皓聞之。文武職位。至于卒

伍。有姓公孫者。皆徙廣州。及聞馬反。大懼曰。此天亡也。以修宿有威惠。爲嶺表所服。乃轉鎮南將軍。假節

領廣州牧。率萬人從東道討之。未得前。馬殺南海太守劉略。逐廣州刺史徐旗。皓又遣徐陵督陶濬將七

千人從西道命交州牧陶璜部伍所領及合浦鬱林諸郡兵與東西軍共擊馬未克而晉伐吳修率衆赴難至巴丘而皓已降乃縞素流涕而還與廣州刺史閻豐蒼梧太守王毅各送印綬詔以修爲安南將軍廣州牧持節都督如故封武當侯加鼓吹委以南方事修在南積年爲邊夷所附太康九年卒請葬京師帝嘉其意賜墓田一頃諡曰聲子並上表言亡父修羈縲吳壤爲所驅馳幸逢開運沐浴至化得從俘虜握戎馬之要未覲聖顏委南蕃之重實由助勞少聞天聽故也年衰疾篤屢乞骸骨未蒙垂哀奄至薨隕臣承遺意輿輓還都瞻望雲闕實懷痛裂切聞博士諡修曰聲直彰流播不稱行績不勝愚情冒昧聞訴帝乃賜諡曰忠並子含初爲庾冰輕車長史討蘇峻有功封夏陽縣開國侯邑一千六百戶遷平南將軍廣州刺史在任積年甚有威惠卒諡曰戴含弟子遜交州刺史修曾孫恬之龍驤將軍魏郡太守戍黎陽爲翟遼所執死之

議曰孔子言衛靈公之無道康子曰奚而不喪子曰仲叔圉治賓客祝鮀治宗廟王孫賈治軍旅夫如是奚其喪故無道之君尙能用人猶未遽亡也孫皓暴戾雖一朝不能有國者也而能倖抗以荆服任璜以南土屹然爲國根柢是以窮凶極惡而與鉅晉爲敵者數十年況以道御之者也璜彥修世牧交廣威服嶺海孫皓之亡足爲尉佗皆放兵歸命以功名終君子哉璜之服楊稷亦荀吳之降鼓也有古良將之規矣

原注。左氏傳。晉荀吳帥師伐鮮虞圍鼓。鼓人或請以城叛。穆子弗許。左右曰。師徒不動。而可以獲城。何故不爲。穆子曰。吾聞諸叔向曰。好惡不愆。民知所適。事無不濟。或以吾城叛。吾所甚惡也。人以城來。吾獨何好焉。賞所

甚惡。若所好何。若其弗賞。是失信也。何以庇民。力能則進。否則退。量力而行。吾不可以欲城而遽姦。所喪滋多。使鼓人殺叛人而繕守備。圍鼓三月。鼓人或請降。使其民見曰。猶有食色。姑修而城。軍吏曰。獲城而勿取。勤民而頓兵。何以事君。穆子曰。吾以事君也。獲一邑而教民忘。將焉用邑。邑以實念。不如完舊。實念無卒。棄舊不祥。鼓人能事其君。我亦能事吾君。率義不爽。好惡不愆。城可獲而民知義。所有死命而無二心。不亦可乎。鼓人告食竭力盡而後取之。克鼓而反。不戮一人。以鼓子感鞮歸。

贊曰。蠻陬獠徠。微綃室珠窟。遐外限阻。易爲翻覆。朱鳥忽驚。便乘黃屋。漢吳載亡。日車折軸。民夷不聳。萬里清肅。前有土燮。後有三牧。譚案。陶璜。吾彥。滕修。皆終于晉代。故陳志不爲立傳。此以三人本吳臣。又相繼牧交廣。事蹟相類。合傳是矣。

續後漢書卷第六十五上上

列傳第六十二上上

儒學

經術總敘 易書詩春秋禮樂
論語孝經孟子

書契始宓犧氏。下蕞虞夏商周。有儒之實。無儒之名。而天下治。仲尼集列聖之成。則天之時。以經世。本三皇以爲易。則乎春。以明陰陽之理。本二帝以爲書。則乎夏。以明帝王之事。本三王以爲詩。則乎秋。以明治亂之情。本五霸以爲春秋。則乎冬。以明尊卑之分。貫之以禮樂。則乎二氣。以通天人之際。於是乎建皇極。以用太極。經世之制畢矣。仲尼沒。七十子之徒游于諸侯。揭焉標乎一世。而以儒自名。以道自私。自魯八儒外。而真儒鮮矣。原注。陶潛聖賢羣輔錄。孔子沒後。散於天下。設于中國。成百氏之源。爲紀綱之儒。居環堵之室。大讓如慢。小讓如僞者。華門圭竇。藥廂繩樞。井日而食。以道自居者。有道之儒。子思氏之所行也。衣冠中。動作順。爲道。爲恭儉莊敬之儒。仲梁氏傳樂爲道。顏氏傳詩爲道。爲諷諫之儒。孟氏傳書爲道。爲疏通致遠之儒。漆雕氏傳禮。傳易爲道。爲潔淨精微之儒。學有枝葉。披其本實。於是乎異端並興。有老莊楊墨。申韓儀秦。百家衆流。蕪沒秕稗。啾啾喧聒。不勝其弊。激訐煩厭。焚滅不足。至于坑戮。儒學幾乎熄矣。然而秦博士之所掌。二帝三王之典籍。猶存。及項籍入咸陽。一炬而盡。禍尤酷於秦人。漢興。高帝過魯。以太牢祀孔子。陸賈稱說詩書。叔孫通制禮。

儀復開後世儒學之原。孝惠四年始除挾書律。殘門餘士。祛箝解禁。排蓬蓽。振埃燼。掇拾斷爛而出焉。公卿大臣皆挽彊蹶張之流。蕭相國以刀筆。曹參事蓋公文景好刑名。而竇太后尊黃老。原注。漢書曹參為齊丞相。開膠西有蓋公善治黃老言。使人厚幣請之。既見蓋公。公為言治道貴清靜而民自定。推此類具言之。參於是辟正堂舍蓋公焉。竇太后好黃老言。而竇嬰。田蚡。趙綰等務隆推備術。貶道家言。是以竇太后滋不悅。雖置博士。具官

待問而已。傳聞漸舛。大義昧沒。僅存章句傳注之學。專門傳家。延引聖道。言易則田何。言書則伏生。言詩

則申公。轅固韓生。言禮則高堂生。言春秋則胡毋生。董仲舒。孝武隆儒。表章六經。公孫宏以治春秋為丞

相封侯。學者靡然嚮風。始為學官。置弟子員。然好名崇修。擯申公而黜董仲舒。原注。漢書。上使使束帛加璧安車以蒲葵輪。駕駟迎申公

。至見上。上問治亂之事。申公對曰。為治者不在多言。顧力行何如爾。是時上方好文辭。見申公對。默然。申公以病免歸。公孫宏性意忌。外寬內深。殺主父偃。徙董仲舒膠西。皆宏力也。使司馬相如嚴助難

誦大臣。原注。漢書上令嚴助等與大臣辨論中外相應以義理之文。大臣數詘。其尤親幸者東方朔。枚臯。嚴助。吾丘壽王。司馬相如。相如常稱病避事。朔臯不根持論。上頗以俳優畜之。文辭雖盛。而儒學終

于不振。孝宣起經生。乃親稱制。論定經義於石渠。原注。漢書宣帝受詩於東海濱中翁。高材好學。甘露三年詔諸儒講五經同異。太子太傅蕭望之等奏其義。上親稱制臨決焉。施讐甘露中論五經於石渠閣。元成之際。貢薛韋匡。迭為宰相。原注。貢禹。薛廣德。韋賢。匡衡也。增太學弟子至三千人。及劉歆校綜七

略。凡三萬三千餘卷。遺經逸典盡出。而儒學始盛矣。遭王莽更始之亂。焚蕩散落。幾復委地。光武中興。收

集經牒祕書。摺載二十餘兩。輸之雒陽。投戈講藝。息馬論道。至夜分乃寐。鴻儒碩士。雲會輦轂。立五經博

士。各以家法教授。易有施孟。梁丘。京氏。書歐陽。大小夏侯。詩齊魯。韓。禮大小戴。春秋嚴顏。凡十四博士。

孝明之世。臨雍拜老。橫經問道。至於期門羽林之士。皆通章句。匈奴亦遣子入學。原注。後漢書。明帝正坐自講。諸儒執經問難于前

。

冠帶潛神之八。圍橋門而觀聽者。蓋億萬計。其後復爲功臣子孫四姓末屬別立校舍。搜選高能。以授其業。自期門羽林之士。悉令通孝經章句。匈奴亦遣子入學。孝章大會諸儒於白虎觀。考詳

同異。親臨稱制。如石渠故事。著爲通義。原注。後漢書建初四年。詔下太常將大夫。博士。議郎。郎官。及諸生。諸儒。會白虎觀講議五經同異。使五官中郎。將魏應承制問。侍中淳于恭。

奏。帝親稱制臨決。如孝宣甘露石渠故事。作白虎議奏。原注。後漢書。翟酺上言。孝文皇帝始置一經博士。武帝初興。懲其荒廢。起太學博士舍內外講堂。諸生橫卷爲海內所集。明帝時辟雍始成。欲毀太學。太尉趙熹以爲太學辟雍。皆宜兼存。故並傳至今。而頃者頽廢。至爲園採芻牧之處。宜更修繕。飭進後學。卒從之。酺免後。遂起太學。更開拓房室。學者爲酺立碑銘。

增廣學舍至二百四十房。千八百五十室。梁太后詔大將軍下至六百石。悉遣子就學。游學增

盛。至三萬餘生。靈帝詔諸儒正定五經。刻於石碑。爲古文。篆。隸三體書法。以相參檢。樹之學門。原注。後漢書。蔡邕以

經籍去聖久遠。文字多謬。俗儒穿鑿。疑誤後學。熹平四年。乃與五官中郎將堂谿典。光祿大夫楊賜。諫議大夫馬日磾。原注。後漢書。蔡邕以

議郎張馴。韓說。太史令單鳳等。奏求正定六經文字。靈帝許之。邕乃自書丹於碑。使工鐫刻。立於太學門外。雒陽

十六碑存。十二碑毀。南行禮記十五碑。悉崩壞。東行論語一碑毀。禮記碑上有諫議大夫馬日磾。議郎蔡邕名。於是

漢之儒學。幾於三代之際矣。故學道爲漢室元氣。與治體污隆。所以包舉宓犧氏之先。統承仲尼氏之後。

而垂萬世之緒者也。雖中更黃老之異。申韓之慘。文賦之浮。王霸之雜。繼以恭顯之讒。新莽之篡。咸宦之

亂。黨錮之禍。而正臣義士。不負所學。擁衛宗社。矯矯嶽嶽。力與天爭。繼之以死。當建安末。猶有鄭元。服虔。

敷暢經旨。盧植。趙岐。正色立朝。孔融。仗節死義。諸葛亮。委身存漢。如董卓之暴。曹操之姦。傾天下。倒四海。

卻立瞪睨。歷涎飲食。不敢遂取。儒效也。章武篡統。東京遺老。留滯三方。血并虎戰。躡蹻墳典。原注。後漢書。初光武還還

雒陽。其經牒祕書。載之二千餘兩。自此以後。參倍於前。及董卓移都之際。吏民擾亂。自辟雍。東觀。蘭臺。石室。宣

明。鴻都。諸藏典策文章。競共剖散。其繚帛圖書。大則連爲帷蓋。小則制爲騰囊。及王允所收而西者。裁七十餘乘。

道路難遠。復棄其牛矣。後長安之亂。一時焚蕩。莫不泯盡焉。青衿轉爲介冑。疊序鞠爲茂草。門傳家業。寢以墜喪。且鄴臺三祖。專尙辭章。鍾賈不學。首登三事。迄于正始。盛爲清談。經術荒蕪。儒者不作。凡歷秦項莽卓四厄。而卒爲異端。文景武宣光武。明章之遺澤盡。而三綱委地。司馬氏父子兄弟篡弒爭奪。而悖亂滋熾矣。初司馬遷爲儒林傳。班固蔚宗二漢書皆有之。今斷自桓靈而下。歷三國迄于晉初。無大事業。祇以經學名家。至於寢微寢滅。絕無僅有者。復著儒學篇。要終漢道云。

禮

虞書舜命九官曰。咨四岳。有能典朕三禮。兪曰。伯夷。帝曰。兪咨伯。汝作秩宗。夙夜惟寅。直哉惟清。則禮之有官有書尙矣。夫禮絜矩民彝。經緯人道。著天理之節文。爲之度數。儀則使之周旋中節。治人事神。規心檢身。齊家以平天下。故主於敬。敬則直。直則清。而禮之大本立矣。以是命之。蓋先王之志也。書契以來。代各有制。至於夏商。莫不有書。及周公制作之際。兼采並用。酌其中而爲之制。經禮三百。威儀三千。大宗伯掌之。其書備矣。夷厲而下。諸侯僭侈。踰閑毀則。遂去其籍。王室文獻。漸亦廢滅。自孔子時已不得見其全。祇有周公所著職官一書。且多殘缺。乃與其徒講明定著。子夏哀集以爲傳。七十子之儔。相與爲之記。謂之儀禮。而後經禮稍備。歷戰國秦漢諸儒。相與授受。志禮之變。而言其義。掇拾孔門餘論。各爲傳記。曰禮記。如曲禮少儀內則。皆威儀三千之制也。於是禮書有三。其大經則著于周官儀禮。其傳義則見于禮記。

先王之盛意猶可稽也。漢興魯有高堂生傳士禮十七篇。而魯徐生善爲頌。

原注。蘇林曰。漢舊儀有二郎爲此頌。貌威儀事有徐氏。徐氏後有

張氏。不知經。但能盤辟爲禮容。天下郡國有容史。皆詣魯學之。顏師古曰。頌讀與容同。

傳其子。至孫延襄及公戶滿意桓生單次皆爲禮官大夫。而蕭

奮亦以禮顯。故言頌者由徐氏。奮授孟卿。孟卿授后蒼。閻丘卿。蒼說禮數萬言。號后氏曲臺禮。授聞人通

漢戴德。戴聖。慶普。德號大戴。聖號小戴。與慶普三家皆立於學官。大戴授徐良。小戴授橋仁。楊榮。普授夏

侯敬。及族子咸。孝武時河間獻王得禮古經五十六篇於魯淹中。及孔氏學七十篇與明堂陰陽王史氏

記。皆七十子後學者所記。多天子諸侯卿大夫之制。愈於后蒼等推士禮而致於天子之說。置不用。亡之

孔安國又獻古禮經七十篇。周官六篇。記百三十一篇。禮經卽儀禮。周官。周禮也。至劉向摠得記二百十

四篇。戴德刪其煩重爲八十五篇。戴聖又刪爲四十七篇。建武以來。曹充習慶氏學。傳其子襄。漢禮。鄭

衆傳周官經。馬融傳小戴學。增入月令。明堂位二篇。共四十九篇。今禮記也。融又作周官傳授鄭元。元作

周官注。元本習小戴禮。後以古經校之。取其義長者爲鄭氏學。通爲三禮焉。

孝經

孔子以曾子之孝。問答之間。爲陳孝道。而曾子門人記之。謂之孝經。殆亦樂正子春子思爲之也。遭秦焚

滅。河間顏芝獨藏之。惠帝除挾書之律。芝子貞始出其書十八章。而傳之長孫氏。江翁。后蒼。翼。奉。張禹。皆

自名家。魯恭王壞孔子宅。得古文二十二章。與今文不同。劉向校祕書。刊古今文爲十八章。後世學者增

其篇目。然非古記之文也。按古文自仲尼居至此。庶人之孝共爲一篇。記者別以爲經。自曾子曰至何日忘之數節。記者別爲經之傳。至孝子喪親一章。記者以孝子事親之義。特置於末也。然其援引詩書與其章次。亦或錯亂不可考也。

謹案。經術摠敍目錄。有易書等九經。大典散編。止三禮孝經二篇。而無易書詩樂春秋論語孟子等篇。蓋闕佚矣。然觀此二篇。亦止統論源流。則易書等篇概可知也。

續後漢書卷第六十五上下

列傳第六十二上下

儒學

漢

何休 服虔 穎容 謝該 許慎 蔡元 鄭元 許慈 孟光 來敏 尹默 李譔

謹案何休服虔穎容三傳闕

謝該字文儀南陽章陵人也善明春秋左氏爲世名儒門徒數百千人建安中河東人樂詳條左氏疑滯數十事以問該皆爲通解之名爲謝氏釋行於世仕爲公車司馬令以父母老託疾去官欲歸鄉里會荆州道斷不得去少府孔融上書薦之曰臣聞高祖創業韓彭之將征討暴亂陸賈叔孫通進說詩書光武中興吳耿佐命范升衛宏修述舊業故能文武並用成久長之計陛下聖德欽明同符二祖勞謙屢運三年乃謹今尙父鷹揚方叔翰飛王師電驚羣凶破殄始有囊弓臥鼓之次宜得名儒典綜禮紀竊見故公車司馬令謝該體曾史之淑性原注曾參史魚兼商偃之文學原注夏子游博通羣藝周覽古今物來有應事至不惑清白異行敦悅道訓求之遠近少有疇匹若乃巨骨出吳原注史記吳伐越槩會稽得骨節專車吳使使問仲尼骨何者最大仲尼曰禹致羣臣於會稽山防風

氏後至。禹殺而修之。隼集陳庭。原注。史記有隼集于陳庭而死。楛矢貫之。石磐矢長尺有咫。陳潘公問仲尼。仲尼

其節專車。此為大也。黃熊入寢。原注。左氏傳。鄭子產聘于晉。晉侯有疾。韓宣子曰。寡君

於配虞胡公而封諸陳。試求之故府。果得之。黃熊入寢。寢疾於今三月矣。今夢黃熊入於寢門。其何厲鬼也。對曰。寡君

昔堯殛鯀于羽山。其神化為黃熊。以入于羽淵。實為夏郊。三代。亥有二首。原注。左氏傳。晉悼公夫人食與人之城杞

祀之。晉為盟主。其或者未之祀也乎。韓子祀夏郊。晉侯有間。亥有二首。原注。左氏傳。晉悼公夫人食與人之城杞

有與疑年。使之年。曰。臣小人也。不知紀年。臣生之歲。正月甲子朔。四百有四十五甲子矣。其季子今三之一也。吏

走問諸朝。師曠曰。魯叔仲惠伯會卻成子于承筐之歲也。七十二年矣。史趙曰。亥有二首六身。下二如身。是其日數也

士文伯曰。然則二萬。非夫洽聞者莫識其端也。雋。原注。徂。不疑定北闕之前。原注。漢書始元五年。有一男子乘

六千六百有八旬也。詔使公卿將軍中二千石雜識視。長安中吏民聚觀者數萬人。右將軍勒兵闕下以備

冒。詣北闕。自謂衛太子。公車以聞。詔使公卿將軍中二千石雜識視。長安中吏民聚觀者數萬人。右將軍勒兵闕下以備

非常。丞相御史中二千石至者立莫敢發言。京兆尹雋不疑後到。叱從吏收縛。或曰。是非未可知。且安之。不疑曰。諸

君何愚於衛太子。昔劇曠違命出奔。輒拒而不納。春秋是之。衛太子得罪先帝。亡不即死。今來

自詣。此罪人也。遂送詔獄。天子與大將軍霍光聞而嘉之曰。公卿大臣。當用經術。明於大誼。夏侯勝辨常陰之

驗。然後朝士益重儒術。原注。漢書。昌邑王嗣立。數出。勝常乘輿前諫曰。天久陰而不雨。臣下有謀上者。陛下出

安世謀欲廢昌邑王。光讓安世以為泄語。安世實不言。適召問勝。勝對洪範傳曰。皇之不極。今該實卓然此跡前

厥罰當陰。時則下人有伐上者。惡察察言。故云臣下有謀。光安世大驚。以此益重經術士。今該實卓然此跡前

列間以父母老疾棄官欲歸。道路險塞無由自致。猥使良才抱璞而逃。踰越山河。沈淪荆楚。所謂往而不

反者也。原注。韓詩外傳。山林之士為名。故往而不。後日當更饋藥以釣由余。原注。史記。由余其先晉人也。亡

觀秦繆公。示以宮室積聚。由余曰。使鬼為之則勞神矣。使人為之亦苦民矣。繆公退而問內史廖曰。孤聞鄰國有聖人敵

國之憂也。今由余賢。寡人之害。將奈之何。內史廖曰。戎王處辟匿。未聞中國之聲。君試遣以女樂。以奪其志。為由余

請以疏其間。留而莫遣以失其期。戎王怪之。必疑由余。君臣有間。乃可虜也。乃令廖以女樂。以奪其志。為由余

女樂二八遣戎王。戎王受而說之。由余數諫不聽。繆公又敬使人問由余。由余遂去降秦。刻像以求傳說。豈不煩哉

臣愚以為可推錄所在。召該令還。楚人止荀卿之去國。原注。劉向荀子序。荀卿過楚。春申君以為蘭陵令。人

或謂春申君曰。湯以七十里。文王以百里。荀卿賢者也。

今與之百里地。楚其危乎。春申君謝之。荀卿去之趙。後客或謂春申君曰。伊尹去夏入殷。殷王而夏亡。管仲去魯入齊。魯弱而齊強。故賢者所在。君尊國安。今荀卿天下賢人。所去之國。其不安乎。春申君使人聘荀卿。荀卿遺春申君書刺趙國。因爲歌賦以遺春申君。春申君恨。復固謝荀卿。荀卿乃還。復爲蘭陵令。漢朝追匡衡於平原。原注。漢書匡衡調補平原文學。長安令揚興說車騎復固謝荀卿。荀卿乃還。復爲蘭陵令。將軍誠召置幕府。學士翕然歸仁。與參事議。觀其所有。尊儒貴學。惜失賢也。書奏。詔卽徵還。賁之朝廷。必爲國器。高然其言。辟衡爲議曹史。薦衡於上。上以爲郎中。

拜議郎以壽終。
謹案。以上何休、服虔、穎容、謝該四人議闕。

許慎字叔重。汝南召陵人也。性淳篤。少博學經籍。馬融常推敬之。時人爲之語曰。五經無雙許叔重。爲郡功曹。舉孝廉。再遷除浚。原注。候交反。長卒于家。初慎以五經傳說。臧否不同。於是譔爲五經異義。又作說文解字十四篇。皆傳於世。議曰。古文科斗。自漢初已無知者。以伏生之口授爲隸古。猶味真是。石渠白虎。每爲是正。而紛紛籍籍。莫適所定。許慎爲說文。畫分點解。明其所自。使舛正不相渝。百世之下。以爲著龜。雖小道。有功於經術甚大也。

蔡元字叔陵。汝南南頓人也。學通五經。門徒常千人。其著錄者萬六千人。徵辟並不就。順帝特詔徵拜議郎。講論五經。異同。甚合帝意。遷侍中。出爲宏農太守。卒官。

鄭元字康成。北海高密人也。八世祖崇。哀帝時尚書僕射。元少爲鄉嗇夫。得休歸。嘗詣學官。不樂爲吏。父數怒之。不能禁。原注。鄭元別傳。元年十二。隨母還家。正臘。會同列十數人。皆美服盛飾。語言閑通。元獨漠然如不及。母私督數之。乃曰。此非我志。不在所願也。遂造太學。受業。師事

京兆第五元先始通京氏易公羊春秋三統歷九章算術

原注三統歷劉歆所撰九章算術周公作凡有九篇方田一粟米二差分三少廣四均輸五方程

六旁要七盈不足八勾股九

又從東郡張恭祖受周官禮記左氏春秋韓詩古文尙書以山東無足問者乃西入關

因涿郡盧植事扶風馬融融門徒四百餘人升堂進者五十餘生融素驕貴元在門下三年不得見乃使

高業弟子傳授於元元日夜尋誦未嘗倦怠會融及諸生考論圖緯聞元善算乃召見於樓上元因從質

諸疑義問畢辭歸融喟然謂門人曰鄭元今去吾道東矣元自游學十餘年乃歸鄉里家貧客耕東萊學

徒相隨已數百千人及黨事起乃與同郡孫嵩等四十餘人俱被禁錮遂隱修經業杜門不出時任城何

休好公羊學遂著公羊墨守左氏膏肓穀梁廢疾元乃發墨守鍼膏肓起廢疾休見而歎曰康成入吾室

操吾矛以伐我乎初中與之後范升陳元李育賈逵之徒爭論古今學後馬融答北地太守劉瓌及元答

何休義據通深由是古學遂明靈帝末黨禁解大將軍何進聞而辟之州郡以進權威不敢違意遂迫脅

元不得已而詣之進爲設几杖禮待甚優元不受朝服而以幅巾見一宿逃去時年六十弟子河內趙商

等自遠方至者數千後將軍袁隗表爲侍中以父喪不行國相孔融深敬於元屣屐造門告高密縣爲元

特立一鄉曰昔齊置士鄉

原注國語管仲制國爲二十一鄉工商鄉六士鄉十五

越有君子軍原注史記越王伐吳君子六千人

皆異賢之意也鄭君

好學實懷明德昔太史公

原注馬談

廷尉吳公

原注文帝時爲河南守

謁者僕射鄧公

原注景帝時爲謁者僕射皆漢之名臣又商

山四皓東園公夏黃公潛光隱耀世嘉其高皆悉稱公然則公者仁德之正號不必三事大夫也今鄭君

鄉宜曰鄭公鄉。昔東海于公僅有一節，猶或戒鄉人侈其門閭。原注。漢書于定國父爲縣獄史，郡決曹決獄。平羅曰：于公祠。其閭門壞。父老方共治之。于公謂曰：少高大閭門。令容駟馬車。我治獄多陰德。未嘗有所冤。子孫必有與者。至定國爲丞相。矧乃鄭公之德，而無駟牡之路，可廣開門衢。令容高車，號爲通德門。董卓遷都長安，公卿舉元爲趙相。原注。趙王乾相。道斷不至，會黃巾寇青都，乃避地徐州。徐州牧陶謙接以師友之禮。建安元年，自徐州還高密，道遇黃巾賊數萬人，見元皆拜，相約不敢入縣境。元後嘗疾篤，篤自慮，以書戒子益，恩曰：吾家舊貧，不爲父母羣弟所容，去廝役之吏，游學周秦之都，往來幽并，兗豫之域，獲覲乎在位通人，處逸大儒，得意者咸從，捧手有所受焉。遂博稽六藝，竊覽傳記，時覩祕書，緯術之奧，年過四十，乃歸供養，假田播殖，以娛朝夕。遇閹尹擅勢，坐黨禁錮，十有四年，而蒙赦令，舉賢良方正有道，辟大將軍三司府，公車再召，比牒併名，早爲宰相，惟彼數公，懿德大雅，克堪王臣，故宜式序。吾自忖度，無任於此，但念述先聖之元意，思整百家之不齊，亦庶幾以竭吾才，故聞命罔從，而黃巾爲害，萍浮南北，復歸邦鄉，入此歲來，已七十矣。宿素衰落，仍有失誤，案之禮典，便合傳家。今我告爾，以老歸爾，以事將閒居，以安性，覃思以終業，自非拜國君之命，問族親之憂，展敬墳墓，觀省野物，胡嘗扶杖出門乎？家事大小，汝一承之，咨爾，兢兢一夫，曾無同生相依，其勗求君子之道，研鑽勿替，敬慎威儀，以近有德，顯譽成於寮友，德行立於己志，若致聲稱，亦有榮於所生，可不深念邪？吾雖無絨冕之緒，頗有讓爵之高，自樂以論贊之功，庶不遺後人之羞，末所憤憤者，徒以亡親墳壟未成，所好羣書，率皆腐敝，不得於禮堂寫

定傳與其人日西方暮其可圖乎家今差多於昔勤力務時無恤飢寒非飲食薄衣服節夫二者尙令吾寡恨若忽忘不識亦已焉哉時大將軍袁紹總兵冀州遣使要元大會賓客元最後至乃延升上坐身長八尺飲酒一斛秀眉明目容儀溫偉紹客多豪俊並有才說見元儒者未以通人許之競設異端百家互起元依方辯對咸出問表皆得所未聞莫不嗟服時汝南應劭亦歸於紹因自贊曰故泰山太守應仲遠北面稱弟子何如元笑曰仲尼之門考以四科回賜之徒不稱官閥原注論語德行顏淵閔子騫言語宰我子貢政事冉有季路文學子游子夏後世有爲之君不敢失萬民之歡心況於君子乎失君子之望難乎以有爲也

公車徵爲大司農給安車一乘所過長吏送迎元乃以病自乞還家五年春夢孔子告之曰起起今年歲在辰來年歲在巳原注北齊劉晝高才不遇傳論元曰辰爲龍巳爲識合之知命當終有頃寢疾時袁紹與曹操相拒於官渡令其子譚遣使逼元隨軍不得已載病到元城

縣疾篤不進其年六月卒年七十四原注裴松之曰英雄記戰曹操作董卓歌辭云德行不虧缺變故自難常鄭康成飲酒伏地氣絕郭景圖命靈於園桑如此之文則元無病而卒餘書不見

遺令薄葬自郡守以下嘗受業者縗經赴會千餘人門生相與譏元答諸弟子問五經依論語作

鄭志八篇凡元所注周易尙書毛詩儀禮禮記論語孝經尙書大傳中候乾象歷又著天文七政論魯禮

禘祫義六藝論毛詩譜駁許慎五經異義答臨孝存周禮難及漢律令注謹案後漢書無及漢律令注五字凡百餘萬言元

質於辭訓通人頗譏其繁至於經傳洽熟稱爲純儒齊魯問宗之其門人山陽郝慮東萊王基清河崔劼

質於辭訓通人頗譏其繁至於經傳洽熟稱爲純儒齊魯問宗之其門人山陽郝慮東萊王基清河崔劼

皆著名於世。又樂安國淵。任嘏。時並童幼。元稱淵爲國器。嘏有道德。其餘亦多所鑒拔。皆如其言。元一子益恩。孔融在北海。舉爲孝廉。及融爲黃巾所圍。益恩赴難。隕身。遺腹子小同。有傳。原注。范氏論曰。自秦焚儒。頗修藝文。及東京學者。亦各名家。而守文之徒。滯固所累。異端紛紜。互相詭激。遂令經有數家。家有數說。章句多者。或乃百餘萬言。學徒勞而無功。後生疑而莫正。鄭元括囊大典。網羅衆家。刪裁繁詘。刊改漏失。自是學者略知所歸。王父豫章君每考先儒經訓。而長於元。嘗以仲尼之門不能過也。及傳授生徒。並專以鄭氏家法。云。

議曰。六經成於孔氏。初無傳注。雖易十翼爲大傳。而皆聖言。故亦爲經。至春秋三禮。七十子以來。始有傳記。而出於孔氏。無異同駁雜之譏。自經秦禁。且罹焚蕩。絕滅無幾。或出於傳聞。或出於口授。或出於壁中。故家異學。人異傳。撓經而騁其胸臆。是其師說而非諸人。辟碎其義。便巧其說。破壞其文。更易其字。說堯典二字至十餘萬言。若稽古三字至二三萬言。有窮一經而皓首之歎。纏麻裹絮。汨喪真是。鑽穴鑿罅。雕傷大義。攻訐訟鬪。反眼爲仇。有入室操戈之言。甚者至於援神引識。以相欺嚇。謂災異讖緯爲內學。義理名數爲外學。羊亡多岐。傳反累經。東京之季。鄭元出焉。時方大亂。知不可爲。徵命屢至。終身不屈。一以經學爲務。囊括大典。磨鏹衆說。芟裁繁蕪。刊正漏誤。要其指歸。是定音韻。區別章句。精覈名數。稽考經制。範圍法象。申明義理。注周易。尙書。儀禮。禮記。論語。孝經。而箋毛氏詩之詁訓。傳爲春秋發墨守。鍼膏肓。起廢疾。號鄭氏學。最爲折中。雖不能盡除讖緯。雜而未純。而傳以釋經。經以傳明。學者知所歸。而爭端始塞矣。嗚呼。六經成於孔氏。而傳注備於元。卒漢四百年之業。而收其功。可謂大儒矣。唐以來學者。易用王弼注。

書用孔安國傳。詩用毛氏傳。鄭氏箋。三禮用鄭氏注。春秋左氏傳用杜預注。公羊傳用何休注。穀梁傳用

范甯注。而孔穎達等復為疏釋。原注。唐孔穎達與顏師古等撰五經正義。至宋易有程氏傳。原注。程氏號伊川先生。作易傳。書有夏氏解。原注。夏儼。

號河山先生。原注。朱熹號晦庵。詩有朱氏傳。原注。朱熹號晦庵先生。作詩傳。春秋有胡氏傳。原注。胡安國。諡曰文定公。作春秋傳。禮有方氏王氏解。原注。方黼號河南先生。作禮記解。王昭禹作周禮解。於是六經傳注于漢。疏釋于唐。議論于宋。聖人之大義備。真儒之學與天地並而立人極焉。

學者毋去彼取此。妄有輕重也。必貫而一之。然後為至已。

許慈字仁篤。南陽人也。師事劉熙。善鄭氏學。治易尚書。三禮。毛詩。論語。建安中與許靖等俱自交州入蜀。

時又有魏郡胡潛字公興。雖學不沾洽。然卓犖強識。祖宗制度之儀。喪紀五服之數。皆指掌畫地。舉手可

采。昭烈定蜀。承喪亂歷紀。學業衰廢。乃鳩合典籍。沙汰衆學。慈潛並為博士。與孟光來敏等典掌舊文。值

庶事草創。動多疑議。慈潛更相克伐。謗讟分爭。形於聲色。書籍有無。不相通借。時尋楚撻。以相震懾。原注

虛晚。其矜已妒彼。乃至於此。昭烈惡之。羣僚大會。使倡家假為二子之容。傲其訟鬪。酒酣樂作。以為嬉戲。

初以辭義相難。終以刀杖相屈。用感切之。潛先沒。慈末帝世稍遷至大長秋。卒。子助傳其業。復為博士。

孟光字孝裕。河南雒陽人。太尉郁之族子也。原注。續漢書郁中常侍孟賁之弟。靈帝末為講部吏。獻帝遷都長安。遂入蜀。

劉焉父子待以客禮。博物識古。尤銳意三史。長於漢家舊典。好公羊春秋。而譏呵左氏。每與來敏爭此二

義。光常饒饒謹。昨原注。譏奴交反。謹休原反。昨徂格反。昭烈定益州。拜為議郎。與許慈等並掌制度。末帝即位。為符節令。屯

義。光常饒饒謹。昨原注。譏奴交反。謹休原反。昨徂格反。昭烈定益州。拜為議郎。與許慈等並掌制度。末帝即位。為符節令。屯

騎校尉長樂少府遷大司農。延熙九年秋大赦。光於衆中責大將軍費禕曰。夫赦者偏枯之物。非明世所宜有也。衰弊窮極。必不得已然後乃可權而行之。爾今主上仁賢。百僚稱職。有何旦夕之危。倒懸之急。而數施非常之恩。以惠姦宄之惡乎。又鷹隼始擊。而更原有罪。上犯天時。下違人理。老夫耄朽。不達治體。竊謂斯法難以經久。豈具瞻之高美。所望於明德哉。禕但顧謝踟躕而已。原注。荀悅曰。夫赦者繼時之宜。非常典也。漢興承秦之敝。比屋可誅。故設三章之法。大赦之令。蕩滌穢流。與民更始。時勢然也。後世承業。襲而不革。失時宜矣。若孝景之時。七國皆亂。異心並起。武帝末年。羣盜巫蠱。人不自安。及光武撥亂之後。如此之比。宜爲赦矣。光之指摘瑕病。謹案。瑕病。志作痛癢。多如是類。故執政重臣。心不能悅。爵位不登。每直言無所迴避。爲世所嫌。太常廣漢。承原注。華陽國志。承字。公文。歷郡守少府。光祿勳。河東裴儁等。年資皆在光後。而登據上列。處光之右。蓋以此也。原注。傅暢裴奉先。魏尙書令潛弟也。備姊夫爲蜀中長史。備送之。時年十餘歲。遂遭漢末大亂。不復得還。既長。知名。爲蜀所推重。傅子越。字令緒。爲蜀督軍。蜀破。遷還雒陽。拜議郎。後進文士祕書郎。郤正數從光諮訪。光問正。太子所習讀。并其性情好尚。正答曰。奉親虔恭。夙夜匪懈。有古世子之風。接待羣僚。舉動出於仁恕。光曰。如君所道。皆家戶所有爾。吾今所問。欲知其權略智調何如也。正曰。世子之道。在於承志竭歡。既不得妄有所施爲。且智調藏於智懷。權略應時而發。此之有無焉。可豫設也。光解正慎宜。不爲放談。乃曰。吾好直言。無所迴避。每彈射利病。爲世人所譏嫌。疑省君意。亦不甚好吾言。然語有次。今天下未定。智意爲先。智意雖有自然。然不可力強致也。此儲君讀書。謹案。儲君諸本皆作諸君。今志改爲儲。茲據改。寧當傲吾等竭力博識。以待訪問。如博士探策講試。以求爵位邪。當務其急者。正深謂光言爲然。後光坐事免官。年九十

餘卒。

來敏字敬達。義陽新野人。來歙之後也。父豔。靈帝時爲司空。原注。華瞻漢書。豔好學下士。開館養徒衆。少歷顯位。靈帝時位至司空。敏遭亂。隨

姊夫黃琬奔荊州。琬劉璋祖母之姪也。故璋遣迎琬妻。敏遂俱與入蜀。常爲璋賓客。涉獵書籍。善左氏春

秋。尤精於蒼雅訓詁。好是正文字。昭烈定益州。署敏典學校尉。及立太子。以爲家令。末帝卽位。爲虎賁中

郎將。丞相亮住漢中。請爲軍祭酒。輔軍將軍。坐事去職。亮下教曰。將軍來敏。對上官顯言。新人有何功德。

而奪我榮資。與之邪。諸人共憎我。何故如是。敏年老狂悖。生此怨言。成都初定。議者以爲來敏亂羣。先帝

以新定之際。故遂含容。無所禮用。後劉子初選爲太子家令。先帝不悅而不忍拒也。主上卽位。謹案志。注

誤。當以此書作主上者爲是。吾聞於知人。遂復擢爲將軍祭酒。違議者之審見。背先帝所疏外。自謂能以敦厲薄俗。帥

之以義。今故表退職。使閉門思愆。亮薨後。還成都爲大長秋。又免。後累遷光祿大夫。復坐過黷。前後數貶

削。皆以言語不節。舉動違常也。時孟光亦以樞機不慎。論議干時。然猶愈於敏。俱以其耆宿學士。見禮於

世。而敏荆楚名族。東宮舊臣。特加優待。是故廢而復起。以敏爲執愼將軍。欲令以官重自警戒也。年九十

七。景耀中卒。子忠亦博覽經學。有敏風。與尙書向充等並能協贊。大將軍姜維維善之。以爲參軍。

尹默字思潛。梓潼涪人也。益部多貴。今文而不崇章句。默知其不博。乃遠游荊州。從司馬徽。宋仲子等受

古學。通諸經史。又專精於左氏春秋。自劉歆條例。鄭衆賈逵父子。陳元方服虔注說。咸略誦述。不復按本。

昭烈定益州領牧以爲勸學從事及立太子以默爲僕射以左氏傳授太子末帝卽位拜諫議大夫丞相

亮住漢中請爲軍祭酒亮薨還成都拜太中大夫卒子宗傳其業爲博士原注。魏略宋仲子名忠。曹操取荆州。遂入魏。其子與魏諷謀反。伏

誅。魏太子答王朗書曰。昔石厚與州吁游。父禮知其與亂。韓子昵田蘇。穆子知其好仁。故君子游必有方。居必就士。誠有以也。嗟夫宋忠無石子先識之明。老懼此禍。今雖欲願行滅親之誅。立純臣之節。尙可得邪。

李譔字欽仲梓潼涪人也父仁字德賢與同縣尹默俱游荆楚從司馬徽宋仲子等學譔具傳其業又從

默講論義理五經諸子無不該覽加博好技藝算術卜數醫藥弓弩機械之巧皆致思焉始爲州書佐尙

書令史延熙元年末帝立太子以譔爲庶子遷爲僕射轉中散大夫右中郎將猶侍太子太子愛其多知

甚悅之然體輕脫好戲啁故世不能重也著古文易尙書毛詩三禮左氏傳太元指歸皆係準賈馬異於

鄭元與王氏殊隔初不見其所述而意歸多同景耀中卒時又有漢中陳術字申伯亦博學多聞著釋問

七篇益部耆舊傳及志位歷三郡太守

議曰武功必本文德宣王命方叔召虎復文武之境土而所與居者張仲孝友也原注。詩六月。宣王北伐也。其卒章曰。侯誰在矣。

故克成中興之功孔明相昭烈討賊誅讎日不暇給遽引經生爲博士講肄輔道并傳太子使知

經術脩文德以固本根己乃率一時虓闕智略講武出師北嚮以爭天下亦宣王之規模也孟光責費禕

之濫赦詰郤正儲貳之學可謂英偉不羣之士矣

續後漢書卷第六十五下上

列傳第六十二下上

儒學

魏

王肅 子恂

董遇

賈洪

隗禧

樂詳

嚴幹

李義

庾峻

子珉

數

王肅字子雍。司空朗之子也。生於會稽。年十八從宋忠讀太元而更爲之解。黃初中爲散騎黃門侍郎。太和三年拜散騎常侍。四年大司馬曹真伐漢。謹案。通鑑綱目。書寇漢。此書他傳有作伐漢者。伐字疑有誤。肅上疏曰。前志有之。千里饋糧。士有飢色。樵蘇後爨。師不宿飽。此謂平塗行軍者也。又況於深入阻險。鑿路而前。則其爲勞必相百也。又今加之以霖雨。山坂峻滑。衆逼而不展。糧縣而難繼。實行軍者之大忌也。聞曹真發踰月而行。裁半谷。治道功夫。戰士悉作。是賊偏得以逸而待勞。乃兵家之所憚也。言之前代。則武王伐紂。出關而復還。論之近事。則文帝征權。臨江而不濟。豈非所謂順天知時。通於權變者哉。兆民知聖上以水雨艱劇之故。休而息之。後日有釁。乘而用之。則所謂悅以犯難。民忘其死者矣。於是遂罷。又上疏宜遵舊禮。爲大臣發哀。薦果宗廟。事皆施行。又上疏陳政本曰。除無事之位。損不急之祿。止浮食之費。并從容之官。使官必有職。職任

其事必受祿。祿代其耕。乃往古之常式。當今之所宜也。官寡而祿厚。則公家之費鮮。進仕之志勸。各展才力。莫相倚杖。敷奏以言。明試以功。能之與否。簡在帝心。是以唐虞之設官分職。申命公卿。各以其事。然後惟龍為納言。猶今尙書也。以出納帝命而已。夏殷不可得而詳。甘誓曰。六事之人。明六卿亦典事者也。周官則備矣。五日視朝。公卿大夫並進。而司士辨其位焉。其記曰。坐而論道。謂之王公。作而行之。謂之士大夫。及漢之初。謹案。陳志作乃漢之初。依擬前代。公卿皆親以事升朝。故高祖躬追反走之周昌。武帝遙可奉奏之汲黯。原注。周昌事見前注。漢書大將軍青侍中。上殿視之。丞相宏宴見。上或時不冠。至如見黯。不冠不見也。上嘗坐武帳。黯前奏事。上不冠。望見黯。避帷中。使人可其奏。其見敬禮如此。宣帝使公卿五日一朝。成帝始置尙書五人。原注。漢書宣帝地節二年。上始親政事。五日一聽事。建始四年。罷中書宦官。初置尙書員五人。自是陵遲。朝禮遂闕。可復五日視朝之儀。使公卿尙書各以事進。廢禮復興。光宣聖緒。誠所謂名美而實厚者也。青龍中。漢帝崩於山陽。肅上疏曰。昔唐禪虞。虞禪夏。皆終三年之喪。然後踐天子之尊。是以帝號無虧。君禮猶存。今山陽公承順天命。允答民望。進禪大魏。退處賓位。公之奉魏。不敢不盡節。魏之待公。優崇而不臣。既至其薨。櫛斂之制。輿徒之飾。皆同之於王者。是故遠近歸仁。以為盛美。且漢總帝皇之號曰。皇帝。有別稱帝。無別稱皇。則皇是其差輕者也。故當高祖之時。土無二王。其父見在。而稱太上皇。明非二王之嫌也。況今以贈終。可使稱皇。以配其諡。明帝不從。使稱皇帝。乃追諡曰漢孝獻皇帝。原注。孫盛曰。化合神者曰皇。德合天者曰帝。是故三皇創號。五帝次之。然則皇之為稱。妙於帝矣。肅謂為輕。不亦謬乎。裴松之曰。上古謂皇皇后帝。次言三五先皇後帝。誠如盛言。然漢氏諸帝。雖尊父為皇。其實則貴而無位。高而無民。比於帝得不謂之輕乎。魏因漢禮。名號無改。孝獻之崩。豈得遠考古義。肅之所云。蓋就漢制。

而爲言耳。謂之爲謬。乃是譏漢。非難肅也。

後肅以常侍領祕書監兼崇文觀祭酒景初間宮室盛興民失農業期信不敦刑殺倉卒肅上疏曰大魏承百王之極生民無幾干戈未戢誠宜息民而惠之以安靜遐邇之時也夫務蓄積而息疲民在於省徭役而勤稼穡今宮室未就功業未訖運漕調發轉相供奉是以丁夫疲於力作農者離其南畝種穀者寡食穀者衆舊穀旣沒新穀莫繼斯則有國之大患而非備豫之長策也今見作者三四萬人九龍可以安聖體其內足以列六宮顯揚之殿又向將畢惟太極已前功夫尙大方向盛寒疾疫或作誠願陛下發德音下明詔深愍役夫之疲勞厚矜兆民之不贍取常食廩之士非急要者之用選其丁壯擇留萬人使一碁而更之咸知息代有日則莫不悅以卽事勞而不怨矣計一歲有三百六十萬夫亦不爲少當一歲成者聽且三年分遣其餘使皆卽農無窮之計也倉有溢粟民有餘力以此興功何功不立以此行化何化不成夫信之於民國家大寶也仲尼曰自古皆有死民非信不立夫區區之晉國微微之重耳欲用其民先示以信是故原雖將降顧信而歸用能一戰而霸於今見稱前車駕當幸雒陽發民爲營有司命以營成而罷旣成又利其功力不以時遣有司徒營其目前之利不顧經國之體臣愚以爲自今以後倘復使民宜明其令使必如期若有事以次寧復更發無或失信凡陛下臨時之所行刑皆有罪之吏宜死之人也然衆庶不知謂爲倉卒故願陛下下之於吏而暴其罪鈞其死也無使汙於宮掖而爲遠近所疑且人命至重難生易殺氣絕而不續者也是以聖賢重之孟軻稱殺一無辜以取天下仁

者不爲也。漢時有犯蹕驚乘輿馬者，廷尉張釋之奏使罰金。文帝怪其輕，而釋之曰：「方其時上使誅之則已，今下廷尉，廷尉天下之平也，一傾之，天下用法皆爲輕重，民安所措其手足？」臣以爲大失其義，非忠臣所宜陳也。廷尉者，天子之吏也，猶不可以失平，而天子之身，反可以惑謬乎？斯重於爲己，而輕於爲君，不忠之甚也。周公曰：「天子無戲言，言則史書之，工誦之，士稱之，言猶不戲，而況行之乎？」故釋之之言，不可不察。周公之戒，不可不法也。又陳諸鳥獸無用之物，而有芻穀人徒之費，皆可蠲除。曹叡嘗問曰：「漢桓帝時，白馬令李雲上書言：『帝者，諦也。』是帝欲不諦當，何得不死？」肅對曰：「但爲言失逆順之節，原其本意，皆欲盡心念存補國，且帝者之威，過於雷霆，殺一匹夫，無異螻蟻，寬而宥之，可以示容受切言。廣德宇於天下，故臣以爲殺之未必爲是也。」叡又問：「司馬遷以受刑之故，內懷隱切，著史記非貶孝武，令人切齒。」對曰：「司馬遷記事不虛美，不隱惡。劉向揚雄服其善敘事，有良史之才，謂之實錄。漢武帝聞其述史記，取孝景及己本紀覽之，於是大怒，削而投之。於今此兩紀有錄無書，後遭李陵事，遂下遷蠶室，此爲隱切在孝武而不在于史遷也。正始元年，出爲廣平太守，公事徵還，拜議郎，頃之爲侍中，遷太常，時大將軍曹爽專權，任用何晏、鄧颺等，肅與太尉蔣濟、司農桓範論及時政，肅正色曰：「此輩卽宏恭石顯之屬，復稱說邪，爽聞之，戒何晏等曰：『當共慎之。』公卿已比諸君前世惡人矣，坐宗廟事，免後爲光祿助，時有二魚長尺，集於武庫之屋，有司以爲吉祥，肅曰：『魚生於淵，而亢於屋，介鱗之物，失其所也，邊將其殆有棄甲之變乎？』後果有東關

之敗。徙爲河南尹。嘉平六年。司馬師廢曹芳。使肅持節兼太常奉法。駕迎高貴鄉公髦於元城。是歲白氣經天。師問肅。肅曰。此蚩尤之旗也。東南其有亂乎。若修己以安百姓。則天下樂安者歸德。倡亂者先亡矣。明年春。鎮東將軍母丘儉。揚州刺史文欽。稱兵討師。師謂肅曰。霍光感夏侯勝之言。始重儒學之士。良有以也。安國寧主。其術焉在。肅曰。昔關侯率荊州之衆。降于禁於漢濱。遂有北向爭天下之志。後孫權襲取其將士家屬。侯士衆一旦瓦解。今淮南將士父母妻子皆在內州。但急往禦衛。使不得前。必有關侯土崩之勢矣。師從之。遂破儉欽。後遷中領軍。加散騎常侍。增邑三百。并前二千二百戶。甘露元年卒。門生縵經者。以百數。追贈衛將軍。諡曰景侯。子惲嗣。惲卒。無子。國絕。景元四年。封惲弟恂爲蘭陵侯。咸熙中。開建五等。以肅著勳前朝。改封恂爲承子。恂字子良。有通識。歷河南尹。侍中。居官亮直。有匪躬之節。勳令袁毅嘗以駿馬賂恂。知其貪。不受。毅竟以贖貨敗。建立二學。崇明五經。皆恂所建。卒年四十餘。贈車騎將軍。肅女適司馬昭。卽晉文明皇后也。生武帝及齊獻王攸。恂兄弟八人。其達者。虔。以公幹見稱位。至尙書弟愷。少有才力。而無行檢。與衛尉石崇友善。俱以豪侈競於世。終後將軍。原注。晉諸公贊。虔字恭祖。愷字君夫。初肅善賈馬學。而不好鄭氏。采會同異。爲尙書詩論語三禮左氏解。及譔定父朗所作易傳。皆列於學官。其所論駁朝廷典制。郊祀宗廟。喪紀。輕重。凡百餘篇。時樂安孫炎。原注。炎字叔然。受學鄭元之門人。稱東州大儒。徵爲祕書監。不就。肅集聖證論。以譏短元。炎駁而釋之。又作周易春秋例。毛詩禮記春秋三傳國語爾雅諸注。又著書十餘篇。

議曰。劉實以爲肅方於事上而好下佞己。此一反也。性嗜榮貴而不求苟合。此二反也。吝惜財物而治身不穢。此三反也。原注。晉書。劉實字子真。漢濟北惠王壽之後。爲吏部郎。參司馬昭車功。封循陽子。累拜司空。遷太保。轉太傅。卒諡曰元。曾子曰。所惡於上。毋以使下。所惡於下。毋以事上。所惡於前。毋以先後。所惡於後。毋以從前。所惡於右。毋以交於左。所惡於左。毋以交於右。此之謂絜矩之道。嗚呼。肅豈知是者。實特見其反之小者爾。至於廢立之際。奔走奉迎。以女妻昭。移魏與晉。乃大反矣。夫傳注之學。至於鄭元。而肅私於賈馬。更爲諸經作解。以駁元。六經聖人載道之具。天理人情之所在。公天下萬世之典也。學者逞其好惡。以爲一己之私。不亦大惑也歟。卒之肅說不行。而鄭氏之學。至今宗之。真是之著於公道。不可誣也。

董遇字季直。京兆人也。性質訥而好學。與平中關中亂。與兄季中依將軍段熲。采稻負販。而常挾持書傳。建安初。郡舉孝廉。稍遷黃門侍郎。旦夕侍講。爲帝所愛信。二十二年。許中謀誅操。遇雖不與。亦被錄。詣鄴。轉冗散。常從操征西道。過宏農王冢。操疑欲謁。顧問左右。左右莫對。遇乃進曰。春秋之義。國君卽位。未踰年而卒。未成爲君。宏農王踐阼旣淺。又爲暴臣所制。降在藩國。不應謁。操乃去。黃初中。出爲郡守。曹叡立。入爲侍中大司農。數年病卒。初遇善治老子。爲老子作訓注。又喜左氏傳。更爲作朱墨別異。人有從學者。遇不肯教。而云必當先讀百遍。言讀書百遍。其義自見。學者苦渴無日。遇曰。自有三餘。冬者歲之餘。夜者日之餘。陰雨者時之餘也。學者難之。故無傳其朱墨者。遇子綏。有亦才學。位至祕書監。

賈洪字叔業。京兆新豐人也。精於春秋。左氏傳。建安初。仕郡舉計掾。應州辟。州中自參軍事。以下百餘人。惟洪與馮翊嚴苞材學最高。洪歷三縣令。所在輒開建第舍。親授諸生。後馬超劫洪。將至華陰。使作露布。洪不獲已。爲作之。司隸鍾繇在東。識其文曰。此賈洪筆也。及超破走。曹操召洪署軍謀掾。猶以其前爲超作文。不卽敝用。晚乃出爲陰泉長。延康中。轉爲白馬王彪相。彪亦雅好文學。師事之。數歲病卒。嚴苞黃初中爲祕書丞。數奏文賦。曹丕異之。出爲西平太守。卒官。謹案。太平御覽嚴苞字文通。衆爲之語曰。州中煜煜賈叔業。議論洵嚴文通。

魏禧字子牙。京兆人也。少好學。初平中。三輔亂。禧南客荊州。擔負書傳。探摺之餘。則誦習之。曹操定荊州。召署軍謀掾。黃初中。教授譙王。大得賜遺。拜郎中。年八十餘。以老居家。就之學者甚衆。禧旣明經。又善星官。常仰瞻天象。謂魚豢曰。天下兵戈。尙猶未已。如之何。豢又嘗從問左氏傳。禧曰。欲知幽微。莫若易。人倫之紀。莫若禮。多識山川草木之名。莫若詩。左氏直相斫書耳。不足精意也。豢又從問詩。禧說齊韓魯。毛四家義。不復執文。有如諷誦。又譏諸經解數十萬言。未及繕寫。而得聾疾。遂病卒。

樂詳字文載。河東人也。少好學。建安初。詳聞南郡謝該善左氏傳。乃從南陽步詣該。問疑難諸要。譏樂氏問七十二事。而歸鄉里。時杜幾爲太守。署詳文學祭酒。使教後進。於是河東學業大興。黃初中。徵拜博士。時太學初立。有博士十餘人。學多褊狹。又不熟悉。備員而已。惟詳五業並授。其或難教。質而不解。詳無慍色。以杖畫地。牽譬引類。至忘寢食。以是獨擅名於遠近。詳學旣精。又善推步。受詔與太史典定律歷。太和

中轉拜騎都尉。詳學優能少。故歷三世。竟不出爲宰守。正始中以年老罷歸。門生千餘人。卒於家。

嚴幹字公仲。李義字孝懿。皆馮翊東縣人。中平末年。皆二十餘。幹好擊劍。義好辨論。會三輔亂。人多流移。而幹義獨不去。採樵自活。建安初。關中始平。詔分馮翊西數縣爲左內史郡。治高陵。以東數縣爲本郡。治臨晉。義於縣分當西屬。義謂幹曰。西縣兒曹。不可與坐爭席。今當共作方牀爾。遂相附結。皆仕東郡。爲右職。司隸辟幹。不至。歲終。郡舉幹孝廉。義上計掾。義留京師。爲平陵令。遷冗從僕射。遂歷顯職。曹操爲魏公。以義爲軍祭酒。又爲魏尙書左僕射。及曹丕篡代。拜諫議大夫。執金吾衛尉。卒官。義子卽中書令豐也。幹以孝廉拜蒲阪令。病去官。復舉至孝。爲公車司馬令。爲州所請。詔拜議郎。還參州事。會以建策捕高幹。又追錄前討郭援功。封武鄉侯。遷宏農太守。及馬超反。幹郡近超。民人分散。超破。爲漢陽太守。謹案。陳志注。作濮陽太守。

遷益州刺史。以道不通。黃初中。轉爲五官中郎將。曹叡時。遷永安。太僕數歲卒。始李義以直道推誠於人。故陳羣等與之交好。終至顯達。幹從破亂之後。更折節學問。特善春秋。公羊。司隸鍾繇不好公羊。而好左氏。謂左氏爲太官。而謂公羊爲賣餅家。故數與幹共辨析長短。繇爲人機捷。善持論。而幹訥口。臨時屈無以應。繇謂幹曰。公羊高竟爲左丘明服矣。幹曰。直故吏爲明使君服爾。公羊弗服也。

議曰。初平之元。至建安末。兵爭紛拏。儒學委地。魏黃初後。始掃除太學。灰燼補石碑缺壞。備博士員。依漢甲乙考課。申告州郡。有儒異好學者。皆遣詣太學。於是有弟子數百人。至太和青龍中。中外多事。人懷避

就。多求詣太學。諸生至千數。而博士率皆疏陋寡學。無以爲法。冬來春去。遨遊而已。間有問學精修。而臺閣舉格太高。加不究明大義。第問字指墨法點注之間。拘禁猥迫。百人同試。合度者未十。是以志學之士。遂復陵遲。而浮虛瑣屑者各競逐也。正始中。詔議園丘。普延學士。時郎官及司徒吏掾二萬餘人。自差遣分布外。在京師者尙且萬人。而應詔與議者無幾。會朝堂者自公卿以下四百餘人。其能操筆者不三數人。皆相從飽食而退。無復東漢之世矣。見諸舊史。王肅諸卿相外。獨周生烈。董遇。賈洪。隗禧。樂詳等數人。用意經傳。頗傳於世。故著於篇。

原注。裴松之曰。周生名烈。何晏論語集解有烈義例。餘所著述。見晉武帝中經簿。

庾峻字山甫。潁川鄆陵人也。祖乘。父道。皆不應徵辟。伯父嶷。仕至太僕。峻少好學。閒散騎常侍。蘇林老疾在家。往候之。林嘗從乘學。見峻流涕。良久曰。尊祖高才。而性退讓。慈和汎愛。清淨寡欲。不營當世。惟修德而已。鄆陵舊五六萬戶。今裁有數百。君二女孩抱。經亂獨存。尊伯爲當世令器。君兄弟復俊茂。此尊祖積德之所致也。因質疑究義。大通經理。遂爲醇儒。仕郡功曹。舉計掾。州辟從事。太常鄭袤見峻。大奇之。舉爲博士。時重莊老而輕經史。峻懼雅道陵遲。以儒典自任。屬曹髦幸太學。問尙書義。峻援引師說。發明經旨。申暢疑滯。對答詳悉。遷祕書丞。長安有大獄。久不決。拜侍御史。往折之。事得平允。晉武帝篡代。賜爵關中侯。遷司空。長史。轉祕書監。御史中丞。拜侍中。加諫議大夫。常侍帝講詩。中庶子何劭論風雅正變之義。峻起難往反。坐莫能屈。是時風俗趣競。禮讓陵遲。峻上疏曰。臣聞黎庶之性。人衆而賢寡。設官分職。則官寡

而賢衆賢衆而多官則妨化無官而棄賢則廢道是故聖王之御世因人之性或出或處故有朝廷之士又有山林之人朝廷之士佐主成化猶股肱心膂共爲一體山林之人被褐懷玉太上棲於丘園高節出於衆庶其次輕爵服遠恥辱以全志謹案晉書志作名最下就列位惟無功而能知止彼其清劭足以抑貪汙退

讓足以息鄙事故在朝之士聞其風而悅之將受爵者皆恥躬之不逮斯山林之人避寵之臣所以爲美也先王嘉之節雖離世而德合乎主行雖詭朝而功同乎政故大者有玉帛之命其次有几杖之禮以厚德載物出處有地廊廟多賢才而野人亦不失爲君子此先王之宏也秦塞斯路利出一官雖有處士之名而無爵列於朝者商君謂之六蟊韓非謂之五蠹時不知德惟爵是聞故閭閻以公乘侮其鄉人郎中

以上爵傲其父兄漢祖反之大暢斯否任蕭曹以天下重四皓於南山以張良之助而班在叔孫之後原注房雖疾諫布反上自將擊之令太子監關中兵上謂子時叔孫通已爲太傅良行少傳事蓋公之賤而曹相諮之以政帝王貴德於上俗亦反本

於下故田叔等十八漢廷臣無能出其右者而未嘗干祿于時原注漢書趙午貫高等謀弑上詔捕趙王及羣臣反者趙有政隨王罪三族惟田叔孟舒等十餘人籍衣自斃隨至長安趙王數事自得出進田叔等原注張

十人召見與語漢廷臣無能出其右盡拜爲郡守諸侯相以釋之之貴結王生之機於朝而其名愈重原注張釋之爲廷尉王生者善爲黃老言帝居廷中公卿盡會立王生告人曰吾禳解顧謂釋之爲我結穢釋之跪而結之人或譏生曰吾老且賤自度終無益於張廷尉廷尉方天下名臣吾故聊使之結穢欲以重之諸公聞之賢王生而重釋之自非主臣尙德兼愛孰能通天下之志如此其大者乎夫不革百王之弊徒務救世之政文士競智而務入武夫恃力而爭先官高矣而意未滿功報矣其求不已又國無隨才任官之制俗無難進易退之恥

位一高雖無功而不見下。已負敗而後見用。故因前而升。則處士之路塞矣。又仕者黜陟無章。是以普天之下。先競而後讓。舉世之士。有進而無退。大人溺於動俗。執政撓於羣言。衡石爲之失平。清濁安可復分。昔者先王患向之所以取天下者。今之爲弊。是故功成必改其物。業定必易其教。雖以爵祿使下。臣無貪陵之行。雖以甲兵定功。主無窮武之悔也。愚以爲古者大夫七十懸車。今自非元功國老。三司上才可聽七十致仕。則士無懷祿之嫌矣。其父母八十可聽終養。則孝莫大於事親矣。吏歷試無績。依古終身不仕。則官無稅政矣。能小而不能大。可降還洩小。則使人以器矣。人主進人以禮。退人以禮。人臣亦量能受爵矣。其有孝如王陽。臨九折而去官。原注。漢書。瑛邪王陽。爲益州刺史。行部至卬都九折。不著。原注。漢書。賈禹舉賢良爲河南令。以職事爲府官所。歎曰。奉先人遺體。奈何敢乘此險。後以病去。潔如貢禹。冠一免而原注。漢書。賈禹舉賢良爲河南令。以職事爲府官所。歎曰。奉先人遺體。奈何敢乘此險。後以病去。知止如王孫。知足如疏廣。原注。漢書。楊王孫學黃老之術。家業千金。厚自奉養。生亡所不致。及病且終。令其子裸葬。二疏事見前注。雖去列位而居東野。與人父言依於慈。與人子言依於孝。此其出言合於國檢。危行彰於本朝。去勢如脫屣。路人爲之隕涕。辭寵如金石。庸夫爲之興行。是故先王許之。而聖人貴之。夫人之性。陵上猶水之趣下也。益而不已必決。升而不已必困。始於匹夫行義不敦。終於皇輿爲之敗績。固不可不慎也。下人并心進趨。上宜以退讓去其甚者。退讓不可以行罰。使莫若聽朝士時時從志山林。往往間出。無使入者不能復出。往者不能復返。然後出處交泰。提衡而立。時靡有爭。天下可得而化矣。又疾世浮華。不修名實。著論非之。九年卒。詔賜朝服一具。衣一襲。錢三十萬。臨終敕子珉。朝卒夕殯。幅巾布衣。

葬勿擇日。珉奉遵遺命。斂以時服。珉字子琚。好學力行。有峻風。懷帝時爲侍中。直省內。謂同僚許遐曰。世路如此。禍難將及。吾死此屋爾。及帝沒於劉淵。淵大會使帝行酒。珉不勝悲憤。因大號哭。淵惡之。帝與珉等皆遇害。太元末。追諡曰貞。珉弟數字子嵩。爲陳留相。不以事物嬰心。從容酣暢。寄通而已。嘗讀老莊曰。正與人意闇同。王衍雅重之。遷吏部郎。參東海王越太傅軍事。轉軍諮祭酒。沒於石勒。與王衍俱被害。議曰。魏晉之際。崇尚老莊。二漢經術。寢以蕪廢。峻獨潛心儒典。以明經自任。劇羣士而立論。至於抑奔競。崇禮義。疾浮華。砥焞膏肓。與世起死。卓車焉。豪傑之士也。珉死於君。不負所學矣。歿叛道忘父。隕其堂構。甚矣風俗之敗人也。

續後漢書卷第六十五下下

列傳第六十二下下

儒學

吳

嚴峻豐元

程秉徵崇

闕澤唐固

虞翻子汎忠

陸績

嚴峻字曼才，彭城人也。少耽學，善詩書三禮，又好說文，避亂江東，與諸葛瑾、步騭、齊名友善，性質直純厚。於人忠告善道，志存補益。張昭進之於孫權，權以為騎都尉從事中郎。及橫江將軍魯肅卒，權以峻代肅督兵萬人，鎮陸口。衆人咸為峻喜。峻前後固辭，樸素書生，不閑軍事，非才而據，咎悔必至，發言慷慨。至於流涕，權又試峻騎，上馬墮鞍，乃聽焉。世嘉其能以實讓，權為吳王及稱尊號，峻常為衛尉使。至漢漢丞相亮深善之，不畜祿賜，皆散之親戚。知故家常不充，廣陵劉穎與峻有舊，穎精學家巷，權聞徵之，以疾不就。其弟略為零陵太守，卒官，穎往赴喪，權知其詐病，急驛收錄，峻亦馳語穎，使還謝權，權怒，廢峻，而穎得免罪。久之，以峻為尚書令，卒。時年七十八。子凱，官至升平少府。謹案：志注引吳書曰：峻二子凱爽。峻著孝經傳、潮水論，又與裴元張承論管仲季路，皆傳於世。元字彥黃，下邳人也，亦有學行，官至大中大夫。問子欽、齊、桓、晉、文、夷、惠。

四人優劣。欽答所見。與元相反。各有文理。欽與太子登游處。登稱其翰采。

程秉字德樞。汝南南頓人也。逮事鄭元。後避亂交州。與劉熙考論大義。遂博通五經。士變命爲長史。孫權聞其名儒。以禮徵。秉既到。拜太子太傅。黃武四年。權爲太子。登聘周瑜女。秉守太常。迎妃於吳。權親幸。乘船。深見優禮。既還。秉從容說登曰。婚姻人倫之始。王教之基。是以聖王重之。所以率先衆庶。風化天下。故詩美關雎。以爲稱首。願太子尊禮教於閨房。存周南之所詠。則道化隆於上。頌聲作於下矣。登笑曰。將順其美。匡救其惡。誠所賴於傅君也。病卒。官著周易摘。尙書駁論語。凡三萬餘言。秉爲傅時。率更令河南徵崇字子和。治易左氏春秋。兼善內術。本姓李。遭亂更姓。隱於會稽。躬耕以求其志。從之學者。所教不過數人。欲令其業必有成也。丞相步騭等咸親敬焉。嚴峻薦崇行足。以爲師。初見太子。登以疾。賜不拜。東宮官僚皆從諮詢焉。卒年七十。

闕澤字德潤。會稽山陰人也。世務農。至澤好學。居貧無資。常爲人傭書。以供紙筆。錄寫誦讀。追思論講。究覽羣籍。兼通歷數。由是顯名。察孝廉。除錢塘長。遷彬令。孫權爲驃騎將軍。辟補西曹掾。及稱尊號。以澤爲尙書。嘉禾中。爲中書令。加侍中。赤烏五年。拜太子太傅。領中書令。如故。澤以經傳多文。難得盡用。乃斟酌

諸家。刊約禮文。及諸注說。以授二宮。爲制行出入。及見賓儀。又著乾象歷注。

謹案。宋書歷法云。吳中書令闕澤受劉洪乾象法於東萊徐岳字公

河。故孫氏用乾象歷。至於吳亡。

以正時日。每朝廷大議。經典所疑。輒諮訪之。以儒學勤勞。封都鄉侯。性謙恭篤慎。官府

謹案

·今志作官府宋本作宮府
·與此合·通志亦作宮·

小吏呼召對問皆爲抗禮。人有非短口未嘗及容貌似不足者。權嘗問書傳篇賦。何者爲美。澤欲諷喻。因對賈誼過秦論最善。權覽讀焉。初以呂壹姦罪發。聞有司窮治。奏以大辟。或以爲宜加焚裂。用彰元惡。權以訪澤。澤曰。盛明之世。不宜復有此刑。權從之。又諸官司有所患疾。欲增重科防。以檢御臣下。澤曰。宜依禮律。其和而有正。皆此類也。虞翻稱澤曰。闕生矯傑。蜀之揚雄。其儒術德行。亦今之仲舒也。初曹丕篡代。權從容問羣臣曰。曹丕以盛年卽位。恐孤不能及之。諸卿以爲何如。羣臣未對。澤曰。不及十年。丕其死矣。王勿憂也。權曰。何以知之。澤曰。不十爲丕。謹案。書傳丕皆作平。故云。此其數也。丕果七年而卒。六年冬。澤卒。權痛惜感悼。食不進者數日。澤州里先輩丹陽唐固字子正。亦修身積學。稱爲儒者。著國語。公羊穀梁傳注。講授常數十人。權爲吳王。拜固議郎。自陸遜。張溫。駱統等皆拜之。黃武四年。爲尙書僕射。年七十餘卒。

虞翻字仲翔。會稽餘姚人也。少好學。有高氣。年十二。客有候其兄者。不過翻。翻追與書曰。僕聞虎魄不取腐介。磁石不受曲鍼。過而不存。不亦宜乎。客得書奇之。由是知名。太守王朗命爲功曹。孫策攻會稽。翻時遭父喪。衰絰詣府門。朗欲就之。翻乃脫衰入見。勸朗避策。朗不能用。拒戰。敗績。亡走浮海。翻追隨營護到廣陵。朗惑王方平。訊言疾來邀我。南嶽相求。故遂南行。欲投交州。翻曰。此妄書爾。交州無南嶽也。安所投乎。乃止。到東部候官。候官長閉門不受。翻往說之。然後見納。朗謂翻曰。卿有老母。可以還矣。原注。裴松之曰。翻別傳。

期使翻見豫章太守華歆圖起義兵。翻未至豫章。聞孫策向會稽。翻乃還。會遭父喪。以臣使有節。不敢過。翻乃歸策。家。星行追期至候官。朗遣翻還。然後奔喪。而傳云孫策之來。翻衰絰詣府門。勸朗避策。則為大異。

復命為功曹。待以交友之禮。身詣翻第。曰。今日之事。當與卿共之。勿謂孫策作郡吏相待也。策好馳騁游

獵。翻諫曰。明府用烏集之衆。驅散附之士。皆得其死力。雖漢高不及也。至於輕出微行。從官不暇嚴。吏卒

常苦之。夫君人者。不重則不威。故白龍魚服。困於豫且。白蛇自放。劉季害之。原注。說苑。吳王欲從民飲。伍子胥曰。昔白龍下清泠之淵。化為魚。豫且射中目。白龍不化。豫且不射。君今乘萬乘之位而從於臣。恐有豫且之患。漢書。高祖祓酒。夜徑澤中。令一人前行。前行者還報曰。前有大蛇當徑。願還。高祖醉曰。壯士行。何畏。乃前。拔劍斬蛇。蛇分為兩。道能。行數里。醉困臥。後人來至蛇所。有一老嫗夜哭。人問嫗何哭。嫗曰。人殺吾子。人曰。願少留意。策曰。君言是也。然時

有所思。端坐悒悒。有裨謹草。創謀野則獲之。計是以行爾。原注。論語為命裨謹草創之。左傳裨謹能謀。謀於野則獲。謀於邑則否。吳書。策討山越。斬其渠帥。悉令左右分行逐賊。獨騎與翻相得山中。翻問左右安在。策曰。悉行逐賊。翻曰。危事也。令策下馬。此草深。卒有驚急。馬不及策。策但牽之。執弓矢以步。翻善用矛。請在前行。得平地。勸策乘馬。策曰。卿無馬奈何。答曰。翻能步行。日可三百里。自征討以來。吏卒無及翻者。明府試躍馬。翻能疏步隨之。行及大道。得一鼓吏。策取角自鳴之。部曲識聲。小大皆出。遂從周旋。平定三郡。策討黃祖。旋軍欲取豫章。使翻前

往說太守華歆。歆即從命。既定豫章。引軍還吳。饗賜將士。計功行賞。謂翻曰。孤昔再至壽春。見馬日磾。及

與中州士大夫會語。我東方人多才爾。但恨學問不博。語議之間。有所不及。孤意猶謂未爾。卿博學洽聞。

故前欲令卿一詣許。交見朝士。以折中國妄語兒。卿不願行。便使子綱。恐子綱不能結兒輩舌也。翻曰。翻

是明府家寶。而以示人。人倘留之。則不復得事明府。故不行。策笑曰。然因曰。孤有征討事。未得還府。卿復

以功曹為吾蕭何。守會稽爾。後三月遣翻還郡。策還。翻出為富春長。策卒。諸長吏並欲出赴喪。翻曰。恐鄰

縣小民或有姦變。遠委城郭。必致不虞。因留制服行喪。諸縣皆效之。咸以安寧。原注。吳書。策薨。權統事。武定中郎將。策之從兄也。

屯烏程。整帥吏士欲取會稽。翻開之。使民守城以俟。嗣主之命。因令人告諭焉。會稽典錄。翻說焉曰。討逆明府。不竟天年。今攝事統衆。宜在孝廉。翻已與一郡吏士嬰城固守。必欲出一旦之命。爲孝廉除害。惟執事圖之。於是焉退。

裴松之曰。按此二書所說。策亡之時。翻猶爲功曹。與本傳不同。

後州舉茂才。朝廷召爲侍御史。曹操爲司空。辟皆不就。翻曰。盜跖欲以餘財。汗良家耶。翻與少府孔融書。并示以所著易注。融答書曰。聞延陵之理樂。觀吾子之治易。乃知東南之美者。非徒會稽之竹箭也。又觀象雲物。察應寒溫。原其禍福。與神合契。可謂探賾窮通者也。會稽東部都尉張紘又與融書曰。虞仲翔前頗爲論者所侵。美寶爲質。彫磨益光。不足以損。孫權以爲騎都尉。翻數犯顏諫。諍權不悅。又性不協俗。多見謗毀。坐徙丹陽涇縣。呂蒙圖取忠義。稱疾還建業。以翻兼知醫術。請以自隨。亦欲因此令翻得釋也。後蒙舉軍西上。南郡太守麋芳開城出降。蒙未據郡城。而作樂沙上。翻謂蒙曰。今區區一心者。麋將軍也。城中之人。豈可盡信。何不急入城。持其管籥乎。蒙卽從之。時城中有伏計。賴翻謀不行。忠義旣敗。權使翻筮之。得兌下坎上節。五爻變之。臨。翻曰。不出二日。必當斷頭。果如翻言。權曰。卿不及伏羲。可與東方朔爲比矣。魏將于禁爲漢所獲。械繫城中。權至。釋之。請與相見。他日權乘馬出。引禁併行。翻呵禁曰。爾降虜。何敢與吾君齊馬首乎。欲抗鞭擊禁。權呵止之。後權御樓船。會羣臣飲。禁聞樂流涕。翻又曰。汝欲以僞求免邪。權悵然不平。後權與魏和。欲遣禁還。翻諫曰。禁敗數萬衆。身爲降虜。又不能死。北習軍政。得禁必不如所規。還之雖無所損。猶爲放盜。不如斬以令三軍。示爲人臣有二心者。權不聽。

羣臣送禁。翻謂禁曰：卿勿謂吳無人。吾謀適不用也。禁雖爲翻所惡，然猶盛歎翻。曹不常爲翻設虛坐焉。權旣爲吳王，歡宴之末，自起行酒，翻伏地陽醉，不持權去。翻起坐，權於是大怒，手劍欲殺之。侍坐者莫不惶遽。惟大司農劉基起抱權，諫曰：大王以三爵之後，手殺善士，雖翻有罪，天下孰知之？且大王以能容賢蓄衆，故海內望風，今一朝棄之可乎？權曰：曹孟德尙殺孔文學，孤於虞翻何有哉？基曰：孟德輕害士人，天下非之。大王躬行德義，欲與堯舜比隆，何得自喻於彼乎？翻由是免。權因敕左右：自今酒後言殺，皆不得殺。翻嘗乘船行，與麋芳相逢，芳船人多欲令翻自避。先驅曰：避將軍船，翻厲聲曰：失忠與信，何以事君？傾人二城而稱將軍可乎？芳闔戶不應。而遽避之。後翻乘車行，又經芳營門，吏閉門，車不得過。翻復怒曰：當閉反開，當開反閉，豈得事宜邪？芳聞之有慙色。翻性疏直，數有酒失。權與張昭論及神仙，翻指昭曰：彼皆死人，而語神仙，世豈有仙人也。權積怒非一，遂徙翻交州。雖處罪放，而講學不倦。門徒常數百人。權稱尊號，翻上書曰：陛下膺明聖之德，體舜禹之孝，歷運當期，順天濟物，奉承革命。謹案：志注作策命。宋臣獨拈本作革命。與此合。舞罪棄兩絕。謹案：志注作兩絕。毛本作兩絕。與此合。拜賀無階，仰瞻宸極，且喜且悲。臣伏自刻省，命輕雀鼠，性輸毫釐，罪惡莫大。不容於誅，昊天罔極。全宥九載，退當念戮，頻受生活，復偷視息。臣年耳順，思咎憂憤，形容枯悴，髮白齒落。雖未能死，自悼終沒，不見宮闕，百官之富，不覩皇輿，金軒之飾，仰觀巍巍衆民之謠，傍聽鐘鼓侃然之樂，永隕海隅，棄骸絕域，不勝悲慕。逸豫大慶，悅以忘罪，又爲論語、國語、老子訓注，皆傳於世。初，立易注，奏

上曰。臣聞六經之始。莫大陰陽。是以伏羲仰天懸象而建八卦。觀變動。六爻爲六十四。以通神明。以類萬物。臣高祖父故零陵太守光。少治孟氏易。曾祖父故平輿令成續。述其業。至臣祖父鳳。爲之最密。臣亡案。今志作先。宋本作亡。與此合。考故日南太守欽。受本於鳳。最有舊書。世傳其業。至臣五世。前人通講。多玩章句。雖有祕說。於經疏闊。臣生遇世亂。長於軍旅。習經於枹鼓之間。講論於戎馬之上。蒙先師之說。依經立注。又臣郡吏陳桃。夢臣與道士相遇。放髮被鹿裘。布易六爻。撓其三。以飲臣。臣乞盡吞之。道士言易道在天。三爻足矣。豈臣受命。應當知經。所覽諸家解。不離流俗。義有不當。實輒悉改定。以就其正。孔子曰。乾元用九。而天下治。聖人南面。蓋取諸離。斯誠天子所宜協。陰陽致麟鳳之道也。謹正書副上。惟不罪戾。翻又奏曰。經之大者。莫過於易。自漢初以來。海內英才。其讀易者。解之率少。至孝靈之際。潁川荀爽。號爲知易。臣得其注。有愈俗儒。至所說西南得朋。東北喪朋。顛倒反逆。了不可知。孔子歎易曰。知變化之道者。其知神之所爲乎。以美大衍四象之作。而上爲章首。尤可怪笑。又南郡太守馬融。名有俊才。其爲解釋。復不及。謂孔子曰。可與其學。未可與適道。豈不其然。若北海鄭元。南陽宋忠。雖各立注。忠少差元。而皆未得其門。難以示世。又奏鄭元解尚書。遺失事目。譚案。陳志注作事。因宋本作事目。與此合。臣聞周公制禮。以辨上下。孔子曰。有君臣然後有上下。有上下然後禮義有所錯。是故尊君卑臣。禮之大司也。伏見故徵士北海鄭元所注尚書。以顧命康王執瑁。古月似同。從誤作同。旣不覺定。復訓爲杯。謂之酒杯。成王疾困。憑几洮頰。爲濯以爲澣衣。成事洮字虛。

更作濯以從其非。又古大篆卯字當讀爲柳。古柳卯同字。而以爲昧。分北三苗。北古別字。又訓北言北。猶別也。若此之類。誠可怪也。玉人職曰。天子執瑁以朝諸侯。謂之酒杯。天子類面。謂之澣衣。古篆卯字。反以爲昧。甚遠不知蓋闕之義。於此數事。誤莫大焉。宜命學官定此三事。又馬融訓注。亦以爲同者。大同天下。今經益金。就作銅字。詁訓言天子副璽。雖皆不得。猶愈於元。然此不定。臣沒之後。而奮乎百世。雖世有知者。懷謙莫或奏正。又元所注五經違義尤甚者百六十七事。不可不正。行乎學校。傳乎將來。臣竊恥之。翻放棄南方云。自恨疏節。骨體不媚。犯上獲罪。當長沒海隅。生無可與語。死以青蠅爲弔客。使天下一人知己者。足以不恨。以典籍自慰。依易說象。以占吉凶。又以宋氏解元。頗有謬錯。更爲立法。并著明揚。釋宋以理其滯。原注。裴松之曰。案翻云。古大篆卯字讀當言柳。古柳卯同字。竊謂翻言爲然。故劉留聊柳同用此字。以從聲。故也。與日辰卯字同音異。然漢書王莽傳論卯金刀。故以爲日辰之卯。今未能詳正。然世多亂之。故翻所說云。荀諝。荀爽。翻身雖放棄。心不忘國。常憂五谿宜討。以遼東絕海。謹案。陳志。聽人使來。屬尙不足。取今去人

財以求馬。旣非國利。又恐無獲。欲諫不敢。作表以示呂岱。岱不報。爲愛憎所白。復徙蒼梧。猛陵。在南十餘年。年七十卒。後權遣將士至遼東。於海中遭風。多所沒失。權悔之。乃令曰。昔趙簡子稱諸君之唯唯。不如周舍之諤諤。虞翻亮直。善於盡言。國之周舍也。使翻在此。此役不成。促下問交州。翻若尙存者。給其人船。發遣還都。已亡則送喪還本郡。使兒子仕宦。會翻已終。歸葬舊墓。妻子得還。初山陰丁覽。太末徐陵。或在縣吏之中。或衆所未識。翻一見之。便與友善。終成顯名。原注。會稽典錄。覽字孝連。八歲而孤。家又單微。清身立行。用意不苟。推財從弟。以義讓稱。仕郡至功曹。

守始平長。爲人精微潔淨。門無雜賓。孫權深賞待之。未及擢用。會病卒。甚見痛惜。殊其門戶。徐陵字元大。歷三縣長。所在著稱。遷零陵太守。時朝廷延俟以列卿之位。故翻書曰。元大受上卿之遇。叔向在晉。未若於今。其見重如此。陵卒。僮客士田或見侵奪。略統爲陵家訟之。求與丁覽卜清等爲比。權許焉。陵子平。字伯先。童胤知名。翻甚愛之。屢稱勳平。諸葛恪爲丹陽太守。討山越。以平威重。思慮可與效力。請平爲丞。稍遷武昌左部督。傾心接物。士卒皆爲盡力。初平爲恪從事。意甚薄。政待平益疏。恪被殺。子建亡走。爲平部曲所得。平使遣去。別爲他軍所獲。平兩婦歸宗。敬奉情過乎厚。其行義敦篤。皆此類也。又曰。孫亮時有山陰朱育。少好奇字。凡所特達。依體象類。擅作異字千名以上。仕郡門下書佐。太守漢陽興正且宴見掾吏。言次問太守昔聞朱穎川問士於鄭召公。韓吳郡問士於劉聖博。王景與問士于虞仲翔。嘗見鄭劉二答。而未觀仲翔對也。飲聞國賢。思視盛美有日矣。書佐寧識之乎。育對曰。往過習之。昔初平末年。王府君以淵妙之才。超遷臨郡。思賢嘉善。樂采名俊。問功曹虞翻曰。聞玉出崑山。珠生南海。遠方異域。各生珍寶。且曾聞士人歎美貴邦。奮多英俊。徒以遠於京畿。含香未越耳。功曹雅好博古。寧識其人邪。翻對方吳域。各生珍寶。且曾聞士人歎美貴邦。奮多英俊。徒以遠於京畿。含香未越耳。功曹雅好博古。寧識其人邪。翻對曰。夫會稽上應牽牛之宿。下當少陽之位。東瀛巨海。四通五湖。南暢無垠。北清浙江。南山攸居。實爲州鎮。昔禹會羣臣。因以命之。山有金木鳥獸之股。水有魚鹽珠蚌之饒。海嶽精液。善生俊異。是以忠臣係跡。孝子連閭。於及賢女靡不宵焉。王府君笑曰。地勢然矣。士女之名可悉聞乎。翻對曰。海內聞名。照然光著。大中大夫山陰陳騫。流則化盜居則讓鄰。感侵退藩。遂成義里。攝養車廡。行足厲俗。自揚子雲等上書薦之。粲然傳世。大尉山陰鄭公。清亮質直。不長黷察。魯相山陰鍾離意。稟殊特之姿。孝家忠朝。宰縣相國。所在遺惠。故取養有君子之讓。魯國有丹書之信。及陳宮贊齊。皆上契天心。功德治狀。記在漢籍。有道山陰趙曄。據土上虞王充。冬洪才湖誌。學究道遠。著書垂藻。駭駭百篇。釋經傳之宿疑。解當世之疑結。或上窮陰陽之奧祕。下據人情之歸極。交趾刺史上虞蔡母俊。拔濟一郡。讓爵士之封。決曹綠上虞孟英。三世死義。主簿句章梁宏。功曹史餘姚劉勗。主簿句章鄭雲。皆敦終始之義。引罪免官。門下督盜賊餘姚任隆。鄞侯主簿任光。章安小吏黃他。身當白刃。濟君子難。揚州從事句章王修。委身授命。垂聲來世。河內太守上虞魏少英。遭世屯蹇。忘家憂國。列在八俊。爲世英彦。尙書烏傷楊喬。桓帝妻以公主。辭病不納。近故太尉上虞朱公。天姿瞻亮。欽明神武。策無失誤。征無遺慮。是以天下義兵。思以爲首。上虞女子曹娥。父溺江流。投水而死。立石碑紀。炳然著顯。王府君曰。是旣然矣。穎川之逸軌。吳有太伯之三讓。貴郡雖士人紛紜。於此足矣。翻對曰。故先晉其近者耳。若乃引上世之事。及抗節之士。亦有其人。昔越王驍讓位。逃於耶大里之穴。越人薰而出之。斯非太伯之儔邪。且太伯外來之君。非其地人也。若以外來言之。則禹亦巡於此而葬之矣。鄞大山黃公潔已暴秦之世。高祖卽阼。不能一致。惠帝恭讓。出則濟難。徵士餘姚嚴遵。王莽敦聘。抗節不行。光武中興。然後俯就。婦手不拜。志陵雲日。皆著於傳籍。較彰彰明。豈如某許流俗遺譚。不見經傳者哉。王府君笑曰。善哉話言也。賢矣。非君不著。太守未之前聞也。濮陽府君曰。御史所云。旣聞其人。亞斯以下。書佐寧識之乎。育曰。瞻仰景行。敢不識之。近者

太守上虞陳業。潔身清行。志懷霜雪。貞亮之信。同操柳下。遭漢中微。委官棄祿。遁迹彭蠡。以求其志。高邈妙探。天下所聞。故桓文遺之尺牘之書。比竟三高。其聰明大略。忠直警諤。則侍御史餘姚虞翻。偏將軍烏程嚴統。其淵懿純德。則太子少府山陰關澤。學通行茂。作帝師儒。其雄姿武毅。立功當世。則後將軍賀齊。勳成績著。其探極秘術。言合神明。則太史令上虞吳範。其文章之士。立言榮盛。則御史中丞荀爽。郡陽太守章安虞翻。各馳文檄。曄若春榮。處士鄧慮。殺弟犯公。自殺乞代。吳寧斯敦。山陰祁庚。上虞樊正。咸代父死罪。其女則松陽柳朱。永寧翟素。或一離守節。喪身不顧。或遭寇劫賊。死不虧行。皆近世之專。尚存耳目。府君曰。皆海內之英也。吾聞秦始皇二十五年。為吳越地。景帝會稽郡。治吳。漢封諸侯王。以何年復為郡。而分治於此。青對曰。劉賈為荆王。賈為英布所殺。又以劉濞為吳王。景帝四年。濞又誅。乃復為郡。治於吳。元鼎六年。除東越。因其地為治。并屬於此。而立東部郡尉。後徙章安。陽朔元年。又徙治鄞。或有寇害。復徙句章。到永建四年。劉府君上書。浙江之北。以為吳郡。會稽還治山陰。自永建四年。歲在己巳。以至今。積百二十九歲。府君稱善。是歲吳之太平三年。歲在丁丑。青後仕朝。常在臺閣。為東觀令。遙拜清河太守。加位侍中。推刺占射文藝多通。

翻十一子。汜。字世洪。謹案。吳志第四。子汜最知名。生南海。年十六。父卒。還鄉里。為選曹郎。孫

緜。廢幼主亮。迎立琅邪王休。休未至。緜欲入宮。圖為不軌。召百官會議。皆惶怖失色。不敢枝梧。汜獨曰。明

公為國伊周。處將相之位。擅廢立之威。將謹案。今志作勢。宋本將。與此合。上安宗廟。下惠百姓。大小踴躍。自以霍光復

見今日。迎王未至。而欲入宮。如是羣下搖蕩。衆聽疑惑。非所以永終忠孝。揚名後世也。緜不懌。休立。汜與

賀邵。王蕃。薛瑩。俱為散騎常侍。以討扶嚴功。拜交州刺史。盪寇將軍。封餘姚侯。卒。汜弟忠。字世方。謹案。會稽典錄。

忠。翻第五子。善識拔人物。賞陸機於童齒。稱魏遷於單微。終皆遠致。交王岐於孤宦。仕進先至。宜都太守。而忠

代之。晉伐吳。忠與夷道監陸晏。晏弟中夏督景。謹案。志注作京。景。陟抗子也。堅守不下。城潰被害。忠子潭。字思與。清

貞有檢操。仕晉歷職內外。終衛將軍。贈侍中。左光祿大夫。開府儀同三司。忠弟聳。字世龍。謹案。會稽典錄。聳。翻第六子。

清虛無欲。進退以禮。為越騎校尉。累遷廷尉。湘東河間太守。入晉。除河間相。王素聞聳名。厚敬禮之。聳引

人物求於幽隱。王岐難聳以高士所達。必合秀異。聳書與族子察曰。世之取士。曾不招未齒於丘園。索良才於總猥。所譽依已成。所毀依已敗。此吾所以歎恨也。聳疾俗喪祭無度。弟昺卒。祭以少牢。酒飯而已。當時俗黨並遵行之。昺字世文。謹案。今志作子文。宋本作世文。與此合。會稽典錄曰。昺翻第八子。少儻有志度。孫皓時爲黃門郎。以捷對見異。超拜尙書侍中。轉廷尉。晉軍來伐。遣昺持節都督武昌。已上諸軍事。皓降。昺先上還節。蓋印綬。然後降。爲濟陰太守。抑彊扶弱。甚著威風。

陸績字公紀。吳郡吳人。曾祖績。祖襄。皆有志操。連徵不至。父康舉茂才。歷典三郡。號稱良吏。終廬江太守。原注。謝承後漢書曰。康字季寧。少惇孝弟。勤修操行。太守李肅察孝廉。肅後坐事伏法。康斂尸送喪。還潁川。行服禮終。舉茂才。歷三郡太守。所在稱治。後拜廬江太守。績年六歲。於九江見袁術。術出橘。績懷三枚。去拜辭。墮地。術謂曰。陸郎作賓客而懷橘乎。績跪答曰。欲歸遺母。術大奇之。孫策在吳。

張昭。張紘。秦松。爲上賓。其論四海未泰。須當用武。治而平之。績年少未坐。遙大聲言曰。昔管夷吾相齊。桓公九合諸侯。一匡天下。不用兵車。孔子曰。遠人不服。則修文德以來之。今論者不務道德。懷取之術。而惟尙武。績雖童蒙。竊所未安也。昭等異焉。績容貌雄壯。博學多識。星歷算數。無不該覽。虞翻舊齒名盛。龐統荊州令士。年亦差長。皆與績友善。孫權統事。辟爲奏曹掾。以直道見憚。出爲鬱林太守。加偏將軍。給兵三千人。績既有臂疾。又意在儒雅。非其志也。雖有軍事。著述不廢。作渾天圖注。易釋元。皆傳於世。豫自知亡日。乃爲辭曰。有漢志士。吳郡陸績。幼敦詩書。長玩禮易。受命南征。遭疾遇厄。遭命不幸。嗚呼悲隔。又曰。從

今已去六十年之外。車同軌。書同文。恨不及見也。年三十二卒。長子宏。會稽南部都尉。次子叡。長水校尉。

原注。方輿勝覽。唐陸龜蒙傳。其術祖續仕吳守鬱林。歸裝舟輕。不可越海。取石爲重。人稱其廉。號鬱林石。

議曰。峻能以實讓乘。輔導有體。澤稱美過。秦以諷權之泰。皆侃侃自將。篤厚君子也。虞翻志節高邁。忠於所事。委質桓王。間關跋涉。盡言彊諫。使華歆幅巾去郡。拓定江西。名動中州。曹丕虛榻以待。增重孫氏多矣。狂直不容。擯斥以死。權之襟度不逮策遠矣。昔揚雄以歷法準易作太元。用洛書以合河圖。固知數之理矣。然天下無二數。道祇一易。易以宓犧演太極。文王演宓犧。周公演文王。孔子演四聖。祇明數以成一易。原注。易範圖書及元皆見道術錄。若可改作。則文王周公孔子自爲之矣。豈必因人述而不作哉。聖人不作而雄作之。

殆一家之私易。疣贅也。嗚呼。數聖人作一易而未備。孔子讀之。韋編三絕。猶以爲年數不足。況後之人乎。又況復爲一元乎。適足以增學者之翳塵。耗精力而冥其歸也。陳壽稱陸績之於揚元。是仲尼之丘明。老聃之莊周。績亦勤矣。其猶在王弼之後乎。翻之易注。稱於孔融。必有深造自得者。惜乎不得見其全也。贊曰。昊天四時。聖人六經。立我人極。萬物是程。夫豈我欺。人情物理。傳心設教。之綱之紀。軻死不作。坑深遂亡。餘燼復然。漢道有光。神緘鬼護。伏口魯壁。稽訛補漏。羣儒之力。康成苦心。傳注始備。精疎有徵。斯文弗墜。

續後漢書卷第六六上上

列傳第六十三上上

文藝

文章總敘

易部序論說評辯
問難釋言

書部表封事奏議牋啓狀奏記
制策敕令教下記檄疏
彈章露布連珠

詩部騷賦古詩樂府歌行吟
篇引詞曲琴操長句雜言
論

春秋部國史碑墓碑誄銘
頌箴贊記雜文
符命

易

昊天有四時。聖人有四經。爲天地人物無窮之用。後世詞章。皆其波流餘裔也。夫繇象象言。詞說序雜。皆易經之固有序。論說評辯。解問對難。語言以意言明義理。申之以詞章者。皆其餘也。序有二義。有端序。有次序。原始首事。推本爲言。以冠諸端。則端序也。廣義列事。排比爲言。各有次第。則次序也。書有古今序。若堯典。昔在帝堯。聰明文思。光宅天下。將遜于位。讓於虞舜。作堯典。孔子序書之時。所

作謹案。百篇書序。朱子已疑其僞。此謂孔子所作。亦承用前人之說。今序也。堯典曰。若稽古帝堯。曰放勳。欽明文思安安。史臣述堯之序。古

序也。詩有大小序。自關雎后妃之德也。至用之邦國焉。則小序也。自風風也。至關雎之義也。則大序也。其餘諸序。亦有古今。序若卷耳后妃之本也。作詩有興采詩之官志之也。古序也。自后妃在父母家。至化天下以婦道也。孔子以來諸弟子及漢世諸儒推廣之也。今序也。此皆端序之始也。至司馬遷作史記。於三代六國諸表及貨殖儒林諸傳皆有序。劉向論次諸子百家。亦皆有序。揚雄作法言。每篇有序。又謂之題詞。而體制日滋矣。孔子作序卦曰。有天地然後萬物生焉。盈天地之間者惟萬物。故受之以屯。所以序文王重卦之次第也。公羊子曰。楚屈完來盟於師。盟於召陵。序績也。所以序齊桓服楚之次第也。此皆次序之始也。至司馬遷作自序。序其家世功烈。并序諸紀傳之次。而班固作序傳。亦序其家世功烈。并序一書之次。皆明其所以著作之意。自是凡所著述。莫不有二者之序。而篇題不可勝窮矣。

論六經無論。至莊荀騁其雄辯。始著論如禮樂正論。齊物論等。皆篇第之名。未特以爲文也。漢興。賈誼初爲過秦一篇。始以爲題而立論。原注。應劭曰。過秦賈誼書第一篇名也。言秦之過。則漢業者。猶曰劇於秦云耳。於是二京三國諸文士。往往著論。大抵反覆明理而已。詞達義暢。不以文爲勝也。

說自孔子爲說卦。六經初有說。以宓犧之易有畫而無文。故於八卦位序體用意象申而爲之說。以文王之易有繇。祇明其入用之位而已。原注。自帝出乎震。至成育乎艮。是也。其餘皆說宓犧八卦。則其爲說有不得已焉者也。戰國諸子。遂騰

口說而又著書名篇如說劍說難等非聖人意也後世遂爲詞章之文矣

評先秦二漢所未有桓靈之季宦戚專朝學士大夫激揚清議題拂品覈相與爲目如曰天下模楷李元禮不畏彊禦陳仲舉許劭在汝南而爲月旦評評之名防此至陳壽作三國志更史贊曰評而始名篇然特論之異名也

辯者別嫌疑定猶豫指陳是非之文也孟子謂吾豈好辯荀子謂析詞而爲察言物而爲辯老子謂大辯若訥善言者不辯揚雄謂或問五經有辯乎曰惟五經爲辯說天者莫辯乎易說事者莫辯乎書說體者莫辯乎禮說志者莫辯乎詩說理者莫辯乎春秋舍斯辯亦小矣故凡論說之文皆辯也先秦二漢猶未以名篇後世始與論別而爲題矣

解記禮者以其記六藝政教得失謂之經解解之名防此漢以來凡注釋經義者皆謂之解辯說之異名也後世始命篇而爲文矣

問禮記論語集聖賢問對之言類以問名篇如憲問曾子問哀公問問喪服問皆記錄之文也未特命篇爲文至屈平作天問宋玉作對楚王問始特以爲文原注王逸曰屈原放逐憂心愁悴彷徨山澤經歷陵陸天地山川神靈琦瑋備僉及古聖賢怪物行事因書其壁呵而問之以潔憤懣舒寫愁思乃假天以爲言焉故作天問楚襄王問於宋玉宋玉對曰云云其後枚乘爲七發曹植爲七啓原注漢書枚乘爲吳王濞郎中作七發王逸曰七發者說七事以啓發太子也猶楚詞七諫之流曹子建七啓序曰昔枚乘作七發傳殺作七激張衡作七辨崔駰作七依詞各美麗余有慕焉遂作七啓并命皆其制也

王粲作焉。

難。六經以來凡師弟對問之間。君臣可否之際。相與擬議詰折。無非問難之文也。難。難也。其言難合。反復相難也。故醫家有書。謂之難經。然未嘗特以命篇而爲文也。漢興。東方朔作客難。其後揚雄爲解嘲。班固作賓戲。皆其制也。原注。漢書朔上書陳農戰疆國之計。推意放蕩。終不見用。因著論設客難己。用位卑以自慰諭。哀帝時。丁傅董賢用事。諸附麗之者起。家至二千石。時雄芳草創太元。有以自守。泊如也。人有嘲雄以元之尙白。雄解之。號曰解嘲。班固序曰。永平中爲郎。典校祕書。專篤志於儒學。以著述爲樂。或譏以無功。又感東方朔揚雄自喻。以不遭蘇張范秦之時。曾不折之以正道。明君子之所守。固聊復應焉。語自論語外。左氏爲春秋傳。其餘事詞。國別爲錄。謂之國語。以爲春秋外傳。特以爲書之號。未嘗命篇爲文。後世特以爲題。與問難等矣。

言。初孔子爲乾坤二卦。作文言傳。而文始有言。後世亦特命篇爲文。而與論說等矣。

書者言之經。後世王言之制。臣子之詞。皆本於書。凡制、詔、敕、令、冊、檄、教、記、誥、誓、命、戒之餘也。書、疏、箋、表、奏、議、啓、狀、謨、訓、規、諫之餘也。國書、策、問、彈、章、露、布、後世增益之耳。皆代典國程。是服是行。是信是使。非空言比。尤官樣體制之文也。

書。自孔子別爲虞夏商周之書。未嘗特以名篇。其篇題則各自有名。於商書太甲曰。伊尹作書。又曰。奉嗣王歸于亳。作書。說命曰。王庸作書。金縢曰。啓鑰見書。召誥曰。周公乃朝用書。顧命曰。太史秉書。皆以爲書。

而無其名。周禮職官所稱賢能之書、禮書、事書、三皇五帝之書、贊書、秋官小行人謂其民之利害爲一書。其禮俗政事教治刑禁之逆順爲一書。其悖逆暴亂作惡犯令爲一書。其札喪凶荒厄貧爲一書。其康樂和親安平爲一書。禮記謂書策書、方振書、端書、與傳記所載載書、丹書、刑書、竹書等亦皆以爲書。而無其篇。則書者文籍之總名也。魯成公七年。楚子重子反殺申公巫臣之族。巫臣自晉遺二子書。特以書名篇。始見乎此。其後魏絳有書。子產有書。叔向有書。至戰國秦漢不可勝載。而體制多矣。臣子之於君父。小臣之於大臣。布衣之於達官。弟子之於師長。小國之於大國。皆謂之上書。名位相埒。則謂之遺書。平交往反。則謂之復書。上之於下。則謂之諭書。告戒論列。則謂之移書。躬親裁制。則謂之手書。天子下書。則謂之賜書。用璽封題。則謂之璽書。敵國講信。則謂之國書。吉慶相賀。則謂之賀書。勝敵報多。則謂之捷書。喪師敗績。則謂之敗書。無禮相陵。則謂之慢書。叛君指斥。則謂之反書。死喪凶訃。則謂之哀書。先秦西漢博約高古。有三代遺風。魏晉以還。辭氣凌弱矣。

國書六經初無有。三代之際。天子之待夷狄。親諸侯。諸侯之邦。交事天子。皆有玉帛之使。其辭命不可考。周室之衰。晉楚齊秦更霸。亟戰亟聘。魯衛宋鄭陳蔡相與爲敵國。數會數朝。辭命益重。故語載鄭之爲命。曰。稗謔草創。世叔討論。子羽修飾。子產潤色。然亦不見其完文。漢初高帝與匈奴約爲兄弟。以和親。孝惠高后時。冒頓爲嫚書以遺高后。高后忍辱報書。冒頓復書以謝。中國始交外夷。而國書之制可考矣。單于

遣漢書則曰天所立匈奴單于敬問皇帝無恙漢遣匈奴書則曰皇帝敬問匈奴大單于無恙及中行說教單于壞約侮漢漢遣單于書以尺一牘說乃令單于以尺二牘及印封皆令廣長大倨齷其詞曰天地所生日月所置匈奴大單于敬問漢皇帝無恙漢亦依違報之至孝武大伐匈奴而書問遂絕矣原注。自漢交匈奴諸事。皆見外夷北狄傳。高后時南粵王趙佗自尊號爲南粵武帝孝文卽位賜佗書曰皇帝謹問南粵王甚苦心勞意朕高皇帝側室之子佗因爲書謝稱蠻夷大長老夫臣佗昧死再拜上書皇帝陛下此又中國以禮禮外夷之制也原注。事見外夷南蠻傳。建武初鄧禹承制命隗囂爲西州大將軍囂乃遣使詣闕上書光武報以殊禮言稱字用敵國之儀其後復報以手書又使來歙奉璽書喻旨及囂反始絕公孫述僭號於蜀帝與述書署曰公孫皇帝此又中國與僭國之制也逮夫三國漢吳用敵國禮吳於魏始上書稱臣既受封爵乃奉表謝其後遂絕不復通故敵國國書始見於漢吳至晉宋南北之際其制滋多皆戰和安危所繫國脈民命之所在王言之尤重者也

詔孔子定書於虞夏商周之際始見誥誓命之文皆王言也故禹謨曰誓於師湯誥曰明聽予一人誥說命曰王言惟作命至周而王與諸侯皆曰命王曰王命諸侯曰公命故大宗伯有典命之職封爵則有五等之命車服則有九等之命原注。周禮典命掌諸侯之五儀。諸臣之五等之命。上公九命爲伯。其國家宮室。車旂。衣服。禮儀。皆以九爲節。建官則有策命原注。左命內史叔與交策命晉侯爲侯伯。賚予則有錫命原注。春秋文公元年。襄美則有追命。王使榮叔來錫桓公命。而詔之名未

有也。若大家宰謂以八柄詔王馭羣臣。以八統詔王馭萬民。則詔者告導之辭也。禮器謂納牲詔於庭。血毛詔於室。羹定詔於堂。三詔皆不同位。則詔者陳設之辭也。春秋大祝作六辭以通上下。親疏遠近。曰祠。曰命。曰誥。曰會。曰禱。曰誅。而無詔也。始皇初并天下。更號曰皇帝。命爲制令爲詔。詔制之名。防此。漢因之。其制有四。曰冊。曰制。曰詔。曰敕。而詔爲重。原注。蔡邕曰。立后妃。皇太子。諸王。三公。則冊。命百官。郡守。則用制。有所戒諭。則用敕。布告天下。則用詔。凡皇太后垂簾者亦用之。二漢制詔去古未遠。猶有先秦三代之風。雖不能如典謨。諧誓。據寫仁義道德性命福禍究竟禮樂天人之際。而其文辭溫雅質厚誠盡。要約不繁。有絲綸之大體。王言之潤色。聖人感人心致和平之意。無欺世罔民之私。隋王通曰。詔其見王者之志乎。其恤人也。周其致用也。悉一言而天下應。一令而不可易。非仁智博達。則天明命。其孰能詔天下乎。東漢之季。漸尙辭用事。魏晉而下。遂爲文具矣。冊者。辭命記注之總稱。古者書於竹簡。一簡謂之簡。編簡謂之冊。事小辭略。一簡可書。則曰簡而已。事大辭多。一簡不容。必編衆簡而書之。則曰冊。故史官大事書之於冊。小事簡牘而已。其名始見於金縢之書。曰。史乃冊祝。其後納冊。作冊。祝冊。冊命。凡告廟命。官封建。皆用之。漢因周制。尊太上皇。皇太后。立皇后。皇太子。封建諸侯王。拜免三公。皆用冊。郊祀天地。謁告宗廟。封禪泰山。亦用冊。至於特拜郡守。述其政績。亦用冊。古者尙質。惟用竹。秦漢則泥金檢玉。號爲玉冊。示其侈也。原注。蔡邕曰。冊者簡也。其制長二尺。短者半符命也。諸侯進受於王者也。象其札一長一短。中有二編之形式。漢書武帝元狩六年。廟立皇子闕爲齊王。且爲燕王。晉爲廣陵王。初作冊。其於國恤有哀冊。謚冊。於是高文大冊爲

漢帝制禮文盛矣。後世皆遵用之。

制。秦更命爲制。蔡邕曰。制書。帝者制度之命也。其文曰制詔。詔書。詔告羣臣有所奏請。尙書令奏之。下有司曰制。天子答之曰可。方之乎詔。尤有禮文之書也。宣布號令沿革更定。則曰詔。諮謀臣下。報答畫可。則曰制。特有處置。告諭大臣。則曰制詔。母后臨朝。非所宜稱。則曰稱制。漢制然也。故隋王通推本高帝。文景。武。宣。光武。明。章爲七制之主。其書曰帝制。言其法制可爲後王之則也。

制策。漢制舉士之制也。孝文二年詔舉賢良方正能直言極諫者。潁陰侯騎賈山上書曰。至言雖詔舉賢良。未有制策也。十五年詔諸侯王公卿郡守舉賢良能直言極諫者。上親策之。太子家令鼂錯對策。其始下制策一篇。而對者舉詔冊之文。敷陳以對。至孝武世。公孫宏。董仲舒出。充推蔓衍。論列治體。指陳天人之際。極於天命情性。風俗教化。三代先秦所未有也。

赦者。貸釋過誤之稱。故易解傳謂君子以赦過宥罪。虞書謂眚災肆赦。呂刑謂五刑之疑有赦。周禮司刺有三宥三赦之法。一宥曰不識。再宥曰過失。三宥曰遺忘。一赦曰幼弱。再赦曰老耄。三赦曰憊愚。皆以其非故怙終。其情可矜也。有罪而特縱釋。以爲一己之私而行小惠。失政刑矣。故春秋肆大眚則譏之。由漢以來。凡勝國克敵則赦。卽位立皇后太子則赦。郊祀天地則赦。朝享太廟則赦。慶瑞之符則赦。禴禋之私則赦。私人則特赦。私一州則曲赦。其大赦則并大逆不道賊弑君親者皆爲除免。一年之間。有至再三

者皆亂制也。故吳漢臨終勸光武無赦。王符謂賊良民之甚者莫失於數赦。諸葛亮治蜀十二年無赦。孟光責費禕之行赦皆知治體者也。

令說命曰。王言惟作命。不言臣下罔攸稟令。則令者命之通稱也。周禮天官女史掌王后之內令。則周之后命稱令也。秦漢之初未爲天子則稱令。既爲天子則稱詔。其後皇后太子諸侯王公之命皆曰令。凡將帥命於軍中亦曰令。始別於詔命而自爲制矣。

教蔡邕曰。諸侯之言曰教。猶天子之制詔也。凡丞相三公諸王列侯開府置官屬者皆用之。下記漢魏以來藩府郡守令於其屬者用之。以記事爲言。自謙之辭。然亦教令之制也。

檄者。傳布告召之文。自丞相尙書令大將軍藩府州郡皆用之。或以徵兵。或以召吏。或以命官。或以諭不庭。或以討叛逆。或以誘降附。或以誅僭僞。或以告人民。皆指陳事端罪狀。開說利害。曉以逆順。明其去就。其文峻其辭切。必警動震竦。撼搖鼓盪。使畏威服罪。然後爲至已。其制以木簡爲之。長一尺二寸。若有急。則插以鳥羽。謂之羽檄。取其疾速也。故亦謂之羽書。初漢高帝謂吾以羽檄徵天下兵。又謂可傳檄而定。則三代先秦已自有之。而其文未見也。至孝武遣司馬相如責唐蒙等。始見喻巴蜀一篇。首曰告巴蜀太守。終曰咸諭陛下意。毋忽。蓋古制然也。

原注。漢書相如爲郎。數歲會唐蒙使略通夜郎。檄發巴蜀吏卒千人。郡又多爲發轉漕萬餘人。用軍與法誅其渠率。巴蜀人大恐。上聞之。乃遣相如責唐蒙等。因諭告巴蜀人以非上之意。

至三國之際益尙事辭其制愈備矣。

疏者、疏通其意、達之於上。凡政有所未便、事有所未當、冤枉有所未信、舉蔽有所未達、臣下為論列奏上、則用之。非三代先秦之故。有至漢高帝五年、誅項羽東城、諸侯王皆上疏請尊漢王為皇帝。疏之名始見。其後臣下往往上疏、同夫書矣。

表者、敷陳著見之稱。有所未明、表而著之也。書謂光被四表、則自內而被於外也。師表萬民、則自上而形於下也。傳謂言不聞於表著之位、則陳設之次也。禮謂立八尺之表者、則禮準之則也。其名則同、其義各異。未特以名篇而謂之文也。司馬遷作史記、始為諸侯六國諸年表、特列序其興滅之年、亦未為臣子之文也。其後漸見於二漢魏晉之際、其首曰臣某言、遂論列其事、其終則曰謹奏、表以聞、義同書疏、而體制異矣。原注。李善曰。表者明也。標也。如物之標表。言標著事序。使之明白。以曉主上。得盡其忠。曰表。三王以前謂之敷奏。故尚書謂敷奏以言是也。至秦并天下改為表。總有四品。一曰章。謝恩曰章。二曰表。陳事曰表。三曰奏。效驗政事曰奏。四曰駁。推覆平論有異事進之曰駁。六國及秦漢兼謂之上書。行此五事。至漢魏以來。都曰表。進之天子稱表。進諸侯稱上疏。魏以前天子亦上疏。封事、漢制表書皆啓封、其言密事、則皂囊重封、謂之封事、其文亦書疏也。

奏、凡進言於君、皆曰奏、書謂敷奏、以言是也。漢世凡效驗政事、特有奏請、乃特作奏、其文亦書疏也。

議、商權可否、與論略同、論略而議詳也。故莊周謂六合之內、聖人論而不議、三代以來、議事以制、政乃不

迷、故周官有八議、議親、議故、議賢、議能、議功、議貴、議勤、議賓。原注。周禮小司寇以八辟麗邦法附刑罰。一曰議能之辟。五曰議功之辟。六曰議貴之辟。七曰議勤之辟。八曰議貧之辟。秦有丞相議、廷尉議、博士議。原注。皆特受詔奏議也。漢與有廷議。原注。于殿廷之間議於天子前也。

能之辟。五曰議功之辟。六曰議貴之辟。七曰議勤之辟。八曰議貧之辟。秦有丞相議、廷尉議、博士議。原注。皆特受詔奏議也。漢與有廷議。原注。于殿廷之間議於天子前也。

集議原注。會集百官而議之也。百官雜議原注。下百官令相雜而議也。下公卿議原注。特下三公九卿議之也。故和親有議原注。漢書武帝建元六年。匈奴來請和親。天子

下如其議大行。王恢議勿許。與兵擊之。韓安國議封禪有議原注。元鼎六年。上與公卿諸生議封禪。鹽鐵有議。詔有司問郡國所舉賢良

文。學民所疾苦教化之要。皆對願罷鹽鐵酒權均輸官。毋廢立有議原注。昌邑王既立。淫戲無度。大將軍霍光召丞相

與天下爭利。桑宏羊以爲不可廢。于是鹽鐵之議起焉。宮。尊號有議原注。哀帝即位。郎中令冷爽等奏言定陶共皇太后共皇后。皆不宜復引藩國

議未央。尊號有議之名以冠大號。上下其議。羣下多順指言母以子貴。宜立尊號。以厚孝道。郊廟有議原注。成

軍許嘉等八人議以爲不當。徙右將軍。王商等五十人。以爲當從衡等議。于是衡譚奏于長安。定南北郊。爲萬世基。天子

劉歆議曰。禮天子七廟者。其正法數可常數者也。宗不在此數。中變也。苟有功德則宗之。不可預爲設數。孝武皇帝功

烈如彼。不宜毀擊珠厓有議原注。元帝時珠厓諸縣反叛。連年不定。上謀于羣臣。欲大發軍。待詔買捐之議以爲不宜擊。遂從捐之議。罷擊珠厓。其大略也。然而三代之

議有言而無書。二漢之議既許其言。又各爲書以上其議。其言不易而得失可考。天子稱制決可。而後下

其議。公卿奉行之。天子不敢奮其私智。大臣不敢進其私言。一以公議網紀天下。而四百年無二志。漢政

之幾於三代者也。牋亦表類也。僚屬於皇太子諸侯王用之。方之於表。首尾稱姓名。而不稱臣。

啓亦牋表類也。有所咨問。慶賀干請。則上啓事於天子。則稱臣某啓。乃入事。末則曰謹奉啓事以聞。非天

子則皆曰某啓而已。狀者。敷奏情狀。列上事宜。猶表之爲標著。疏之爲條達也。自天子省府上下皆得用之。其辭質。其事詳。公

狀者。敷奏情狀。列上事宜。猶表之爲標著。疏之爲條達也。自天子省府上下皆得用之。其辭質。其事詳。公

文之通稱。疏之次也。

奏記、漢魏以來，凡有司言事於上官者，謂之奏記。避尊遠嫌，以記事爲言也。故有司藩府將帥置官屬者，皆有記室、掌書記之官焉。

彈章，有司舉劾奏上治罪之文也。秦漢以來，有御史大夫、中丞、侍御史之官，如周之大小司寇，糾詰姦慝，奮勵風憲。自天子大臣百官羣司，凡有過惡，皆得舉正。有所彈劾，則冠豸冠，簪白筆，對仗讀彈文。彈者擊其罪而必中，章者暴其惡而無隱，亦幾於三代之良法也。

露布，古之捷書也。凡聲罪致討，有所克捷，列其功狀，書之於帛，露見布告，故謂之露布。又謂之露版，尤尙辭之文也。

連珠，孝章命班固傳毅作一事未已，又列一事，駢辭相連，體如貫珠，故謂之連珠，亦奏議之體也。

詩

詩經三百篇，雅亡於幽厲，風亡於桓莊，歷戰國先秦，祇有詩之名，而非先王之詩矣。本然之聲音，鬱湮噴薄，變而爲雜體，爲騷賦，爲古詩，爲樂府，歌行吟謠，篇引辭曲，琴操長句，雜言，其體制不可勝窮矣。

騷，古所無有，楚屈原始爲之。司馬遷曰：楚懷王信上官大夫之讒，怒而疏屈平，屈平疾王聽之不聰也，諶諂之蔽明也，邪曲之害公也，方正之不容也，故憂愁幽思而作離騷。離騷者，猶離憂也。其託物引喻，愛君

憂國變風變雅之流。其辭雖怨激發。幾於憤悱。跌宕怪神。而類夫巫覡。要之出於忠而止於義。凡二十五首。其弟子宋玉。景差。相繼而作。及漢賈誼。莊忌。等復爲之。大抵皆祖原。以其體制創於楚。謂之楚辭。以離騷一篇。旨意深遠。可以繼詩經之後。特稱爲經。自九歌。天問。及諸人之作。皆謂之傳云。

賦詩有六義。二曰賦。排比鋪陳之體也。如曰。手如柔荑。膚如凝脂。領如蝤蛴。齒如瓠犀。螓首蛾眉。齊侯之子。衛侯之妻。東宮之妹。邢侯之姨。之類是也。其體雜見於風雅頌之間。而不特名篇。至屈原作離騷。謂之賦。宋玉乃作高唐風賦。荀卿。賈誼。司馬相如等相與倡和。拓大綴緝。峯然爲辭章之冠。兼詩騷之制。爲文士傑作。至魏晉極矣。

古詩。自陳靈公訖周之亡。歷戰國。秦。漢。及高惠文景之世。踰五百年。騷賦之外。詩遂無聞。孝武時李陵。蘇武相與贈答。始爲五言。號稱古詩。歷漢三百餘年。絕無僅有。建安間篇什始盛。爲漢魏正體。然亦非三代之詩也。

樂府。周官大司樂。乃其職也。六代之樂。皆有樂歌。自雅頌外。不見其文。漢初樂府。令掌樂舞。有房中安世

等歌。始見其辭。原注。漢書房中祠樂。高祖唐山夫人所作也。孝惠二年使樂府令夏侯寬備其辭管。更名曰安世樂。安世房中歌十七章。至孝武立樂府。采詩夜誦。原注。漢書武帝新定郊祀之禮。乃立樂府。采詩夜誦。有趙代秦楚之調。以李延年爲協律都尉。多舉司馬相如等數十人造爲詩賦。略論律呂。以合八音。顏師古曰。采詩依古。道人徇路。采取百姓謳謠。以知政教得失也。夜誦者。其言詞或祕不可宣露。故於夜中歌誦。定郊祀祠太一。作十九章之歌。章各有名。曰。練時日。帝臨青陽。朱明西顛。元冥惟泰。元天地日出入。又

繼以諸事名章曰天馬。原注。元狩三年。馬生渢渢中作。天門。景星。齊房。原注。元鼎五年得鼎汾陰作。后皇華。

煜煜五神朝隴首。

原注。元狩元年行幸雍。獲白麟作。

象載瑜。

原注。太始三年行幸東海獲赤雁作。

赤蛟及宣房。柏梁等作皆有其辭。而樂府

始盛。其後雜體歌行吟謠皆爲樂府新聲別調不可勝窮矣。

歌與詩同。皆古有之。作爲篇章而歌之爾。故歌之爲言也。長言之也。說之故言之。言之不足故長言之。長言之不足故嗟歎之。于是有詠歌。嘯歌。悲歌。怨歌。長歌。短歌。各以其聲爲體。詩三百篇皆是也。及詩之亡。戰國秦漢之際。往往爲歌。樂府以來。篇章遂盛。與詩別而自爲制矣。

行亦歌詩之流。三代先秦未之見也。樂府以來。往往以行稱。又與歌並稱。歌行也。歌以詠其志。行以行其志。爾其特稱行。如飲馬。長城窟行。苦寒行。善哉行等是也。與歌並稱者。如傷歌行。燕歌行。長歌行。短歌行。怨歌行等是也。

吟亦歌類也。歌者發揚其聲而詠其辭也。吟者掩抑其聲而味其言也。歌淺而吟深。故曰吟詠情性以風其上。三代先秦有其名而無其文。樂府有白頭吟。梁父吟。東武吟。始自爲篇題矣。

謠亦歌類也。遠而言之。緩而不切。爾詩曰。我歌且謠。則歌切而謠緩也。如風謠。童謠。自古有之。皆自成章。而詩經不錄。樂府以來。始自爲篇題。如箜篌謠等是也。

篇。古者編竹爲書。凡成章者自爲一篇。故謂之篇。特文籍次第之名。未特命題爲文也。樂府以來。始以名

題如美女篇、白馬篇、名都篇等是也。

引亦歌類也。歌之爲言長言之也。引則引而信之又長矣。樂府以來始有之。如箜篌引等是也。

辭。凡言成文謂之辭。故易有繇辭、象辭、爻辭、繫辭。書謂之兩辭。傳謂之文辭。皆成文之言也。然未命題爲文。漢孝武始爲秋風辭。樂府有王明君辭。亦自名篇矣。

曲。盡其音曲折也。季札觀樂。謂直而不倨。曲而不屈。師乙謂曲如折句中鈞。皆其意也。漢立樂府。始以曲名樂章。又特以名篇爲歌曲矣。

琴操。古有雅琴、頌琴。故詩三百篇。孔子皆弦歌之。則古之歌詩皆琴曲也。謂之操者。風俗通曰。凡琴曲憂愁而作。命之曰操。言困阨窮迫。猶不失其操也。古操有十二首。拘幽、文王、越裳、岐山、周公、履霜、尹吉甫、子伯奇、將歸、猗蘭、龜山。孔子作。殘形、曾子、雉朝飛、牧犢子、作。別鶴、商陵穆子、作。水仙、懷陵伯牙。作。皆有其辭。亦歌詩之體也。後世凡制琴曲。皆謂之辭矣。

長句雜言。古之爲詩也。其章句不繫短長。期於意盡辭止。音韻順適而已。故有三言者。江有汜是也。有四言者。關關雎鳩是也。有五言者。投我以木瓜是也。有六言者。曷月子還歸哉是也。有七言者。送我乎淇之上矣是也。有八言者。十月蟋蟀入我牀下是也。其爲章則或三四相間。或五七相錯。不拘其字數章句。而其變無窮。所以爲詩之經也。漢初專尙四言。至蘇李專爲五言。孝武爲秋風。柏梁等辭。則專爲七言。自張

衡四愁而下。號七言爲長句。建安以來。號四五言爲古詩。其餘自樂府歌謠外。三四六七相雜成章者。則謂之雜言詩之體制。至是極矣。

春秋

春秋詩書皆王者之迹。唐虞三代之史也。孔子修經。乃別辭命爲書。樂歌爲詩。政事爲春秋。以爲大典大法。然後爲經而非史矣。凡後世述事功。紀政績。載竹帛。刊金石。皆春秋之餘。無筆削之法。祇爲篇題記注之文。則自爲史而非經矣。

國史書契以來。卽有史。至周而有太史、小史、內史、外史、左史、右史。太師、太祝之官。自王朝列國皆有之。其書法大抵皆編年。大事書之於策。小事簡牘而已。至孔子作春秋。筆削其事而略其辭。亦皆編年。具四時以首事。晉太康中得竹書有紀年十二篇。則古法也。左氏爲春秋作傳。雜以事辭。亦皆編年。其餘則別爲國語。歷戰國訖秦。凡諸史書有五帝德、帝繫、春秋歷、譜牒、世本、戰國策、鐸氏微、虞氏春秋。而呂不韋者上觀尙古。刪入春秋。集六國時書爲八覽、六論、十二紀。爲呂氏春秋。始錯綜諸家。變古編年法。至司馬遷因呂氏春秋法。推本詩書。據左氏國語。采世本戰國策。述漢楚春秋。上記軒轅。下訖天漢。著十二本紀、十表、八書、三十世家、七十列傳。謂之史記。有序有論。有自序。有序傳。馳騁上下。數千載。分散數十百家。其體甚大。六經以來所未有也。其後班固因遷之制。斷自漢元。迄于王莽。作西京書。縝密精覈。法制益備。遷之書

始於父談而成於遷固之書。始於父彪而成於固其事。則身所聞見其發凡起例皆出家學。於是卓然爲宗匠。後世國史之制皆本乎是矣。

碑者。褒述功烈。夸示天下後世。自期於不朽之文也。夫史官記注。謂之實錄。不虛美。不隱惡。功過並載。至其殊勛異烈。各當其時。書旂常。著鐘鼎。昭示後世。傳之子孫。則義存勸戒。非直爲稱美也。故聖德之帝。莫如堯舜。功烈之王。莫如禹湯。勛在王室。莫如伊周。教垂萬世。莫如孔孟。而無頌功述德之文。謂之碑者。按祭義。祭之日。君牽牲。肉袒。卿大夫序從。既入廟門。麗於碑。雜記謂豐廟之制。宰夫北面於碑南。東上。喪大記。謂君葬。用輜四綽二碑。大夫葬。用輜二綽二碑。皆植石如柱。鑿孔於端。以繫牲繫棺爾。碑者。悲也。麗。牲之際。覩其宗廟。悲其親之亡也。繫棺之際。覩其封瘞。悲其親之不復見也。以是名石。故謂之碑。碑之名。昉此。祭則或書年月。葬則或書姓名。非特爲文而頌德紀功也。始皇并天下。丞相斯以善書能□□□導修。每巡幸輒從。東行郡縣。上鄒嶧山。立石頌功。□□□頌功始此。於是封泰山。至山顛。立石頌德。南登琅邪。作琅邪臺。立石頌德。以明得意。登之朶。刻石頌功。上會稽。刻石頌德。諛辭誣文。增穢名山。幾徧天下。漢興以來。自天子三公。九卿。將相。郡國守相。師儒。博士。太學諸生。處士。烈女。義夫。節婦。凡異政茂行。皆著文刻麗性之碑。則漸爲宗廟。神廟。家廟等制。縣棺之碑。則漸爲神道。墓表。墓誌等制。其碑猶存古制。鑿孔其端。東漢之際。其文益盛。故漢碑多見陽嘉元嘉之間。原注。陽嘉。順帝年。元嘉。桓帝年。崔蔡之作。靈帝時。至書六經爲三體。

刻之石碑。鍾繇、梁鵠相繼而出。曹丕之篡。大書深刻於受禪壇。而豐碑數丈。漢碑至是極矣。然而先秦二漢。文辭簡質。其事則凡而不目。銘詩尤爲高古。魏晉而下。諛臣媚子。夸吏侈孫。匿其暴露雜穢之過。揚其纖悉溢美之功。爲之文者。褒大稱推。立論序述。則體夫詩書史漢之序。述其事業。則備夫春秋紀傳之法。其終篇銘詩。則用夫雅頌箴贊之體。或磨宏崖。或墜深淵。或配諸海嶽之靈。或並諸淫昏之鬼。矯誣之弊。蓋不可勝言矣。

墓碑。墓前之道。神遊之道也。碑於是則謂之神道碑。古之葬者。墓而不墳。因留縣棺之石。表其墓之所在。謂不可弗識也。其後既封爲墳。仍立石爲表。王與諸侯遂爲石闕。而楚謂之室。皇漢以來。王公大臣亦有闕。仍立石表。石儀。天祿。辟邪之類。謂之墳皇。其勒文于表者。謂之墓表。表著也。著其人之事也。勒文墓側。不當神道。制小文約。謂之墓銘。銘名也。著其人之名也。其制又小。其文又約。謂之墓碣。碣揭也。揭揚其行也。勒文於石。納之壙中。謂之墓誌。又謂之墓誌銘。志其人之事於墓中也。皆有序有事。有詩碑之制也。

誄者。哀死而累其行以定諡之文也。自周有之。按周官大師。大喪帥瞽而厥作匱。原注。與。極同。諡。鄭元謂厥

陳也。以瞽史知天道。使其其事。言王之誄。諡成於天道也。太祝作六辭。六曰誄。太史大喪遺之日。讀誄。小史卿大夫之喪。賜諡讀誄。蓋天子之諡。至尊之行。非臣子所敢議。故使瞽史以天道累其行。而爲誄以定諡。其諸侯卿大夫皆有司稱王命。錄其行以爲誄。以定諡。及其遣則賜諡讀誄。故記曰。少不誄長。卑不誄。

尊惟天子稱天以誅之。然不見其全文。惟左氏稱於孔子卒見哀公誅一章。不累其行。特哀之之辭也。漢以來天子有謚冊。王公大臣則太常有謚議。魏晉而下始有誅文。有序有事。盛爲辭章。勒石於墓。亦與碑等矣。

銘者名也。著於文辭。刻之金石。表見其名也。由器物則因以示戒。由義理則因以垂訓。由事業則因以昭

德。揚雄謂銘哉銘哉。有意於慎也。故黃帝命孔甲書盤。孟中以爲戒法。而禹有讒鼎之銘。湯有盤銘。至周

而門屏階席冠冕衣履。几杖弓劍。觚牘。盃原注音和。敦原注徒。權衡度量。莫不有銘。皆警戒自修之文也。

秦漢而下。夸毗示侈。不因器以爲戒。不垂訓而昭德。墮嵯峨。伐琬剡。封泰山。勒燕然。原注漢書上封泰山禪梁父。封廣文二尺。高

九尺。其下有則玉牒書。後漢書竇憲懼誅。自求擊匈奴。大破單于。登燕然山。令班固作銘。刻石立碑。紀漢威德。有序有事。有銘有詩。大或數千次。或數百。制與碑

等矣。

符命之說。古不經見。皆後世迂儒俗士。賊臣篡子。獻諛逢惡。以爲篡竊之資者所作也。六經所載。如河出

圖。雒出書。鳳凰來儀。百獸率舞。麟趾騶虞。帝武元鳥。獲麟等。皆據事而書。非推天引神。而以爲符也。如麟

鳳龜龍謂之四靈。及天降膏露。地出醴泉。山出器車。河出馬圖等。皆秦漢諸儒附會之說。非聖人之意也。

至司馬遷爲史記。始載赤烏白魚。赤帝子白帝子之事。以爲有天下之徵。又特爲封禪一書。從史神怪。而

董仲舒對策。遂言三代受命之符。於是司馬相如爲封禪文。原注史記長卿病甚。帝使所忠往求其書。及至長卿已卒。其妻曰。長卿未死時。爲一卷書曰。有使

來求書。奏之。其遺札書言封禪。原注。李充翰林論揚子論秦之劇。稱新揚雄作劇秦美新。原注。李充翰林論揚子論秦之劇。稱新而班固爲典引。原注。蔡
事。所忠奏之。帝遂議封禪。揚雄作劇秦美新。原注。李充翰林論揚子論秦之劇。稱新而班固爲典引。原注。蔡
亂曰。典引者。篇名也。典者。常也。法也。引者。伸也。長也。尙書疏堯之常法。謂之堯典。漢紹其緒。伸而長之也。原注。蔡 闕衍侈大。推美功德。以爲符命。新莽盜漢。而讖緯
之術興矣。

頌者。稱美之辭。不歌而誦謂之賦。既誦而歌謂之頌。又頌者容也。形容其美也。本詩之一義。故大序曰。頌者美盛德之形容。以其成功告於神明者也。然未命篇爲文。至離騷楚辭而有橘頌。漢王褒爲聖主得賢
臣頌。揚雄爲趙充國頌。其後亦有序有頌。其銘詩爲頌。與碑等矣。

箴者。刺譏勸戒之文也。自古有之。于魏絳對晉侯。始見虞人箴一篇。其文似詩而簡婉高雅。至漢成帝時
揚雄依虞箴作十二州箴。二十五官箴。亡失九篇。後漢崔駰。駰子瑗。瑗子實。補其闕。及臨邑侯劉駰。太傅
胡廣。各有所增。凡四十八篇。廣乃署之曰百官箴。自是凡臣子進規於上。皆有箴矣。

贊者。叶相輔成之名。孔子作易大傳而謂之贊。未特名篇以爲文也。至班固作漢書。于紀傳後如司馬遷
立論而謂之贊。實則論也。其序傳則謂之述贊。始叶韻如詩銘。及范氏作後漢書。既立論。復特爲贊。體制
始定矣。其後復加之序。有事有贊。亦與碑等矣。

記。凡志之典籍者皆是也。故易。記理之書也。書。記辭之書也。詩。記聲之書也。春秋。記事之書也。四經。萬世
之大記也。而不以記爲名。孔子沒。諸弟子及秦漢諸儒。各爲記錄。如禮記。樂記。雜記。學記。表記。坊記。秦記。

史記皆記注於四經之後。而以爲名。然未特命篇爲文也。魏晉而下。自史氏記錄外。凡志一事。皆特爲文。有序有事。亦有爲銘詩者。皆刻之石。亦與碑等矣。

雜文。雜於四經之間。而其體不一。如祭文、弔文、移文、紀錄、傳志。卽事爲文。隨命題者皆是也。

右四類其別五十有八。皆戰國秦漢以來文章體制。原於四經。而滋蔓於四經之後。所以爲文章學。後世之制也。雖其義理不醇。辭氣寢衰。不逮夫古。然自今視之。又不逮漢魏遠甚矣。故三代之文。至於六經語孟。後世之文。至於先秦漢魏。雖原遠未分。皆規矩準繩大匠也。故備錄其制。推本所自。與其所以弊而下者云。

續後漢書卷第六十六上下

列傳第六十三上下

文藝

漢

崔實

從兄烈
烈子鈞

蔡邕

禰衡

應劭

謹案崔實傳文闕止存議蔡邕傳亦闕

議曰實父子三世挾藻摛秀並擅才美爲儒林文宗蔡邕繼之並加雋偉於是東京之文比隆西漢桓靈之季號稱崔蔡實著論以爲漢政衰微皇綱不振當嚴刑峻法攻以藥石興滯補弊之說非治體之常也宋司馬光曰漢家之法已嚴矣而實猶病其寬何哉蓋衰世之君率多柔懦凡愚之佐惟知姑息是以權幸之臣有罪不坐豪猾之民犯法不誅仁恩所施止於目前姦宄得志綱紀不立故實之論以矯一時之枉非百世之通義也孔子曰政寬則民慢慢則糾之以猛猛則民殘殘則施之以寬寬以濟猛猛以濟寬政是以和斯不易之常道也

禰衡字正平原般人也少有才辯而氣尙剛傲好矯時慢物興平中避難荊州建安初來遊許下始達

穎川陰懷一刺。既而無所之適。至於刺字漫滅。是時許都新建。賢士大夫四方來集。或問衡曰。盍從陳長

文司馬伯達乎。對曰。吾焉能從屠沽兒邪。又問荀文若。趙稚長云何。衡曰。文若可惜。面弔喪。稚長可使監

廚。請客。原注。典略。衡見荀容儀。但有貌爾。故惟善魯國孔融及宏。農楊修。常稱曰。大兒孔文舉。小兒楊德祖。

餘子碌碌。莫足數也。融亦深愛其才。衡始弱冠。而融年四十。遂與交友。上疏薦之曰。臣聞洪水橫流。帝思

俾乂。旁求四方。以招賢俊。昔孝武繼統。將宏祖業。疇咨熙載。羣士響臻。陛下睿聖。纂承基緒。遭遇屢運。勞

謙日昃。惟岳降神。異人並出。竊見處士平原禰衡。年二十四。字正平。淑質貞亮。英才卓犖。初涉藝文。升堂

觀奧。目所一見。輒誦於口。耳所警聞。不忘於心。性與道合。思若有神。宏羊潛計。安世默識。以衡準之。誠不

足怪。原注。漢書。桑安羊。雒陽賈人。以心計年十二為侍中。張安世為郎。上幸河東。忠果正直。志懷雪霜。見善若

驚。疾惡如讎。任座抗行。史魚厲節。殆無以過也。原注。呂氏春秋。魏文侯使樂羊伐中山。克之。以封其子擊。文

也。君得中山。不以封君之弟。而以封君之子。何為仁君。文侯怒。任座趨出。次問翟璜。對曰。仁君。文侯

曰。何以知之。對曰。臣聞君仁則臣直。嚮者任座之言直。臣是以知之。文侯悅。召任座而反之。以為上客。驚鳥累

百。不如一鶚。使衡立朝。必有可觀。飛辯騁辭。溢氣盈涌。解疑釋結。臨敵有餘。昔賈誼求試。屬國詭係。單于

終軍。欲以長纓。牽致勁越。弱冠慷慨。前世美之。近日路粹。嚴象。亦用異才。擢拜臺郎。衡宜與為比。如得龍

躍天衢。振翼雲漢。揚聲紫微。垂光虹蜺。足以昭近署之多士。增四門之穆穆。鈞天廣樂。必有奇麗之觀。原注

帝所甚樂。與百神遊於鈞天。廣樂九奏。其聲動心。

史記趙簡子疾。五日不知人。及寤。語大夫曰。我之帝室皇居。必蓄非常之寶。若衡等輩。不可多得。激楚陽

阿至妙之容臺牧者之所貪飛兔腰囊原注：呂氏春秋。飛兔腰囊。古駿馬也。絕足奔放。良樂之所急。臣等區區。敢不以聞。融

既愛衡才。稱述於曹操。欲見之。而衡素相輕疾。自稱狂病不肯往。而數有恚言。操懷忿。而以其才名。不欲

殺之。聞衡善擊鼓。乃召為鼓史。因大會賓客。閱試音節。諸史過者。皆令脫其故衣。更著岑牟單綬之服。原注

文士傳。魏太祖欲辱衡。乃令人錄用為鼓史。後至八月朝。普天閱試鼓節。作三重閣。列坐賓客。以帛絹制作衣。一岑牟一單綬及小褌。岑牟鼓角土冑也。次至衡。衡方為漁陽參搗。蹀躞而前。

原注。文士傳。衡擊鼓作漁陽參搗。蹋地來前。攝服足脚。容態不常。鼓聲甚悲。易衣畢。復擊鼓參搗而去。至今有漁陽參搗。自衡始也。李賢曰。案參搗。並擊鼓之法。而王僧儒詩云。散度廣陵音。參寫漁陽曲。而於其詩自音云。參

音七紺反。後語文人多同用之。據此詩意。則參曲義之名。則搗字入於下句。全不成文。下容態有異。聲節悲壯。聽

者莫不慷慨。衡進至操前而止。吏訶之曰。鼓史何不改裝而敢輕進乎。衡曰。諾。於是先解袒衣。次釋餘服。

裸身而立。徐取岑牟單綬而著之。畢復參搗而去。顏色不怍。操笑曰。本欲辱衡。衡反辱孤。孔融退而數之。

曰。正平大雅固當爾邪。因宣操意。衡許往。融復見操說衡狂疾。今求得自謝。操喜。敕門者有客便通。待之

極晏。衡乃著布衣疏巾。手持三尺棨杖。原注。許慎說文。棨杖也。坐大營門。以杖捶地大罵。吏曰。外有狂生。坐於營門。

言語悖逆。請收案罪。操怒謂融曰。禰衡豎子。孤殺之猶雀鼠爾。顧此人素有虛名。遠近將謂孤不能容之。

今送與劉表。視當何如。於是遣人騎送之。臨發。衆人為之祖道。先供設於城南。乃更相戒曰。禰衡悖虐無

禮。今因其後到。咸當以不起折之也。及衡至。衆人莫肯與衡坐。而大號。衆問其故。衡曰。坐者為冢。臥者為

屍。屍冢之間。能不悲乎。劉表及荊州士大夫先服其才名。甚禮之。文章言議。非衡不定。表嘗與諸文人共

草章奏。並極其才思。時衡出。還見之。開省未周。因毀以抵地。表慙然爲駭。衡乃從求筆札。須臾立成。辭義可觀。表大悅。益重之。後復侮慢於表。表恥不能容。以江夏太守黃祖性急。故送衡與之。祖亦善待焉。衡爲作書記。輕重疏密。各得體宜。祖持其手曰。處士。此正得祖意。如祖腹中之所欲言也。祖長子射。原注音亦。爲章陵太守。尤善於衡。嘗與俱遊。共讀蔡邕所作碑文。射愛其辭。還恨不繕寫。衡曰。吾雖一覽。猶能識之。惟其中石缺二字爲不明爾。因書出之。射馳使寫碑還校。如衡所書。莫不歎伏。射時大會賓客。人有獻鸚鵡者。射舉卮於衡曰。今日無以娛賓。而此鳥自遠而至。明慧聰善。羽族之可貴。願先生賦之。衡攬筆而作。筆不停綴。文不加點。辭采甚麗。其辭曰。惟西域之靈鳥兮。挺自然之奇姿。體金精之妙質兮。合火德之明輝。性辯慧而能言兮。才聰明以識機。故其嬉遊高峻。棲峙幽深。飛不妄集。翔必擇林。紺趾丹背。綠衣翠衿。采采麗容。咬咬好音。雖同族於羽毛。固殊智而異心。配鸞鳳而等美焉。比德於衆禽。於是羨芳聲之遠暢。偉靈表之可嘉。命虞人於隴坻。詔伯益於流沙。跨崑崙而播弋。冠雲霓而張羅。雖網維之備設。終一日之所加。且其容止閒暇。守植安停。逼之不懈。撫之不驚。寧順從以遠害。不違迂以喪生。故獻全者受賞。而傷肌者被刑。爾乃歸窮委命。離羣喪侶。閉以雕籠。翦其翅羽。流飄萬里。崎嶇重阻。踰岷越障。載罹寒暑。女辭家而適人。臣出身而事主。彼賢哲之逢患。猶棲遲以羈旅。矧禽鳥之微物。能馴擾以安處。眷西路而長懷。望故鄉而延佇。忖陋體之腥臊。亦何勞於鼎俎。嗟祿命之衰薄。奚遭時之險巖。豈言語以階亂。將不密以致

危痛母子之永隔。哀伉儷之生離。匪餘年之足惜。惑衆雖之無知。背蠻夷之下國。待君子之光儀。懼名實之不副。恥才能之無奇。羨西都之沃壤。識苦樂之異宜。懷代越之悠思。故每言而稱斯。若乃少昊司辰。靡收整轡。嚴霜初降。涼風蕭瑟。長吟遠慕。哀鳴感類。音聲悽以激揚。容貌慘以顛頓。聞之者悲傷。見之者隕淚。放臣爲之屢歎。棄妻爲之歔歔。感平生之游處。若墮籠之相須。何今日之兩絕。若胡越之異區。順籠檻以俯仰。闕戶牖以踟躕。想崑山之高嶽。思鄧林之扶疏。顧六嗣之殘毀。雖奮迅其焉如。心懷歸而弗果。徒怨毒于一隅。苟竭心于所事。敢背惠而忘初。託輕鄙之微命。委陋賤之薄軀。期守死以報德。甘盡辭以效愚。恃隆恩于既往。庶彌久而不渝。後黃祖在蒙衝船上。大會賓客。而衡言不遜。祖慙訶之。衡熟視曰。死公云等道。祖大怒。令五百將出欲加箠。衡方大罵。祖恚。遂令殺之。祖主簿素疾衡。卽時殺焉。射徒跳來救。不及。祖亦悔之。乃厚加棺斂。時年二十六。其文章多亡云。原注。傅子曰。衡辯於言而刻於論。見荊州牧劉表。日所而論表左右不廢繩墨。于是左右因形而譖曰。衡稱將軍之仁。西伯不過也。惟以爲不能斷。終不濟者。必由此也。是言實指表智短而非衡所言也。表不詳察。遂疏衡而逐之。衡以交絕于表。智窮於黃祖。身死名滅。爲天下笑者。在譖之者有形也。

謹案。目錄此下有應劭傳。今闕。

議曰。君子之道。出與處二者而已。苟不當其可。則禍其自取也。方董卓羸兒。廢立劫遷。虐焰烈烈。不可嚮邇。能以義撲滅。唏清王風。載正皇輿。矯焉而出可也。不然。雖庸夫細民。亟走懼及之。不暇。豈可受其辟召。

從而事之乎。蔡邕鴻儒碩學，藝能兼綜，爲一代文宗。宦豎忌忤，竄極幽裔。嬰鉗胃纆，琅璫轉徙。及幸而免，亡命江湖，積有年所。天時人事，亦自知矣。天地閉，賢人隱，確乎其不可拔。邕之事也。聞卓召命，不以死拒。翹然而起，三日之間，周歷三臺，矢謀承策，盡以所學事卓。勸以伊周之事，且爲鼓琴。自同俳優，則亦劉歆嚴尤之於新莽也。欲免得乎。卓未就誅，允固睥睨切齒於邕矣。是以竊歎之際，必殺而不貸也。子長謗書等語，特以爲辭爾。匱玉而汗血肉，麗錦而藉蛇虺，惜哉！衡恃才傲物，辱操忤祖，隕身喪元，自取之也。應氏七世才聞，劭采章尤著，淹洽典故，終漢文獻，可謂博物君子矣。

續後漢書卷第六十六中上

列傳第六十三中上

文藝

漢

荀悅 仲長統 陳壽

謹案荀悅、仲長統二傳文闕，止存議。

議曰：仲豫公理立言論政，深知治體，不當文景明章之盛，而奔走於曹袁之間，終以不用，惜哉！仲豫之漢紀，其論辯精當，高出遷固，盡變史法，真奇才也。公理之論井田肉刑，有意乎三代之治矣。謂光武矯枉太過，不任三公，政歸臺閣，曩者任之重而責之輕，今也任之輕而責之重，東漢之膏肓也。不任三公，故大臣無權，政柄下移，故竊於宦戚，天子不能總攬，大臣不能有爲，王室遂卑，底於亡滅，光武基之也。議者謂其當專用一相，委任責成，以爲餌操，嗚呼！是六官冢宰之義，三代任相之道也。光武昧其統體，隘高皇之規模，不舉大綱而張衆目，所以不能如西漢之可繼而復興也。以是致譏過矣。

陳壽字承祚，巴西安漢人也。少好學，師事同郡譙周。延熙末爲觀閣令史。宦人黃皓專弄朝柄，大臣皆曲

意附之。壽獨不為之屈。由是被黜。遭父喪。有疾。使婢劑藥。謹案。晉書作丸藥。客往見之。鄉鄙以為貶。漢亡。以是沈

滯累年。司空張華愛其才。以壽雖不遠嫌。原情不至貶廢。舉為孝廉。除佐著作郎。出補陽平令。譔丞相諸

葛亮集奏之。除著作郎。領本郡中正。譔魏蜀吳三國志。凡六十五篇。時人稱其善敘事。有良史才。夏侯湛

時著魏書。見壽所作。便壞已書。張華深善之。謂壽曰。當以晉書相付爾。初丁儀丁廙有盛名於魏。壽謂其

子曰。可覓千斛米見與。當為尊公作佳傳。不與。竟不為立傳。謹案。晉書本傳作或云丁儀丁廙有盛名云云。考陳

粲傳。丁氏兄弟本無事蹟可述。如粲傳末云。自穎川郡鄆淳。繁欽。陳留路粹。沛國丁儀。丁廙。宏農楊修。河內荀綽等亦有文采。而不在七人之列。然七人皆不立專傳。豈亦有所寬乎。故史存或云兩字有關疑之意。而此書刪去。則直以此罪壽矣。蓋經本不滿壽書。故貴備尤甚也。壽父為馬謖參軍。謖為諸葛亮所誅。壽父亦坐髡。壽嘗為諸葛瞻門下書佐。被撻百

下。故為亮傳。謂亮將略非長。無應敵之才。言瞻惟工書。名過其實。議者以此少之。華將舉壽為中書郎。荀

勗忌華而疾壽。遂諷吏部。徙壽為長廣太守。以母老不就。杜預將之鎮。復薦於帝。宜補黃散。由是以為治

書侍御史。母憂去職。母遺言令葬雒陽。壽遵其志。又坐不以母歸葬。復被貶議。出為平陽侯相。初譙周嘗

謂壽曰。卿必以才學成名。當被損折。亦非不幸也。宜深慎之。壽至此再致廢辱。皆如周言。後數歲起為太

子中庶子。未拜。元康七年病卒。年六十五。梁州大中正尚書郎范頴等上表曰。昔漢武帝詔曰。司馬相如

病甚。可遣悉取其書。使者得其遺書。言封禪事。天子異焉。臣等按故治書侍御史陳壽作三國志。辭多勸

誠。明乎得失。有益風化。雖文豔不若相如。而質直過之。願垂采錄。於是詔下河南尹雒陽令就家寫其書。

誠。明乎得失。有益風化。雖文豔不若相如。而質直過之。願垂采錄。於是詔下河南尹雒陽令就家寫其書。

壽又譏古國志五十篇益都耆舊傳十篇餘文章傳於世。

原注。北史。毛修之以軍功遷特進撫軍大將。軍位次

與共論說之。次及陳壽三國志云。有古良史風。其所著述。文義典正。班史以來。無及壽者。修之曰。昔在蜀中聞長老言。壽曾爲諸葛門下書佐。得達百下。故其論武侯云。應變非其所長。浩乃與論曰。承祚之評亮。乃有故義過美之譽。非挾恨之言。夫亮之相蜀。英雄奮發之時。君臣相得。魚水爲喻。而不能與曹氏爭天下。委襄荊州。退入巴蜀。守窮崎。驅之地。僭號邊夷之間。此策之下者。可以趙化爲偶。而以爲管蕭之亞匹。不亦過乎。且亮既據蜀。弗量勢力。嚴威切法。控勒蜀人。欲以邊夷之衆。抗衡上國。出兵隴右。再攻祁山。一攻陳倉。疏遲失會。摧麟而反。後入秦川。更求野戰。魏人知其意。以不戰屈之。智窮勢盡。發病而死。由是言之。豈合古之善將見可知難乎。修之謂浩言爲然。孔明比擬得失。又重毀詆。可謂小人而無忌憚者也。卒許暴虜。殺身赤族。宜哉。

議曰三史亞六經。法制備矣。壽爲國志序事典。贍評論卓然。足以繼其後也。末帝之世。國不置史。記注無官。非壽書所睹。記昭烈之偉蹟。孔明之盛心。後世不可得聞矣。則壽於漢季不爲無功。但其以晉承魏。壽仕晉。依違從諛。失其統紀。於昭烈孔明。增塵飾玷。而推獎操懿。故遺萬世之惡。而行道之人。弗是焉。且其尙典質。崇簡壯。志其大而舍其細。故多疏略。不能完史而傳信於後也。

續後漢書卷第六十六中下

列傳第六十三中下

文藝

魏

潘勗孫尼族子岳

路粹

潘勗字元茂，滎陽中牟人也。初名芝，後更勗。歷宰守，有政蹟，入為尚書郎，遷右丞，專典辭命，雅善清奧，甚得綸綍體。曹操公九錫文，勗所作也。謹案：殷云：小說曰：魏國初建，潘勗為策命文，勗亡，後或疑是王仲宣謂之曰：尊君作封魏公策，高妙信不可及。吾曾聞仲宣亦以為不如。朝廷之士乃知勗作也。建安二十年，遷東海相，未行，留拜尚書左丞。其年病卒。勗子滿，平原太守，亦以學術稱。滿子尼，字正叔，少有清才，文辭溫雅，有勗風。及從父岳，俱以文章擅名一世。與陸機兄弟號稱潘陸。嘗贈機詩，機答之曰：猶與潘生世篤其操，仰儀前文。丕隆祖考，晉太康中舉秀才，為太常博士，出為高陸令。淮南王允鎮東參軍，元康初，拜太子舍人，上釋奠頌，復出為宛令，入補尚書郎。轉著作郎，奏乘輿箴。趙王倫之亂，稱疾取假，拜掃墳墓。齊王冏起義，引為參軍，管記室。倫誅，以功封安昌公。歷黃門侍郎，散騎常侍，侍中，祕書監。永興末，為中書令，當三王兵爭，尼從容顯要，無所附比，故免於難。永嘉

則有錫能敵王所愾而獻其功。則有錫。原注。左氏傳。諸侯敵王所愾而獻其功。王於是乎賜之。彤弓一。彤矢百。旅弓矢千。以覺報宴。愾。音概。故詩曰。君子來朝。何錫予之。雖無予之。輅車乘馬。又何予之。玄衮及黼。原注。詩。謂諸侯朝於天子。則天子錫予之也。又曰。彤弓。受言藏之。我有嘉賓。中心貺之。原注。詩。則諸侯有功見於天子。天子錫予之也。春秋以來。諸侯不朝。事王。王亦時有錫。而見於魯者。三。莊公元年。王使榮叔來錫桓公命。文公元年。天王使毛伯來錫公命。成公八年。天子使召伯來賜公命。或死而追錫。或生而賜命。言命而不言所錫之物。按文侯之命。用賚爾。秬鬯一卣。彤弓一。彤矢百。盧弓一。盧矢百。馬四匹。則乘馬弓矢。祭酒三物爾。策命晉文公爲侯伯。則九命。作伯之制也。賜之大輅之服。戎輅之服。彤弓一。彤矢百。盧公矢千。秬鬯一卣。虎賁三百人。則車服。弓矢。祭酒。虎賁亦四物爾。命雖九而錫之四。與詩所載車服。弓矢。皆同。左氏謂王使內史過賜晉侯命。晉侯受玉。惰。則錫命又有玉也。其物又各不同。或錫車服。或錫弓矢。或錫瑞玉。或錫策命。初無定制也。韓詩外傳謂諸侯之有德。天子錫之。一錫車馬。再錫衣服。三錫虎賁。四錫樂器。五錫納陞。六錫朱戶。七錫弓矢。八錫鈇鉞。九錫秬鬯。何休注春秋公羊氏錫命。引禮緯含文嘉云。諸侯有德。當益其地。不過百里。後有功。加以九賜。進退有節。行步有度。賜以車馬。以代其步。其言成文章。行成法。則賜以衣服。以表其德。其長於教誨。內懷至仁。賜以樂則。以化其民。其居處修理。房內不泄。賜以朱戶。以明其別。其動作有禮。賜以納陞。以安其體。其勇猛勁疾。執義堅彊。賜以虎賁。以備非常。其內懷至仁。執義不傾。賜以弓矢。使得專其征。其亢揚威。

武志在宿衛。賜以鈇鉞。使得專殺。其孝慈父母。賜以鉅鬯。使之祭祀。皆如有德。則陰陽和。風雨時。四方所瞻。臣子所望。則有鉅鬯之草。景星之應已。其所錫之物。與韓詩所載同。而其殺則不同。今此文次弓矢在鈇鉞之下。則又不同也。蓋九命之制。車服。弓矢。鉅鬯。虎賁。瑞玉之錫。則周制也。如韓詩所載。禮緯所言。皆非王制。後世尊禮權臣。以資篡竊者。附會九命等制。增而爲之。是以始見於新莽。終行於曹操。爾嗚呼。錫予之義。備見於詩書春秋之際矣。成康之際。諸侯觀享。述職獻功。不過錫之車服。使之朝會。賜之弓矢。命之征伐。周室之衰。齊桓公九合諸侯。一匡天下。不過使召伯賜命。襄述而已。晉文公世世勤王。戰勝城濮。率諸侯以朝王。獻俘述職。不過叔與父策命。用平禮有加而已。原注。左氏傳。鄭伯傳王。用平禮也。杜預注。以平王享晉文侯禮。五伯桓文。爲盛。其翼戴天子。同獎王室。使東周不墜。又數百年。功烈如彼。其高齊撫故。封晉啓南陽而已。原注。左氏傳。王與之陽樊。溫原。攬茅之田。晉於是乎始啓南陽。曹操起自凡庶。託名漢相。挾天子以令諸侯。南征北伐。爲己而不爲漢。乃桓文之罪人也。將建國代漢。先以天下爲九州。遂以冀州十郡爲魏國。奄有河朔山東之地。半天下之襟帶。制漢死命矣。而後雍容漸進。蹈新莽之故迹。冊受九錫。進爵爲王。冕十有二旒。出警入蹕。建天子旌旗。置三公官。有天子之實矣。而猶名漢相。則九錫之受。篡漢之實。名爲漢相。終不踐位。欺天下後世。以僞爾。昔周桓王追錫魯公命。仲尼書於春秋曰。王使榮叔來錫桓公命。而王不稱天。以爲魯桓殺兄篡立。又不朝王。則當舉九伐之法。討而戮之。三不朝。則六師移之者也。生不能討。死又錫命。褒稱弒逆之人。是無天也。故王不稱

天則王亦不王矣。獻帝居許以來，僅守位號，自謂未知死所。至於弑母后，賊王子，翦伐漢室，幾無噍類，而不敢言，復令爲九錫之文，以之藉手，而不敢拒。雖制之在操，爲漢家一死可也。偷生而惟命是從，又可繩以春秋之法乎？士苟有志，手可斷，禪文不可草，曷之文固美矣。其節不足稱也。當无妄之世，尼岳以文筆競於一時，尼頗恬退，故幸而免。岳浮躁奔趨，朋扇逆后，相與陷害冢適，赤族其理也。閒居一賦，其拜塵之媒，秋興一賦，其附炎之心也歟。

路粹字文尉。

謹案·王粲傳注粹·陳留人。

少學於蔡邕。初平中，隨車駕至三輔。建安初，曹操以粹才高，與京兆嚴像擢

拜尙書郎，像以兼資文武，出爲揚州刺史。粹後爲軍謀祭酒，與陳琳、阮瑀等典記室。及操欲殺孔融，使粹爲奏，曲致融罪，無不惡其人而畏其筆。十九年，轉祕書令，從軍至漢中，坐違禁賤請驢，伏法。太子丕素與粹善，聞其死，爲之歎惜，及篡代，特用其子爲長史。

議曰：古者君子絕交，不出惡聲。大夫去國，不說人以無罪。大臣有坐不廉而廢者，不曰不廉，曰簠簋不飭，坐污穢，淫亂男女，亡別者，不曰汙穢，曰帷薄不修。坐罷輒不勝任者，不曰罷輒，曰下官不職。所以崇禮讓，養廉恥，絕誣染之端，杜澆訐之原。三代忠厚之政，風俗之所以美也。漢初公卿，恥言人過，至於幾至刑措，猶有三代之遺風。孝武而下，屢誅大臣，漢政寢稅，欲加之罪，爲爲之辭，謂之罪狀，辭章之臣，往往借筆代罵，李固之罪，成於馬融之手，而漢遂衰。

原注·後漢書·馬融爲梁冀作飛章誣奏李固曰·大尉李固·因公假私·依正行邪·離間近戚·自隆支黨·大行在廡·路人掩涕·固獨胡粉飾貌·極

頭弄姿。槃旋偃仰。從容治步。曾無慘怛傷悴之心。山陵未成。違矯舊政。善則稱己。過則歸君。斥逐近臣。不得侍送。作威作福。莫固之甚矣。夫子罪莫大於累父。臣惡莫深於毀君。固之過釁。事合誅辟。吳祐謂融曰。李公之罪。成於卿手。李公即誅。卿何面目見天下人乎。冀竟罔殺固。

孔融之誅出於路粹之筆而操始篡於是天下遂畏三端謂文士之筆端武士之鋒端辯士之舌端原注。見韓詩外傳。近世蘇軾作呂惠卿責辭謂作劄子今日始遇著有因漢極口稱快激成

紹聖之禍。原注。宋實錄。元祐元年。呂惠卿授建寧軍節度副使。救曰。元兇在位。民不寔居。司寇失刑。士有異論。稍正滔天之罪。永為垂世之規。某以斗筭之才。挾穿窬之智。詔事幸輔。同升廟堂。樂禍而貪功。好

兵而喜殺。以聚斂為仁義。以法律為詩書。首建青苗。次行助役。均輸之政。自同商賈。手實之禍。下及雞豚。苟可蠲

國而害民。率皆攘臂而稱首。先皇帝求賢若不及。從善如轉圜。始以帝堯之聰。姑試伯繇。終然孔子之聖。不信宰予。發其宿姦。謫之輔郡。尙疑改過。稍畀重權。復陳罔上之言。繼有陽山之貶。反覆教戒。惡心不悛。躁輕矯誣。德音猶

在。始與知己。共為欺君。喜則摩足以相驕。怒則側目以相視。連起大獄。發其私書。黨與交攻。幾半天下。茲誠狼籍

道。橫被江東。至於復用之年。始倡西戎之隙。妄出新意。變亂舊章。力引狂生之謀。馴致永洛之禍。輿言及此。流涕何

追。迨予踐阼之初。首發安邊之詔。假我號令。成汝詐謀。不圖渙汗之文。止為款賊之具。迷國不道。從古罕聞。尙寬

兩觀之誅。薄示三危之竄。章惇貶責元祐臣僚。欲得如軾者使為之辭。遂用林希希既為之。擲筆曰。壞了名

節矣。終之黨與相軋而亡。宋金源氏禽遼主天祚。降封海濱王。學士王介儒嘗為天祚黜辱。及作詔謂天

祚居位二十載。有罪數千條。舉古今君人之惡而歸之。天祚受詔於庭。仰而誓曰。夫亡人之國。罪莫大焉。

又加之罪乎。非吾所為。而數吾於朝。必爛其舌矣。未幾。介儒瘍生於頸。爛舌而死。嗚呼。醜詆安可肆。誣誑

安可為哉。之得失。未生靈獻。孰覆漢基。不祥。降封為海濱王。詔曰。歷稽往古。不無天數之廢興。斷以公言。亦緣君道

。椒蠶靈命。居位二十載。有罪數千條。訴自伊民。達于朕聽。事輿德象。人難力為。大遼皇帝耶律延禧。自絕衆心。動違常節。視之不似人君。對之終日無語言。行之當代惟亂政。權分外戚。事委宵人。峻宇巖牆。實官鬻獄。內耽女亂。日曠萬幾而弗親。外作禽荒。動浹十旬而未返。開藥鹿之囿狎於國。無山澤之利共于民。用人不啻于牛羊。有官或及於犬馬。七世之廟雖在。無祀禮之可觀。六尺之輿時乘。每弄臣之共載。加以逞淫刑于賢嫡。滋毒賦于疲氓。安忍無親

骨肉阻爲敵國。失道寡助。腹心去作仇讐。穰德外聞。醜聲遐布。獲戾天地。見怒人神。方積豐以在躬。更背隣而絕好。先皇帝志期全取。躬自徂征。仗一劍而渡江。指獨夫而數罪。民訖息肩而欣戴。物皆後望于來蘇。尙猶長惡不悛。莫知大勢已去。天靡悔禍。人同覆轍。屬秦鹿之奔迷。會軒龍之飛去。遣及渺昧。肆惟纂承。敢隳垂統之功。益謹後圖之事。再揚我武。必取斯人。知天網以難逃。詣軍門而請罪。尋敕將臣而解縛。許朝先廟以奏俘。且底怒以加誅。將何辭而以對。徒自羞而負恥。實伊戚之自貽。雖其不忍者朕心。奈何難塞者衆口。尙謂不君。矧多惡貫以兼盈。訖爲亡國。庶絕下望。用削尊名。故事若稽。新命以降。已於八月七日降封遼主爲海濱王。嗚呼。原上帝降罰之意。罪莫能容。以先廟遺命之言。恩爲見許。肆台小子。終此全功。對越靈威。降茲成命。布告遐邇。咸使聞知。

續後漢書卷第六十六下上

列傳第六十三下上

文藝

魏

王粲

陳琳

阮瑀

應瑒

劉楨

吳質

邯鄲淳

桓威

繁欽

荀緯

王粲

劉廙

孫該

蘇林

李康

謹案王粲傳文闕止存議

議曰初曹丕及弟植皆好文學與粲及孔融徐幹陳琳阮瑀應瑒劉楨相友善丕植咸有逸才奇氣往往鞍馬間橫槊賦詩至於飲至策勳讌崇臺泛清池看花佇月粲等更酬迭和適章雅詠警動一世號稱建安七子二漢質文於是一變儒學盡為詩文矣

陳琳字孔璋廣陵人也辭采傑贍大將軍何進辟為主簿進欲誅宦官太后不聽進乃召四方猛將使引兵向京師以脅太后琳入諫曰易稱卽鹿無虞原注屯卦六三爻辭諺有掩目捕雀夫微物尚不可欺以得志況國之大事其可以詐立乎今將軍總皇威握兵要龍驤虎步高下在心此猶鼓洪爐燎毛髮耳但當震發電

斷夫違經合道。天人所順。而反委釋利器。更徵外助。大兵聚會。強者爲雄。所謂倒持干戈。授人以柄。功必不成。祇爲亂階。進不聽。果敗。琳避難冀州。袁紹使典文章。嘗爲紹作書檄曹操。紹敗。琳歸操。操曰。卿昔爲本初移書。但可罪狀孤而已。惡惡止其身。何乃上及其父祖邪。琳謝罪曰。矢在弦上。不得不發。操愛其才而勿責也。乃以爲司空軍謀祭酒。管記室。軍國書檄。多琳所作也。每作書檄。成草上操。操先苦頭風。一日疾發。臥讀琳作。翕然而起曰。此能愈我病也。數加賞賜。後徙爲門下督。建安二十一年。操大舉伐孫權。琳移檄喻權。操歎其文辭之美。二十二年。琳卒。操甚惜之。

議曰。陳琳之書檄。宏麗高壯。頓挫激切。足以聳動天下。建安以來所未有也。夫文動於中。而形於言。使讀之者亦動於中。而感夫言。則可以爲文矣。故歌詠之文。必使之歡忻動蕩。而手舞足蹈。戒諭之文。必使之擊跽曲拳。服膺而感刻。弔祭之文。必使之歎歔流涕。而不能自己。檄告之文。必使之扼腕振奮。羣起而怒冠。歌詠而不能悅人。戒諭而不能服人。哀輓而不能哭人。檄告而不能怒人。則不足以爲文矣。若琳之作。所謂雷厲風蜚者也。得體制矣。然而琳初事袁紹。而爲紹檄曹操。及爲操禽。而復爲操檄孫權。君讎共主。堯桀共吠。方之袁渙之拒呂布。則其節不足稱也。

阮瑀字元瑜。陳留人也。少受學於蔡邕。著作奇敏。邕稱其能。建安中都。護曹洪欲使掌書記。瑀不爲。屈。曹操雅聞瑀名。辟之。不應。連見敦促。逃入山以避之。操命焚山。乃出。以爲司空軍謀祭酒。與陳琳管記室。使

瑀作書諭昭烈及孫權。及征馬超。使瑀作書諭韓遂。馬上具草呈操。操覽筆欲爲更定。而竟不能。徒爲倉曹掾。屬建安十七年卒。原注。文士傳。太祖雅聞瑀名。辟之。不應。連見信促。乃逃入山中。太祖使人焚山。得瑀。

遂撫琴而歌。因造歌曲曰。奕奕天門開。大魏應期運。青蓋巡九州。在西東人怨。士爲知己死。女爲悅者玩。恩義荷數。他人焉能亂。爲曲既捷。音聲殊妙。當時冠坐。太祖大悅。裴松之曰。案魚氏典略。擊虞文章志。並云瑀建安初辭病。

避役。不爲曹洪屈。得太祖召。卽投杖而起。不得有逃入山中焚之乃出之事也。又典略載太祖初征荆州。使瑀作書與劉備。及征馬超。又使瑀作書與韓遂。此二書今具存。至長安之前。遂等破走。太祖始以十六年得入關南。而張隲云。初得瑀時。太祖在長安。此又乖戾。瑀以十七年卒。太祖十八年策爲魏公。而云瑀歌舞辭稱大魏應期運。逾知其妄。又其辭云。他人焉能亂。了不成語。瑀之吐屬。必不如此。世期謂鼓琴詩曲等爲妄。以瑀之高。或不爲此。不爲世風。又不仕操。逃山之事則有之。始焉不屈。

既乃投杖。逃山之事則有之。始焉不屈。既乃投杖。逃山之事則有之。始焉不類。

應瑒。漢司空掾珣之子也。瑒有才學。且出于父祖。珠玉之淵。故尤知名於時。謹案。應瑒傳不載事實。似非全瑒。字德璉。後云被太祖辟爲丞相掾屬。轉爲平原侯庶子。後爲五官將文學。後漢書應奉傳注。

亦據魏志云。瑒字德璉。瑒弟璠。字休璉。咸以文章顯也。又云。珣子瑒。曹操辟爲丞相掾。

劉楨。字公幹。東平人也。父梁。字曼山。謹案。陳志云一名恭。少有清才。以文學稱。終野王令。楨思致高邁。敏於詞章。曹

操辟爲丞相掾屬。後爲五官將。丕文學。丕嘗賜楨廓落帶。其後工死。欲借以爲式。因書嘲楨云。夫物因人

爲貴。故在賤者之手。不御至尊之側。今雖取之。勿嫌其不反也。楨答曰。楨聞荆山之璞。曜元后之寶。隋侯

之珠。燭衆士之好。原注。淮南子。隋侯之珠。高誘注曰。隋侯見大蛇傷斷。以藥傅而塗之。後蛇於江中銜珠以報。因曰隋侯珠。南垠之金。登窈窕之首。原注。詩泮水。

鄭玄箋云。荆揚之州。貢金三品。麗貂之尾。綴侍臣之幘。原注。後漢書。侍中中常侍加黃金璫。附蟬爲文。貂尾爲飾。謂之趙惠。

滅趙。以其君冠賜近臣。此四寶者。伏朽石之下。潛汚泥之中。而光揚千載之上。發彩疇昔之外。亦皆未能初自接於

至尊也。夫尊者所服，卑者所修也。貴者所御，賤者所先也。故夏屋初成，而大匠先立其下。嘉禾始熟，農夫先嘗其粒。恨楨所帶，無他妙飾。若實殊異，尚可納也。楨辭旨巧捷，類如此。由是特爲諸公子所親愛。其後丕宴諸文學，酒酣命夫人甄氏出拜，坐中咸伏。而楨獨平視。曹操聞之，乃收楨，減死輸作刑。竟署吏。建安二十二年卒。建安七子，今自王粲至楨五人者，傳於此。孔融入死國傳。徐幹入高士傳。曹丕作典論論七子之文曰：文人相輕，自古而然。傅毅之於班固，伯仲之間爾。而固小之，與弟超書曰：武仲以能屬文，爲蘭臺令史。下筆不能自休。夫人善於自見，而文非一體，鮮能備善。是以各以所長，相輕所短。里語曰：家有弊帚，享之千金。斯不自見之患也。原注：東觀漢記曰：吳漢入蜀都，縱兵大掠。上詔讓漢曰：城降孩兒，老母口以萬數。一旦縱火放兵，聞之可爲酸鼻。家有弊帚，享之千金。尙宗室子孫，故嘗更職。

何忍行此。

今之文人，魯國孔融，文舉，廣陵陳琳，孔璋，山陽王粲，仲宣，北海徐幹，偉長，陳留阮瑀，元瑜，汝南應

瑒，德璉，東平劉楨，公幹，斯七子者，於學無所遺，於辭無所假。咸以自騁，驥驟於千里，仰齊足而並馳。以此

相服，亦良難矣。蓋君子審己以度人，故能免於斯累。而作論文，王粲長於辭賦，徐幹時有齊氣。原注：李善曰：言齊俗

文體舒緩。

然非粲之匹也。如粲之初征，登樓槐賦，征思幹之玄猿，漏卮團扇，橘賦雖張，蔡不過也。然於他文

未能稱是。琳瑀之章表書記，今之雋也。應瑒和而不壯，劉楨壯而不密，孔融體氣高妙，有過人者。然不能

持論，理不勝辭。原注：孔叢子。平原君謂公孫龍曰：公無復與孔子高辨事也。其人理勝於辭。公辭勝於理。至乎雜以嘲戲，及其所善，揚班之儔也。常人貴

遠賤近，向聲背實，又患闇於自覺，謂己爲賢。夫文本同而未異，蓋奏議宜雅，書論宜理，銘誄尙實，詩賦欲

麗此四科不同。故能之者偏也。惟通才能備其體。文以氣爲主。氣之清濁有體。不可力彊而致。譬諸音樂。曲度雖均。節奏同檢。至於引氣不齊。巧拙有數。雖在父兄。不能以移子弟。蓋文章經國之大業。不朽之盛事。年壽有時而盡。榮樂止乎其身。二者必至之常期。未若文章之無窮。是以古之作者。寄身於翰墨。見意於篇籍。不假良史之辭。不託飛馳之勢。而聲名自傳於後。故西伯幽而演易。周且顯而制禮。不以隱約而弗務。不以康樂而加思。夫然。則古人賤尺璧而重寸陰。懼乎時之過也。原注。淮南子曰。聖人不貴尺之璧而重寸之陰。時難得而易失。而人多不彊力。貧賤則懼于飢寒。富貴則流於逸樂。遂營目前之務。而遺千載之功。日月逝於上。體貌衰於下。忽然與萬物遷化。斯志士之大痛也。融等已逝。惟幹著論成一家言。原注。魚豢曰。尋者往者。魯連。鄒陽之徒。今覽王。繁。阮。陳。路諸人。前後文旨亦何有不若哉。其所以不論者。時世異耳。余又竊怪其不甚見用。以問大鴻臚卿章仲將。仲將云。仲宣傷於肥羸。休伯都無格檢。元瑜病於體弱。孔璋實自羸疏。文蔚性頗忿鷙。如是彼爲非徒以脂燭自煎。其不高蹈。蓋有由矣。然君子不責備於一人。譬之朱漆。雖無楨幹。其爲光澤亦壯觀也。

議曰。曹氏父子兄弟傑出一時。而陳思王植爲之冠。不乃不數思王。以孔融稱首。融以英偉蓋世之氣。欲指揮劉玄德撥亂世反之正。豈區區於文字之間者耶。嫉賢弟而不與。援豪傑以爲論。皆其私也。其謂文章以氣爲主。孔融氣體高妙。徐幹時有齊氣。文章有大體。無定體。氣盛則格高。格高則語妙。以氣爲主。則至論也。嗚呼。不言論固至矣。然非帝王之學也。唐虞稽古。始皆傳心。禹湯受命。亦惟立德。至高宗傳說始言學。謂數學半念終始。典於學。厥德修罔覺。故帝王之學。罔不在德。以之誠意。正心修身。齊家治國。平天

下格物以窮理。修道以立教。躬行以邁化。尙德以厚俗。致敬以閑邪。執中以馭變。畏慎以奉天。警省以謹微。自彊以建極。公溥以庇物。寬裕以畜衆。剛斷以申令。明察以照姦。慈惠以子民。恭儉以足用。左師右傅。前諫後弼。論思講肄。不過夫是。凡詩書所載。文武成康之學。今皆可按。未始爲文也。故六經無虛文。三代無文人。戰國之末。屈宋始爲文章。漢興。孝武雖有歌詩。然亦未以爲學也。至於宣、元、成、哀。皆務經術。以儒臣爲輔相。講論經理。潤色皇業。雖新莽之僞。亦誦六藝。究王制。逮乎世祖。以諸生復漢。明、章皆北面受業。三公九卿。無非經明行修之人。顧未及於二帝三王之學。亦是有用。非虛文也。至丕篡代。專以文章爲務。一時學士大夫公卿大臣。專門名家。流風波蕩。不復可遏。至宋、齊、梁、陳。如簡文、元帝、長城公輩。原注。簡文武帝子。隋平陳。封陳叔寶爲長城公。益爲浮豔。君臣宣淫。自謂風流天子。卒債社沈宗。浸淫及於隋唐。明智之君。皆喜辭章。遂以篇題取士。舉世事虛文。而爲文人不復知二漢之經術。況唐虞之學乎。皆操丕父子建安諸人啓之也。丕卒而諡之曰文。而與堯之文思、舜之文明、禹之文命、周文、漢文。並謂之文。嗚呼。果何文邪。

吳質字季重。濟陰人也。以才學通博爲五官將。丕及諸侯所禮愛。質亦善處其兄弟之間。丕之爲太子。質有力焉。及劉楨失敬。被譴。質出爲朝歌長。臨淄侯植與質書曰。前日雖因常調。得爲密坐。雖燕飲彌日。其於別遠會稀。猶不盡其勞積也。若夫觴酌凌波於前。簫管發音於後。足下鷹揚其體。鳳觀虎視。謂蕭曹不足儔。衛霍不足侔也。左顧右盼。謂若無人。豈非吾子壯志哉。過屠門而大嚼。雖不得肉。實且快意。原注。桓譚新論。

人開長安樂。則出門向西而笑。知肉味美。對屠門而大嚼。當斯之時。願舉泰山以爲肉。傾東海以爲酒。伐雲夢之竹以爲笛。斬泗濱之梓

以爲箏。食若填巨壑。飲若灌漏卮。其樂固難量。豈非大丈夫之樂哉。然日不我與。曜靈急節。而有逸景之

速。別有參商之闊。思欲抑六龍之首。頓羲和之轡。折若木之華。閉濛汜之谷。原注。王逸曰。若木在崑崙。楚辭出自暘谷。次于濛汜。天

路高邈。良無由緣。懷戀反側。如何如何。得所來訊。文采委曲。擘若春榮。瀏若清風。申詠反覆。曠若復面。其

諸賢所著文章。想還所治復申詠之也。可令熹事小吏。諷而誦之。夫文章之難。非獨今也。古之君子。猶有

病諸。家有千里驥。而不珍焉。人懷盈尺和氏而無貴矣。夫君子而不知音樂。古之達論。謂之通而蔽。墨翟

不好伎。何爲過朝歌而迴車乎。足下好伎。而正值墨翟迴車之縣。原注。漢書鄒陽上書曰。里名勝母。曾子不入。邑號朝歌。墨子迴車。想足

下助我張目也。又聞足下在彼。自有佳政。夫求而不得者有之矣。未有不求而自得者也。且改轍易行。非

良樂之御。易民而治。非楚鄭之政。原注。戰國策趙造謂趙王曰。臣聞之。聖人不易民而教。智者不變俗而動。史記楚有叔孫敖。鄭有子產。而二國俱治。是不易民也。願足下勉

之而已矣。適對嘉賓。口授不悉。往來數相聞。質答書曰。信到奉所惠貺。發函伸紙。是何文采之巨麗而慰

喻之綢繆乎。夫登東嶽者。然後知梁山之邈迤也。奉至尊者。然後知百里之卑微也。自旅旋之初。伏念五

六日。至於旬時。精散思越。惘若有失。非敢羨寵光之休。慕猗頓之富。原注。孔叢子。猗頓魯之窮士也。耕則常飢。桑則常寒。聞朱公富。往而問術焉。

朱公告之曰。子欲速富。當畜五特。於是乃適西河大畜牛羊於猗氏之南。誠以身賤犬馬。德輕鴻毛。至乃歷玄闕

十年之間。其息不可計。賈擬王公。馳名天下。與富猶氏。故曰猗頓。

排金門。升玉堂。伏虛檻於前殿。臨曲池而行觴。既威儀虧替。言辭漏泄。雖持平原。養士之懿。愧無毛遂。耀

穎之才深蒙薛公折節之禮而無馮諼三窟之效

原注。戰國策孟嘗君就國於薛。馮諼曰。狡兔有三窟。免其死爾。今君有一。未得高枕而臥也。請為君復鑿二窟。孟嘗君乃

興車五十乘。金五百斤。西遊於梁。梁惠王聘孟嘗君。齊王聞之。君臣恐懼。使太傅謝孟嘗君曰。願君願先王之宗廟。屢

姑反國統萬民。馮諼謂孟嘗君曰。請先王之祭器立宗廟於薛。廟成還報孟嘗君曰。三窟已就。請君高枕為樂矣。屢

獲信陵虛左之德。又無侯生可述之美。原注。史記。魏公子從車騎虛左自迎夷門侯生。侯生攝衣冠直載公子。上坐足矣。市人皆以贏為小人。而以公子為長者。能下士也。凡此數者。乃質之所以憤積於胸臆。懷眷而悵邑者也。若追前宴。謂之未究。欲

傾海為酒。并山為肴。伐竹雲夢。斬梓泗濱。然後極雅意。盡歡情。信公子之壯觀。非鄙人之所庶幾也。若質

之志。實在所天。思投印釋黻。朝夕侍坐。鑽仲父之遺訓。覽老氏之要言。對清醑而不酌。抑嘉肴而不享。使

西施出帷。嫫母侍側。原注。越絕書。越王乃飾美女西施。使大夫種獻之於吳王。楚辭曰。西施。醜女也。斯盛德之所蹈。明哲之

所保也。若乃近者之觀。實蕩鄙心。秦箏發徽。二八迭奏。塤簫激于華屋。靈鼓動於坐右。耳嘈嘈於無聞。情

踴躍於鞍馬。謂可北攝肅慎。使貢其楛矢。南震百越。使獻其白雉。原注。尚書大傳。交趾之南有越裳國。周公

象重九譯而獻白雉曰。道路悠遠。山川阻深。恐使之不通。故重譯而朝。成王以歸周公。公曰。德不加焉。則君子不享其賞。政不施焉。則君子不臣其人。吾何以獲此賜也。其使請曰。吾受命吾國之黃耆曰。久矣天之無烈風暴雨。意者中國有聖人乎。有則盍往朝之。周公乃又況權備。夫何足視乎。還治諷采。所著觀省英瑋。實賦頌之宗作者之

師也。衆賢所述。亦各有志。昔趙武過鄭。七子賦詩。春秋載列。以為美談。原注。左氏傳。鄭伯享趙孟於垂隴。趙孟曰。七子從君以寵武也。請皆賦

以卒君貺。武亦以觀七子之志。子展賦草蟲。伯有賦鶉之實。子西賦黍苗。質小人也。無以承命。又所答貺辭賦

之四章。子產賦隰桑。子大叔賦野有蔓草。印段賦蟋蟀。公孫段賦桑扈。

義陋申之再三。赧然汗下。此邦之人。間習辭賦。三事大夫。莫不諷誦。何但小吏之有乎。重惠苦言。訓以政

事。惻隱之恩。形乎文墨。墨子迴車。而質四年。雖無德與民。式歌且舞。儒墨不同。固以久矣。然一旅之衆。不足以揚名。步武之間。不足以聘跡。若不改轍易御。將何以效其力哉。今處此而求大功。猶絆良驥之足。而責以千里之任。檻猿猴之勢。而望其巧捷之能者也。原注。淮南子兩絆驪而求其致千里。置援檻中。則與豚同。非不巧捷也。無所以肆其技能也。不勝見恤。謹附遺白答。不敢繁辭。轉元城令。魏郡大疫。諸賢淪喪。太子不傷之。與質書曰。歲月易得。別來行復四年。三年不見東山。猶歎其遠。況乃過之。思何可支。雖書疏往返。未足解其勞結。昔年疾疫。親故多罹其災。徐陳應劉。一時俱逝。痛何可言邪。昔日遊處。行則同輿。止則接席。何嘗須臾相失。每至觴酌流行。絲竹並奏。酒酣耳熱。仰面而賦詩。當此之時。忽然不自知樂也。謂百年已分。長共相保。何圖數年之間。零落略盡。言之傷心。頃誤其遺文。都爲一集。觀其姓名。已爲鬼錄。追思昔遊。猶在心目。而此諸子。化爲糞壤。可復道哉。觀古今文人。類不護細行。鮮能以名節自立。而偉長獨懷文抱質。恬澹寡欲。有箕山之志。可謂彬彬君子矣。著中論二十餘篇。成一家之業。辭義典雅。足傳於後。此子爲不朽矣。德埤常斐。然有述作意。才學足以著書。美志不遂。良可痛惜。間歷觀諸子之文。對之拭淚。旣痛逝者。行自念也。孔璋章表殊健。微爲繁富。公幹有逸氣。但未逾爾。至其五言詩。妙絕當時。元瑜書記翩翩。致足樂也。仲宣獨自善於辭賦。惜其體弱。不足起其文。至於所善。古人無以遠過。昔伯牙絕絃於鍾期。仲尼覆醢於子路。愍知音之難遇。傷門人之莫逮也。原注。絕絃事。見前注。禮記。孔子哭子路於中庭。有人弔者。而夫子拜之。旣哭。進使者而問故。曰醢之矣。遂命覆醢。諸子但爲未及古人。自一時之雋也。今之

存者已不逮矣。後生可畏。來者難誣。然吾與足下不及見也。行年已長大。所懷萬端。時有所慮。至乃通夕不眠。何時復類昔日。已成老翁。但未白頭爾。光武言年已三十。

謹案。後漢書隗囂傳云。年垂四十。文選作年三十餘。此作年已三十。蓋沿裴注之說。

在軍十年。所更非一。吾德雖不及。年與之齊。以犬羊之質。服虎豹之文。無衆星之明。假日月之光。動見瞻觀。何時易邪。恐永不復得爲昔日游也。少壯眞當努力。年一過往。何可攀援。古人思秉燭夜遊。良有以也。頃何以自娛。頗復有所造述否。東望於邑。裁書敍心。質答箋曰。奉讀手命。追亡慮存。哀愛之隆。形於文墨。日月冉冉。歲不我與。昔侍左右。廁坐衆賢。出有微行之遊。入有管絃之歡。置酒樂飲。賦詩稱壽。自謂可終始相保。並騁材力。效節明主。何意數年之間。死喪略盡。臣獨何德。以堪久長。陳、徐、劉、應、才學所著。誠如來命。惜其不遂。可爲痛切。凡此數子。於雍容侍從。實其人也。若乃鄰境有虞。羣下鼎沸。軍書輻至。羽檄交馳。於彼諸賢。非所任也。昔者孝武之世。文章爲盛。若東方朔、枚皋之徒。不能持論。卽阮、陳之儔也。其唯嚴助、壽王與聞政事。然皆不慎其身。善謀于國。卒以敗亡。臣竊恥之。至于司馬長卿。稱疾避事。以著書爲務。則徐生庶幾焉。而今各逝。已爲異物矣。後來君子。實可畏也。伏惟所天。優游典籍之場。休息篇章之囿。發言抗論。窮理盡微。摛藻下筆。鸞龍之文奮矣。雖年齊蕭王。才實百之。此衆議所以歸高。遠近所以同聲。然年歲若墜。今質已四十二矣。白髮生鬢。所慮日深。實不復若平日之時也。但欲保身。敕行。不蹈有過之地。以爲知己之累。爾遊宴之歡。難可再遇。盛年一過。實不可追。臣幸得下愚之才。值風雲之會。時邁齒載。

原注徒

結切 猶欲觸胸奮首。展其割裂之用也。不勝慄慄。以來命備悉。故略陳至情。曹操西征。太子丕在孟津小

城。與質書曰。季重無恙。途路雖局。官守有限。願言之懷。良不可任。足下所治僻左。書問致簡。益用增勞。每

念昔日南皮之遊。誠不可忘。既妙思六經。逍遙百氏。彈棊間設。終以六博。原注。藝經。棊正彈法二人對局。白黑棊各六枚。先列棊相當。更先

控三彈。不得各去。控一棊先補角。世說。彈棊出魏宮。大體以巾角拂棊子也。高談娛心。哀箏順耳。馳騫北場。旅食南館。浮甘瓜於清泉。沈朱李於

寒水。皦日既沒。繼以朗月。同乘並載。以游後園。輿輪徐動。賓從無聲。清風夜起。悲笳微吟。樂往哀來。淒然

傷懷。余顧而言。茲樂難常。足下之徒。咸以為然。今果分別。各在一方。元瑜長逝。化為異物。每一念至。何時

可言。方今蕤賓紀辰。景風扇物。天氣和暖。衆果具繁。時駕而游。北遵河曲。從者鳴笳。以啓路。文學託乘於

後車。節同時異。物是人非。我勞如何。今遣騎到鄴。故使枉道相過。行矣自愛。不即王位。又與質書曰。南皮

之游。存者三人。烈祖龍飛。或將或侯。今惟吾子。棲遲下仕。從我游處。獨不及門。餅馨壘恥。能無懷愧。路不

云遠。今復相聞。初曹真曹休亦與質等。俱在渤海游處。時休真以宗親並受爵封。並為列將。而質故為長

史。不顧質有望。故稱二人以慰之。及不篡代。徵質至雒陽。拜振威將軍。北中郎將。封列侯。假節都督河北

諸軍事。治信都。黃初二年。召質入朝。不與質及曹休歡燕。命郭后出見質。不曰。卿諦視之。其親愛如此。五

年質復入朝。詔上將軍及特進以下皆會質所。大官供具。酒酣質復欲盡歡。時上將軍曹真肥而中領軍

朱鑠瘦。質召優使說肥瘦。真負責。恥見戲。怒謂質曰。卿欲以部曲將遇我邪。驃騎將軍曹洪。輕車將軍王

忠言將軍必欲使上將軍服肥。自宜爲瘦。真愈恚。拔刀瞋目。言俳敢輕脫。吾斬爾。遂罵坐。質按劍曰。曹子丹汝屠机上肉爾。吾吞爾不嚙喉。咀爾不搖牙。何恃而敢爾邪。鑠因起曰。陛下使吾等來樂卿爾。乃至此乎。質顧叱之曰。朱鑠敢壞坐。諸將軍皆還坐。鑠性急。忿恚。拔劍斫地。遂皆罷去。其恃勢驕豪如此。原注。質別傳。

文帝崩。質思慕作詩曰。愴愴鬪股憂。殷憂不可居。徒倚不能坐。出入步踟躕。念蒙聖主恩。榮爵與衆殊。自謂永終身。志氣甫當舒。何以中見棄。棄我歸黃墟。覺覺靡所恃。淚下如連珠。隨沒無所益。身死名不書。慷慨自憫傷。庶幾烈文。太和四年入爲侍中。時司空陳羣錄尙書事。質以輔弼大臣安危之本。盛稱驃騎將軍司馬懿忠智

至公。社稷之臣也。陳羣從容之士。處重任而不視事。非國相之才。叡深納之。其年夏。質卒。始質爲單家。遨遊貴戚間。不爲鄉里所重。雖出官本國。猶不齒士列。太和中入朝。質自以不爲本郡所饒。謂司徒董昭曰。我欲溺鄉里爾。昭曰。君且止。我年八十。不能爲溺攢也。及卒。有司以質怙威肆行。諡曰醜侯。質子應。仍上書論枉。正元中。乃改諡威侯。自質及潁川邯鄲淳。繁欽。原注。繁音婆。沛國丁儀。丁廙。宏農楊修。河內荀緯。王

象。下邳桓威。天水薛夏等。皆有文采。而不在七子之列。應瑒弟璩。璩子貞。阮瑀子籍。譙郡嵇康。咸以文章顯。儀。廙。修。籍。康。皆自有傳。邯鄲淳一名竺。字子叔。博學有文章。又善蒼雅蟲篆。許氏字指。初平中。從三輔客荊州。操聞其名。召與相見。甚敬異之。時五官將丕博延英賢。亦宿聞淳名。因啓淳欲使在文學官屬中。會臨淄侯植亦求淳。操遣淳詣植。植具酒炙。論文談兵。及當世之務。縱橫無窮。淳出歎植之才。謂爲天人。原注。魏略太祖遣淳詣植。植初得淳甚喜。延入坐。不先與談。時天暑熱。植因呼常從取水自澡訖。傳粉。遂科頭拍袒。胡舞。五椎鉞跳丸。擊劍。誦俳優小說數千言。訖。謂淳曰。邯鄲生何如耶。於是乃更著衣幘。整儀容。與淳評說混元造

化之端。品物區別之意。然後論議皇以來賢聖名臣烈士優劣之其次。誦今古文章賦誄。及當官政事宜所先後。及於時論用武行兵倚伏之勢。乃命府宰酒炙交至。坐席默然。無與侑者。及暮。淳歸。對其所知歎植之才。謂之天人。於時

世子未立。操俄有意於植。而淳屢稱植才由是。丕頗不悅。及篡代。以淳為博士。給事中。淳作投壺賦千餘

言奏之。丕以為工。賜帛千匹。尋卒。繁欽字休伯。潁川人。以文才機辯少得名於汝潁間。欽長於書記。又善

詩賦。為丞相主簿。建安二十三年卒。原注。文帝集序。上西征。余守譙。繁欽從。時薛訪車子能喉轉與笛同音。欽。賤選與余而盛歎之。雖過其實。而其文甚麗。正月八日壬寅。領主簿繁欽死。

罪。近屢秦賤。不足自宜。頃諸鼓次。廣求異技。時都尉薛訪車之子。年始十四。能喉轉引聲。與笛同音。自上早見。果如其言。即日共觀試。乃知天壤之所生。誠有自然之妙物也。潛氣內轉。哀音外激。大不抗越。細不幽散。聲悲奮。曲美常均。及與黃門鼓吹。溫胡洗唱迭和。喉所發音。無不響應。曲折沈浮。尋變入節。自初早試。中間二句。胡欲

傲其所不知。尚之以一曲。巧竭意匱。既已不能。而此孺子遺聲抑揚。不可勝窮。優游轉化。餘弄未盡。覺其清激悲吟。難以怨慕。咏北狄之遐征。奏胡馬之長嘶。懷入肝脾。哀感頑豔。是時日在西隅。涼風拂衽。背山臨溪。流泉東逝。竊

惟聖體兼愛好奇。是以因賤先自委曲。伏想御聞。必含餘歡。冀事速訖。旋待光塵。寓目庭階。與聽斯調。喜宴之樂。蓋亦無量。欽死罪死罪。案曰錄此下有荀緯傳。今闕。王象字義伯。少為同郡楊

俊所知。拔及長。有才學志節。建安中與荀緯等俱為太子丕禮待。及王粲陳琳阮瑀路粹等亡後。新出之

中。惟象才最高。丕既篡代。拜散騎侍郎。遷常侍。封列侯。受詔譟皇覽。使象領祕書監。自延康元年始譟。集

數歲成。藏於祕府。合八百餘萬言。象既性氣和厚。又文彩溫雅。用是京師歸美。稱為儒宗。丕如宛。詔百官

不得干預郡縣。及到而宛令不解詔旨。閉市門。丕大怒曰。吾為寇邪。乃收宛令及太守楊俊。詔問尙書漢

明帝殺二千石幾人。象見詔文。知俊不免。乃當丕前叩頭流血被面。請俊減死一等。丕不答。欲入禁中。象

引丕衣。丕顧謂象曰。朕知楊俊與卿本末。爾今聽卿是無朕也。卿寧無俊也。無朕邪。象見丕言切。縮手。丕

引丕衣。丕顧謂象曰。朕知楊俊與卿本末。爾今聽卿是無朕也。卿寧無俊也。無朕邪。象見丕言切。縮手。丕

遂入決俊法然後出象自恨不能濟俊遂發病卒

謹案目錄此下有桓威傳今闕

薛夏字宣聲博學多才善屬文天水

故有姜閭任趙四姓雄望郡中而夏單家不爲降屈四姓欲共治之夏乃逸去東詣雒陽曹操宿聞其名

甚禮遇之後四姓又使囚遙引夏關移潁川收捕繫獄時操在冀州撫掌曰夏無罪也漢陽兒輩直欲殺

之爾乃告潁川使理出之召署軍謀掾曹丕嘉其才黃初中遷祕書丞丕每與夏推論書傳不斥其名謂

之薛君夏甚貧不顧其衣薄解所御袍賜之其後征東將軍曹休來朝丕方與夏有所咨論而外啓休到

不引入坐定顧夏言之於休曰此祕書丞天水薛宣聲也宜共談論其見遇如此太和中嘗以公事移蘭

臺蘭臺自以臺也而祕書署爾謂夏爲不得移推使當有坐者夏報之曰蘭臺爲外臺祕書爲內閣臺閣

一也何不相移之有蘭臺屈無以折自是之後遂以爲常及卒敕其子無還天水

謹案大典續後漢散條有薛夏傳而目錄無之此

書吳質傳後列薛夏於王象桓威下今從之

應璩字休璉博學好屬文善爲書記歷丕叡世爲散騎常侍曹芳立稍遷侍中大

將軍長史曹爽秉政多違法度璩爲詩以諷焉其言雖頗諧合多切時要世共傳之復爲侍中典著作嘉

平四年卒贈衛尉子貞字吉甫少以才聞能談論正始中夏侯玄有盛名貞嘗與玄坐作詩玄嘉玩之舉

高第歷顯位晉武帝爲撫軍大將軍以貞參軍事及篡代遷太子中庶子散騎常侍以儒學與太尉荀顛

譏定新禮事未施行泰始五年卒貞弟純純子紹永嘉中爲黃門侍郎爲東海王越所殺純弟秀秀子詹

鎮南大將軍江州刺史

議曰嘗讀曹丕與季重書未嘗不擊節稱歎辭氣瑰偉卓犖飄忽撼搖天壤對客口授神采敏捷短章之奇也季重黽勉奉答鰲魚目以償夜光動爲羞澀筆力氣格之相懸有如是者然而丕植累貽書論一時文士及文章利病有敬畏之意則季重雖不在七子之列必有過人之度焉

劉廙字恭嗣南陽人也其先漢宗室封安衆侯廙年十歲戲於講堂上潁川司馬德操拊其首曰孺子孺子黃中通理寧自知不廙兄望之有名於世荊州牧劉表辟爲從事而其友二人皆以讒毀爲表所誅望之又以正諫不合投傳告歸廙謂望之曰趙殺鳴犢仲尼回輪

原注。劉向新序。趙簡子欲專天下。謂其相曰。天下可王也。於是乃書召犢。犢鳴而問政焉。已即殺之。使使者聘孔子於魯。以胾牛肉迎於河上。使者謂船人曰。孔子即上船。中河。必流而殺之。孔子至。使者致命進胾牛之肉。孔子仰天而歎曰。美哉水乎。洋洋乎使丘不濟此水者命也。夫子路趨而進曰。敢問何謂也。孔子曰。犢鳴而問政。晉國之賢大夫也。趙簡子未得意之時。須而後從政。及其得意也。殺之。黃龍不及於涸澤。鳳凰不離其巖羅。故刳胎焚林。則麒麟不臻。覆巢破卵。則鳳凰不翔。涸澤而流。則龜龍不見。鳥獸之於不仁。猶知避之。況丘乎。故虎嘯而谷風生。龍興而景雲見。擊庭鐘於外。而黃鐘應於內。夫物類之相感。精神之相應。若響之應聲。影之象形。故君子遠傷其類者。今彼已殺吾類矣。何爲之此乎。於是遂回車。不渡而還。案。寶鳴犢孔叢子作鳴犢寶。戰國策作鳴犢寶。史記作寶。鳴犢寶。或又作鳴犢寶。諸說不同。未知孰是。

今兄既不能法柳下惠和光同塵於內則宜模范蠡遷化於外原注。柳下惠事見前注。史記。范蠡既雪會稽之恥。乃喟然歎曰。計然之策七。越用其五而得意。既諸侯四通。貨物所交易也。乃治產積居。與時逐而不責於人。故善治生者。能擇人而任時。十九年之中。三致千金。再分散與貧交疏昆弟。此所爲富好行其德者也。遷化。懲遷有無化居也。坐而自絕於時。殆不可也望之不從尋復見害廙懼奔揚州道中爲牋謝表曰考躬過蒙分遇榮授之顯未有管狐桓文之烈孤德殞命精誠不遂兄望之見禮在昔旣無堂構昭前之績中規不密用墜禍辟斯乃明神弗祐天降

之災。悔吝之負。哀號靡及。虞之愚淺。言行多違。懼有浸潤。三至之間。考躬之愛。已衰。望之之責。猶存。必傷

天慈。既往之分。門戶殫滅。取笑明哲。是用迸竄。永涉川路。卽日到廬江潯陽。昔鍾儀有南音之操。椒舉有

班荆之思。雖遠猶邇。敢忘前惠。原注。左氏傳。初楚伍舉與蔡太師子朝友。其子伍舉與聲子相善也。伍子娶於王子

卒。王子卒爲申公而亡。楚人曰。伍舉實送之。伍舉奔鄭。將遂奔晉。聲子將如晉

之。遇之於鄭郊。班荆相與食而言復故。聲子曰。子行也。吾必復子。傅子曰。表旣設望之。荆州土人皆自危也。夫齊

之本心。於望之不輕也。以直忤情而讒言得入者。以無容直之度也。據全楚之地。不能以成功者。未必不由此也。夷齊

连武王以成名。丁公順高祖以受戮。二主之度遠也。若不違其度。惟褊心是從。難乎以容民畜衆矣。遂歸曹操。操辟爲丞相掾屬。轉五官將文學。不甚器之。命虞

通草書。虞答書曰。初以尊卑不踰禮之常分也。是以貪守區區之節。不敢修草。必如嚴命。誠知勞謙之素。

不貴殊異。若彼之高。而倬白屋如斯之好。苟使郭隗不輕於燕。九九不忽於齊。樂毅自至。霸業以隆。原注

國策。有以九九求見齊桓公。桓公不納。其人曰。九九小術。而君納之。況大於

九九者乎。於是桓公設庭燎以禮而見之。居無幾。隗自遠而至。齊遂以霸。虧匹夫之節。成巍巍之美。雖愚不

敏。何敢以辭。魏國初建。爲黃門侍郎。操在長安。欲親攻漢中。虞上疏曰。聖人不以智輕俗。王者不以人廢

言。故能成功於千載者。必以近察遠。智周於獨斷者。不恥於下問。亦欲博采必盡於衆也。且韋弦非能言

之物。而聖人引以自匡。臣才智闇淺。願自比於韋弦。昔樂毅能用弱燕破大齊。而不能以輕兵定卽墨者。

夫自爲計者。雖弱必固。欲自潰者。雖強必敗也。自殿下起軍以來三十餘年。敵無不破。強無不服。今以海

內之兵。百勝之威。而孫權負險於吳。劉備不賓於蜀。夫夷狄之臣。不當冀州之卒。權備之籍。不比袁紹之

業。然本初已亡。而二寇未捷。非闇弱於今。而智武於昔也。斯自爲計者。與欲自潰者。異勢耳。是故文王伐

崇三駕不下。歸而修德。然後服之。秦爲諸侯所征。必服。及兼天下。東向稱帝。匹夫大呼。而社稷用隳。是力斃於外。而不恤民於內也。臣恐邊寇非六國之敵。而世不乏才。土崩之勢。此不可不察也。天下有重德。有重失。勢可得而我勤之。此重德也。勢不可得而我勤之。此重失也。於今之勢。若能料四方之險。擇要害之處而守之。選天下之甲卒。隨方面而歲更焉。殿下可高枕於廣廈。潛思於治國。廣務農桑。事從節約。修之旬年。則民安國富矣。操遂進前而報麋曰。非但君當知臣。臣亦當知君。今欲使吾坐行西伯之德。恐非其人也。魏諷反。麋弟偉爲諷所引。當相坐誅。操令曰。叔向不坐弟虎。古之制也。特原不問。徙置丞相倉曹掾。屬上疏謝曰。臣罪應傾宗。禍當覆族。遭乾坤之靈。值時來之運。揭湯止沸。使不燋爛。起煙於寒灰之上。生華於已枯之木。物不答施於天地。子不謝生於父母。可以死效。難用筆陳。初偉與諷善。麋戒之曰。交友之美。在於得賢。不可不詳。而世之交者。不審擇人。務合黨衆。有違先聖人交友之義。非厚己輔仁之謂也。吾觀諷不修德義。而專以鳩合爲務。華而不實。此實攪世沽名者也。卿其慎之。勿復與通。偉不從。故及於難。麋上疏論治道曰。昔者周有亂臣十人。有婦人焉。九人而已。孔子稱才難。不其然乎。明賢者難得也。況亂弊之後。百姓凋盡。士之存者。蓋亦無幾。股肱大職。及州郡督司。邊方重任。雖備其官。亦未得人也。此非選者之不用意。蓋才匱使之然爾。況於長吏以下。羣職小任。能皆簡練。備得其人也。其計莫如督之以法。不爾而數轉易。往來不已。送迎之煩。不可勝計。轉易之間。輒有姦巧。旣於其事不省。而爲政者亦以其不得。

久安之故。知惠益不得成於己。而苟且之可免於患。皆將不念盡心於卹民。而夢想於稱譽。此非所以爲政之本意也。今之所以爲黜陟者。近頗以州郡之毀譽。聽往來之浮言爾。亦皆得其實。而課其能否也。長吏之所以爲佳者。奉法也。憂公也。卹民也。此三者。或州郡有所不便。往來者有所不安。而長吏執之不已。於治雖得。計其聲譽未爲美。闕而從人。謹案。關今志注改作屈。監本作闕。與此合。於治雖失。計其聲譽必集也。長吏皆知黜陟之在此。亦何能不去本而就末哉。以爲長吏皆宜使少久。足使自展。歲課之能。三年總計。乃加黜陟。課之皆當以事。不得依名。事者皆以戶口率。其墾田之多少。及盜賊發興。民之亡畔者。爲得負之計。如此行之。則無能之吏。修名無益。有能之人。無名無損。法之一行。雖無部司之監。姦譽妄毀。可得而盡。事上操甚善之。麀著書數十篇。及與丁儀共論刑禮。皆傳於世。曹丕立。爲侍中。賜爵關內侯。黃初二年卒。年四十二。無子。以弟子阜嗣。終陳留太守。阜子喬。晉惠帝時爲豫州刺史。時東海繆襲。陳留蘇林。任城孫該。河東杜摯。皆有才學。其所敘述。亦傳於世。繆襲字熙伯。父斐。字文雅。該覽經傳。六辟公府。徵爲博士。皆不就。襲辟御史大夫。府歷事魏四世。官至尙書光祿勳。正始六年卒。年六十。子悅。晉光祿大夫。孫紹。播。徽等。皆以文學顯於世。蘇林字孝友。博學多聞。凡諸書傳疑難。林皆釋之。甚有抵要。建安中爲五官將。丕文學。黃初中。爲博士。給事中。以老歸第。國有大議。遣人就諮之。數加賜遺。年八十餘卒。孫該字公達。好學能文。年二十。上計掾。召爲郎中。著魏書。遷博士。司徒右長史。復入著作。景元二年卒。官杜摯字德魯。初上笏賦。署司

徒軍謀掾。後舉孝廉。除郎中。轉補校書。摯與毋丘儉鄉里親善。始儉詩求仙藥一丸。欲以感求助。儉答詩而摯竟不遷。卒於祕書。原注。文章敘錄。摯與毋丘儉詩曰。駢驥馬未試。婆娑槽欄間。壯士志未伸。坎軻多辛酸。薪。妻呼呼不還。釋之官十年。位不增故官。才非八子倫。而與齊其患。無知不在此。衰益未有言。彼此篤病久。榮衛動不安。聞有韓衆藥。信來給一丸。儉答曰。鳳鳥翔京邑。哀鳴有所思。才爲聖世出。德音何不怡。八子未遭過。今者遵明時。胡康出隴畝。楊偉無根基。飛騰冲雲天。奮迅協光熙。駿驥骨法異。伯樂觀知之。但當養羽翮。鴻舉必有期。體無纖微疾。安用問良醫。嘯詡輕酒集。還爲燕雀嗤。韓衆藥雖良。或更不能治。悠悠千里情。薄言答嘉詩。信心感請中。中實不在辭。

議曰。劉廙才鑒清遠。諫操伐漢。懼其重失。規以西伯。操謂之不知君。擬非其倫。而近於迂。不欺之言也。則吾爲周文王之語。豈非自欺與。其論治道。謂不宜數易守令。不當以聲譽黜陟。皆知治體之言也。自封建廢而爲郡縣。至漢孝宣久任守令。增秩賜金。而不徙使吏。致其能民熟其化。於是號多良吏。至於綜核名實。信賞必罰。皆漢之善政也。廙有見乎此矣。

衛覬字伯儒。河東安邑人也。少夙成。以才學稱。曹操辟爲司空掾屬。除茂陵令。尙書郎。操攻袁紹。而劉表爲紹援。關中諸將又中立。益州牧劉璋與表有隙。覬以治中侍御史使益州。令璋下兵以綴表軍。至長安。道路不通。覬不得進。遂留鎮關中。時四方大有還民。關中諸將多引爲部曲。覬書與荀彧曰。關中高腴之地。頃遭荒亂。人民流入荊州者十萬餘家。聞本土安寧。皆企望思歸。而歸者無以自業。諸將各競招懷。以爲部曲。郡縣貧弱。不能與爭。兵家遂彊。一旦變動。必有後憂。夫鹽國之大寶也。自亂來放散。宜如舊置使。

者監賈。以其直益市犂牛。若有歸民以供給之。勤耕積粟。以封殖關中。遠者聞之。必日夜競還。又使司隸校尉留治關中。以爲之主。則諸將日削。官民日盛。此疆本弱敵之利也。或以白操。操從之。始遣謁者僕射監鹽官。司隸校尉治宏農。關中服從。乃白召凱還。稍遷尙書。魏國旣建。拜侍中。與王粲並典制度。初朝廷播遷。臺閣舊事。散亡無幾。都許之後。漸有綱紀。凱以古義。多所正定。是時關中諸將。外雖懷附。內未可信。司隸校尉鍾繇。求以三千兵入關外。託討張魯。內以脅取質任。操使荀彧問凱。凱以爲西方諸將皆豎夫。崛起無雄天下意。苟安樂目前而已。今國家厚加爵號。得其所志。非有大故。不憂爲變也。宜爲後圖。若乃以兵入關中。當討張魯。魯在深山。道徑不通。諸叛必疑。一相驚動。地險衆強。殆難爲慮。彧以凱議呈操。操初善之。而以繇自典其任。遂從繇議。兵始進。而關右皆叛。操親伐之。僅乃得平。死者萬計。操悔不從凱議。由是益重凱。曹丕立。徙爲尙書。頃之。還漢朝爲侍郎。勸贊禪代之義。爲文誥詔册及丕稱尊號。復爲尙書。封陽吉亭侯。曹叡立。進封闡。原注音闡鄉侯。三百戶。凱奏曰。九章之律。自古所傳。斷定刑罪。其意微妙。百里長吏。皆宜知律。刑法者國家之所貴重。而私議之所輕賤。獄吏者百姓之所縣命。而選用者之所卑下。王政之弊。未必不由此也。請置律博士。轉相教授。事遂施行。時百姓凋匱。而役務方殷。凱上疏曰。夫變情厲性。彊所不能。人臣言之旣不易。人主受之又甚難。且人之所樂者富貴顯榮也。所惡者貧賤死亡也。然此四者君之所制也。君愛之則富貴顯榮。君惡之則貧賤死亡。順指者愛所由來。逆意者惡所從生也。故人

臣皆爭順指而避逆意。非破家爲國。殺身成君者。誰能犯顏色。觸忌諱。建一言。開一說哉。陛下留意察之。則臣下之情可見矣。今議者多好悅耳。其言政治。則比陛下於堯舜。其言征伐。則比二虜於狸鼠。臣以爲不然。昔漢文之時。諸侯彊大。賈誼累太息以爲至危。況今四海之內。分而爲三。羣士陳力。各爲其主。其來降者。未肯言舍邪就正。咸稱迫於困急。是與六國分治無以爲異也。當今千里無煙。遺民困苦。陛下不善留意。將遂凋弊。難可復振。禮天子之器。必有金玉之飾。飲食之肴。必有八珍之味。至於凶荒。則徹膳降服。然則奢儉之節。必視世之豐約也。武皇帝之時。後宮食不過一肉。衣不用錦繡。茵褥不緣飾。器無丹漆。用能平定天下。遺福子孫。此陛下之所親覽也。當今之務。宜君臣上下並用籌策。計校府庫。量入爲出。深思句踐滋民之術。猶恐不及。而尙方所造金銀之物。漸更增廣。工役不輟。侈靡日崇。帑藏日竭。昔漢武信求神仙之道。謂當得雲表之露。以餐玉屑。故立仙掌。以承高露。陛下通明。每所非笑。漢武有求於露。而猶尙見非。陛下無求於露。而空設之。不益於好。而糜費工夫。誠皆聖慮所宜裁制也。覲歷漢魏時。獻納鯁切。率如此。受詔典著作。又爲魏官儀。凡所撰述。數十篇。好古文。鳥篆。隸草。無所不善。覲卒諡曰敬侯。覲子璿。與燉煌索靖俱善草書。原注。晉書。靖字幼安。有先識遠量。知天下將亂。指雒陽宮門銅駝數曰。會見。璿筆勝靖。然汝在荆棘中耳。太安末。拜使持節監關陽諸軍事游擊將軍。與賊戰。被傷而卒。璿筆勝靖。然有楷法。遠不及靖。璿爲尙書令。靖爲尙書郎。號一臺二妙。漢末張芝特善草書。論者謂璿得伯英筋。靖得伯英肉。原注。後漢書。度遼將軍張奐長子芝。字伯英。最知名。英弟超字文舒。並善草書。靖作草書狀。其辭曰。聖皇御世。隨時之宜。蒼頡既生。書契是

爲科斗鳥篆類物象形。叡哲變通。意巧滋生。損益隸草。以崇簡易。百官畢修。事業並麗。蓋草書之爲狀也。婉若銀鈎。漂若驚鸞。舒翼未發。若舉復安。蟲蛇虬蟠。或往或還。類阿那以羸形。欬奮鬣而桓桓。及其逸遊。盼嚮乍正。乍邪。馱驥暴怒。逼其轡。海水漲隆。揚其波。芝草蒲陶。還相繼。棠棣融融。載其華。玄熊對踞於山嶽。飛燕相追而差池。舉而察之。又似乎和風吹林。偃草扇樹。枝條順氣。轉相比附。窈窕廉苦。隨體散布。紛擾擾以猗靡。中持疑而猶豫。玄螭狡獸。嬉其間。騰猿飛颺。相奔趣。凌魚奮尾。蛟龍反據。投空自竄。張設牙距。或若登高望其類。或若旣往而中顧。或若傲儻而不羣。或若自檢於常度。於是多才之英。篤藝之彥。役心精微。耽此文憲。守道兼權。觸類生變。離析八體。靡形不判。去繁存微。大象未亂。上理開元。下周謹案。騁辭放手。雨行冰散。高音翰厲。溢越流漫。忽班班而成章。信奇妙之煥爛。體儼落而壯麗。姿光潤以璀璨。命杜度運其指。使伯英迴其腕。著絕勢於紈素。垂百世之殊觀。瓊子恆謹案晉書字巨山亦善草隸。乃作四體書勢曰。昔在黃帝。創制造物。有沮誦蒼頡者。始作書契。以代結繩。蓋覩鳥跡以興思也。因而遂滋。則謂之字。有六義焉。一曰指事。上下是也。二曰象形。日月是也。三曰形聲。江河是也。四曰會意。武信是也。五曰轉注。老考是也。六曰假借。令長是也。夫指事者。在上爲上。在下爲下。象形者。日滿月虧。象其形也。形聲者。以類爲形。配以聲也。會意者。止戈爲武。人言爲信也。轉注者。以老壽考也。假借者。數言同字。其聲雖異。文意一也。自黃帝至三代。其文不改。及秦用篆書。焚燒先典。而古文絕矣。漢武時魯恭王壞孔子宅。得尙書。春秋論

語。孝經。時人以不復知有古文。謂之科斗書。漢世祕藏。希得見之。魏初傳古文出於邯鄲淳。恆祖敬侯寫淳尙書。後以示淳。而淳不別。至正始中。立三字石經。轉失淳法。因科斗之名。遂效其形。太康元年。汲縣人盜發魏襄王家。得策書十餘萬言。案敬侯所書。猶有髣髴古書。亦有數種。其一卷論楚事者。最爲工妙。恆竊悅之。故竭愚思以贊其美。愧不足廁前賢之作。冀以存古人之象焉。古無別名。謂之字勢云。黃帝之史。沮誦蒼頡。眺彼鳥跡。始作書契。紀綱萬事。垂法立制。帝典用宣。質文著世。爰暨暴秦。滔天作戾。大道旣泯。古文亦滅。魏文好古。世傳丘墳。歷代莫廢。真僞靡分。大晉開元。宏道敷訓。天垂其象。地耀其文。其文乃耀。粲矣其章。因聲會意。類物有方。日處君而盈其度。月執臣而虧其旁。雲委蛇而上布。星離離以舒光。禾卉萃萼以垂穎。山嶽峨嵯而連岡。蟲跂跂以若動。鳥似飛而未揚。觀其錯筆綴墨。用心精專。勢和體均。發止無間。或守正循檢。矩折規旋。或方圓靡則。因事制權。其曲如弓。其直如弦。矯然獨出。若龍騰於川。森爾下頽。若雨墜於天。或引筆奮力。若鴻雁高飛。邈邈翩翩。或縱肆阿那。若流蘇懸羽。靡靡綿綿。是故遠而望之。若翔風厲水。清波漪漣。就而察之。有若自然。信黃唐之遺跡。爲六藝之範先。籀篆蓋其子孫。隸草乃其曾玄。覩物象以致思。非言辭之所宜。昔周宣王時。史籀始著大篆十五篇。或與古同。或與古異。世謂之籀書者也。及平王東遷。諸侯力政。家致國異。而文字乖形。秦始皇帝初兼天下。丞相李斯乃奏損益之。罷不合秦文者。斯作蒼頡篇。中車府令趙高作爰歷篇。太史令胡毋敬作博學篇。皆取史籀大篆。或頗省改。所謂

小篆者。或曰下邳人程邈爲衙獄吏。得罪始皇。幽繫雲陽十年。從獄中作大篆。少者增益。多者損減。方者使圓。圓者使方。奏之始皇。始皇善之。出以爲御史。使定書。或曰邈所定乃隸字也。自秦壞古文。有八體。一曰大篆。二曰小篆。三曰刻符。四曰蟲書。五曰摹印。六曰署書。七曰殳書。八曰隸書。王莽時使司空甄豐校文字部。改定古文。復有六書。一曰古文。孔氏壁中書也。二曰奇字。卽古文而異者也。三曰篆書。秦篆書也。四曰佐書。卽隸書也。五曰繆篆。所以摹印也。六曰鳥書。所以書幡信也。及許慎撰說文。用篆書爲正。以爲體例。最可得而論也。秦時李斯號爲二篆。諸山及銅人銘皆斯書也。漢建初中。扶風曹喜少異於斯。而亦稱善。邯鄲淳師焉。略究其妙。韋誕師淳而不及也。太和中。誕爲武都太守。以能書留補侍中。魏代寶器銘題皆誕書也。漢末又有蔡邕。采斯喜之法。爲古今雜形。然精密閑理。不如淳也。邕作篆勢曰。鳥遺跡。皇顏循。聖作則。制斯文。體有六。篆爲真。形要妙。巧入神。或龜文鍼列。櫛比龍鱗。紆體放尾。長短複身。頽若黍稷之垂穎。蘊若蟲蛇之焚縕。揚波振擊。鷹跖鳥震。延頸脅翼。勢似凌雲。或輕筆內投。微本濃末。若絕若連。似水露緣絲。凝垂下端。從者如懸。衡者如編。杳杪邪趣。不方不圓。若行若飛。跂跂翾翾。遠而望之。象鴻鵠羣游。駘驛遷延。迫而視之。端際不可得見。指搆不可勝原。研桑不能數其詰屈。離婁不能覩其卻間。般倬揖讓。而辭巧。籀誦拱手。而韜翰。處篇籍之首目。粲斌斌其可觀。摛華豔於執素。爲學藝之範先。喜文德之宏懿。愠作者之莫刊。思字體之頽仰。舉大略而論旃。秦旣用篆。奏事繁多。篆字難成。卽令隸人佐書。曰隸字。

漢因行之。獨符、印、璽、幡、信、題、署、用、篆。隸、書、者、篆、之、捷、也。上谷王次仲始作楷法。至靈帝好書。時多能者。而師宜官爲最。大則一字徑丈。小則方寸千言。甚矜其能。或時不持錢詣酒家飲。因書其壁。願觀者以酬酒。討錢。足而滅之。每書輒削而焚其柁。梁鵠乃益爲版而飲之酒。候其醉而竊其柁。鵠卒以書至選部。尙書原注。梁鵠字子皇。安定人。靈帝末爲涼州刺史。逸章韓遂之亂。徵爲選部尙書。宜官後爲袁術將。今鉅鹿宋子有耿球碑。是術所立。其書甚工。云是宜官也。梁鵠奔劉表。魏武帝破荊州。募求鵠。鵠之爲選部也。魏武欲爲雒陽令。而以爲北部尉。故懼而自縛詣門。署軍假司馬。在祕書以勤書自效。是以今者多有鵠手跡。魏武帝懸著帳中。及以釘壁玩之。以爲勝宜官。今宮殿題署。多是鵠書。鵠宜爲大字。邯鄲淳宜爲小字。鵠謂淳得次仲法。然鵠之用筆盡其勢矣。鵠弟子毛宏教於祕書。今八分皆宏法也。漢末有左子邑。小與淳鵠不同。然亦有名。魏初有鍾胡二家。爲行書法。俱學之於劉德升。而鍾氏小異。然亦各有巧。今大行於世云。作隸勢曰。鳥跡之變。乃惟佐隸。獨彼繁文。崇此簡易。厥用旣宏。體象有度。煥若星陳。鬱若雲布。其大徑尋。細不容髮。隨時從宜。靡有常制。或穹隆恢廓。或櫛比鍼列。或砥平繩直。或蜃蜃膠戾。或長邪角趣。或規旋矩折。修短相副。異體同勢。奮筆輕舉。離而不絕。織波濃點。錯落其間。若鍾籛設張。庭燎飛煙。嶄巖巖嵯。高下屬連。似崇臺重宇。增雲冠山。遠而望之。若飛龍在天。近而察之。心亂目眩。奇姿譎詭。不可勝原。研桑所不能計。宰賜所不能言。何草篆之足算。而斯文之未宣。豈體大之難覩。將祕奧之不傳。聊俯仰而詳觀。舉大較而論旂。漢興而有草書。不知作

者姓名。至章帝時，齊相杜度號善作篇，後有崔瑗、崔實，亦皆稱工。杜氏結字甚安，而書體微瘦。崔氏甚得筆勢，而結字稍疎。宏農張伯英者，因而轉精甚巧。凡家之衣帛，必書而後練之。臨池學書，池水盡黑。下筆

必爲楷，則號忽忽不暇草書。寸紙不見遺。至今世尤寶其書。章仲將謂之草聖。原注：文章敘錄：誕字仲將，太僕端之子。有文才。善屬辭。

章：建安中爲郡上計吏。特拜郎中。稍遷侍中書監。以光祿大夫遜位。年七十五。卒於家。初，邯鄲淳、衛覲及誕並善書有名。伯英弟文舒者，次伯英。又有姜孟穎、梁孔達、

田彥和及章仲將之徒，皆伯英弟子。有名於世。然殊不及文舒也。羅叔景、趙元嗣者，與伯英並時。見稱於

西州，而矜巧自與，衆頗惑之。故英自稱上比崔，杜不足。下方羅、趙有餘，河間張超亦有名。然雖與崔氏同

州，不如伯英之得其法也。崔瑗作草書勢，曰：書契之興，始自顓臾，寫彼鳥跡，以定文章。爰暨末葉，典籍彌

繁，時之多僻，政之多權，官事荒蕪，勦其墨翰，惟作佐隸。舊字是刪，草書之法，蓋又簡略。應時諭指，用於卒

迫，兼功并用，愛日省力，純儉之變，豈必古式。觀其法象，俯仰有儀，方不中矩，圓不中規，抑左揚右，望之若

崎，竦企鳥峙，志在飛移，狡獸暴駭，將奔未馳，或跼黠點，點狀似連珠，絕而不離，畜怒怫鬱，放逸生奇，或凌

遽惴慄，若據高臨危，旁點邪附，似蜩蟬揭枝，絕筆收勢，餘綆糾結，若杜伯捷，毒緣幟，騰蛇赴穴，頭沒尾垂，

是故遠而望之，隳然若沮岑崩崖，就而察之，一畫不可移，機微要妙，臨時從宜，略舉大較，髣髴若斯。於是

晉世往往以書法名家。至右軍將軍王羲之，兼善隸草，爲古今之冠。論者稱其筆勢飄若游雲，矯若驚龍，

其出奇爲擘窠大字，曰龍爪書。至小楷，則尤極秀勁。其真行如蘭亭敘草，皆絕筆也。每自稱我書比鍾繇

當抗衡張芝草書當雁行也。與人書云：張芝臨池學書，池水盡黑，使人耽之若是，未必後之也。羲之書初不勝庾翼、郗愔，及其暮年方好，嘗以章草答庾亮，而翼深歎服。與羲之書云：吾昔有伯英草，草十紙，過江顛損，遂乃亡失，常歎妙跡永絕，忽見足下答家兄書，煥若神明，頓還舊觀。子獻之亦工草隸，七八歲時學書，羲之密從後掣其筆，不得，歎曰：此兒後當復有大名。嘗書壁爲方丈大字，羲之甚以爲能，觀者數百人，議者謂羲之草隸，江左中朝莫有及者。獻之骨力遠不及父，而頗有媚趣。桓玄雅愛其父子書，各爲一帙，置左右以翫之。天下號爲二王。漢晉書法，至是極矣。

議曰：古者造書契以代結繩，至於六藝典籍，綿世閱代，書以傳信而已，初不計其工拙而以爲學也。秦始以隸代篆，漢魏之際，又以楷代隸，以草代楷，漸趨簡易，以爲捷便。蔡邕、梁鶴、鍾繇，獨能存古法，出新意，遂爲工師規矩，書學之宗。衛凱父子以書法傳家，恆遂著論，推本所自，至於二王盡古今之變，書家之能事畢矣。嗚呼！詩文至於漢晉，字畫亦至焉，而後世鮮能及之，豈其去古未遠，氣質渾厚，天然太璞，未至於剗弊歟。

李康字蕭遠，中山人也。性介立，有崖岸，不能和俗，著遊山九吟，曹叡異其文，起家爲潯陽長，政有美績，卒於官。又嘗著運命論行於世，其辭曰：夫治亂運也，窮達命也，貴賤時也，故運之將隆，必生聖明之君，聖明之君，必有忠賢之臣，其所以相遇也，不求而自合，其所以相親也，不介而自親，唱之而必和，謀之而必從。

道德玄同曲折合符得失不能疑其志。讒搆不能雜其交。然後得成功也。其所以得然者。豈徒人事哉。授

之者天也。告之者神也。成之者運也。夫黃河清而聖人生。里社鳴而聖人出。原注。易乾陶度。聖人受命瑞應。先見於河。河水先清。清變白。

白變赤。赤變黑。黑變黃。各三日。春秋清濁已曰。里社明。此里有聖人出。其胸百姓。歸天辟亡。宋均曰。社里之君鳴。則教令行。教令明惟聖人能之也。陶鳴之怒者。聖人怒則天辟亡矣。湯起放桀時蓋此祥也。明與鳴古字通。

羣龍見而聖人用。故伊尹有莘氏之媵臣也。而阿衡於商。太公涓濱之賤老也。而尚父於周。百里奚在虞

而虞亡。在秦而秦霸。非不才於虞而才於秦也。張良受黃石之符。誦三略之說。以游於羣雄。其言也。如以

水投石。莫之受也。及其遭漢祖。其言也。如以石投水。莫之逆也。非張良之拙說於陳項。而巧言於沛公也。

然則張良之言一也。不識其所以合離。合離之由。神明之道也。故彼四賢者。名載於錄圖。事應乎天人。其

可格之賢愚哉。原注。春秋考異。郵稽之靈圖參於太古。易坤靈圖。湯臣伊尹。振鳥陵。春秋命歷序。文王受丹書。呂望佐昌發。春秋保乾圖。漢之一師為張良。生韓之隙。漢以興。春秋感精記。西秦東闕。

謀竊鄭伯。晉我同心。遮之穀谷。百里子哭語之。不知其泣血何益。孔子曰。清明在躬。志氣如神。嗜欲將至。有開必先。天降時雨。山川出雲。詩

云。惟嶽神降。生甫及申。惟申及甫。惟周之翰。運命之謂也。豈惟與主亂亡者亦如之焉。幽王之惑。褒女也。

妖始於夏庭。原注。史記。昔夏后氏之衰也。有神龍二止於夏帝之庭而言曰。余褒之二君也。夏帝卜殺之與。去之與。止之莫吉。卜請其弊而藏之。乃吉。於是布幣而册告之。龍亡而弊在。夏氏乃積而去之。比三代莫敢發。至厲王之末。發而觀之。弊流於庭。不可除。厲王使婦人裸而册告之。龍亡而弊在。夏氏乃積而去之。比三代莫敢

而娘。無夫而生一女子。懼而棄之。宣王之時童謠。壓弧箕服。實亡周國。於是宣王聞之。有夫婦實是器者。宣王使執而戮之於道。而鄉者後宮妾所棄妖子出於路者。聞其夜啼。哀而收之。夫婦遂奔於褒。褒人有罪。請入粟

子以贖罪。棄子出於褒。是為褒姒。幽王廢申后。立褒姒為后。后父申侯怒。攻幽王。遂殺幽王驪山下。曹伯陽之獲公孫彊也。徵發於社宮。原注。左氏傳。初曹人或夢乘君子立於社宮而謀亡曹。曹叔振鐸請待公孫彊。許之。旦而求之曹。無之。戒其子曰。我死。爾聞公孫彊為政。必去之。及曹伯陽即位。好弋也。曹

鄧人公孫彊好弋。且言敗弋之說。悅之。因訪政事。說於曹伯叔孫豹之暱豎牛也。禍成於庚宗。原注。左氏傳。初

從之。乃背晉而奸宋。宋人伐之。執曹伯陽以歸。殺之。叔孫豹之暱豎牛也。禍成於庚宗。原注。左氏傳。初

庚宗。遇婦人。使私爲食而宿焉。魯人召之。所宿庚宗婦人獻以雉。問其姓。對曰。余子長矣。召而見之。遂使爲豎。有寵。具使爲政。田於丘薺。遂遇疾焉。豎牛曰。夫子疾病。不欲見人。使饋饋於个而退。弗進。則置虛器命徹。叔孫

不食。吉凶成敗各以數至。咸皆不求而自合。不介而自親矣。昔者聖人受命。河洛曰。以文命者。七九而衰。

以武興者。六八而謀。原注。河洛。謂河圖洛書也。文謂文德。即文王也。武謂武功。即武王也。言及成王定鼎

於郊。鄆卜世三十。卜年七百。天所命也。故自幽厲之間。周道大壞。二霸之後。禮樂陵遲。文薄之弊。漸於靈

景。辯詐之僞。成於七國。酷烈之極。積於亡秦。文章之貴。棄於漢祖。雖仲尼至聖。顏冉大賢。揖讓於規矩之

內。閭閻於洙泗之上。不能遏其端。孟軻孫卿。體仁希聖。謹案。體仁。文選作體二。從容正道。不能維其末。天下卒至於

溺而不可援。夫以仲尼之才也。而器不周於魯衛。以仲尼之辯也。而言不行於定哀。以仲尼之謙也。而見

忌於子西。以仲尼之仁也。而取讎於桓魋。以仲尼之智也。而屈厄於陳蔡。以仲尼之行也。而招毀於叔孫

夫道足以濟天下。而不得貴於人。言足以經萬世。而不見信於時。行足以應神明。而不能彌綸於俗。應聘

七十國。而不一獲其主。驅驟於蠻夏之域。屈辱於公卿之門。其不遇也如此。及其孫子思。希聖備體。而未

之至。封己養高。勢動人主。其所遊歷。諸侯莫不結駟。而造門。猶有不得賓者焉。其徒子夏。升堂而未入於

室者也。退老於家。魏文侯師之。西河之人。肅然歸德。比之於夫子。而莫敢問其言。故曰。治亂運也。窮達命

也。貴賤時也。而後之君子。區區於一主。太息於一朝。屈原以之沈湘。賈誼以之發憤。不亦過乎。然則聖人

所以爲聖者。蓋在乎樂天知命矣。故遇之而不怨。居之而不疑也。其身可抑。而道不可屈。其位可排。而名不可奪。譬如水也。塞之斯爲淵焉。通之斯爲川焉。升之於雲。則雨施。沈之於地。則土潤。體清以洗物。不亂於濁。受濁以濟物。不傷於清。是以聖人處窮達如一也。夫忠直之迂於主。獨立之負於俗。理勢然也。故木秀於林。風必摧之。堆出於岸。流必湍之。行高於人。衆必非之。前鑒不遠。覆車繼軌。然而志士仁人。猶蹈之而弗悔。操之而弗失。何哉。將以遂志而成名也。求遂其志。而冒風波於險途。求成其名。而歷謗議於當時。彼所以處之。蓋有算矣。子夏曰。死生有命。富貴在天。故道之將行也。命之將貴也。則伊尹呂尚之興於商。周百里子房之用於秦漢。不求而自得。不微而自遇矣。道之將廢也。命之將賤也。豈獨君子恥之而弗爲乎。蓋亦知爲之而弗得矣。凡希世苟合之士。籛隙戚施之人。俛仰尊貴之顏。逶迤勢利之間。意無是非。讚之如流。言無可否。應之如響。以闕看爲精神。以向背爲變通。勢之所集。從之如歸市。勢之所去。棄之如脫遺。其言曰。名與身孰親也。得與失孰賢也。榮與辱孰珍也。故遂潔其衣服。矜其車徒。冒其貨賄。淫其聲色。脈脈然自以爲得矣。蓋見龍逢比干之亡其身。而不惟飛廉惡來之滅其族也。蓋知伍子胥之屬鏹於吳。而不戒費無忌之誅夷於楚也。蓋譏汲黯之白首於主爵。而不懲張湯牛車之禍也。原注。漢書。汲黯爲東海太守。大治。召爲主爵都尉。又曰。上以張湯懷詐面欺。使使薄責湯。湯自殺。諸子欲厚葬。湯母曰。湯爲天子大臣。被惡言而死。何厚葬爲。載以牛車。有棺而無槨。蓋笑蕭望之跋躓於前。而不懼石顯之絞紘於後也。原注。漢書前將軍蕭望之及光祿大夫周堪建白。以爲宜罷中書宦官。應古不近刑人。由是大與石顯忤。後皆害焉。望之自殺。又成帝立。丞相奏顯舊惡。免官。徙歸故郡。憂慙不食。道病死。故

夫達者之算也。亦各有盡矣。曰：凡人之所以奔競於富貴何爲者哉？若夫立德必須貴乎？則幽厲之爲天

子不如仲尼之爲陪臣也。必須勢乎？則王莽董賢之爲三公。不如揚雄仲舒之闕其門也。原注：漢書拜王莽爲大司馬。又董賢

代丁明爲大司馬。揚雄自序：雄家世素貧。嗜酒。人希至其門。又董仲舒爲博士。下帷講誦。弟子傳以久次相受業。或莫見其面。必須富乎？則齊景之千駟。不如顏回原憲之

約其身也。其爲實乎？則執杓而飲河者。不過滿腹。棄室而灑雨者。不過濡身。過此以往。弗能受也。原注：桓譚新論。桓

子貢對齊景公曰：臣事仲尼。譬如渴而操杯器。就江海飲。滿腹而去。又焉知江海之深也。其爲名乎？則善惡書於史冊。毀譽流於千載。賞罰懸於天道。吉

凶灼乎鬼神。固可畏也。將以娛耳目樂心意乎？譬命駕而遊五都之市。則天下之貨畢陳矣。原注：漢書。王莽于五都立

均官。更名雒陽。邯鄲。臨淄。宛。成都。市長。皆爲五均。司市師也。褰裳而涉汝陽之丘。則天下之稼如雲矣。椎紆而守敖庾海陵之倉。則

山坻之積在前矣。拔衽而登鍾山藍田之上。則夜光瓊瑤之珍可觀矣。夫如是也。爲物甚衆。爲己甚寡。不

愛其身而嗇其神。風驚塵起。散而不止。六疾待其前。五刑隨其後。原注：左氏傳。晉侯求醫於秦。秦使醫和視

之。和曰：是謂近女室。公曰：女不可近乎。對曰：天有六氣。淫生六疾。六氣曰陰。陽。風。雨。晦。明。過則爲災。陰淫寒疾。陽淫熱疾。風淫末疾。雨淫腹疾。晦淫惑疾。明淫心疾。今君不節。能無及此乎。利害生其左。攻奪出其右。

而自以爲見身名之親疏。分榮辱之主客哉。天地之大德曰生。聖人之大寶曰位。何以守位曰仁。何以正

人曰義。故古之王者。蓋以一人治天下。不以天下奉一人也。古之仕者。蓋以官行其義。不以利冒其官也。

古之君子。蓋恥得之而弗能治也。不恥能治而弗得也。原乎天人之性。核乎邪正之分。權乎禍福之門。終

乎榮辱之算。其昭然矣。故君子舍彼取此。若夫出處不違其時。默語不失其人。天動星迴。而辰極猶居其

所。璇。旋。輪。轉。而。衝。軸。猶。執。其。中。既。明。且。哲。以。保。其。身。貽。厥。孫。謀。以。燕。翼。子。者。昔。吾。先。友。嘗。從。事。於。斯。矣。
議。曰。蕭。遠。之。論。謂。治。亂。有。運。窮。達。有。命。而。要。歸。於。任。運。委。命。而。不。及。造。運。立。命。則。未。備。也。夫。運。故。天。之。氣。
數。命。爲。人。之。分。定。而。治。亂。興。亡。則。不。可。以。任。運。吉。凶。得。失。則。不。可。以。委。命。皆。人。爲。有。以。致。之。苟。爲。有。道。匹。
夫。而。終。爲。萬。乘。苟。爲。無。道。萬。乘。而。終。爲。匹。夫。舜。居。深。山。之。中。與。木。石。居。與。鹿。豕。遊。及。聞。一。善。言。見。一。善。行。
若。決。江。河。必。行。而。莫。之。禦。卒。受。天。命。以。匹。夫。而。爲。天。子。紂。爲。無。道。窮。凶。極。侈。滔。天。往。惡。每。稱。說。天。命。謂。我。
生。不。有。命。在。天。卒。自。斷。命。以。天。子。而。爲。匹。夫。故。孔。子。罕。言。命。君。相。不。言。命。君。子。存。心。養。性。以。事。天。天。壽。不。
貳。以。立。命。其。亡。國。者。則。任。運。自。暴。者。則。委。命。欺。天。盜。國。者。則。自。負。運。命。故。王。莽。謂。天。生。德。於。予。曹。操。謂。天。
命。在。吾。吾。爲。周。文。王。矣。惟。莫。之。爲。而。爲。莫。之。致。而。致。如。孔。子。之。無。位。顏。淵。之。短。命。冉。耕。之。惡。疾。孟。軻。之。不。
遇。能。事。天。立。命。不。違。夫。道。而。行。使。止。尼。始。可。以。運。命。言。之。苟。爲。有。位。而。於。道。未。盡。皆。不。可。以。運。命。言。之。夫。
言。之。難。立。論。尤。難。矧。於。運。命。天。道。之。流。行。理。之。極。致。數。之。大。歸。聖。人。所。罕。言。者。而。遽。立。論。馳。騫。於。辭。章。之。
末。可。乎。哉。故。蕭。遠。之。論。則。亦。叔。皮。王。命。之。流。其。任。適。兩。墮。則。老。莊。之。餘。也。非。吾。聖。人。所。謂。命。也。

續後漢書卷第六十六下

以列傳第六十三下下

文藝

吳

左思 弟雲 孫拯

謹案左思傳文闕止存議

議曰賦本詩之一義屈宋作而騷賦興遂與詩別而體制異矣漢興賈誼司馬相如壯浪縱肆宏富高古無以尚矣至揚雄班固摸擬填塞雖工巧而不能窮神入聖於是自以為非若張衡左思則又下揚班遠甚特主撮事類辭章之肆闡爾孟堅平子之兩都二京歸美當代未害於意若太沖之三都以晉繼魏遂鄙蜀抑吳歸美於魏統紀既謬又可與語義乎故文章先義理而後詞藻本體制以定工拙悖理失正而夸多鬪巧不足以為文也故削而不錄云

陸機字士衡大司馬抗之子也身長七尺其聲如鍾謹案晉書作如雷少有異才文章冠世年二十作文賦曰余

每觀才士之所作竊有以得其用心夫放言遣辭良多變矣妍蚩好惡可得而言每自屬文尤見其情恆

患意不稱物。文不逮意。蓋非知之難。能之難也。故作文賦。以述先士之盛藻。因論作文之利害所由。他日殆可謂曲盡其妙。至於操斧伐柯。雖取則不遠。若夫隨手之變。良難以辭逮。蓋所能言者。具於此云。佇中區以元覽。頤情志於典墳。遵四時以歎逝。瞻萬物而思紛。悲落葉於勁秋。喜柔條於芳春。心懷慄以懷霜。志渺渺而凌雲。詠世德之駿烈。誦先人之清芬。遊文章之林府。嘉麗藻之彬彬。慨投篇而援筆。聊宣之乎斯文。其始也。皆收視反聽。耽思傍訊。精驚八極。心遊萬仞。其致也。情曛曠而彌鮮。物昭晰而互進。傾羣言之瀝液。漱六藝之芳潤。浮天淵以安流。溜下泉而潛浸。於是沈辭怫悅。若遊魚銜鈎。而出重淵之深。浮藻聯翩。若翰鳥纓繳。而墜曾雲之峻。收百世之闕文。採千載之餘韻。謝朝華於已披。啓夕秀於未振。觀古今於須臾。撫四海於一瞬。然後選義按部。考辭就班。抱景者咸叩。懷響者畢彈。或因枝以振葉。或沿波而討源。或本隱以之顯。或求易而得難。或虎變而獸擾。或龍見而鳥瀾。或妥帖而易施。或岨嶸原注。上助舉切。下魚呂切。而不安。馨澄心以凝思。眇衆慮而爲言。籠天地於形內。挫萬物於筆端。始躑躅於燥吻。終流離於濡翰。原注。音寒。理扶質以立幹。文垂條而結繁。信情貌之不差。故每變而在顏。思涉樂其必笑。方言哀而已歎。或操觚以率爾。或含毫而邈然。伊茲事之可樂。固聖賢之所欽。課虛無以責有。叩寂寞而求音。函緜邈於尺素。吐滂沛乎寸心。言恢之而彌廣。思按之而逾深。播芳蕤之馥馥。發青條之森森。粲風飛而焱豎。鬱雲起乎翰林。體有萬殊。物無一量。紛紜揮霍。形難爲狀。辭程才以效伎。意司契而爲匠。在有無而僊俛。當淺深而不

讓雖離方而遜圓。期窮形而盡相。故夫夸目者尙奢。愜心者貴當。言窮者無隘。論達者惟曠。詩緣情而綺麗。賦體物而瀏亮。碑披文以相質。誄纏綿而悽愴。銘博約而溫潤。箴頓挫而清壯。頌優游以彬蔚。論精微而朗暢。奏平徹以閑雅。說煒煜而譎誑。雖區分之在茲。亦禁邪而制放。要辭達而理舉。故無取乎冗長。原注

音。其爲物也多姿。其爲體也屢遷。其會意也尙巧。其遣言也貴妍。暨音聲之佚代。若五色之相宣。雖逝止之無常。固崎嶇。原注。上音綺。下音嶇。而難便。苟達變而識次。猶開流以納泉。如失機而後會。恆操末以續顛。謬玄黃之秩敘。故洩忍而不鮮。或仰逼於先條。或俯侵於後章。或辭害而理比。或言順而義妨。離之則雙美。合之則兩傷。考殿最於錙銖。定去留於毫芒。苟銓衡之所裁。固應繩其必當。或文繁理富。而意不指適。極無兩致。盡不可益。立片言而居要。乃一篇之警策。雖衆辭之有條。必待茲而效績。亮功多而累寡。故取足而不易。或藻思綺合。清麗芊眠。炳若縵繡。悽若繁絃。必所擬之不殊。乃闔合乎曩篇。雖杼柚於予懷。怵佗人之我先。苟傷廉而愆義。亦雖愛而必捐。或若發穎豎。離衆絕致。形不可逐。響難爲係。塊孤立而特峙。非常音之所緯。心牢落而無偶。意徘徊而不能掃。石韞玉而山輝。水懷珠而川媚。彼榛楛之勿翦。亦蒙榮於集翠。綴下里於白雪。吾亦濟夫所偉。原注。宋玉對楚王問。客有歌於郢中者。其始曰下里巴人。國中屬而和者數千。引商刻羽。雜以流徵。國中屬而和者數十人。其爲陽阿薳露。國中屬而和者數百人。其爲陽春白雪。國中屬而和者不過數十人而已。是其曲彌高其和彌寡。或託言於短韻。對窮迹而孤興。俯寂寞而無反。仰寥廓而莫承。譬偏絃之獨張。含清唱而靡應。或寄辭於瘁音。言徒靡而弗華。混妍蚩而成體。累良質而爲瑕。象下管之偏

疾。原注。禮記。升歌。清廟。下管象武。故雖應而不和。或遺理以存異。徒尋虛以逐微。言寡情而鮮愛。辭浮漂而不歸。猶絃

么而徽急。故雖和而不悲。或奔放以諧合。務嘈囋。原注。才。曷切。而妖冶。徒悅目而偶俗。固高聲而曲下。寤雍

露與桑間。又雖悲而不雅。或清虛以婉約。每除煩而去濫。闕大羹之遺味。同朱絃之清汜。雖一唱而三歎。

固既雅而不豔。原注。禮記。清廟之瑟。朱絃而疏越。一唱而三歎。有遺音者矣。大饗之禮。尚元酒而俎腥魚。大

歌句者。三歎。三人從而歎之。大饗。肉湊不調以鬪菜也。遺。練朱絃也。練則聲濁。越瑟底孔。靈疏之使聲遲。唱。發猶餘也。然大羹之有餘味以爲古矣。而又闕之。甚之之辭也。若夫豐約之裁。俯仰之形。因宜適變。曲有微情。或

言拙而喻巧。或理朴而辭輕。或襲故而彌新。或沿濁而更清。或覽之而必察。或研之而後精。譬猶舞者赴

節以投袂。歌者應絃而遣聲。是蓋輪扁所不得言。故亦非華說之所能精。原注。莊子。桓公讀書于堂上。輪扁

敢問公之所讀者何言也。公曰。聖人言也。曰。聖人在乎。公曰。死矣。輪扁曰。然則君之所讀者聖人之糟粕爾。公曰

寡人讀書。輪人安得譚乎。有說則可。無說則誅。輪扁曰。臣也以臣之事觀之。斲輪徐則甘而不固矣。疾則苦而不入

矣。不徐不疾。得於心而應於手。口不能言也。有數存焉。於其間。臣不能以喻臣之子。臣之子亦不能受之於臣。普

辭條與文律。良余膺之所服。練世情之常尤。識前修之所淑。雖濬發於巧心。或受岷。原注。與。歎同。於拙目。彼瓊

敷與玉藻。若中原之有菽。同橐籥之罔窮。與天地乎並育。雖紛藹於此世。嗟不盈乎予掬。患挈餅之屢空。

病昌言之難屬。故蹉蹕。原注。上敕甚反。下軟角反。於短韻。放庸音以足曲。恆遺恨以終篇。豈懷盈而自足。懼蒙塵於

叩缶。願取笑乎鳴玉。若夫應感之會。通塞之紀。來不可遏。去不可止。藏若景滅。行猶響起。方天機之駭利。夫何紛而不理。思風發於胸臆。言泉流於脣齒。紛威蕤以駭選。惟毫素之所擬。文徽徽以溢目。聲泠泠而

盈耳。及其六情底滯，志往神留，兀若枯木，豁若涸流，攬營魂以探蹟，頓精爽於自求。理翳翳而愈伏，思乙乙其若抽。是以或竭情而多悔，或率意而寡尤。雖茲物之在我，非余力之所戮。故時撫空懷而自惋，吾未識夫開塞之所由，伊茲文之爲用。固衆理之所因，恢萬里而無閔，通億載而爲津。俯貽則於來葉，仰觀象乎古人。濟文武於將墜，宣風聲於不泯。途無遠而不彌，理無微而弗綸。配霑潤於雲雨，象變化乎鬼神。被金石而德廣，流管絃而日新。抗卒領父兵爲牙門將，吳滅退居舊里，杜門爲學，積十有餘年。以孫氏在吳，而祖父世爲將相，有大勳於江表。孫皓舉而棄之，乃論權所以得皓，所以亡。又述其祖父功業，作辨亡論二篇。其上篇曰：昔漢氏失御，姦臣竊命，禍基京畿，毒徧宇內。皇綱弛紊，王室遂卑。於是羣雄蜂駭，義兵四合。吳武烈皇帝慷慨下國，電發荆南，權略紛紜，忠勇伯世。威稜則夷羿震盪，兵交則醜虜授馘。遂掃清宗，祓蒸醜皇祖。於是雲興之將帶州，鷗起之師跨邑。哮闕之羣風驅，熊羆之衆霧集。雖兵以義合，同盟戮力。然皆包藏禍心，阻兵怙亂。或師無謀律，喪威稔寇。忠規武節，未有如此其著者也。武烈旣沒，長沙桓王逸才命世，弱冠秀發，招攬遺老，與之述業。神兵東驅，奮寡犯衆，攻無堅城之將，戰無交鋒之虜。誅叛柔服，而江外底定。飾法修師，則威德翕赫，寶禮名賢。而張昭爲之雄，交御豪俊。而周瑜爲之傑。彼二君子，皆宏敏而多奇，雅達而聰哲。故同方者以類附，等契者以氣集。而江東蓋多士矣。將北伐諸華，誅鉏千紀，旋皇輿於夷庚。

原注：繁欽辨惑。吳人以船楫爲與馬。以巨海爲夷庚。臧榮緒晉書：夷庚未入乘輿旅館。則夷庚者藏車之所。

反帝座乎紫闥，挾天子以令諸侯。清天步而歸

舊物。戎車既次。羣凶側目。大業未就。中世而殞。用集我大皇帝。以奇蹤襲於逸軌。叡心因於令圖。從政咨於故實。播憲稽乎遺風。而加之以篤固。申之以節儉。疇咨俊茂。好謀善斷。束帛旅於丘園。旌命交於塗巷。故豪彥尋聲而響臻。志士希光而景鶩。異人輻湊。猛士如林。於是張昭爲師傅。周瑜。陸公。魯肅。呂蒙之儔。入爲腹心。出作股肱。甘寧。凌統。程普。賀齊。朱桓。朱然之徒。奮其威。韓當。潘璋。黃蓋。蔣欽。周泰之屬。宣其力。風雅則諸葛瑾。張承。步騭。以名聲光國。政事則顧雍。潘濬。呂範。呂岱。以器任幹職。奇偉則虞翻。陸績。張溫。張惇。以諷議舉正。奉使則趙咨。沈珩。以敏達延譽。術數則吳範。趙達。以禳祥協德。董襲。陳武。殺身以衛主。略統。劉基。彊諫以補過。謀無遺計。舉不失策。故遂割據山川。跨制荆吳。而與天下爭衡矣。魏氏嘗藉戰勝之威。率百萬之師。浮鄧塞之舟。下漢陰之衆。羽檄萬計。龍躍順流。銳騎千旅。虎步原隰。謨臣盈室。武將連衡。喟然有吞江滸之志。一宇宙之氣。而周瑜驅我偏師。黜之赤壁。喪旗亂轍。僅而獲免。收迹遠遁。漢王亦憑帝王之號。帥巴漢之民。乘危聘變。結壘千里。志報關羽之敗。圖收湘西之地。而我陸公亦挫之西陵。覆師敗績。困而後濟。絕命永安。續以濡須之寇。臨川摧銳。蓬籠之戰。子輪不反。由是二邦之將。喪氣挫鋒。勢翻財匱。而吳莞然坐乘其弊。故魏人請好。漢氏乞盟。遂躋天號。鼎峙而立。西屠庸益之郊。北裂淮漢之浹。東包百越之地。南括羣蠻之表。於是講八代之禮。蒐三王之樂。告類上帝。拱揖羣后。虎臣毅卒。循江而守。長戟勁鏃。望颺而奮。庶尹盡規於上。四民展業於下。化協殊裔。風衍遐圻。乃俾一介行人。撫巡外域。巨象

逸駿擾於外閑。明珠瑋寶耀於內府。珍瑰重迹而至。奇玩應響而赴。輜軒騁於南郊。衝軻息於朔野。齊民免干戈之患。戎馬無晨服之虞。而帝業固矣。大皇既沒。幼主蒞朝。姦回肆虐。景皇聿興。虔修遺憲。政無大闕。守文之良主也。降及歸命之初。典刑未滅。故老猶存。大司馬陸公以文武熙朝。左丞相陸凱以審諤盡規。而施績范慎以威重顯。丁奉、離斐謹案。晉書作鍾離斐。文選作離斐。與此合。查孫峻傳云。丁奉、黎斐。黎與離同音。即其人也。以武毅稱。孟宗、丁固之徒。爲公卿樓元、賀邵之屬。掌機事。元首雖病。股肱猶存。爰及末葉。羣公既喪。然後黔首有瓦解之志。皇家有土崩之變。歷命應化而徵。王師躡運而發。卒散於陳。民奔于邑。城池無藩籬之固。山川無溝阜之勢。非有公輸雲梯之械。智伯灌激之害。楚子築室之圍。燕人濟西之隊。軍未浹辰。而社稷夷矣。雖忠臣孤憤。烈士死節。將奚救哉。夫曹劉之將。非一世所選。向時之師。無曩日之衆。戰守之道。抑有前符。險阻之利。俄然未改。而成敗貿理。古今詭趣。何哉。彼此之化殊。授任之才異也。其下篇曰。昔三方之王也。魏人據中夏。漢氏有岷益。吳制荆揚。而奄交廣。曹氏雖功濟諸華。虐亦深矣。其民怨。劉公因險以飾智。功已薄矣。其俗陋。謹案。其民怨。其俗陋。二句。文選俱有矣字。此據晉書刪。夫吳桓王基之以武。大帝成之以德。聰明叡達。懿度宏遠矣。其求賢如不及。卹民如稚子。接士盡盛德之容。親仁罄丹府之愛。拔呂蒙於戎行。識潘濬於係虜。推誠信士。不恤人之我欺。量能授器。不患權之我逼。執鞭鞠躬。以重陸公之威。悉委武衛。以濟周瑜之師。卑官菲食。以豐功臣之賞。披懷虛己。以納謨士之算。故魯蕭一面而自託。士燮蒙險而致命。高張公之德。而省遊田之娛。賢諸葛之

言而割情欲之歡。感陸公之規。而除刑法之煩。奇劉基之議。而作三爵之誓。屏氣跼蹐。以伺子明之疾。分滋損甘。以育凌統之孤。登壇慷慨。而歸魯子之功。削投怨言。信子瑜之節。是以忠臣競盡其謨。志士咸得肆力。洪規遠略。固不厭夫區區者也。故百官苛合。庶務未遑。初都建業。羣臣請備禮秩。天子辭而不許。曰。天下其謂朕何。宮室與服蓋慊如也。爰及中葉。天人之分既定。百度之缺粗修。雖醴化懿綱。未齒乎上代。抑其體國經邦之具。亦足以爲政矣。地方幾萬里。帶甲將百萬。其野沃。其兵練。其器利。其財豐。東負滄海。西阻險塞。長江制其區宇。峻山帶其封域。國家之利未巨。有宏於茲者矣。謹案。未巨與文選合。晉書作未見。借使中才守

之以道。善人御之有術。敦率遺典。勤民謹政。循定策。守常險。則可以長世永年。未有危亡之患也。或曰。吳蜀唇齒之國。蜀滅則吳亡。理則然矣。夫蜀蓋藩援之與國。而非吳人之存亡也。何則。其郊境之接。重山積險。陸無長轂之徑。川阨流迅。水有驚波之難。雖有銳師百萬。啓行不過千夫。舳艫千里。前驅不過百艦。故劉氏之伐。陸公喻之長蛇。其勢然也。昔蜀之初亡。朝臣異謀。或欲積石以險其流。或欲機械以御其變。天子總羣議而咨之大司馬陸公。公以四瀆天地之所以節宣其氣。固無可遏之理。而機械則彼我之所共。彼若棄長技以就所屈。卽荆揚而爭舟楫之用。是天贊我也。將謹守峽口。以待禽爾。逮步闡之亂。憑寶城以延疆寇。重資幣以誘羣蠻。于是大邦之衆。雲翔電發。懸旂江介。築壘遵渚。襟帶要害。以止吳人之西。而巴漢舟師。沿江東下。陸公以偏師三萬。北據東抗。深溝高壘。按甲養威。反虜跪跡待戮。而不敢北窺。生路

強寇敗績宵遁。喪師大半。分命銳師五千西禦水軍。東西同捷。獻俘萬計。信哉賢人之謀。豈欺我哉。自是烽燧少警。封域寡虞。陸公歿而潛謀兆。吳覺深而六師駭。夫太康之役。衆未盛乎曩日之師。廣州之亂。禍有愈乎向時之難。而邦家顛覆。宗廟爲虛。嗚呼。人之云亡。邦國殄瘁。不其然與。易曰。湯武革命。順乎天。元曰。亂不極則治不形。言帝王之因天時也。古人有言曰。天時不如地利。易曰。王公設險以守其國。言爲國之恃險也。又曰。地利不如人和。在德不在險。言守險之由人也。吳之興也。參而由焉。孫卿所謂合其參者也。及其亡也。恃險而已。又孫卿所謂舍其參者也。夫四州之氓。非無衆也。大江之南。非乏俊也。山川之險。易守也。勁利之器。易用也。先政之策。易循也。功不與而禍遘者。何哉。所以用之者失也。是故先王達經國之長規。審存亡之至數。謙己以安百姓。敦惠以致人和。寬沖以誘俊乂之謀。慈和以結士民之愛。是以其安也。則黎元與之同慶。及其危也。則兆庶與之同患。安與衆同慶。則其危不可得也。危與下同患。則其難不足卹也。夫然。故能保其社稷。而固其土宇。麥秀無悲殷之思。黍離無愍周之感矣。原注。史記箕子朝周。生禾黍。箕子傷之。欲哭則不可。欲泣爲其近婦人。乃作麥秀之詩以歌咏之。其詩曰。麥秀漸漸兮。禾黍油油。彼狡童兮。不與我好兮。殷民聞之。皆爲流涕。尚書大傳。微子將朝周。過殷之故墟。見麥秀之漸漸曰。此父母之國。宗廟社稷之所立也。志動心悲。欲哭則朝周。俯泣則近婦人。推而廣之。作雅聲。二說不同。詩序。黍離。閔宗周也。周大夫行役。過故宗廟宮室。爲黍離。徬徨不忍去。而作是詩也。太康末。與弟雲俱入雒。

造太常張華華曰。伐吳之役。利獲二俊。原注。晉書。機嘗詣侍中王濟。濟指羊酪謂機曰。何以敵此。答云。千里尊羹。未下鹽豉。時人稱爲名對。晉書云。遂薦之。諸公

太傅楊駿辟爲祭酒。累遷太子洗馬。著作郎。范陽盧志於衆中問機曰。陸遜陸抗於君近遠。機曰。如君於

盧毓、盧瑛志默然。雲謂機曰：殊邦遐遠，容不相悉。何至於此？機曰：我父祖名播四海，寧不知邪？議者以此定二陸之優劣。吳王晏出鎮淮南，以機爲郎中令，遷尙書中兵郎，轉殿中郎。趙王倫輔政，令爲相國參軍，豫誅賈謐，功賜爵關中侯。倫將篡位，以爲中書郎。倫誅齊王冏，以機職在中書。九錫文及禪詔，疑機爲之。遂收機等九人付廷尉。賴成都王穎、吳王晏救，理得減死徒邊，遇赦而止。

原注：晉書：初機有駿犬，名曰黃耳，甚愛之。旣而歸寓京師，久無

家問。笑語犬曰：我家絕無書信，汝能齋書取消息不？犬搖尾作聲。機乃爲書以竹筒盛之，而繫其頸，犬尋路南走，遂至其家，得報還洛。其後因以爲常。

時中國多難，顧榮戴若思等咸勸

機還吳，機負其才望，志匡世難，不從。冏旣矜功自伐，受爵不讓，機惡之作豪士賦以刺其序曰：夫立德之基有常，而建功之路不一。何則？循心以爲量者存乎我，因物以成務者繫乎彼。存乎我者，隆殺止乎其域；繫乎彼者，豐約惟所遭遇。落葉俟微颺以隕，而風之力蓋寡；孟嘗遭雍門以泣，而琴之感以末。何哉？欲隕之葉，無所假烈風；將墜之泣，不足煩哀響也。是故苟時啓于天，理盡於人。庸夫可以濟聖賢之功，斗筲可以定烈士之業。故曰：才不半古，功已倍之。蓋得之于時勢也。歷觀古今，徼一時之功，而居伊周之位者有矣。夫我之自我，智士猶嬰其累物之相物，昆蟲皆有此情。夫以自我之量，而挾非常之勳，神器輝其顧盼，萬物隨其俯仰。心玩居常之安，耳飽從諛之說，豈識乎功在身外，任出才表者哉？且好榮惡辱，有生之所大期，忌盈害上，鬼神猶且不免。人主操其常柄，天下服其大節。故曰：天可仇乎，而時有袂服荷戟，立乎廟門之下，援旗誓衆，奮於阡陌之上。況乎代主制命，自下裁物者乎？廣樹恩不足以敵怨，勤興利不足以補

害故曰。代大匠斲者。必傷其手。且夫政由甯氏。忠臣所以慷慨。祭則寡人。人主所不久堪。是以君爽快。不悅公旦之舉。高平師側目博陸之勢。原注。班固述魏相曰。高平師師。惟辟作威。國黜凶害。天子是叱。博陸侯。霍光也。而成王不遣嫌吝于懷。宣帝若負芒刺於背。原注。漢書。宣帝始立。謁見高廟。大將軍光從參乘。上內殿憚之。若有芒刺在背。非其然者歟。嗟乎。光于四表。德莫富焉。王曰。叔父親莫昵焉。登帝天位。功莫厚焉。守節沒齒。忠莫至焉。而傾側顛沛。僅而自全。則伊生抱明允以嬰戮。文子懷忠敬而齒劍。原注。竹書紀年。大甲潛出自桐。殺伊尹。吳越春秋。文種者姓文。字少禽。固其所也。因斯以言。夫以篤聖穆親如彼之懿。大德至忠如此之盛。尙不能取信於人主之懷。止謗于衆多之口。過此以往。惡觀其可安危之理。斷可識矣。又況乎饜大名以冒道家之忌。運短才而易聖哲所難者哉。身危由于勢過。而不知去勢以求安。禍積起於寵盛。而不知辭寵以招福。見百姓之謀己。則申宮警守以崇不畜之威。懼萬方之不服。則嚴刑峻制以賈傷心之怨。然後威窮乎震主。而怨乎上下。衆心日陟。危機將發。而方偃仰瞪盱。謂足以夸世。笑古人之未工。忘己事之已拙。知曩勳之可矜。開成敗之有會。是以事窮運盡。必于顛仆。風起塵合。而禍至常酷也。聖人忌功名之過己。惡寵祿之踰量。蓋爲此也。夫惡欲之大端。賢愚所共有。而遊子殉高位於生前。志士思垂名於身後。受生之分。惟此而已。夫蓋世之業。名莫盛焉。率意無違。欲莫順焉。借使伊人頗覽天道。知盡不可益。盈難久持。超然自引。高揖而退。則巍巍之盛。仰邈前賢。洋洋之風。俯冠來籍。而大欲不止於身。至樂無愆乎舊。節彌效而德彌廣。身逾逸而名逾劭。此之不爲。而彼之必昧。然後河海之迹。湮爲窮流。

一匱之釁積成山嶽名編凶頑之條身厭荼毒之痛豈不謬哉故聊爲賦焉庶使百世少有悟云問不之悟而竟以敗機又以聖王經國義在封建因著五等論曰夫體國經野先王所慎創制垂基思隆後葉然而經略不同長世異術五等之制始于黃唐郡縣之治創于秦漢得失成敗備在典謨是以其詳可得而言夫王者知帝業至重天下至廣廣不可以偏制重不可以獨任任重必於借力制廣終乎因人故設官分職所以輕其任也並建五長所以宏其制也於是乎立其封疆之典裁其親疏之宜使萬國相維以成磐石之固宗庶雜居以定維城之業又有以見綏世之長御識人情之大方知其爲人不如厚己利物不如圖身安上在於悅下爲己存乎利人故易曰悅以使人人忘其勞孫卿曰不利而利之不如利而後利之利也是以分天下以厚樂則己得與之同憂饗天下以豐利而已得與之共害利博則恩篤樂遠則憂深故諸侯享食土之實萬國受傳世之祚夫然則南面之君各務其政九服之內知有定主上之子愛於是乎生下之禮信於是乎結世平足以敦風道衰足以禦暴故彊毅之國不敢擅一時之勢雄俊之人無所寄霸王之志然後國安由萬邦之思化主尊賴羣后之圖身譬猶衆目營方則天綱自昶四體辭難而心膂獲爰蓋三代所以直道四王所以垂業也夫盛衰隆弊理所固有教之廢興繫乎其人原法期於必諒明道有時而闡故世及之制弊于彊禦厚下之典漏於未折侵弱之釁遵自三季陵夷之禍終乎七雄昔成湯親照夏后之鑒公旦目涉商人之戒文質相濟損益有物然五等之禮不革於時封畛之制有隆

於昔豈玩二王之禍而闡經世之算乎。因知百世非可懸御。善制不能無弊。而侵弱之辱。愈于殄祀。土崩之固。痛於凌夷也。是以經始獲其多福。慮終取其少禍。非謂侯伯無可亂之符。郡縣非興化之具。故國憂賴其釋位。主弱憑其翼戴。及承微積弊。王室遂卑。猶保名位。祚垂後嗣。皇統幽而不輟。神器否而必存者。豈非事勢使之然與。降及亡秦。棄道任術。懲周之失。自矜其得。尋斧始於所庇。制國昧于弱下。國慶獨享其利。主憂莫與共害。雖速亡趨亂。不必一道。顛沛之變。實由孤立。是蓋思五等之小怨。忘萬國之大德。和陵夷之可患。闢土崩之爲痛也。周之不競。有自來矣。國乏令主。十有餘世。然片言勤王。諸侯必應。一朝震矜。遠國先叛。原注。公羊傳。葵丘之會。齊桓公震而矜之。叛者九國。震之者何。何休曰。振振然。矜之者何。猶莫我若也。故彊晉收其請隧之圖。暴楚頓其觀鼎之志。原注。請隧事見曹植傳。楚子伐陸渾之戎。遂至於雒。定王使王孫滿勞楚子。楚子問鼎之大小輕重焉。豈劉項之能闕關。勝廣之敢號澤哉。原注。漢書。沛公自武關入秦。又曰。羽至函谷關。使當陽君擊羽。羽入至戲。借使秦人因循其制。雖則無道。有與共亡。覆滅之禍。豈在曩日。漢矯秦枉。大啓王侯。境土踰溢。不遵舊典。故賈生憂其危。鼂錯痛其亂。是以諸侯阻其國家之富。憑其士庶之力。勢足者反。疾土狹者逆。遲六臣犯其弱網。七子衝其漏網。原注。漢書。賈誼曰。大抵強者先反。故淮陰王楚最彊。則最先反。韓信倚胡。則又反。賈高因趙資。則又反。陳豨兵精。則又反。彭越用梁。則又反。黥布用淮南。則又反。盧縮最弱。最後反。景帝卽位。鼂錯說上令削吳。及書至。吳王起兵。誅漢吏二千石以下。膠西。膠東。淄川。濟南。楚。趙。亦皆反也。然誼言八而機言六者。賈高非五等。盧縮亡入匈奴。故不數之。皇祖夷於黥徒。西京病於東帝。原注。皇祖。高祖也。史記。淮南王黥布反。高祖自往擊之。布走。高祖時爲流矢所中。行道病。至長安崩。前漢書。吳王濞傳。及削吳會稽。豫章郡。書至。起兵反。以袁盎爲太常使吳。魚王聞盜來。知其欲說。笑而應曰。我以爲東帝尙誰拜。不肯見盎。是蓋過正之災。而非建侯之累也。然呂氏之難。朝士外顧。宋昌

策漢必稱諸侯

原注：漢書：呂產呂祿作亂。朱虛侯使人告兄齊王令發兵西。大臣迎立代王。張武以為不可往。宋昌曰：內有朱虛東牟之親。外畏吳。楚。淮南。鄒。齊。代之強。故迎立大王。大王勿疑。

逮至中葉。忌其失節。割削宗子。有名無實。天下曠然。復襲亡秦之轍矣。

原注：漢書：諸侯小者。淫荒越法。大者睽孤橫逆。以害身喪國。故文帝采。

賈生之議分齊趙。景帝用罷錯之計削吳楚。

是以五侯作威。不忌萬邦。新都襲漢。易於拾遺也。

原注：漢書：成帝悉封舅。譚為平阿侯。南成。都侯。立紅陽侯。根曲陽侯。

逢時高平侯。五人同日封。故世謂之五都。又封非為新都侯。

光武中興。纂隆皇統。而猶遵覆車之遺轍。養喪家之宿疾。僅及數世。姦宄充斥。卒有彊臣專朝。則天下風靡。一夫從衡。而城池自夷。豈不危哉。在周之衰。難興王室。放命者七臣。干位者三子。嗣王委其九鼎。凶族據其天邑。

原注：左氏傳：初王姚嬖于莊王。生子頤。子頤有寵。為國為之師。及惠。跪與詹父田。而收膳夫之秩。故薨國。邊伯。石速。詹父。子禽。祝跪作亂。因蘇氏。秋。五大夫奉子頤以伐王。不克。出奔溫。蘇子奉子頤以奔衛。衛師。燕師伐周。冬立子頤。初甘昭公有寵于惠后。將立之。未及而卒。昭公奔齊。王復之。又通於隗氏。王替隗氏。頤叔桃子曰：我實使狄。狄其怨我。遂奉大叔以狄師攻王。王御土將禦之。王曰：先。后其謂我何。寧使諸侯圖之。王遂出。及狄。國人納之。秋。頤叔桃子奉大叔以狄師伐周。大敗周師。獲周公忌父。原伯。毛伯。宮辰。王出適鄭。處于汜。太叔以隗氏居于溫。王子朝。實起有寵于景王。王崩。子朝因舊官百工之喪。職秩者與靈景之族以作亂。單子逆悼王子莊宮。以歸王。子猛卒。敬王即位。尹氏立王子朝。劉子以王出次于滑。晉趙。鞅帥師納王。尹氏。召氏。毛伯。以王子朝奔楚。王入于成周。七臣。薨國。邊。鉦。鞞。震於闕宇。鋒鏑流於絳闕。伯。詹父。子禽。祝跪。及頤。叔。桃子。實起也。三子。子頤。叔帶。子朝也。

然禍止幾旬。害不覃及天下。晏然以安待危。是以宜王與于共和。襄惠振於晉鄭。

原注：史記：厲王出奔于。號曰共和。十四年。厲王死于厲。二相乃共立宣王。左氏傳：惠王即位。衛師伐周。立子頤。虢公。鄭伯同伐。王城。殺子頤及五大夫。襄王出居于鄭。晉侯辭秦師而下右師圍溫。左師逆王。王入於王城。取太叔于溫。殺之于隰。城。

豈若二漢階閭暫擾。而四海已沸。孽臣朝入。而九服夕亂哉。

原注：董卓也。遠惟王莽篡逆之事。近攬董。卓擅權之際。億兆悼心。愚智同痛。然周以之存。漢以之亡。夫何故哉。豈世乏曩時之臣士。無匡合之志歟。

卓擅權之際。億兆悼心。愚智同痛。然周以之存。漢以之亡。夫何故哉。豈世乏曩時之臣士。無匡合之志歟。

蓋遠績屈於時異。雄心挫於卑勢耳。故烈士扼腕終委寇仇之手。忠人變節以助虐國之桀。雖復時有鳩

合同志以謀王室。然上非奧主。下皆市人。師旅無先定之班。君臣無相保之志。是以義兵雲合。無救劫殺

之禍。原注。漢書。王莽居攝。翟義與劉宇。劉橫。結謀舉義兵立劉信爲天子。義敗。皆爲莽所誅。後漢書。董卓以韓馥爲冀州刺史。劉岱爲兗州刺史。各舉義兵討卓。卓乃醜殺宏農王。遷帝於長安。左氏傳。韓宣子問於叔向。

曰。子干其濟乎。對曰。難共有龜。子國有奧主。衆望未改而已。見大漢之滅矣。或以諸侯世位不必常全。昏主暴君有時比迹。故

五等所以多亂。今之牧守皆官方庸能。雖或失之。其得固多。故郡縣易以爲政。夫德之休明。黜陟日用。長

率連屬咸述其職。而淫昏之君無所容過。何則其不治哉。故先代有以之興矣。苟或衰陵。百度自悖。嚮官

之吏以貨準才。則貪殘之萌皆羣后也。安在其不亂哉。故後王有以之廢矣。且要而言之。五等之君爲己

思政。郡縣之長爲吏圖物。何以徵之。蓋企及進取。仕子之常志。修己安人。良士之所希。及夫進取之情銳

而安人之譽遲。是故侵百姓以利己者。在位所不憚。損實事以養名者。官長所夙慕也。君無卒歲之圖。臣

挾一時之志。五等則不然。知國爲己土。衆皆我民。民安己受其利。國傷家嬰其病。故前人欲以垂後。後嗣

思其堂構。爲上無苟且之心。羣下知膠固之義。使其並賢居治。則功有厚薄。兩慮處亂。則過有深淺。然則

八代之制。幾可以一理貫。秦漢之典。殆可以一言蔽也。機感成都王穎全濟之恩。又思朝廷屢有變難。謂

穎必能戡定。遂委質焉。穎以機參大將軍軍事。表爲平原內史。機表謝曰。陪臣機言。今月九日。魏郡太守

遣兼丞張含齋板詔書印綬。假臣爲平原內史。拜受祇竦。不知所裁。臣機頓首頓首。死罪死罪。臣本吳人。

出自敵國。世無先臣宣力之效。才非丘園耿介之秀。皇澤廣被。惠濟無遠。擢自羣萃。累蒙榮進。入朝九載。歷官有六。身登三閣。官成兩宮。服冕乘軒。仰齒貴遊。振景拔迹。顧邈同列。施重山岳。義足灰沒。遭國顛沛。無節可紀。雖蒙曠盪。臣獨何顏。俛首頓膝。憂愧若厲。而橫爲故齊王罔所見。枉陷誣臣與衆人共作禪文。幽執囹圄。當爲誅始。臣之微誠。不負天地。倉卒之際。慮有逼迫。乃與弟雲及散騎侍郎袁瑜。中書侍郎馮熊。尙書右丞崔基。廷尉正顧榮。汝陰太守曹武。思所以獲免。陰蒙避迴。崎嶇自列。片言隻字。不關其間。事蹤筆跡。皆可推校。而一朝翻然。更以爲罪。叢爾之生。尙不足去。區區本懷。實有可悲。畏逼天威。卽罪惟謹。鉗口結舌。不敢上訴所天。莫大之釁。日經聖聽。肝血之誠。終不一聞。所以臨難慷慨。而不能不恨恨者。惟此而已。重蒙陛下愷悌之宥。迴霜收電。使不隕越。復得扶老攜幼。生出獄戶。懷金拖紫。退就散輩。感恩惟咎。五情震悼。跼天踏地。若無所容。不悟日月之明。遂垂曲照。雲雨之澤。播及朽瘁。忘臣弱才。身無足采。哀臣零落。罪有可察。苟削丹書。得夷平民。則塵洗天波。謗絕衆口。臣之始望。尙未至是。猥辱大命。顯授符虎。使春枯之條。更與秋蘭垂芳。陸沈之羽。復與翔鴻撫翼。雖安國免徙。起紆青組。張敞亡命。坐致朱軒。方臣所尙。未足爲泰。豈臣蒙垢含忝。所宜忝竊。非臣毀宗夷族。所能上報。喜懼參并。悲慙哽結。拘守常憲。當便道之官。不得束身奔走。稽顙城闕。瞻係天衢。馳心輦轂。臣不勝屏營延仰。太安初。穎與河間王容起兵討長沙王。又假機後將軍河北大都督。督北中郎將王粹。冠軍牽秀諸軍二十餘萬。機以三世爲將。道家所

忌。又羈旅入宦。頓居羣士之右。而王粹牽秀。皆有怨心。固辭都督。穎不許。機鄉人孫惠亦勸機讓都督於粹。機曰。將謂吾爲首鼠避賊。所以速禍也。遂行。穎謂機曰。若功成事定。當爵爲郡公。位以台司。將軍勉之。機曰。昔齊桓任夷。吾以建九合之功。燕惠疑樂毅以失垂成之業。今日之事。在公不在機也。穎左長史盧志害機寵。言於穎曰。陸機自比管樂。擬君闇主。自古命將遣師。未有臣陵其君而可以濟事者。穎默然。機始臨戎。而牙旂折。意甚惡之。列軍自朝歌至於河橋。金鼓之聲。聞數百里。漢魏以來。出師之盛。未之有也。長沙王又奉天子與機戰於鹿苑。機軍大敗。赴七里澗而死。者如積水爲之不流。將軍賈稜皆死之。初。宦人孟玖弟超並嬖於穎。超領萬人爲小都督。未戰。縱兵大掠。機錄其主者。超將鐵騎百餘人直入機麾下。奪之。顧謂機曰。貉奴能作督不。機司馬孫拯勸機殺之。機不能用。超宣言於衆曰。陸機將反。又還書與玖。言機持兩端。軍不速決。及戰。超不受機節度。輕兵獨進而沒。玖疑機殺之。遂譖機於穎。言其有異志。將軍王闡、郝昌、公師籓等皆玖所用。與牽秀等共證之。穎大怒。使秀密收機。其夕。機夢黑幘繞車。手決不開。天明而秀兵至。機釋戎服。著白帔。與秀相見。神色自若。謂秀曰。自吳朝傾覆。吾兄弟宗族蒙國重恩。入侍帷幄。出剖符竹。成都命吾以重任。辭不獲已。今日受誅。豈非命哉。因與穎牋。詞甚悽惻。旣而歎曰。華亭鶴唳。可復聞乎。遂遇害於軍中。時年四十三。二子蔚、夏亦同被害。機旣死。非其罪。士卒莫不流涕。是日昏霧晝合。大風折木。平地尺雪。議者以爲陸氏之冤。機天才秀逸。辭藻宏麗。張華嘗謂之曰。人之爲文。常恨才少。

而子更患其多弟。雲嘗與書曰：君苗見兄文，輒欲燒其筆硯。後葛洪著書稱機文猶元圃之積玉，無非夜光焉。五河之吐流，泉源如一焉。其宏麗妍瞻，英銳漂逸，一代之絕也。然好遊權門，與賈謐親善，以進取獲譏。所著文章凡三百餘篇，並行於世。雲字士龍，六歲能屬文，性清正，有才理，少與兄機齊名。雖文章不及機，而持論過之。號曰二陸。幼時尚書廣陵閔鴻見而奇之，曰：此兒若非龍駒，當是鳳雛。遂舉雲賢良。時年十六，吳平入雒。原注：晉書。機初之張華。華問雲何在。機曰：雲有笑疾，未敢自見。俄而雲至。華爲人多姿制，又獲免。雲與荀隱素未相識。嘗會華座。華曰：今日相遇，可勿爲常談。雲因抗手曰：雲聞陸士龍。隱曰：日下荀鳴鶴。鳴鶴。隱字也。雲又曰：旣開青雲觀，白雉。何不張爾弓。挾爾矢。隱曰：本謂是雲龍駮駮。乃是山鹿野藥。獸微嘗強。是以發迴。華撫掌大笑。揚州刺史周浚辟爲從事，謂人曰：陸士龍當今之顏子也。俄以公府掾爲太子舍人，出補浚儀令。人有見殺者，主名不立。雲錄其妻而無所問。十許日，遣出，密令人隨後，謂曰：其去不出十里，當有男子候之與語，便縛來。旣而果然。問之具服，云：與此妻通，共殺其夫。聞妻得出，欲與語，憚近縣，故遠相要候。於是一縣稱爲神明。郡守害其能，屢譴責之。雲乃去官。百姓追思之，圖畫形象，配食縣社。尋拜吳王晏郎中令。晏於西園大營第室，雲上書曰：臣竊見世祖武皇帝臨朝拱默，訓世以儉，卽位二十有六載，宮室臺榭無所新營，屢發明詔，厚戒豐奢。國家纂承，務在遵奉，而世俗凌遲，家競盈溢，漸漬波蕩，遂以成風。雖嚴詔屢宣，而侈俗滋廣。每觀詔書，衆庶歎息。清河王昔起墓宅，時手詔追述先帝節儉之教，懇切之旨，形於四海。清河王毀壞成宅，以奉詔命。海內聽望，咸用欣然。臣愚以先帝遺教，日以凌替。今與國家協崇大化。

追闡前蹤者。實在殿下先敦素朴。而後可以訓正四方。凡在崇麗。一宜節之以制。然後上厭帝心。下允時望。臣以凡財。特蒙拔擢。亦思竭忠效節。以報所受之施。是以不慮犯迂。敢陳所懷。如愚臣言有可采。乞垂三省。時晏信任部將使覆察諸官錢帛。雲又諫曰。伏見令書以部曲將李咸。馮南。司馬吳定。給使徐泰等覆校諸官市買錢帛簿。臣愚以聖德龍興。光有大國。選衆官材。庶工肄業。中尉該。大農誕。皆清廉淑慎。恪居所司。其下衆官。悉州閭一介。疏闕之咎。雖可日聞。至於處義用情。庶無大戾。今咸南軍旅小人。定泰士卒。廝賤。非有清慎素著。忠公足稱。大臣所關。猶謂未詳。咸等督察。然後得信。既非開國勿用之義。又傷殿下推誠曠蕩之量。雖使咸等能盡節益國。而功利百倍。至於光輔國美。猶未若開懷信士之無失。況所益不過姑息之利。而使小人用事。大道凌替。此臣所以慷慨也。臣備位大臣。職在獻可。苟有管見。敢不盡規。愚以宜發明令。罷此等覆察。衆事一付治書。則大信臨下。人思盡節矣。雲愛才好士。多所貢達。移書大常府。薦同郡張瞻曰。蓋聞在昔聖王。承天御世。殷薦明德。思和人神。莫不崇典。謨以教思。興禮樂以陶遠。是以帝堯昭煥。而道協人天。西伯質文。而周隆二代。大晉建皇。崇配天地。區夏旣混。禮樂將庸。君侯應歷。運之會。贊天人之期。博延俊茂。熙隆載典。伏見衛將軍舍人同郡張瞻。茂德清粹。器思深通。初慕聖門。棲心重切。啓塗及階。遂升樞輿。抽靈樞於祕宮。披金縢於元夏。思樂百代。博採其珍。辭邁翰林。言敷其藻。探微集逸。思心洞神。論道厲書。篇章光觀。含奇宰府。婆娑公門。棲靜隱寶。淪虛藏器。駸裳襲錦。緇衣被玉。曾泉

改路懸車將邁。考槃下位。歲聿屢遷。縉紳之士。具懷慷慨。方今太清闢宇。四門啓籥。元綱括地。天網廣羅。慶雲興以招龍。和風起而儀鳳。誠巖穴耀穎之秋。河津託乘之日也。而瞻沈淪下位。羣望悼心。若得端委太學。錯綜先典。垂纓玉階。論道紫宮。誠帝室之瑰寶。清廟之偉器。廣樂九奏。必登昊天。之庭。韶夏六變。必饗上帝之祀矣。原注。周禮大司樂。凡六樂者。一變而致羽物及川澤之節。再變而致羸物及山林之節。三變而致鱗物及丘陵之節。四變而致毛物及墳衍之節。五變而致介物及土節。六變而致象物及天神。入為

尚書郎。侍御史。太子中舍人。中書侍郎。成都王穎表為清河內史。穎將討齊王冏。以雲為前鋒都督。會問誅轉大將軍。右司馬。穎晚節政衰。雲屢以直言忤旨。孟玖欲用其父為邯鄲令。左長史盧志等並阿意從之。而雲固執不許。曰。此縣皆公府掾資。豈有黃門父居之邪。玖深忿怨。張昌為亂。穎上雲為使持節大都督。前鋒將軍。以討昌。會伐長沙王。乃止。機之敗也。并收雲。穎官屬江統。蔡克。棗嵩等上疏曰。統等聞人主聖明。臣下盡規。苟有所懷。不敢不獻。昨聞教以陸機後失軍期。師徒敗績。以法加刑。莫不謂當。誠足以肅齊三軍。威示遠近。所謂一人受戮。天下知誡者也。且聞重教。以機圖為反逆。應加族誅。未知本末者。莫不疑惑。夫爵人於朝。與衆共之。刑人於市。與衆棄之。惟刑之恤。古人所慎。今明公興舉義兵。以除國難。四海同心。雲合響應。罪人之命。懸於漏刻。秦平之期。不且則夕矣。機兄弟並蒙拔擢。俱受重任。不當背罔極之恩。而向垂亡之寇。去泰山之安。而赴累卵之危也。直以機計慮淺近。不能董攝羣帥。致果殺敵。進退之間。事有疑似。故令聖鑒未察其實耳。刑誅事大。言機有反逆之徵。宜令王粹。牽秀。檢校其事。令事驗顯然。暴

之百姓然後加雲等之誅。未足爲晚。今此舉措實爲太重。得則足令天下情服。失則必使四方心離。不可不審。詳慎。統等區區。非爲陸雲請一身之命。實慮此舉有得失之機。敢竭愚慙。以備誹謗。穎不納。統等重請。穎遲回者三日。盧志又曰。昔趙王毅中護軍趙浚。赦其子驤。驤詣明公而擊趙。卽前事也。蔡克入至穎前。叩頭流泣曰。雲爲孟玖所怨。遠近莫不聞。今果見殺。罪無彰驗。將令羣心疑惑。竊爲明公惜之。僚屬隨克入者數十人。流涕固請。穎惻然有宥雲色。孟玖扶穎入。催令殺雲。時年四十二。有二女。無男。門生故

吏迎喪葬清河。修墓立碑。四時祠祭。所著文章三百四十九篇。又撰新書十篇。並行於世。

原注。晉書。初雲嘗行。逗宿故人

家。夜暗迷路。莫知所從。忽望草中有火光。於是趨之。至一家。便寄宿。見年少。美風姿。共談老子。辭致深遠。向曉辭去。行十里許。至故人家云。此數十里中無人居。雲意始悟。卻尋昨宿處。乃王弼家。雲本無元學。自此談老

殊進

雲弟耽爲平東祭酒。亦有清譽。與雲同遇害。初抗之克步闡也。誅及嬰孩。識者尤之。曰。後世必受其

殃。及機之誅。陸氏無遺。大將軍參軍孫惠與淮南內史朱誕書曰。馬援擇君。凡人所聞。不意三陸相攜。闡

朝。一旦湮滅。道業淪喪。可爲悼歎。後東海王越討穎。移檄天下。亦以機雲兄弟枉害罪狀。穎云。謹案。目錄附孫拯。稽陶

闡。今

議曰。楚祖鬻熊爲文王師。今其書有鬻子者。其後成穆。莊靈與齊。晉狎主夏盟。虞夏商周之後。皆朝於郢。

嘗用六王二公之禮。則其文物不異諸華。左史倚相能讀三墳。五典八索。九丘之書。右尹子革復能誦所

招之詩。則學問淵源。自同於齊魯。豈無風雅之文乎。孔子以其僭三紀而弗錄。故楚之文辭不見於六經。

之中及其終也。屈原以騷賦爲辭人倡。自置六經之後。秦漢而下。莫不遵之。於是六經之文不復作。盡爲騷人辭客而文章盛矣。建安末。曹氏昆弟雖論體製。猶未大備。陸氏世雄荆楚。累將重侯。丕顯武烈。未有文人國亡而機雲出焉。機年二十作文賦。遠探屈宋。下拉曹劉。窮極作文之情狀。推本篇章之體制。究竟辭藻之利病。精粗本末。無不周悉。遂爲作者大匠。百世文宗。嗚呼。六經之後。文章之學。皆本於楚。豈抑之久。故發之傑。且異歟。抑豈江山之勝。篤生異人哉。夫發造物之變者。必見惡于鬼神。屈平沈江。陸機伏鱗。天奪之也。又可問天耶。又可尤人耶。

贊曰。三辰麗天。萬類賁土。紛我情志。葩芬抽吐。儲神郁氣。夏摩律呂。駕才摘藻。厭客尊主。經緯典則。芟崇費淫。雕仁琢義。追玉鏘金。體制不紊。淵源益深。搜抉理窟。步驟辭林。爰始屈宋。遂極漢魏。七子偕作。視古無愧。

續後漢書卷第六十七

列傳第六十四

行人

漢

鄧芝

宗預

陳震

吳

顧徽

趙咨

沈珩

陳化

浩周

鄭泉

馮熙

張溫

秦旦

鄭胄

紀陟

宏璠

張儼

周官大行人王交諸侯則問以諭志歸賑以交福賀慶以贊喜致禮以補裁諸侯之邦交則歲相問殷相聘世相朝故自王朝及諸侯皆有行人之職焉所以維持恩紀為太和之治也及周之衰諸侯比周大夫交政行人之職尤重晉之子員鄭之子羽皆其選也至于大征伐盛會同皆正卿命大夫親行逮夫戰國四公子之徒連車騎結賓客勢焰翕赫聳動天下蘇秦乃佩六國相印為從長而張儀出入並相數國為衡家布衣崛起鼓舌張吻搖撼王公大人以排難解紛如魯仲連毛遂者不可勝數昔之行人舉為說

客矣。漢興猶有先秦遺風。蒯、鄧、隨、陸。

原注。蒯通。鄧食其。隨何。陸賈。

高視闊步于慶兵之時。及中原無事。劉敬始結和

親。使外夷。至于孝武開邊。通西南夷。西域。兩粵。朝鮮。而使者冠蓋相望于異域矣。然而祇以中國交夷狄。

勤遠略而已。未繫于安危存亡之際也。建安末。海宇剝裂。國別爲三。行人雖不置官。而職任益重。初。昭烈

不得還漢。託足無所。孔明求救于孫權。與共拒曹操。至昭烈親詣京口。見權。有不得已焉者。自是漢納交

于吳。而行李往來矣。及昭烈得益州。而權爭荊州。權乃稱臣於操。以襲關侯。吳納交於魏。而使相通矣。

昭烈討權。權懼而稱臣於曹丕。使命再通矣。權復叛魏。遣使聘漢。漢報其聘。漢吳復交矣。吳與魏通。而中

絕。其後復與晉通。而復絕。與漢再通。而終末帝之亡。而不絕。漢賊不共戴天。終與魏絕。故其行人往還。皆

安危存亡大計。重於周秦漢初之世。漢吳初合。而勝赤壁。吳魏初合。而勝荊州。漢吳再合。而勝漢中。吳魏

再合。而勝猗亭。漢吳復合。而首尾並進。聲罪致討。孫權出濡須。諸葛亮軍渭南。魏人來震。君臣盱食。行人

之職。顧不重哉。故取漢吳行人之尤彰灼者。著於篇。魏晉雖亦通使於吳。而約質不終。削而不錄云。

鄧芝字伯苗。義陽新野人。司徒禹之後也。靈帝末。入蜀。未見知待。時益州從事張裕善相。芝往從之。裕謂

芝曰。君年過七十。位至大將軍。封侯。芝聞巴西太守龐羲好士。往依焉。昭烈定益州。芝爲郫邸閣督。昭烈

出至郫。與語。大奇之。擢爲郫令。遷廣漢太守。所在清嚴。有治績。入爲尙書。昭烈崩于永安。先是孫權請和。

昭烈累遣宗瑋。費禕等相與報答。丞相亮深慮權聞昭烈崩殂。有異計。未知所如。芝見亮曰。今主上幼弱。

初卽位。宜遣大使重申吳好。亮曰：吾思之久矣，未得其人。爾今日始得之。芝問其人爲誰，亮曰：卽使君也。乃遣芝修好於權。權果狐疑，不時見芝。芝乃自表請見，權曰：臣今來亦欲爲吳，非但爲漢也。權乃見之。語芝曰：孤誠願與漢和親，然恐漢主幼弱，國小勢偏，爲魏所乘，不自保全。以此猶豫，爾芝對曰：吳漢二國，四州之地，大王命世之英，諸葛亮亦一世之傑也。漢有重險之固，吳有三江之阻。謹案：志此下有合此二長四字。共爲唇齒，進可并兼天下，退可鼎足而立。此理之自然也。大王今若委質於魏，魏必上望大王之入朝，下求太子之內侍。若不從命，則奉辭伐叛，漢必順流見可而進。如此江南之地，非復大王之有也。權默然良久曰：君言是也。遂絕魏與漢和，遣張溫來報聘。漢復令芝重往，權謂芝曰：若天下太平，二主分治，不亦樂乎？芝對曰：夫天無二日，民無二王。如并魏之後，大王未深識天命者也。君各茂其德，臣各盡其忠，將提枹鼓則戰爭，方始爾。權大笑曰：君之誠款，乃爾邪？權與亮書曰：丁亥，挾張。原注：裴松之曰：挾，夷念反。或作醢。權蓋謂丁亥之言多浮醢也。陰化不盡，和合二國。惟有鄧芝及亮北住漢中，以芝爲中監軍、揚武將軍，亮薨，遷前軍師、前將軍，領兗州刺史，封陽武亭侯。頃之爲督江州，權數與芝相聞，饋遺優渥。延熙六年，就遷車騎將軍，後假節。十一年，涪陵國人殺都尉反，叛芝率軍征討，卽梟其渠帥，百姓安堵。初征涪陵，見元獐抱子緣山木，芝引弩射之，中其母，其子爲拔箭，以木葉塞創。芝歎息投弩水中曰：嘻，吾違物之性，其將死矣。十四年薨，芝爲大將軍二十餘年，賞罰明斷，善郵卒伍，身之衣食資仰於官，不苟素儉，然終不治私產，妻子不免飢寒。死之日，家無餘財，性剛簡。

不飾意氣。不得士類之和。於時人少所敬貴。惟器異姜維云。子良襲爵。景耀中爲尙書左選郎。漢亡入晉爲廣漢太守。

宗預字德豔。南陽安衆人也。昭烈取益州。隨張飛入蜀。建興初。丞相亮以爲主簿。遷參軍。右中郎將。及亮薨。吳慮魏或乘衰取蜀。增巴丘守兵萬人。一欲以爲救援。二欲以事分割也。漢聞之。亦益永安之守。以防非常。預將命使吳。孫權問預曰。東之與西。譬猶一家。而聞西更增白帝之守。何也。預對曰。臣以爲東益巴丘之戍。西增白帝之守。皆事勢宜然。俱不足以相問也。權大笑。嘉其抗直。甚愛待之。見敬亞於鄧芝。費禕遷爲侍中。徙尙書。延熙十年。爲屯騎校尉。時車騎將軍鄧芝自江州還來朝。謂預曰。禮六十不服戎。而卿甫受兵。何也。預答曰。卿七十不還兵。我六十爲何不受邪。原注。裴松之曰。芝以年闕預。是不自顧。然預之此答。觸人所忌。載之記牒。近爲煩文。芝性驕傲。自大將軍費禕等皆避下之。而預獨不爲屈。復東聘吳。臨別謂孫權曰。蜀土僻小。雖云鄰國。東西相

賴。吳不可無漢。漢不可無吳。君臣馮恃。惟陛下重垂神慮。臣年老多病。恐不得復奉聖顏。孫權捉預手涕

泣曰。君每銜命。結二國之好。君旣年長。孤亦衰老。無復相見矣。遺預大珠一斛。原注。孫盛曰。夫帝王之保國

可大。殷周是也。苟任詐力。雖強必敗。秦項是也。況乎居偏鄙之域。恃山水之固。而欲連橫萬里。永相資賴哉。昔九國建合從之計。而秦人卒併六合。蠶述營輔車之謀。而光武終兼隴蜀。夫以九國之強。隴漢之大。莫能相救。坐觀屠覆。而云。吳不可無漢。漢不可無吳。豈不詔哉。乃還。遷後將軍。督永安。就拜征西大將軍。賜爵關內侯。景耀元

年。以疾徵還。成都後爲鎮軍大將軍。領兗州刺史。時都護諸葛瞻初統朝事。廖化過預。欲與預共詣瞻許。

預曰。吾等年踰七十。所竊已過。但少一死爾。何求於年少輩。而屑屑造門邪。遂不往。漢亡。徙雒陽。病薨。議曰。嗚呼。昭烈。債軍崩殂。孫曹方睦。倚角危漢。芝慨然奉命。直以誠信。開示利害。折權之姦。強援離而復合。搆黨而孤賊。使大勢在我。首尾並進。聲罪致討。終漢之世。賊常罷於奔命。隱然爲大將軍。而本根強固。可謂社稷臣矣。宗預當孔明薨謝之際。猜阻方生。而道二國之言。無私。至使權威慨流涕。非誠信之篤。能若是乎。中孚豚魚吉。芝預有焉。

陳震字孝起。南陽人也。昭烈領荊州牧。辟爲從事。部諸郡隨昭烈入蜀。爲蜀郡北部都尉。因易郡名爲汝山太守。轉在犍爲。建興三年。入拜尙書。遷尙書令。奉命使吳。七年。孫權稱尊號。以震爲衛尉。賀權踐阼。丞相亮與兄瑾書曰。孝起忠純之性。老而益篤。及其贊述東西。歡樂和合。有可貴者。震入吳界。移關侯曰。東之與西。驛使往來。冠蓋相望。申盟初好。日新其事。東尊應保聖祚。告燎受符。剖判土宇。天下響應。各有所歸。於此時也。以同心討賊。則何寇不滅哉。西朝君臣。引領欣賴。震以不才。得充下使。奉聘敘好。踐界踊躍。入則如歸。獻子適魯。犯其山諱。孔子譏之。原注。國語。范獻子聘于魯。問具山。放山。魯人以其鄉對。曰。不爲具。二諱爲笑矣。惟不學也。望必啓告。使行人睦焉。即日張旌誥衆。各自約誓。順流漂疾。國典異制。懼或有違。幸必樹誨。示其所宜。震到武昌。孫權與震升壇歃盟。交分天下。以徐。豫。幽。青。屬吳。并涼。冀。兗。屬漢。其司州之土。以函谷關爲界。震還。封城陽亭侯。十三年卒。子濟嗣。

議曰禮大夫受命不受辭出境有可以安國家利社稷則專之可也謂命之一事不能中覆則便宜從事

得以專對不受其辭爾若違命生事雖利國家安社稷則當服矯制擅命之誅故春秋書公子結驂陳人

之婦于鄆遂及齊侯宋公盟以譏之原注三傳折中驂陳事陳人微者不志此其志者大夫無意事驂禮之輕

公侯為國生事故冬齊宋陳三國來伐特曰遂生事也陳湯誅鄧支單于匡衡當以擅與師矯制生事蠻夷不

宜加以爵士議者越之原注漢書漢遣衛司馬谷吉送鄧支單于侍子還單于怒殺吉漢遣使三輩求谷吉等屍鄧

湯獨矯制登城郭請國兵車師戊已校尉屯田吏士圍鄧支城單于戰敗被創死斬其首得漢使節二及谷吉等所齎帛書

延壽湯遣使上疏言狀既至論功匡衡以為延壽湯擅與師矯制幸得不誅如復加爵士則後奉使者爭欲乘危微倖

生事於蠻夷為國招難漸不可開元帝嘉孫權僭號朝論以為當絕孔明以天下大計隱忍稱賀以虧損國

體權乃振矜約震中分天下要震與盟天下者漢之天下也孫權何人欲中分之震以死拒之可也乃欲

歃血捐關以東震於是不臣矣曩者鄧芝奉使權謂天下太平則二主分治芝曰天無二日土無二王并

魏之後大王不深識天命則戰爭方始嗚呼若芝者可謂漢大使矣原注或者以震移文有剖判土宇等言謂

權盟非震之罪案末帝及孔明傳祇書權告稱舉號事而權傳及盟文亦無先遣使與漢定約之文特震至而權要之與盟

遂使告漢共分魏土孔明既屈從賀稱尊號故亦從其誓約為徒封國震既不拒權孔明方與掎角討賊焉得忤權而

拒之也故歸罪於震云爾震之剖判土宇之言謂東西割據立國相與響應討魏非有中分之約而為是言也

顧徽字子歎丞相雍母弟也孫權統事聞徽有才辯召署主簿嘗出行見營軍將一男子至市行刑問何

罪云盜百錢徽呵止使待後命馳詣權陳啓方今畜養士衆以圖北虜視此兵健兒且所盜少乞為哀原

權許而嘉之。轉東曹掾。或傳曹操欲東。權謂徽曰。卿孤腹心。今傳孟德懷異意。莫足使揣之。卿爲吾行。拜輔義都尉使操。操具問境內消息。徽應對婉順。因說江東大豐山藪宿惡。皆慕化爲善義。出作兵。操笑曰。孤與孫將軍一結婚姻。共輔漢室。義如一家。君何爲道此。徽曰。正以明公與主將義固磐石。休戚共之。必欲知江表消息。是以爾。操厚待徽。遣還。權問定云何。徽曰。敵國隱情。卒難探察。然徽潛采聽。曹公方與袁譚交爭。未有他意。乃拜徽巴東太守。欲大用之。會卒子裕字季。則少知名。位至安東將軍。譚案。安東志注作鎮東。趙咨字德度。南陽人也。博聞多識。應對便捷。孫權爲吳王。擢咨爲中大夫使魏。曹丕謂咨曰。吳王何等主也。咨對曰。聰明仁智。雄略之主也。丕問其狀。咨曰。納魯肅於凡品。是其聰也。拔呂蒙於行陳。是其明也。獲于禁而不害。是其仁也。取荊州兵不血刃。是其智也。據三州虎視於天下。是其雄也。屈身於陛下。是其略也。又曰。吳王頗知學乎。咨曰。吳王浮江萬艘。帶甲百萬。任賢使能。志在經略。雖有餘閒。博覽史籍。採奇錄異。不效書生尋章摘句而已。又曰。吳可征否。咨曰。大國有征伐之兵。小國有備禦之固。又曰。吳難魏否。咨曰。帶甲百萬。江漢爲池。何難之有。又曰。吳如大夫者幾人。咨曰。聰明特達者八九十人。如臣之比。車載斗量。不可勝數。咨頻載使魏。魏人驚異。權嘉之。拜騎都尉。咨言觀北方終不能守盟。今日之計。朝廷承漢四百之際。應東南之運。宜改年號。正服色。以應天順民。權納之。未幾卒。權甚惜之。

沈珩字仲山。吳郡人。博綜經藝。

譚案。綜今志作總。宋本作綜。與此合。

尤善春秋內外傳。權以珩有智謀。能專對。乃命使魏。曹

不問曰。吳嫌魏東向乎。珩曰。不嫌。曰。何以。曰。信恃舊盟。言歸於好。是以不嫌。若魏渝盟。自有預備。又問。聞太子當來。寧然乎。珩曰。臣在東朝。朝不坐。宴不與。若此之議。無所聞也。不善之。乃引珩自近。談語終日。珩隨事響應。無所屈服。珩還言曰。臣密參侍中劉曄。數爲賊設姦計。終不久懣。臣聞兵家舊論。不恃敵之不犯。恃我之不可犯。今爲朝廷慮。且當省息他役。惟務農桑。以廣軍資。修繕舟車。增作戰具。令皆兼盈。撫養士民。使各得其所。覽延英俊。獎勵將士。則根本強固。天下可圖也。以奉使有稱。封永安鄉侯。官至少府。卒。陳化字元耀。汝南人。博覽書傳。氣幹剛毅。長七尺九寸。有威容。爲郎中令。使魏。曹丕因酒酣曰。吳魏時立。誰將平一海內者乎。化對曰。易稱帝出乎震。加聞前志。紫蓋黃旗。連在東南。丕曰。昔文王以西伯王天下。豈復在東乎。化曰。周之初基。泰伯在東。是以文王能興於西。不笑無以對。使畢當還。禮送甚厚。權以化奉命光國。拜犍爲太守。頃之遷太常。兼尙書令。正色立朝。勅子弟廢田業。謹案。勅志注作勅。宋本作勅。與此合。絕治產。仰官廩祿。不與百姓爭利。妻早亡。化以禮無二嫡。乃不復娶。權聞而貴之。以其年壯。勅京正妻以宗室女。化固辭以疾。權不違其志。年踰七十。乃上疏乞骸骨。遂爰居章安。卒於家。長子熾。字公照。少有志操。能計算。衛將軍全琮表稱熾任大將軍掾。赴召道卒。

浩周字孔異。上黨人。建安中爲蕭令。至徐州刺史。後領護于禁軍。軍沒爲關侯所得。孫權襲侯。并得周。甚禮之。及曹丕立。權遣周爲牋。上不曰。昔討關侯。獲于將軍。卽白先王。當發遣之。比乃奉款之心。不言而發。

先王未深留意。而謂權中間復有異圖。愚情悽悽。用未果決。遂值先王委離國祚。殿下承統。下情始通。公私契闊。未獲備舉。故令本誓未卽昭顯。梁寓傳命。委曲周至。深知殿下以爲意望。權之赤心。不敢有他。願垂明恕。保權所執。謹遣浩周、東里袞。至情至實。皆周等所具。又曰。權本性空薄。文武不昭。昔承父兄成軍之緒。得爲先王所見。獎飾遂因國恩。綏撫東土。而中間寡慮。庶事不明。畏威忘德。以取重戾。先王恩仁。不忍遐棄。旣釋其宿罪。且開明信。雖致命虜庭。克獲關羽。功效淺薄。未報萬一。事業未究。先王卽世。殿下踐阼。威仁流邁。私懼情願未蒙昭察。梁寓來到。具知殿下不遂疏遠。必欲撫錄。追本先緒。權之得此。欣然踊躍。心開目明。不勝其慶。權世受寵遇。分義深篤。今日之事。永執一心。惟察悽悽。重垂含覆。又曰。先王以權推誠已驗。軍當引還。故除合肥之守。著南北之信。令權長驅不復後顧。近得守將周泰、全琮等白事。過月六日。有馬步七百徑到橫江。又督將馬和謹案。督將志注作爲將。誤。復將四百人進到居巢。琮等聞有兵馬。渡江視之。爲兵馬所擊。臨時交鋒。大相殺傷。卒得此間。情用恐懼。權實在遠。不豫聞知。約勅無素。敢謝其罪。又聞張征東、朱橫海今復還合肥。先王盟要。由來未久。且權自度未獲罪覺。不審今者何以發起。率軍遠次。事業未訖。甫當爲國討除賊備。重聞斯問。深使失圖。凡遠人所恃。在於明信。願殿下克卒前分。開示坦然。使權誓命。得卒本規。凡所願言。周等所當傳也。初東里袞爲于禁軍司馬。前與周俱沒。又俱還。丕皆見之。周言權必臣服。而東里袞謂不可必服。丕悅。周言謹案。志注此下有以爲有以知之六字。旣篡代。遣使封權爲吳王。詔使周與使

者俱往。周既致詔命，與權私宴，謂權曰：「陛下未信王遣子入侍也。」周以闔門百口明之。權因字謂周曰：「孔異卿乃以舉家百口保我，我當何言邪？」遂流涕霑襟。及與周別，又指天爲誓。周還，權不遣子，丕乃留周不遣。權上書謝，又與周書曰：「自道路開通，不忘修意。既新奉國命，加知起居。假歸河北，故使情問不獲果至。望想之勞，曷云其已。孤以空闕，分信不昭。中間招罪，以取棄絕。幸蒙國恩，復見赦宥。喜與君克卒本圖，傳不云乎。雖不能始，善終可也。」又曰：「昔君之來，欲令遣子入侍。於時傾心，歡以承命。徒以登年幼，欲假年歲之間爾。而未蒙昭信，遂見討責。常用慚怖，自頃國恩復加開導，忘在前愆，取其後效，喜得因此。尋竟本誓，前已有表具說遣子之意。想君假還，已知之也。」又曰：「今子當入侍，而未有妃耦。昔君念之以爲可，上連轡宗室若夏侯氏，雖中間自棄，常奉戢在心。當垂宿念，爲之先後，使獲攀龍附驥，永自固定。其爲分惠，豈有量哉。如是欲遣孫長緒與小兒俱入，奉行禮聘，成之在君。」又曰：「小兒年弱，加教訓不足，念當與別，爲之緬然。父子恩情，豈有已耶。又欲遣張子布追輔護之，孤性無餘，凡所欲爲，今盡宣露。惟恐赤心不先暢達，是以具爲君說之。宜明所以，於是丕下詔曰：「權前對浩周自陳，不敢自遠，樂委質長爲外臣。又前後辭旨，頭尾擊地。此鼠子自知不能保爾許地也。又今與周書，請以十二月遣子。復欲遣孫長緒、張子布隨子俱來。彼二人皆權股肱腹心也。又欲爲子於京師求婦。此權異心之明效也。」

謹案：今志考證云：案下云帝既信權，且謂周爲得其真，則此詔語非

謂權有異心也。此權下疑脫無字，詰本同。惟册府作無異心是。

丕既信權甘言，且謂周爲得其真，而權但飾僞，竟無遣子意，自是之後，不

既彰權罪。周亦見疏遠。終身不用。

鄭泉字文淵。陳郡人。博學有奇志。而性嗜酒。嘗曰。願得美酒滿五百斛船。以四時甘脆置兩頭。反覆沒飲之。儻卽住而啖肴膳。酒有斗升。減隨卽益之。不亦快乎。然性和易而中有守。善言論。權以爲郎中。嘗與之

言。卿好於衆中面諍。或失禮敬。寧不

謹案。志注無不字。

畏龍鱗乎。對曰。臣聞君明臣直。今值朝廷無諱。實恃洪恩。

不畏龍鱗。後侍讌。權乃怖之。使提出付有司。促治罪。臨出屢顧。權呼還。笑曰。卿言不畏龍鱗。何以臨出而顧乎。對曰。實恃恩覆。知無死憂。至當出閣。感惟威靈。不能不顧爾。昭烈卽位。權遣泉使漢。昭烈問曰。吳王何以不答吾書。得毋以吾正名故乎。泉曰。曹操父子。陵轢漢室。終奪其位。殿下旣爲宗室。有維城之責。不荷戈執戈。爲海內率先。而於是自名。未合天下之議。是以寡君未復書爾。昭烈默然。泉臨卒。謂同類曰。必葬我於陶家之側。庶百歲之後化而成土。幸見取爲酒壺爾。

馮熙字子柔。潁川人。漢大將軍異之後也。權爲車騎將軍。熙歷東曹掾。黃武二年。使漢弔昭烈之喪。還爲中大夫。後使於魏。曹丕問曰。吳王若欲修好。宜當厲兵江關。縣旂巴蜀。而聞復遣修好。必有變故。熙曰。臣聞西使直報問。且以觀釁。非有謀也。又曰。聞吳國比年災旱。人物凋損。以大夫之明。觀之何如。熙對曰。吳王體量聰明。善於任使。賦政施役。每事必咨。敬養賓旅。親賢愛士。賞不擇怨仇。而罰必加有罪。臣下皆感恩懷德。惟忠與義。帶甲百萬。穀帛如山。稻田沃野。民無饑歲。所謂金城湯池。強富之國也。以臣觀之。輕重

之分。未可量也。不悅。以陳羣與熙同郡。使羣誘之。昭以重利。熙不爲迴。送至摩陂。欲困苦之。後又召還。未至。熙懼見追迫。不從。必危身辱命。乃引刀自刺。御者覺之。得不死。權聞之。垂涕曰。此與蘇武何異。竟死於魏。

張溫字惠恕。吳郡吳人也。

謹案。今志作吳郡人。毛本作吳郡吳人。與此相合。

父允。以輕財重士。名顯州郡。爲孫權東曹掾。卒。溫少

修節操。容貌奇偉。權聞之。以問公卿曰。溫當今與誰爲比。大司農劉基曰。可與全琮爲輩。太常顧雍曰。基

未詳其爲人也。溫當今無輩。權曰。如是。張允不死也。徵到廷見。

謹案。今志作延見。太平御覽作廷見。與此合。

文辭占對。觀者傾

竦。權改容加禮。罷出。張昭執其手曰。老夫託意君。宜明之。拜議郎。選曹尙書。徙太子太傅。甚見信重。時年

三十二。以輔義中郎將使漢。權謂溫曰。卿不宜遠出。恐諸葛孔明不知吾所以與曹氏通意。故屈卿行。若

山越都除。便欲大構於蜀。行人之義。受命不受辭也。溫對曰。臣入無腹心之規。出無專對之用。懼無張老

延譽之功。

原注。國語。使張老延君譽於四方。

又無子產陳事之效。然諸葛亮達見計數。必知神慮屈伸之宜。加受朝廷天覆

之惠。推亮之心。必無疑貳。溫至漢。詣闕拜章曰。昔高宗以諒闇昌殷。祚於再興。成王以幼冲隆周。德於太

平。功冒溥天。聲貫罔極。今陛下以聰明之資。等契往古。總百揆於良佐。參列精之炳耀。遐邇望風。莫不欣

賴。吳國勤任膂力。清澄江澍。願與有道平一字內。委心協規。有如河水。軍事興煩。使役乏人。是以忍鄙倍

之羞。使下臣溫通致情好。陛下敦崇禮義。未便恥忽。臣自入遠境。及卽近郊。頻蒙勞來。恩詔輒加以榮自

懼。悚怛若驚。謹奉所齎函書一封。漢甚貴其才。還頃之使入豫章部伍出兵。事業未究。權既陰銜。溫稱美漢政。又嫌其聲名太盛。衆庶炫惑。恐終不爲己用。思有以中傷之。會暨豔事起。遂因此發舉。豔字子休。亦吳郡人。溫引致之。以爲選曹郎。至尙書。豔性狷厲。好爲清議。見時郎署混濁淆雜。多非其人。欲臧否區別。賢愚異貫。彈射百僚。覈選三署。率皆貶高就下。降損數等。其守故者。十未能一。其居位貪鄙。志節汙卑者。皆以爲軍吏。置營府以處之。而怨憤之聲積。浸潤之譖行矣。競言豔及選曹郎徐彪。專用私情愛憎。不由公理。原注。吳錄彪字仲侯。廣陵人。豔彪皆坐自殺。溫宿與豔彪同意。數交書疏。聞問往還。卽罪溫。權幽之。有司下令曰。昔令召張溫。虛已待之。旣至顯授。有過舊臣。何圖凶醜。專挾異心。昔暨豔父兄。附於惡逆。寡人無忌。故進而任之。欲觀豔何如。察其中間。形態果見。而溫與之結連。死生豔所進退。皆溫所爲。頭角更相表裏。共爲腹背。非溫之黨。卽就疵瑕。爲之生論。又前任溫董督三郡。指擣吏客及殘餘兵。時恐有事。欲令速歸。故授榮戟。獎以威柄。乃便到豫章。表討宿惡。寡人信受其言。特以繞帳。帳下解煩兵五千人付之。後聞曹丕自出淮泗。故預勅溫有急便出。而溫悉內諸將。布於深山。被命不至。賴丕自退。不然已往。豈可深計。又殷禮者本占候召。而溫先後乞將到蜀。扇揚異國。爲之譚論。又禮之還。當親本職。而令守尙書戶曹郎。如此署置。在溫而已。又溫語賈原。當薦卿作御史。語蔣康。當用卿代賈原。專銜賈國恩。爲己形勢。揆其姦心。無所不爲。不忍暴于市朝。今斥還本郡。以給斯吏。嗚呼。溫也。免罪爲幸。將軍略統表理。溫曰。伏惟殿下。天生明

德神啓聖心。招髦秀於四方。置俊乂於宮朝。多士既受普篤之恩。張溫又蒙最隆之施。而溫自招罪譴。孤負榮遇。念其如此。誠可悲矣。然臣周旋之間。爲國觀聽。深知其狀。故密陳其理。溫實心無他情。事無逆迹。但年紀尙少。鎮重尙淺。而戴赫烈之寵。體卓偉之才。亢臧否之譚。效褻貶之議。於是務勢者妒其寵。爭名者嫉其才。元默者非其譚。瑕釁者諱其議。此臣下所當詳辨。明朝所當究察也。昔賈誼至忠之臣也。漢文大明之君也。然而絳灌一言。賈誼遠退。何者。疾之者深。譖之者巧也。然而誤聞於天下。失彰於後世。故孔子曰。爲君難。爲臣不易也。溫雖智非從橫。武非虓虎。然其宏雅之素。英秀之德。文章之采。議論之辯。卓際冠羣。焯煜曜世。世人未有及之者也。故論溫才。卽可惜。言罪則可恕。若忍威烈以赫盛德。宥賢才以敦大業。固明朝之休光。四方之麗觀也。國家之於暨豔。不內之忌族。猶等之平民。是故先見用於朱治。次見舉於衆人。中見任於明朝。亦見交於溫也。君臣之義。義之最重。朋友之交。交之最輕者也。國家不嫌於豔。爲最重之義。是以溫亦不嫌於豔。爲最輕之交也。時世寵之於上。溫竊親之於下也。夫宿惡之民。放逸山險。則爲勁寇。將置平土。則爲健兵。故溫念在欲取宿惡。以除勁寇之害。而增健兵之銳也。但自錯落。功不副言。然計其送兵。以比許晏。數之多少。溫不減之。用之彊羸。溫不下之。至於遲速。溫不後之。故得及秋冬之月。赴有警之期。不敢忘恩而遺力也。溫之到蜀。共譽殷禮。雖臣無境外之交。亦有可原也。境外之交。謂無君命而私相從。非國事而陰相聞者也。若以命行。旣修君好。因敍己情。亦使臣之道也。故孔子使鄰國。則

有私觀之禮。季子聘諸夏，亦有燕譚之義也。古人有言：欲知其君，觀其所使；見其下之明明，知其上之赫赫。溫若舉禮，能使彼歎之，誠所以昭我臣之多良。明使之得其人，顯國美於異境，揚君命於他邦，是以晉趙文子之盟於宋也，稱隨會於屈建。原注：左氏傳：宋公及諸侯之大夫盟於蒙門之外。子木問於趙孟曰：范文子之木歸以語王，王曰：尙矣哉，能歎人神，宜其光輔五君以爲盟主也。楚王孫圉之使於晉也，譽左史於趙鞅。原注：國語：楚王孫圉聘於晉，趙簡子爲寶也，幾何矣。對曰：未嘗爲寶也。楚人有觀射父能作訓辭以行諸侯。有左史倚相道訓典以序百物。此楚國之寶也。若夫古玉白珩，先王之所玩也。何寶焉。亦向他國之輔而歎本邦之臣，經傳美之以光國而不譏之，以外交也。王靖內不憂時，外不趨事，溫彈之，不私推之，不假於是，與靖遂爲大怨。此其盡節之明驗也。靖兵衆之勢，幹任之用，皆勝於賈原、蔣康。溫尙不容私，以安於靖，豈敢賣恩以協原、康邪？又原在職不勤，當事不堪，溫數對以醜色，彈以急聲。若其誠欲賣恩作亂，亦不必貪原也。凡此數者，校之於事，旣不合，參之於衆，亦不驗。臣竊念人君雖有聖哲之姿，非常之智，然以一人之身，御兆民之衆，從層宮之內，瞰四國之外，照羣下之情，求萬幾之理，猶未易周也。固當聽察羣下之言，以廣聰明之烈。今者人非溫旣殷勤，臣是溫又契闊，辭則俱巧，意則俱至，各自言欲爲國，誰其言欲爲私？倉卒之間，猶難卽別。然以殿下之聰睿，察講論之曲直，若潛神留思，纖粗研核，情何嫌而不宣，事何昧而不昭哉？溫非親臣，臣非愛溫者也。昔之君子，皆抑私忿，以增君明；彼獨行之於前，臣恥廢之於後，故遂發宿懷於今日。納愚言於聖聰。謹案：陳志作聖聰。實盡心於明朝，非有念於溫身也。權終不納，後六年，溫病卒，二弟祇白，亦有才名，與

温俱廢。原注。裴松之曰。莊周云。名者公器也。不可以多取。張温之廢。豈取名之多乎。多之爲弊。古賢既知之矣。是以遠見之士。退藏於密。不使名浮于德。不以華傷其實。既不能被禍繼實。挫廉逃譽。使才曠一世。聲蓋人上。冲用之道。庸可暫替。温則反之。能無敗乎。權既疾温名盛。而略統方驥言其美。至云卓犖冠軍。燁燁曜世。世人未有及之者也。斯何異燎之方盛。又搗膏以熾之。初温彼徵餘姚虞俊歎曰。張惠恕才多智少。華而不實。怨之所聚。有覆家之禍。吾見其兆矣。諸葛亮聞俊憂温。意未之信。及温放黜。亮乃歎俊之先見。亮初聞温敗。未知其故。思之數日。曰。吾得之矣。其人於清濁太明。善惡太分。

謹案。目錄此下有秦旦傳。今闕。

鄭胄字敬先。沛國人。父札。才學博達。權爲驃騎將軍。以札爲從事中郎。與張昭孫邵。謹案。張昭傳作孫紹。鄭禮。此處禮作札。紹作

邵。皆沿志注。共定朝議。胄其少子。有文武姿局。少知名。舉賢良。稍遷建安太守。呂壹賓客於郡。犯法。胄收付獄。

考竟。壹懷恨。後密譖胄。權大怒。召胄還。潘濬陳表。並爲請得釋。後拜宣信校尉。往救公孫淵。已爲魏所破。

還。遷執金吾。子豐字曼季。有文學操行。與陸雲善。與雲詩相往返。謹案。志注作詩詞往返。毛本詞作相。與此合。吳亡入晉。司空

張華辟未就。卒。

紀陟字子上。丹陽人。初爲中書郎。孫峻使詰南陽王和。令其引分。陟密使令正辭自理。峻怒。陟懼。閉門不

出。孫休時。父亮爲尙書令。而陟爲中書令。每朝會。詔以屏風隔其座。出爲豫章太守。孫皓立。遣陟與宏瓌

使魏。壽春將王布宴陟等。夸其騎射。既而問曰。吳之君子亦能斯乎。陟曰。此軍人騎士肄業所及。士君子

未有爲之者。布大慚。至魏。曹奐使僕問曰。卿來時。吳王何如。陟對曰。臣陛辭日。皇帝臨軒。百寮陪位。御膳

無恙。司馬昭饗之。羣官畢會。僨者告曰：「某者安樂公也。某者匈奴單于也。」陟曰：「西主失土，爲君王所禮。位同三代，莫不感義。匈奴邊塞難羈之國，君王懷之，親在坐席。此誠威恩遠著。又問吳之戍備幾何？」對曰：「自西陵至江都，五千七百里。又問曰：「道里甚遠，難爲拒守。」對曰：「疆界雖遠，險要必爭之地，不過數四。猶人有八尺之軀，靡不受患。其護風寒亦數處爾。昭善之厚，爲之禮。」原注：裴松之曰：以爲人有八尺之體，靡不受患。防護風寒。豈惟數處。取譬若此。未足稱能。若曰。譬如金城萬雉，所急防者四門而已。方陟此對，不猶愈乎？」皓以諸父與和相連及者，家屬皆徙東冶。惟陟有密旨，特封子孚都亭侯，子弟瞻，字思遠，入晉爲驃騎將軍。宏，璆曲阿人，宏咨之孫，權外甥也。後至中書令，太子少傅。

張儼字子節，吳郡人也。弱冠知名，歷顯位。以博聞多識，拜大鴻臚。孫皓令與五官中郎將丁忠使於晉，弔祭晉文王。皓謂儼曰：「今南北通好，以君爲有出境之才，故相屈行。」對曰：「皇皇者華，蒙其榮耀，無古人延譽之美。磨厲鋒鏑，思不辱命。既至，車騎將軍賈充，尙書令裴秀，侍中荀勗等，欲傲以所不知而不能，尙書僕射羊祜，尙書何禎，並結縞帶之好焉。及還，儼道病卒。忠勸皓襲晉弋陽，遂與晉絕。子翰，字季膺，有清才，善屬文。晉齊王問辟爲大司馬東曹掾。見時方多難，因秋風起，乃思吳中菰菜、蓴羹、鱸魚膾，曰：「人生貴適志，何能羈宦數千里，以要名節乎？」遂命駕而歸。著首丘賦，俄而問敗，世高其見。幾云。

議曰：張溫有雋才，鋒穎太露，觸權之忌，一斥不復。惜哉！願徵趙咨諸賢，辨惠明敏，咸能專對，不辱國命，使乎使乎。紀陟宏璆當皓之世，銜命而往，以欺大國，得死幸矣。秦旦雖非正使，萬死奪命，崎嶇海陬，不失身。

於人卒歸國復命可謂忠矣。

贊曰。皇華遣送。四牡勞來。出疆專對。將命惟才。道言無私。申好惟允。煜煜周京。奉使尤謹。漢吳合從。掎角誅仇。星麾玉節。照耀江流。伯苗開濟。德豔誠盡。崔巍二國。炳烺一信。

續後漢書卷第六十八

列傳第六十五

義士

臧洪 陳容

田疇

謹案臧洪傳文闕止存議

議曰壯哉洪之志烈也以崎嶇孤壘不忘君主志存王室嘗嘗諤諤繼之以死其捧盤誓衆氣凌毛遂徒
跳求救志同申胥凜凜烈日秋霜無以尙已今千有餘年猶想見怒卓責操而誚紹也且夫救超之志所
以爲漢非私所事也伐操之謀所以爲紹非爲己也王臣並沒則社稷孤操寔得志豈袁氏之利乎紹乃
一日殺二烈士已自敗矣不待官渡之戰然後判袁曹之勝負也

田疇字子泰右北平無終人也好讀書擊劍謹案今志作善擊劍宋本無善字與此合初平元年義兵起董卓遷帝于長安幽

州牧劉虞歎曰賊臣作亂朝廷播蕩四海囂然謹案今陳志作俄然莫有固志身備宗室遺老不得自同于衆今欲

奉使展效臣節安得不辱命之士乎衆議咸曰田疇年二十二雖少有奇才可使也虞乃備禮請疇與語

大悅之遂署爲從事具車騎將行疇曰今道路阻絕寇虜縱橫稱官奉使爲衆所指願以私行期于得達

而已。虞從之。疇乃歸。自選其家客與年少之勇壯募從者二十騎俱往。虞自出祖而遣之。疇引虞道左。密謂虞曰。今帝主幼弱。姦臣擅命。表上須報。懼失事幾。公孫瓚阻兵安忍。不早圖之。必爲後患。虞默然。旣取道。疇乃更上西關。出塞傍北山直趨朔方。循間徑去。遂至長安致命。詔拜騎都尉。疇以天子方蒙塵未安。不可以荷佩榮寵。固辭不受。朝廷高其義。三府並辟。皆不就。得報馳還。未至。虞已爲公孫瓚所害。疇至謁祭虞墓。陳發章表。哭泣而去。瓚聞之。大怒。購求獲疇。謂曰。汝何自哭劉虞墓。而不送章報于我也。疇曰。漢室衰頹。人懷異心。惟劉公不失忠節。章報所言。於將軍未美。恐非所樂聞。故不進也。將軍方舉大事以求所欲。旣滅無罪之君。又離守義之臣。誠行此事。則燕趙之士。將皆蹈東海而死爾。豈有從將軍者乎。瓚壯其對。釋不誅。拘之軍下。禁其故人。莫得與通。或謂瓚曰。田疇義士。君弗能禮。而又囚之。恐失衆心。瓚乃縱遣疇。疇得北歸。率舉宗族他附。從數百人。掃地而盟曰。君仇不報。吾不可以立於世。遂入徐無山中。營深險。平敞地而居。躬耕以養父母。百姓歸之。數年間至五千餘家。疇謂其父老曰。諸君不以疇不肖。遠來相求。衆成都邑。而莫相統一。恐非久安之道。願推擇其賢良者以爲之主。皆曰。善。共僉推疇。疇曰。今來在此。非苟安而已。將圖大事。復怨雪恥。竊恐未得其志。而輕薄之徒。自相侵侮。愉快一時。無深計遠慮。疇有愚計。願與諸君共施之。可乎。皆曰。可。疇乃爲約束。相殺傷犯盜爭訟之法。法重者至死。其次抵罪。二十餘條。又制爲婚姻嫁娶之禮。興舉學校講授之業。班行其衆。衆皆便之。道不拾遺。北邊翕然。服其威信。烏桓鮮

卑。並各遣譯使致貢遺。疇悉撫納。令不爲寇。袁紹數遣使招之。又卽授將軍印。因安輯所統。疇皆拒不受。紹死。其子尙又辟焉。疇終不行。疇常忿烏桓昔多賊殺其郡冠蓋。欲討之。而力未能。建安十二年。曹操伐烏桓。未至。先遣使辟疇。又命田豫喻旨。疇戒其門下趣治殿。門人謂曰。昔袁公慕君。禮命五至。君義不屈。今曹公使一來。而君若恐弗及者。何也。疇笑而應之曰。此非君所識也。遂隨使者到軍。署司空戶曹掾。引見諮議。明日出令曰。田子泰非吾所宜吏者。卽舉茂才。拜爲脩。原注。他。苗反。令不之官。隨軍次無終。時方夏。水雨而濱海。洿下。滯滯不通。虜亦遮守蹊。要軍不得進。操患之。以問疇。疇曰。此道秋夏。每常有水。淺不通。車馬深不載。舟船爲難久矣。舊北平郡治在平岡道。出盧龍。達於柳城。自建武以來。陷壞斷絕。垂二百載。而尙有微徑可從。今虜衆將以大軍當由無終。不得進而退。懈弛無備。若默回軍。從盧龍口。越白檀之險。出空虛之地。路近而便。掩其不備。蹋頓之首。可不戰而禽也。操曰。善。乃引軍還。而署大木表於水側。路傍曰。方今暑雨。謹案。陳志。作暑夏。道路不通。且俟秋冬。乃復進軍。虜候騎見之。誠以爲大軍去也。操令疇將其衆爲鄉導。上徐無山。出盧龍。歷平岡。登白狼堆。去柳城二百餘里。虜乃驚覺。單于身自臨陳。操與戰。遂大斬獲。追奔逐北。至柳城。軍還入塞。論功行賞。封疇亭侯。邑五百戶。原注。先賢行狀載太祖表論疇功曰。文雅優備。忠武又著。和於撫下。慎于事上。量時度理。進退合義。

幽州始擾。胡漢交萃。蕩析離居。靡所依懼。疇率宗人。避難于無終山。北拒盧龍。南守要害。清靜隱約。耕而後食。人民化從。咸共資奉。及袁紹父子威力加于朔野。漳結烏桓。輿爲首尾。前後召疇。終不陷撓。後臣奉命。軍次易縣。疇自驅自到。陳討胡之勢。猶廣武之建燕策。薛公之度淮南。又使部曲持臣露布。出誘胡衆。漢民或因亡來烏桓。聞之震蕩。王旅出塞。塗由山中。九百餘里。疇帥兵五百。啓導山谷。遂滅烏桓。蕩平塞表。疇文武有效。節義可嘉。誠應寵賞。以

旌其美。疇曰始為劉公報仇率衆逃遁志義不立反以為利非本志也固讓不受操知其至心許而不奪令

曰昔伯成棄國夏后不奪將欲使高尚之士優賢之主不止于一世也其聽疇所執遼東斬送袁尙首令

三軍敢有哭之者斬疇以嘗為尙所辟乃往弔祭操亦不問原注裴松之曰田疇不應袁紹父子之命以其非

授首遼東皆疇之由也既以明其為賊胡為復弔祭其首乎若以嘗被辟命義在其中則不應為人設謀使其至於此也

疇此舉止進退無當與王修哭袁譚貌同而心異也謹案疇之導操擊烏桓特為鄉里父老報仇除狄難爾顧堂計尙

禮也世曲為文致則過矣疇盡將家屬及宗人三百餘家居鄴操賜疇車馬穀帛皆散之宗族知舊從

伐荊州還操追念疇功殊美恨前聽疇之讓曰是成一人之志而虧王法大制也於是乃復以前爵封疇

原注先賢行狀載太祖令曰脩令田疇志節高尚遭值州里戎夏交亂引身深山研精味道百姓從之以成都邑袁

賊之盛命召不屈慷慨守志以徵真主及孤奉詔征定河北遂服幽都將定胡寇特加禮命疇即受署陳建攻胡

蹊路所由率齊山民一時向化開塞導途供承使役路近而便令廢不意斬陽頓于白狼遂長驅于柳城疇有力

焉及軍入塞將圖其功表封亭侯食邑五百而疇懇惻前後辭賞出入三載歷年未賜此為成一人之高甚遠

王典失之多矣宜從表封無久留吾過疇上疏陳誠以死自誓操不聽欲引拜之至於數四終不受有司劾疇狷介違道苟

立小節宜免官加刑操重其事乃下世子不及大臣博議不以為子文辭祿申胥逃賞原注國語昔楚鬬

日之積成王聞子文之朝不及夕也於是每朝設脯一束糗一盤以羞子文成王每出子文之祿必逃王止而後復

人謂子文曰人生求富子逃之何也對曰從政者以庇人也人多賔者而我取富焉是動人以自封也死無日後復

逃死非逃富也申胥事見曹操傳傳載其美所以激濁勵貪賢於尸祿素餐之人也至於田疇斯近之矣免官加刑於法

為重宜勿奪以優其節尙書令荀彧司隸校尉鍾繇亦以為可聽原注魏略載教曰昔夷齊棄爵而讓武王

雖不合道但欲清高爾使天下悉知疇志即墨翟兼愛尙同之事而老聃使民結繩之道也外議雖善為復使令司隸

決之魏書載荀彧議以為君子之道或出或處期於為善而已故匹夫守志聖人各因而成之鍾繇以為原思辭粟

仲尼不與。子路拒牛，謂之止善。雖可以激清勵濁，猶不足多也。疇雖不合大義，有益推讓之風，宜如世子讓。裴松之曰：案呂氏春秋，子路拯溺人，拜以牛受之，繇所引者與此不同。爲繇之事誤邪，而事將別有所出。操猶欲侯之，疇素與夏侯善，操語疇曰：且往以情喻之。從君所言，無告吾意也。疇就疇宿，如操所戒。疇揣知其指，不復發言。疇臨去，乃拊疇背曰：田君主意殷勤，曾不能顧乎。疇曰：是何言之過也。疇負義，逃竄之人爾。蒙恩全活，爲幸多矣。豈可賣盧龍之塞，以易賞祿哉。縱國私疇，獨不愧于心乎。將軍雅知疇者，猶復如此。若必不得已，請願效死，刎首于前。言未卒，涕泣橫流。疇具答操，操喟然知不可屈，乃拜爲議郎。年四十六卒。一子早卒。曹丕篡代，高疇德義，賜疇從孫續爵關內侯，以奉其嗣。

議曰：傳稱燕趙多奇士，當漢之季，姦臣倚疊，莫不姦回僭竊，撐裂鼎命，汚利疚義，狡狡自喜。惟劉虞以幽州死漢，昭烈與關侯張飛倡義，涿郡以復漢，管寧隱遼海，田疇邑無終，終身不仕以存漢，志節高天下，忠義動千古。惟茲六子皆在，夫燕趙豈其土風豪勁，質直尙義而然哉。惟疇不幸而陷于操，拒其封爵，終不臣事，操雖險狠，不敢睚眦加害而優禮之，義烈良有以厭之也。

贊曰：忠肝烈士，屹不可奪。軼世勿顧，全節自樂。俠則傷勇，忿則道薄。唯正爲義，死生可託。

續後漢書卷第六十九上

列傳第六十六上

高士

漢

郭泰 左原 茅容 孟敏 庚乘 賈淑 史叔寶 黃允 謝顛 王柔

符融

仇覽

陳寔

子紀 鍾皓

譙

黃憲

徐穉

姜肱

申屠

蟠 張元

兄陸

袁閔

屈伸隱顯。天之道也。惟其時而已矣。故易曰。時止則止。時行則行。進退不失其時。其道光明。又曰。遯世無悶。不見是而無悶。樂則行之。憂則違之。確乎其不可拔。又曰。遯而亨也。與時行也。遯之時義大矣哉。好遯君子吉。嘉遯貞吉。肥遯無不利。聖人作易。於進退隱顯之時。諄諄諦切如此。欲人之審之而不違也。蓋世治而君子道長。宜信而顯進之時也。世亂而小人道長。宜屈而隱退之時也。時之進也。道行而得其泰。時之退也。道全而得其高。故立朝則爲賢臣。在野則爲高士。其道一也。殷周之衰。隱者衆矣。稱於仲尼之門者。曰箕子、泰伯、伯夷、叔齊、虞仲、夷逸、朱張、柳下惠、少連、長沮、桀溺、丈人、晨門、荷蕢、儀封人、楚狂接輿、秦漢而下。見諸載籍者。則夏黃公、東園公、綺里季、角里先生、邵平、魯兩生、鄭子真。原注。漢書。邵平故秦東陵侯。秦破。爲布衣。賢。種瓜長安城。

東。瓜美。故世謂之東陵瓜。叔孫通使魯魯生三十餘人共起朝儀。魯兩生不肯行曰。公所事者且十主。皆面諛親貴。今天下初定。死者未葬。傷者未起。又欲起禮樂。禮樂所由起。百年積德而後可興也。吾不忍為公所為。公所為不合古。吾不行。公往矣。勿汗我。谷口鄭子真。脩身自保。非其服不服。非其食不食。成帝時。元舅大將軍王鳳以禮聘子真。子真遂不詘而終。三輔決錄。子真名朴。子真其字。新莽之世著稱者。則梅福、兩龔、郭欽、蔣詡、逢萌。原注。漢書。梅福為南昌尉。居家常以讀書養性為事。元始中王莽專政。福一朝棄妻子去九江。蔣詡為宛州刺史。王莽居攝。欽詡皆以病免歸鄉里。臥不出戶。卒于家。後漢書。王莽殺其子宇。北海逢萌謂友人曰。三綱絕矣。不去禍將及人。即解冠掛東都城門。歸將家屬浮海。客于遼東。皆遭逢衰亂。避世長往。稱為逸民。或推國而去。或不食而死。或佯狂。以免。或閉關而遁。或蒙垢以自愚。或潔己以全操。逃山林。放滄海。被髮煙霞之表。浪跡江湖之上。超然以求其志。不息其明。不失其真。不違其時。遂為一世高人。視患失之徒。奔走於形勢之間者。若糞壤然。建武初。嚴光、周黨。原注。後漢書。嚴光少有高名。與光武同遊學。賢。乃令以物色訪之。後齊國上言一男子披羊裘釣澤中。帝疑其光。乃備安車元纁遣使聘之。三反而後至。舍于北軍。駕即日幸其館。光臥不起。帝因共偃臥。光以足加帝腹上。除為諫議大夫。不屈。乃耕于富春山。建武十七年復特徵。不至。周黨。飭身修志。州里稱其高。及王莽竊位。託疾杜門。建武中。嚴光為諫議大夫。遂將妻子居湄池。復被徵。不得已。乃著短布單衣。皮緇頭待見。尚書。及引見。黨伏而不謁。自陳願守所志。帝乃許焉。詔曰。伯夷叔齊。不食周粟。太原周黨。不受朕祿。亦各有志焉。其以孔光、張禹之徒。依違無恥。揚雄、劉歆。脂腴祿仕。原注。漢書。孔光哀帝時為丞。賜帛四十四匹。黨遂隱居而終。

委政于王莽。以光舊相名儒。備禮事光。所欲搏擊。輒為草。以太后指風光。令上之。莽權日盛。光為御史大夫。丞相各再。一為大司徒。太傅。太師。歷三世居輔位。前後十七年。張禹授太子論語。成帝即位。以師賜爵關內侯。拜光祿大夫。切王氏。車駕至禹第。問禹以天變。因以吏民所言王氏事示禹。禹自見年老。子孫弱。恐為所怨。乃謂上曰。災變之意。深遠難見。故聖人罕言命。不語怪神。何況淺見鄙儒之所言。陛下宜修政事以善應之。新學小生。亂道誤人。宜無信用。上由此不疑王氏。揚雄成哀與莽賢同官。莽賢為三公。而雄三世不徙官。以耆老久次轉為大夫。莽篡位。雄復雍之。作劇秦美新文。稱莽曰周公。以來。未有漢公之懿也。勤勞則過於阿衡。漢興二百一十載而中天。其庶矣乎。辟雍以本之。學校以教之。禮樂以容之。與服以表之。復其非刑勉人後唐矣夫。及莽誅。甄豐父子投劉棻四裔。連及雄。

時雄校書天祿閣上。治獄使者來欲收雄。雄恐不能自免。乃從閣上自投下。幾死。問其故。乃劉棻嘗從雄學作奇字。有詔勿問。然京師爲之語曰。惟寂寞。自投閣。爰清靜。作符命。雄以病免。復召爲大夫。劉歆少與王莽俱爲黃門郎。及莽持政。遷中壘校尉。義和京兆。使治明堂辟雍。封紅休侯。典儒林史卜之官。考定律歷。著三統歷譜。莽篡位。以爲國師嘉新公。宗室列侯公卿將軍二千石守闕而獻符命

者。動以萬數。使莽坐移神器。莫有誰何。風節不立故也。方世祖中興。偃然不屈。輕萬乘。蔑富貴。引而自高。激成東漢風節。以維體統。爲天下大閑。則又異乎曩時逸民。伯夷不獨爲聖人之清。而師百世矣。厥後帝德下衰。邪孽專政。公卿大臣。爭大義於上。處士抗憤。持清議於下。犯難而行。不以爲悔。郭泰諸賢。隱然其間。不受爵祿。不爲激絕。潔己懷道。凜凜高氣。倚薄天日。小人亦知敬仰。而不敢加害。社稷增重者。猶六七年。曹丕已篡。而管寧濯足遼海。卻三公而弗顧。獨爲漢室遺老。嚴光之力也。故范氏作東漢書。特爲逸民篇。以著光之事。今繼范史。斷自郭泰而下。復爲高士篇。以明時止光明之道云。

郭泰字林宗。太原介休人也。家世貧賤。早孤。母欲使給事縣廷。泰曰。大丈夫焉能處斗筲之役乎。遂辭。就成皋屈伯彥學。三年業畢。博通墳籍。善談論。美音制。乃游於雒陽。始見河南尹李膺。膺大奇之。遂相友善。於是名震京師。後歸鄉里。衣冠諸儒。送至河上。車數千兩。泰惟與李膺同舟而濟。衆賓望之。以爲神仙焉。司徒黃瓊辟太常趙典舉有道。或勸泰仕進者。對曰。吾夜觀乾象。晝察人事。天之所廢。不可支也。遂並不應。性明知人。好獎訓士類。身長八尺。容貌魁偉。褻衣博帶。周遊郡國。嘗於陳梁間行。遇雨。巾一角墊。原注。丁念反。時人乃故折巾一角。以爲林宗巾。其見慕如此。與陳留夏馥。河南尹勳。泰山羊陟。東郡劉儒。謹案。後漢書。

八顧有范滂而無劉。陳國蔡衍、渤海巴肅、南陽宗慈，天下號為八顧。原注：後漢書。顧者言能以德行引人者也。三君八俊錄。夏竦字子治。陳留圍人。官至

儒。劉備在八廚中。尹勳字伯元，河南鞏人。官至尚書令。天下英潛尹伯元。羊陟字嗣祖，泰山梁父平陽人。官至

太常。天下慕侍夏子治。尹勳字伯元，河南鞏人。官至尚書令。天下英潛尹伯元。羊陟字嗣祖，泰山梁父平陽人。官至

河南尹。天下清苦羊嗣祖。劉儒字叔林，東郡發干人。徵為議郎。天下瑤金劉叔林。蔡衍字孟喜，陳國項人。官至冀州

刺史。天下雅志蔡孟喜。巴肅字恭祖，渤海高城人。官至潁川太守。天下臥虎巴恭祖。或問汝南范滂曰：郭林宗

宗慈字季初，南陽安衆人。徵為議郎。天下通儒宗季初。其稱林宗天下和雍郭林宗。或問汝南范滂曰：郭林宗

何如人。滂曰：隱不違親，貞不絕俗。天子不得臣，諸侯不得友。吾不知其他。後遭母憂，有至孝稱。原注：謝承

憂。嘔血發病。歷年乃瘳。泰雖善人倫，而不為危言駁論，故宦官擅政而不能傷也。及黨事起，知名之士多被其害。惟

泰及汝南袁閔得免焉。遂閉門教授弟子。謹案：後漢書作子弟。以千數。建寧元年，太傅陳蕃、大將軍竇武為閹人所

害，泰哭之慟。既而歎曰：人之云亡，邦國殄瘁。瞻烏爰止，不知于誰之屋。爾明年春卒於家。時年四十二。四

方來會葬者千餘人。原注：謝承漢書。泰以建寧二年正月卒。自安農函谷關以西，河內瀉陰以北，二千里。真笈荷擔彌路。柴車葦裝塞塗。蓋有萬數來赴。同志者乃共刻石立碑。

蔡邕為其文。既而謂涿郡盧植曰：吾為碑銘多矣，皆有慚德。惟郭有道無愧色。爾。原注：蔡邕郭有道碑。先

休人也。其先出自有周。王季之稷有輔叔者，實有懿德。文王咨焉，建國命氏。或謂之郭。即其後也。先生誕應天衷，

瞻睿明哲。孝友溫恭，仁篤慈惠。夫其器量宏深，姿度廣大。浩浩焉，汪汪焉。與乎不可測已。若乃砥節厲行，直道正

辭，貞固足以幹事，樂括足以矯時。遂考覽六經，探綜圖緯。周流華夏，隨集帝學。收文武之將墜，拯微言之未絕。於

時纓綬之徒，紳佩之士，望行表而影附，聆嘉聲而響和者，猶百川之歸巨海，鱗介之宗龜龍也。爾乃潛隱衡門，收朋勳

誨。童蒙賴焉，用祛其蔽。州郡聞聽，虛已備禮。莫之能致。羣公休之，遂辟司徒掾。又舉有道，皆以疾辭。將蹈鴻涯

之遐迹，紹葉許之絕軌。翔區外以舒翼，越天衢以高峙。稟命不融，享年四十有二。以建寧二年正月乙亥卒。凡我四方

同好之人，永懷哀悼。靡所置念，乃相與推先生之德，以謀不朽之事。余以為先民既沒，而德音猶存者，亦賴之於見述

也。今其如何而闕斯禮。于是樹碑表墓，昭銘景行。俾芳烈奮於百世，令聞顯於無窮。其辭曰：於休先生，明德通元。純懿淑

純懿淑。受之自天。崇壯陶浚。如山如淵。禮樂是悅。詩書是敦。匪惟撫華，乃尋厥根。宮牆重仞，允得其門。懿乎

其純。確乎其操。洋洋摯紳。言觀其高。懷遇泌丘。善誘能教。赫赫三事。幾行其招。委辭召賈。保此清妙。降年不永

·民斯悲悼·爰勒茲銘·摘其光耀·嗟爾來世·是則是效·其獎拔士人·皆如所鑒·原注·謝承漢書·秦之所名·人品乃定·先言後驗·衆皆服之·公·入汝南則·後之好事·或附益增張·故多華辭不經·又類卜相之書·今錄其章·章效於事者·著之篇末·左

交黃叔度·原者·陳留人也·爲郡學生·犯法見斥·郭林宗嘗遇諸路·爲設酒肴以慰之·謂曰·昔顏涿聚·梁甫之巨盜·段

干木·晉國之大隹·卒爲齊之忠臣·魏之名賢·原注·呂氏春秋曰·顏涿聚·梁父大盜也·學於孔子·左傳曰·晉伐齊

大夫顏涿聚也·又曰·晉荀孫伐鄭·請救於齊·齊師將與·陳成子屬孤子三日朝·設乘車兩馬繫五邑焉·召顏涿聚之子晉

曰·隲之後·而父死焉·以國之多難·未汝恤也·今君命汝以是邑也·服車而朝·無廢前勞·呂氏春秋曰·段干木賢

國之隹·說文曰·隹·會也·謂合兩家之實買·如今之度市也·新序曰·魏文侯過段干木之闥而賦之·遂致祿百萬·而時

往問之·國人皆喜·相與誦之曰·吾君好正·段干木之敬·吾君好忠·段干木之隱·秦欲攻魏·司馬唐諫曰·段干木賢

者也·而魏禮之·天下莫不聞·無乃不可·還瑗顏回·尙不能無過·況其餘乎·原注·論語曰·蘧伯玉使人於孔子·問

加兵乎·秦君以爲然·隹·音子期反·而未能也·又曰·顏·慎勿悲恨·責躬而已·原納其言而去·或有譏林宗不絕惡人者·對曰·人而不仁·疾之已

甚亂也·原注·論語孔子之言也·鄭元注云·不仁之人·原後忽更懷忿結客欲報諸生·其日林宗在學·原愧負

前言·因遂罷去·後事露·衆人咸謝服焉·茅容字季偉·陳留人也·年四十餘·耕於野·時與等輩避雨樹下·衆

皆夷踞相對·原注·夷平也·說文曰·踞·踞也·容獨危坐愈恭·郭林宗行見之而奇其異·遂與共言·因請寓宿·旦日·容殺

雞爲饌·林宗謂爲已設·既而以供其母·自以草蔬與客同飯·原注·草林宗起拜之曰·卿賢乎哉·因勸令

學·卒以成德·孟敏字叔達·鉅鹿楊氏人也·原注·十三州志曰·楊氏縣在今魏郡北地·客居太原·荷飯墮地·不顧而去·郭林宗見

而問其意·對曰·飯已破矣·視之何益·林宗以此異之·因勸令遊學·十年知名·三公俱辟·並不屈云·庾乘字

世遊潁川鄆陵人也。少給事縣廷爲門士。郭林宗見而拔之。勸遊學宮。遂爲諸生傭。後能講論。自以卑第。每處下坐。諸生博士皆就離間。由是學中以下坐爲貴。後徵辟。並不起。號曰徵君。謹案。目錄。此下有賈淑傳。今闕。史叔

賓者。陳留人也。少有盛名。林宗見而告人曰。牆高基下。雖得必失。後果以論議阿枉。敗名云。黃允字子艾。

濟陰人也。以雋才知名。郭林宗見而謂曰。卿有絕人之才。足成偉器。然恐守道不篤。將失之矣。後司徒袁

隗欲爲從女求婚。見允而歎曰。得婿如是足矣。允聞而黜遣其妻夏侯氏。婦謂姑曰。今當見棄。方與黃氏

長辭。乞一會親屬。以展離訣之情。於是大集賓客三百餘人。婦中坐攘袂數允隱匿穢惡十五事。言畢登

車而去。允以此廢於世。謹案。目錄。此下有謝甄傳。今闕。王柔字叔優。弟澤字季道。郭泰同郡晉陽縣人也。兄弟總角共

候泰。以訪才行所宜。泰曰。叔優當以仕進顯。季道當以經術通。然遠方改務。亦不能至也。後果如所言。柔

爲護匈奴中郎將。澤爲代郡太守。謹案。後漢書郭泰傳。此下有又識張孝仲子芻牧之中云云七十餘字。又此書郭泰傳。目錄所附諸人次第。與後漢書同。惟庚乘下缺宋果。疑目錄有脫也。今仍之。

符融字偉明。陳留浚儀人也。少爲都官吏。恥之。委去。後遊太學。師事少府李膺。膺夙性高簡。每見融輒絕

他賓客。聽其言論。融幅巾奮襖。談辭如雲。膺每捧手歎息。郭泰始入京師。時人莫識融。一見嗟服。因以介

於李膺。由是知名。原注。謝承漢書。融見林宗。便與之交。又紹介于膺。以爲海之明珠。未耀其光。鳥之鳳凰。羽儀未翔。聲與林宗相見。待以師友之禮。遂名振天下。融之致也。時漢中晉文

經。梁國黃子艾。並恃其才智。炫耀上京。臥託養疾。無所通接。雖中士大夫好事者。承其聲名。坐門問病。猶

不得見。原注。謝承漢書。文經子艾。曠名遠近。聲價已定。徵辟不就。療病京師。不遇賓客。公卿將相大夫遺門生旦暮問疾。郎吏公府掾屬雜坐其門。不得見也。三公所辟召者。輒以詢訪之。

隨所臧否。以爲與奪。融察其非真。乃到太學。見李膺曰。二子行業無聞。以豪傑自置。遂使公卿問疾。王臣坐門。融恐其小道破義。空譽違實。特宜察焉。膺然之。二人自是名論漸衰。賓徒稍省。旬日之間。慚歎逃去。後果爲輕薄子。並以罪廢棄。融益以知名。州郡禮請。舉孝廉。公府連辟。皆不應。太守馮岱有名稱。到官請融相見。融一往。薦達郡士范冉、韓卓、孔伯等三人。原注。謝承漢書。馮岱字德山。性慷慨。有文武異才。既到官。山松書。卓字子助。臘日奴竊食祭其先。卓義其心。即日免之。因辭病自絕。會有黨事。亦遭禁錮。妻亡貧無殯殮。鄉人欲爲具棺服。融不受。

曰古之亡者。棄之中野。惟妻子可以行志。但卽土埋藏而已。原注。謝承漢書。潁川張元祖志行士也。來存融甲。且禮設棺槨。制杖章。孔子曰。吾從周。便推所乘羸車牛命融以給殯。融受而不辭也。融同郡田盛字仲嚮。與郭泰同好。亦名知人。優游不仕。並以壽終。

仇覽字季智。一名香。陳留考城人。少爲書生。淳默。鄉里無知者。年四十。縣召補吏。選爲蒲亭長。原注。謝承縣陽遂亭長。勸人生業。爲制科令。至於果菜爲限。雞豕有數。農事旣畢。乃令子弟羣居。還就黌學。其剽輕遊恣者。皆役以田桑。嚴設科罰。躬助喪事。賑卹窮寡。期年稱大化。覽初到亭。人有陳元者。獨與母居。遠養道。忤

母。母詣覽告元不孝。覽驚曰。吾近過舍。廬落整頓。耕耘以時。此非惡人。當是教化未至耳。母守寡養孤。苦身投老。奈何肆忿於一朝。欲致子以不義乎。母聞感悔。涕泣而去。覽乃親到元家。爲陳人倫孝行。譬以禍福。因貽孝經一卷。使誦讀之。元深自悔責。拜母牀下曰。元少孤。爲母所驕。諺曰。孤犢獨乳。驕子罵母。乞自今改。母子更相向泣。元遂修孝道。卒成佳士。鄉邑爲之語曰。父母何在在我庭。化我鴈鼻。哺所生。時考城

令河內王渙政尚嚴猛。聞覽以德化人。署爲主簿。謂覽曰。主簿聞陳元之過。不罪而化之。得無少鷹鷂之志邪。覽曰。以爲鷹鷂不若鸞鳳。渙謝遣曰。枳棘非鸞鳳所棲。百里豈大賢之路。今日太學曳長裾。飛名譽。皆主簿後爾。以一月奉爲資。勉卒景行。覽入太學。時諸生同郡符融有高名。與覽比字。賓客盈室。覽常自守。不與融言。融觀其容止。心獨奇之。乃謂曰。與先生同郡壤。鄰房牖。今京師英雄四集。志士交結之秋。雖務經學。守之何固。覽乃正色曰。天子修設太學。豈但使人游談其中。高揖而去。不復與言。後融以告郭泰。因與融齋刺就房謁之。遂請留宿。泰嗟歎。下牀爲拜。覽學歸鄉里。州郡並請。皆以疾辭。雖在燕居。必以禮自整。妻子有過。輒免冠自責。妻子庭謝。候覽冠乃敢升堂。家人莫見喜怒聲色之異。後徵方正。遇疾而卒。三子皆有文史才。少子元最知名。謹案。大典續後漢書。符融傳後有仇覽傳。其文與後漢書循吏傳所載略有增改。而目錄脫漏。今仍列于符融傳後。

陳寔字仲弓。潁川許人也。出於單微。自爲兒童。雖在戲弄。爲等類所歸。少作縣吏。常給事廝役。後爲都亭刺佐。而有志好學。坐立誦讀。縣令鄧邵試與語。奇之。聽受業太學。後令復召爲吏。乃避隱陽城山中。時有殺人者。同縣揚吏以寔寔。縣遂逮繫。考掠無實。而後得出。及爲督郵。乃密託許令禮召揚吏。遠近聞者咸歎服之。家貧。復爲郡西門亭長。尋轉功曹。時中常侍侯覽託太守高倫用吏。倫教署爲文學掾。寔知其非。人懷微請見。言曰。此人不宜用。而侯常侍不可違。寔乞從外署。不足以慶明德。倫從之。於是鄉論怪其非舉。寔終無所言。倫後被徵爲尚書。郡中士大夫送至輪氏傳舍。倫謂衆人言曰。吾前爲侯常侍用吏。陳君

密持教還。而於外白署。比聞議者以此少之。此咎由故人畏憚彊禦。陳君可謂善則稱君。過則稱己者也。寔固自引愆。聞者方歎異。由是天下服其德。司空黃瓊辟選理劇。補開喜長。旬月以期喪去官。復再遷除。太丘長。修德清靜。百姓以安。鄰縣人戶歸附者。寔輒訓導。譬解發遣。各令還本縣。司官行部吏慮有訟者。曰。欲禁之。寔曰。訟以求直。禁之理將何伸。其勿有所拘。司官聞而歎曰。陳君所言若是。豈有怨於人乎。亦竟無訟者。以沛相賦斂違法。乃解印綬去。吏人追思之。及後逮捕黨人。事亦連寔。餘人多逃避。求免。寔曰。吾不就獄。衆無所恃。乃請囚焉。遇赦得出。靈帝初。大將軍竇武辟以爲掾屬。時中常侍張讓權傾天下。讓父死。歸葬潁川。雖一郡畢至。而名士無往者。讓甚恥之。寔乃獨弔焉。及後復誅黨人。讓感寔。故多有全宥。寔在鄉閭。平心率物。其有爭訟。輒求判正。曉譬曲直。退無怨者。至乃歎曰。寧爲刑罰所加。不爲陳君所短。時歲荒。民儉。有盜夜入其室。止於梁上。寔陰見。乃起自整拂。呼命子孫。正色訓之曰。夫人不可不自勉。不善之人。未必本惡。習以性成。遂至於此。梁上君子者是矣。盜大驚。自投於地。稽顙歸罪。寔徐譬之曰。視君狀貌。不似惡人。宜深克己反善。然此當由貧困。令遺絹二匹。自是一縣無復盜竊。太尉楊賜。司徒陳耽。每拜公卿。羣僚畢賀。賜等常歎寔大位未登。愧於先之。及黨禁始解。大將軍何進。司徒袁隗。遣人敦寔。欲特表以不次之位。寔乃謝使者曰。寔久絕人事。飾巾待終而已。時三公每缺。議者歸之。累見徵命。遂不起。閉門懸車。棲遲養老。中平四年。年八十四。卒於家。何進遣使弔祭。海內赴者三萬餘人。制衰麻者以百數。共

刊石立碑。諡為文範先生。

原注。先賢行狀。大將軍何進遺官賜弔祠為諡。

六子。紀、誠、最賢。

原注。蔡邕陳太丘碑。先生諱寔。字仲弓。潁川許人也。含元精之。用行舍藏。進退可度。

資九德。總修百行。於鄉黨則恂恂焉。為善勝。仁而愛人。使夫少長咸安。謂之。其為道也。和行舍藏。進退可度。不徵計以干時。不遷貳以隨下。四為郡功曹。五辟豫州。六辟三府。再辟大將軍。寧開喜牛歲。太丘一年。德務中庸。教敦不肅。政以禮成。化行有謚。會遭黨事。禁錮二十年。樂天知命。澹然自逸。交不諂上。愛不覆下。見機而作。不俟終日。及文書敕。時年已七十。遂隱丘山。懸車告老。四門備禮。閉心靜居。大將軍何公。司徒袁公。前後摺辟。使人曉諭云。欲持表便可入踐常伯。超補三事。紆佩金紫。光國垂勳。先生曰。絕望已久。節巾待期而已。皆遂不至。宏農楊公。東海陳公。每在喪職。羣僚賀之。皆舉手曰。潁川陳君。絕世超倫。大位未躋。懶于職文竊位之責。故時人高其德。重乎公相之位也。年八十有四。中平三年八月丙午遭疾而終。臨沒。願命留葬所卒。時服素棺。鄣財周觀。喪事惟約。用過乎儉。羣公百僚。莫不咨嗟。廡廡知名。失聲揮涕。大將軍弔祠。錫以嘉諡曰。徵士陳君。稟嶽瀆之精。苞靈曜之純。天不愆遺老。俾屏我王。梁崩哲萎。于時靡盬。摯紳儒林。論德謀跡。蓋曰文範先生。傳曰。郗都乎文哉。曹府君命官作誄曰。赫矣陳君。命世是生。含光醇德。為士作程。實始既正。守終又令。奉禮終沒。休矣清聲。遺官屬掾吏前後赴會。刊石作銘。府丞與比縣會葬。荀慈明。韓元長等五百餘人。緇服設位。哀以送之。遠近會葬。千人已上。河南尹仲府君臨郡道。歎功德。述錄高行。以為遠近鮮能及之。重部大掾。一時成銘。斯可謂存榮沒哀。死而不朽者也。乃作銘曰。峨峨崇嶽。吐符降神。於皇先生。抱寶懷珍。如何吳穹。既喪斯文。微言圯絕。來者曷聞。交交黃鳥。爰集于棘。命不可贖。哀何有極。

紀字元方亦以至德稱兄弟孝養閨門雍和後進之士皆推慕其風及遭黨錮發憤著書

數萬言號曰陳子黨禁解四府並命無所屈就遭父憂每哀至輒嘔血絕氣雖衰服已除而積毀消瘠殆將滅性豫州刺史嘉其至行表上尙書圖象百城以厲風俗董卓入雒陽乃使就家拜五官中郎將不得已到京師遷侍中出為平原相往謁卓時欲徙都長安乃謂紀曰三輔平敞四面險固土地肥美號為陸海今關東兵起恐雒陽不可久居長安猶有宮室今欲西遷何如紀曰天下有道守在四夷宜修德政以懷不附遷移至尊誠計之末者愚以為公宜事委公卿專精外任其有違命則威之以武今關東兵起民

不堪命。若謙遠朝政，率師討伐，則塗炭之民，庶幾可全。若欲徒萬乘以自安，將有累卵之危，崢嶸之險也。卓意甚忤，而敬紀名行，無所復言。時議欲以爲司徒，紀見禍亂方作，不復辦嚴。卽時之郡，璽書追拜太僕。

又徵爲尙書令，建安初，袁紹爲大尉，讓於紀，紀不受，拜大鴻臚。年七十一，卒於官。子羣爲魏司空。原注：魏志。

魯國孔融，才高倨傲，年內羣紀之間，先與羣交，更爲紀拜，由是顯名。

天下以爲公慚卿，卿慚長弟。諡字季方，與紀齊德，父子並著高名。時號

三君，每宰府辟召，常同時旌命，羔鴈成羣。當世榮之，諡早終。原注：范氏論曰：漢自中世以下，閣豎擅恣，故俗

豎已叫呼之矣，故時政彌昏，而其風愈往，惟陳先生進退之節，必可度也。據於德，故物不犯。安于仁，故不離羣。行成乎身，而道訓天下，故凶邪不能以權奪。王公不能以貴驕，所以聲教廢於上，而風俗清乎下也。鍾皓字

季明，潁川長社人也。爲郡著姓，世善刑律。皓少以篤行稱，公府連辟爲二兄，未仕，避隱密山，以詩律教授。

門徒千餘人。同郡陳寔年不及皓，皓引與爲友。皓爲郡功曹，會辟司徒府，臨辭，太守問誰可代卿者，皓曰：

「明府欲必得其人，西門亭長陳寔可。」寔聞之曰：「鍾君似不察人，不知何獨識我。」皓頃之，自劾去。前後九辟

公府，徵爲廷尉、正博士、林慮長，皆不就。時皓及荀淑並爲士大夫所歸慕。李膺嘗歎曰：「荀君清識難尙，鍾

君至德可師，皓兄子瑾母，膺之姑也。瑾好學慕古，有退讓風，與膺同年，俱有聲名。膺祖太尉修嘗言：「瑾似

我家性，邦有道不廢，邦無道免於刑戮，復以膺妹妻之。」瑾辟州府，未嘗屈志。膺謂之曰：「孟子以爲人無是

非之心，非人也。弟何期不與孟軻同邪？」瑾嘗以膺言白皓，皓曰：「昔國武子好招原注：音搖。人過，以致怨本，卒

保身全家，爾道爲貴，其體訓所安，多此類也。」年六十九，終於家。諸儒頌之曰：「林慮懿德，非禮不處，悅此詩

書。弦琴樂古。五就州招。九膺台輔。逡巡王命。卒歲容與。謹案。後漢書此下有暗孫條。建安中爲司錄校尉十一字。此書緣自有傳。故從刪節。

議曰。嘗讀蔡邕所作郭有道陳太丘二碑。高風絕跡。邈不可及。有伯夷之清而不隘。有柳下惠之和而不流。鸞鳳翔翥而不忤於臯虺。蘭桂芬烈而不蔽於楛棘。國無道至死不變。怡然而不戚戚焉。天下莫不高之。則顏氏之徒也。范滂謂泰隱不離親。貞不絕俗。天子不得臣。諸侯不得友。范氏謂寔據於德。故物不犯安於仁。故不離羣。行成乎身。而道訓乎天下。故凶邪不能以權奪。王公不能以貴驕。可謂知二子矣。嗚呼。方帝棟弗隆。咸宜構難。亟去疾走。猶懼厭焉。憤然矯激。與之角死。黨人之所以及也。其視二子遠矣哉。張讓之弔。或以病寔。夫人而不仁。疾之已甚。則亂孔子之所以見南子及陽虎也。喪紀不廢。不惡而嚴。夫何病哉。

黃憲字叔度。汝南慎陽人也。世貧賤。父爲牛醫。潁川荀淑至慎陽。遇憲於逆旅。時年十四。淑竦然異之。揖與語。移日不能去。謂憲曰。子吾之師表也。既而前至袁閔所。原注。閔舊作閔。非也。案閔字奉高。未及勞問。閔字夏甫。下言奉高。則閔也。

逆曰。子國有顏子。寧識之乎。閔曰。見吾叔度邪。是時同郡戴良。才高倨傲。而見憲未嘗不正容。及歸。罔然若有失也。其母問曰。汝復從牛醫兒來邪。對曰。良不見叔度。不自以爲不及。既觀其人。則瞻之在前。忽焉在後。固難得而測矣。同郡陳蕃。周舉。常相謂曰。時月之間。不見黃生。則鄙吝之萌。復存乎心。及蕃爲三公。臨朝歎曰。叔度若在。吾不敢先佩印綬矣。太守王龔在郡。禮進賢達。多所降致。卒不能屈憲。郭泰少遊汝

南先過袁閔不宿而退進往從憲累日方還或以問泰

原注。郭泰別傳。時林宗過薛恭祖。恭祖問曰。聞足下見袁奉高。車不停軌。鑿不輟輓。從叔度乃彌信宿也。

泰曰奉高之器譬諸汎濫雖清而易挹叔度汪汪若千頃陂澄之不清清之不濁不可量也憲初舉孝廉

原注。杜預女戒。憲與同郡周子居。艾伯堅。郗伯向。封武。與盛。孔叔。號汝南六孝廉。太守張儉選此六人以應歲舉。受版未行。儉死。子居等遂駐行喪。儉妻于柩側下帷見之。厲以宜行。子居歎曰。不有行者莫宣公。不有止者莫卹居。

於是與伯堅即日辭。又辟公府友人勸其仕憲亦不拒之暫到京師而還竟無所就年四十八而終天下

號曰徵君謹案。通鑑綱目。漢安帝延光元年書汝南黃憲卒。以史家限斷論。不當入三國。此特因郭泰等牽連入之耳。

徐穉字孺子豫章南昌人也少爲諸生學嚴氏春秋京氏易歐陽尙書兼綜風角河圖七緯推步變易恭

儉義讓閭里服其德化家貧常自耕稼非其力不食四察孝廉五辟公府三舉茂才皆不起時陳蕃爲太

守以禮請署功曹穉不免見之謹案。後漢書不免下無見字。既謁而退蕃在郡不接賓客惟穉來特設一榻去則懸之

後舉有道家拜太原太守皆不悅就延熹二年尙書令陳蕃僕射胡廣上疏薦穉等曰臣聞善人天地之

紀政之所由也詩云思皇多士生此王國天挺俊乂爲陛下出當輔弼明時左右大業者也伏見處士豫

章徐穉彭城姜肱汝南袁閔京兆章著原注。謝承漢書。著爲三輔冠族。少修節操。治京氏易。韓詩。博通術藝。潁川李曇德行純備著於人

聽若使擢登三事協亮天工必能翼宣盛美增光日月矣桓帝乃以安車元纁備禮徵之並不至帝因問

蕃曰徐穉袁閔韋著孰爲先後蕃對曰閔生公族問道漸訓著長於三輔禮義之俗所謂不扶自直不鏤

自雕至於穉者爰自江南卑薄之域而角立傑出宜當爲先穉嘗爲太尉黃瓊所辟不就及瓊卒歸葬穉

乃負糧徒步到江夏。豫豕一雞，以綿絮一兩，漬酒以裹雞，至冢外，以水漬縣，使有酒氣。白茅藉飯，置雞而酌，哭畢即去，不告姓名。時會者四方名士郭泰等數十人，聞之，疑其穉也。乃選能言生茅容，輕騎追之。及於塗，容爲設飯，共言稼穡之事。臨訣去，謂容曰：爲我謝郭林宗，大樹將顛，非一繩所維，何爲栖栖不遑寧處？及泰有母憂，穉往弔之，置生芻一束於廬前而去。衆怪不知其故，泰曰：此必南州高士徐孺子也。詩不云乎：生芻一束，其人如玉。吾無德以堪之。靈帝初，欲蒲輪聘穉，會卒。年七十二，子允字季登，篤行孝弟，亦隱居不仕。太守華歆禮請相見，固病不詣。漢末寇賊縱橫，皆敬允禮行，轉相約敕，不犯其閭。建安中卒。李曇字雲，少孤，繼母嚴酷，曇事之愈謹，爲鄉里所稱法。養親行道，終身不仕，與徐孺子等海內稱爲五處士焉。

姜肱字伯淮，彭城廣戚人也。家世名族。

原注：謝承漢書。祖父豫章太守。父任城相。

肱與二弟仲海、季江，俱以孝行著聞。其友愛

天至，常共被臥起，及各娶妻，兄弟相戀，不能別寢。

以繼嗣當立，乃遞往就室。

原注：謝承漢書。肱性篤孝。事繼母恪勤。母既年少，又嚴厲。

肱感凱風之孝，兄弟同被而寢，不入房室，以慰母心也。

肱博通五經，兼明星緯，士之遠來就學者三千餘人。諸公爭加辟命，皆不就。二

弟名聲相次，亦不應徵聘。肱嘗與季江謁郡，夜于道遇盜，欲殺之。肱兄弟更相爭死，盜遂兩釋之。

原注：謝承漢書。

肱與季江俱乘車行過野廬，爲賊所劫，取其衣物，欲殺其弟。兄肱謂盜曰：弟年幼，父母所憐，又未聘娶，願自殺身，濟弟。季江言：兄年德在前，家之珍寶，國之英俊，乞自受戮，以代兄命。盜戰刃曰：二君所爲賢人，吾等不肖，妄相侵

犯，棄物而去。肱車中尙有數千錢，盜不見也。使從者追與之，亦不復受。肱以物經歷盜手，因以付亭吏而去。

但掠奪衣資而已，既至郡中，見肱無衣服，怪問其故。

肱託以他辭終不言盜盜聞而感悔後乃就精廬求見肱與相見皆叩頭謝罪而還所略物肱不受勞以酒食而遣之後與徐稱俱徵不至桓帝乃下彭城使畫工圖其形狀肱臥於幽閣以被韜面言感眩疾不欲出風工竟不得見之中常侍曹節等專執朝政新誅太傅陳蕃大將軍竇武欲借寵賢德以釋衆望乃白徵肱爲太守肱得詔告其友曰吾以虛獲實遂籍聲價明明在上猶當固其本志況今政在闒豎夫何爲哉乃隱身遁命遠浮海濱再以元纁聘不就卽拜大中大夫詔書至門原注謝承漢書靈帝手筆下詔曰肱抗凌雲之志養浩然之氣以朕德薄未肯降志昔許由不風王道爲化夷齊不撓周德不虧州郡以禮僉順勿失其意肱使家人對云久病就醫遂羸服閒行竄伏青州界中賣卜給食召命得斷家亦不知其處歷年乃還年七十七熹平二年終於家弟子陳留劉操追慕肱德共刊石頭之

申屠蟠字子龍陳留外黃人也九歲喪父哀毀過禮服除不進酒肉十餘年廬於墓側致甘露白雉每忌日輒三日不食同郡緱氏女玉爲父報仇殺夫之從母兄季士吏執玉以告外黃令梁配配欲論殺玉蟠時年十五爲諸生進諫曰王之節義足以感無恥之孫激忍辱之子不遭明時尙當表旌廬墓況在清聽而不加哀矜配善其言乃爲讞得減死論家貧備爲漆工郭泰見而奇之同郡蔡邕深重蟠及被州辟乃辭讓曰申屠蟠稟氣元妙性敏心通喪親盡禮幾于毀滅至行美義人所鮮能安貧樂潛味道守眞不爲燥溼輕重不爲窮達易節方之於邕以齒則長以德則賢後郡召爲主簿不行前後徵辟文書悉掛於樹

初不顧盼。遂隱居精學。博貫五經。兼明圖緯。始與濟陰王子居同在太學。子居臨沒。以身託蟠。蟠乃躬推輦車。送喪歸鄉里。遇司隸從事於河鞏之間。從事義之。爲封傳護送。蟠不肯受。投傳於地而去。事畢。還學。太尉黃瓊辟不就。及瓊卒。歸葬江夏。四方名豪會帳下者六七千人。互相談論。莫有及蟠者。惟南郡一生與相酬對。既別。執蟠手曰。君非聘則徵。如是相見於上京矣。蟠勃然作色曰。始吾以子爲可與言也。何意乃相拘教樂貴之徒邪。因振手而去。不復與言。再舉有道。不就。

原注。謝承漢書。詔書令郡以禮發遣蟠到河南萬歲亭折轅而旋。

先是京師遊

士汝南范滂等非訐朝政。自公卿以下。皆折節下之。太學生爭慕其風。以爲文學將興。處士復用。蟠獨歎曰。昔戰國之世。處士橫議。列國之王。至爲擁篲先驅。卒有坑儒燒書之禍。今之謂矣。乃絕迹於梁碭之間。因樹爲屋。自同傭人居。二年。滂等果罹黨錮。或死或刑者數百人。蟠確然免於議論。後蟠友人陳羣。馮雍坐事繫獄。豫州牧黃琬欲殺之。或勸蟠救雍。蟠不肯行。曰。黃子刻爲吾故邪。未必合罪。如不用吾言。雖往何益。琬聞之。遂免雍罪。大將軍何進連徵不詣。進必欲致之。使蟠同郡黃忠書勸曰。前幕府初開。至如先生。時加殊禮。優而不名。申以手筆。設几杖之坐。經過二載。而先生抗志彌高。所向益固。竊論先生高節有餘。于時則未也。今潁川荀爽。載病在道。北海鄭元。北面受署。彼豈樂羈牽哉。知時不可逸豫也。昔人之隱。遭時則放聲滅迹。巢棲茹薇。其不遇也。則裸身大笑。被髮狂歌。今先生處平壤。遊人間。吟典籍。襲衣裳。事異昔人。而欲遠蹈其跡。不亦難乎。孔氏可師。何必首陽。蟠不答。中平五年。復與爽元及潁川韓融陳紀等。

十四人並博士徵不至。明年董卓廢立，蟠及爽、融、紀等復俱公車徵。唯蟠不到，衆人咸勸之。蟠笑而不應。居無幾，爽等爲卓所脅迫，西都長安。京師擾亂，及大駕西遷，公卿多遇兵飢，室家流散。融等僅以身脫，惟蟠處亂末，終全高志。年四十七，終於家。

議曰：林宗，仲弓高標跨世，表表焉而終莫不則焉。叔度，孺子淵懿宏遠，林宗尤所敬而盛爲稱道。且自愧焉，則又高矣。伯淮，子龍見幾而作，雖近乎閉關絕世，其不滓世汚，又其次也。詩曰：潛雖伏矣，亦孔之昭。易曰：箕子之貞，明不可息也。褚子有焉，議者往往以叔度爲顏子，夫顏子具聖人之體，發仲尼之蘊，仁爲德之全，仲尼與其不違，復爲易之幾，仲尼與其不遠，是以道冠七十子而獨稱入室，言其出處，則孟子以爲與禹稷易地，孔孟而下，數千年孰與斯人也。叔度資質雖美，使問學聖門，庶幾廟游夏之列，一間地位，恐未易至也。

張元字處虛，蜀郡成都人也。祖霸，治嚴氏公羊春秋，博覽五經。永元中，爲會稽太守。刪嚴氏春秋，名張氏學。父楷，傳霸學，性好道術，能作五里霧。兄陵，官至尙書。元嘉中，歲首朝賀，大將軍梁冀帶劍入省，陵呵叱之，令出。敕羽林虎賁奪冀劍，冀跪謝，陵不應。卽劾奏冀，請廷尉論罪。有詔以一歲俸贖，而百僚肅然。初，冀弟不疑爲河南尹，舉陵孝廉，不疑疾陵之奏冀，因謂曰：昔舉君適所以自罰也。陵對曰：明府不以陵不肖，誤見擢序，今申公憲以報私恩，不疑有愧色。元沈深有才學，以時亂不仕。司空張溫數以禮辟，不能致。中

平二年。溫以車騎將軍出征涼州賊邊章等。將行。元自田廬被褐帶索。要說溫曰。天下賊寇雲起。豈不以黃門常侍無道故乎。聞中貴人公卿以下。當出祖道於平樂觀。明公總天下威重。握六師之要。若於中坐酒酣。鳴金鼓。整行陣。召軍正執有罪者誅之。引兵還屯都亭。以次翦除中官。解天下之倒懸。報海內之怨毒。然後顯用隱逸忠正之士。則邊章之徒。宛轉股掌之上矣。溫聞大震。不能對。良久謂元曰。處虛非不說。子之言。願吾不能行如何。元乃歎曰。事行則爲福。不行則爲賊。今與公長辭矣。卽欲仰藥。溫前執其手曰。子忠於我。我不能用。是吾罪也。子何爲然。且出口入耳之言。誰令知之。元遂去。隱居魯陽山中。及董卓秉政。辟以爲掾。舉侍御史。不就。卓臨之以兵。不得已強起。至輪氏。道病終。

議曰。孟子謂浩然之氣。至大至剛。以直養而無害。則塞乎天地之間。是集義所生者。夫義之所在。氣之所充也。靡不勝之。而天下莫彊焉。觀陵之叱冀。至冀跪謝而不貸。卒効致廷尉。方逆威強橫。視天子蔑如。而陵執之如狐兔。元勸溫誅鋤閹穢。以正朝廷。溫震懼卻走。而不敢聞。方宦豎專朝。回天倒海。錮戮一世。而元視爲几上肉。義之所激。強有力者不與如此。故苟能集義以生氣。擴而充之。則大守而用之。則剛。存而養之。則直。引而去之。則逸。乎其高也。元卒隱而不就卓命。前日之剛。乃今日之高也。與。

袁閔字夏甫。司徒安之元孫也。少勵操行。父賀爲彭城相。閔往謁。變姓名。徒行無旅。旣至府門。連日吏不爲通。會阿母出見閔。入白夫人。乃密呼見之。旣而辭去。賀遣車送之。閔稱眩疾不肯乘。反郡界無知者。及

賀卒。閔兄弟迎喪，不受賻贈。纒經扶柩，冒犯寒露，體貌枯毀，手足血流。見者莫不傷之。服闋，累徵舉，皆不應。居處側陋，耕學爲業。從父隗，貴盛數饋之，無所受。閔見時方險亂，而家富盛，常對兄弟歎曰：「吾先公福祚，後世不能以德守之，而競爲驕奢，與亂世爭權，此卽晉之三卻矣。延熹末，黨事將作，閔遂散髮絕世，投迹深林。以母老不宜遠遁，乃築土室，四周於庭，不爲戶，自牖納飲食而已。且於室中東向拜母。母思閔時往就視，母去便自掩閉。兄弟妻子莫得見也。及母沒，不爲制服，設位時，莫能名，或以爲狂生。潛身十八年。黃巾賊起，攻沒郡縣，百姓驚散。閔誦經不移，賊相約語不入其閭。鄉人就閔避難，皆得全免。年五十七卒於土室。臨終敕其子曰：「勿設殯棺，但著禪衫疏布單衣幅巾，親尸於版牀之上，以五百盞爲藏。二弟忠宏、節操皆亞於閔。忠字正甫，與同郡范滂爲友，俱證黨事，得釋。初平中爲沛相，乘輦車到官，以清亮稱。及天下大亂，忠棄官客會稽上虞。一日見太守王朗，徒從整飭，心嫌之，遂稱病自絕。後孫策破會稽，忠等浮海南投交趾。獻帝都許，徵爲衛尉，未到卒。宏字邵甫，恥其門族貴勢，乃變姓名，徒步師門，不應徵辟。終于家。忠子祕，爲郡門下議生。黃巾起，祕從太守趙謙擊之，軍敗，祕與功曹封觀等七人以身扞刃，皆死于陳。謙以得免，詔祕等門閭號曰七賢。封觀者有志節，當舉孝廉，以兄名位未顯，恥先受之，遂稱風疾，暗不能言。火起觀屋，徐出避之，忍而不告。後數年，兄得舉，觀乃稱損而仕郡焉。

議曰：族大而侈，單斃于亂，尙矣。故書曰：世祿之家，鮮克由禮。以蕩陵德實悖天道，是以越椒競于楚而滅。

伯有汰于鄭而亡袁氏四世五公驕奢而與亂世爭權卒之尺口盡赤于西京而術紹強僭爲世大戮遂
祝袁宗閔獨閉門自絕克免于難智氏雖滅輔果猶在易曰見幾而作不俟終日夏甫有焉

續後漢書卷第六十九中

列傳第六十六中

高士

漢

龐公

徐幹

管寧

王烈 胡昭

張辟

李密

子賜 興

龐公者名德公南郡襄陽人也居峴山之南未嘗入城府夫妻相敬如賓諸葛亮每至德公家獨拜牀下德公初不令止司馬德操嘗詣德公值其渡沔上先人墓德操逕入其室呼德公妻子使速作黍徐元直向云當來就我與德公談其妻子皆羅拜堂下奔走供設須臾德公還直入相就不知何者為客也德操年小德公十歲兄事之呼作龐公故俗人遂稱為龐公荊州刺史劉表數延請不能屈乃就候之曰夫保全一身孰若保全天下乎公笑曰鴻鵠巢於高林之上暮而得所棲黿鼉穴於深淵之下夕而得所宿夫趣舍行止亦人之巢穴也各得棲宿而已天下非所保也因釋耕于壟上而妻子耘於前表指而問曰先生苦居畝畝而不肯官祿後世何以遺子孫乎公曰世人皆遺之以危今獨遺之以安雖所遺不同未為無所遺也表歎息而去後遂攜其妻子登鹿門山因采藥不反子山民

謹案注作子字山人有令名娶諸葛亮姊為

魏黃門吏部郎早卒。子渙。晉太康中爲牂牁太守。

議曰。孔明見公輒拜。公不爲之止。非厭德之深能若是乎。伏龍鳳雛皆出其門。卒撥亂世。反之正。以存漢公之爲人可知已。昭烈三顧孔明。始得一見。表乃亟欲屈公。而且讓之。宜乎見諂。攜妻子而去也。公往鹿門。孔明起隆中。見龍在田。利見大人。公雖隱而跡益彰矣。

徐幹字偉長。北海人也。聰識洽聞。操翰成章。篤行體道。委謝榮寵。曹操特加旌命。辟爲司空軍謀祭酒掾。屬轉五官將。丕文學。輒告休假。除上艾長。復稱疾不行。以著述自娛。著法象論曰。夫法象立所以爲君子。法象者莫先乎正容貌。慎威儀。是故先王之制禮也。爲冕服采章以旌之。爲佩玉鳴璜以聲之。欲其尊也。欲其莊也。焉可以懈慢也。容貌者人之符表也。容貌正。故情性治。情性治。故仁義存。仁義存。故盛德著。故可以爲法象。斯謂之君子矣。君子者無尺土之封而民尊之。無刑罰之威而民畏之。無羽籥之樂而民樂之。無爵祿之賞而民懷之。其所以致之者一也。故孔子曰。君子威而不猛。泰而不驕。詩云。敬慎威儀。惟民之則。若夫惰其威儀。恍其瞻視。忽其辭令。而望民之則我者。未之有也。莫之則者。必漫之者至矣。小人見慢也。而致怨乎人。患己之卑而不思其所以焉。哀哉。故書曰。惟聖罔念作狂。惟狂克念作聖。人性之所簡也。存乎幽微。人情之所忽也。存乎孤獨。夫幽微者顯之原。孤獨者見之端也。胡可簡也。胡可忽也。是故君子敬孤獨而慎幽微。雖在隱蔽。鬼神不見其隙耳。詩云。肅肅兔置。施于中林。處獨之謂也。又有顛沛而不

可亂者。則成王季路其人也。昔成王將崩。體被冕服。然後發顧命之辭。季路遭亂。正冠結纓。而後死。白刃

之難。原注。尙書顧命。惟四月。哉生魄。王不懌。甲子王乃洗頰水相。被冕服。憑玉几。乃同召太保爽。左氏傳。太子道孔懼于亂。遂劫以登臺。季子曰。食焉不避其難。乃入曰。太子焉用孔懼。雖殺之必或繼之。太子聞之懼。

下石乞孟。嚴敵子路。以戈擊之。斷纓。子路曰。君子死。冠不免。結纓而死。夫以彌留之困。白刃之難。猶不忘敬。況於遊宴乎。故詩曰。就其深矣。

冰之游之。言必濟也。君子者無戲諠之言。言必有防。無戲諠之行。行必有檢。言必有防。行必有檢。故雖妻

妾不得而黷也。雖朋友不得而狎也。是以不愠怒而教行于閨門。不諫論而風聲化乎鄉黨。傳稱大人正

己而物正者。蓋此之謂也。以匹夫之居猶然。況得志而行於天下乎。唐堯之帝。允恭克讓。而光被四表。成

湯不敢怠遑。而奄有九域。文王祗畏而造彼區夏。易曰。觀盥而不薦。有孚容若。言下觀而化也。禍敗之所

由也。則有媠媠以爲階。可無慎乎。昔宋閔碎首於棊局。陳靈被矢於戲言。原注。公羊傳。宋萬嘗與莊公戰。獲乎莊公。莊公歸。散舍諸宮中。

數月然後歸之。歸反爲大夫于宋。與閔公博。婦人皆在側。萬曰。甚矣魯侯之淑。魯侯之美也。天下諸侯。宜爲君者。惟魯侯耳。閔公矜此婦人。妬其言。顧曰。此處也。爾處焉。故魯侯之美惡乎。萬怒。博閔公。絕其脣。左氏傳。陳

靈公與孔寧儀行父飲酒于夏氏。公謂行父曰。微舒似汝。對曰。亦似君。微舒病之。公出。自其腹射殺之。二子奔楚。閔邠造逆於相。託于公。生殺於嘗鼈。原注。左氏傳。齊

與邠歌之父爭田。弗勝。及即位。乃掘而別之。而使歐僕納閔職之妻。而使職歸乘。夏五月。公游于申池。二人浴于

池。歐以朴扶職。職怒。歐曰。人奪女妻而不怒。一挾女庸何傷。職曰。與則其父而弗能病者何如。乃謀弑靈公。二入浴竹

中。歸舍爵而行。楚人獻鼈于鄭靈公。公子宋與子家將見。子公之食指動。以示子家曰。他日我如此。必嘗異味。及

入。宰夫將解鼈。相視而笑。公問之。子家以告。及食大夫鼈。召子公而弗與也。子公怒。染指于鼎。嘗之而出。公怒

而況君乎。反譖子家。子家懼而從之。夏弑靈公。是故君子居身也謙。在敵也讓。臨下也莊。事上也敬。四

者備而怨咎不作。福祿從之。詩云。靖恭爾位。正直是與。神之聽之。式穀以女。君子之交人也。勸而不媠。和

而不同。好而不佞。詐學而不虛行。易親而難媚。多恕而寡非。故無絕交無畔朋。書曰：慎始而敬終。終以不困。夫禮也者。人之急也。可終身思而不可須臾離忘也。須臾離則悖慢之行臻焉。須臾忘則悖慢之心生焉。況無禮而可以終始乎。夫禮也者。敬之經也。敬也者。禮之情也。無敬無以行禮。無禮無以節敬。道不偏廢。相須而成。是能盡敬以從禮者。謂之成。過則生亂。亂則災及其身。昔晉惠公以慢瑞無嗣。文公以肅命典國。原注：左氏傳。天王使召武公內史過賜晉侯命受玉幣。過歸告王曰：晉侯其無後乎。王賜之命。幣于受瑞。先自棄也。已。其何繼之有。王命尹氏及王子虎內史叔與父策命晉侯為侯伯曰：王謂叔父。敬服王命。以綏四國。糾遜王愿。晉侯三辭。從命曰：重耳敢再拜稽首。欲讎以傲。享徵亡。冀缺以敬妻受服。原注：左氏傳。衛侯享苦成叔。奉揚天子之丕顯休命。受策以出。出入三覲。曰：苦成家其亡乎。古之為享食也。以觀威儀。省禍福也。故詩曰：兕觥其觶。旨酒思柔。彼交匪傲。萬福來求。今天子微。取禍之道也。初白季使過冀。見冀缺。其妻饋之。敬相待如賓。與之歸。言諸文公曰：敬德之聚也。能敬必有德。德以治民。君請用之。遂以治民。君請子園以大明招亂。遠罷以既醉保祿。良霄以鶉賁喪家。子展以草蟲昌族。原注：左氏傳。賦既醉。叔向曰：蕙氏之有後于楚國也。宜哉。承君命不忘敬。鄭伯享趙孟于垂隴。伯有賦鶉之賁賁。趙孟曰：牀第之言不踰闕。況在野乎。非使人之所得聞也。子展賦草蟲。趙孟曰：善哉。民之主也。卒享。文子告叔向曰：伯有將為戮矣。詩以言志。志諷其上而公怨之。以為賓榮。其能久乎。幸而後亡。子展其後亡者也。在上不忘降。君子感凶懷之。如彼。見吉德之如此。故立必磬折。坐必抱鼓。周旋中規。折旋中矩。視不離于檜結之間。言不越乎表著之位。聲氣可聽。精神可愛。俯仰可宗。揖讓可貴。作事有方。動靜有常。帥禮不荒。故為萬夫之望也。又著書二十餘篇。曰中論。文多不能具載。其治學篇曰：民之初載。其蒙未祛。譬如宵在元室。所求不獲。白日照焉。則羣物斯辨。學者之心。白日也。又曰：君子之於學也。其不懈如上天之動。猶日月之行。終身亶亶。沒而後已。

又曰。學者所以總羣道也。羣道統乎己心。羣言一乎己口。惟所用之。故出則元亨。處則利貞。又曰。夫獨思則滯而不通。獨爲則困而不就。人心必有困焉。必有寤焉。如火得風而炎熾。水赴下而流速。故太昊觀天地而畫卦。燧人察辰心而鑽火。帝軒聆鳳鳴而調律。蒼頡視鳥跡而作書。則大聖之學矣。賢不能學於遠。乃學於近。故聖人爲師。脩本篇曰。君子之嚮道也。止則隅坐。行則驂乘。上懸乎冠綬。下繫乎帶佩。晝與之游。夜與之休。此之謂日新。又曰。故君子脩德。始乎羈紲。終乎駘背。創乎夷原。成乎喬岳。易曰。升元亨。積小致大之謂曰。小人朝爲夕而求其成。坐施而立望其反。行一日之善。而求終身之譽。譽不至則曰善無益。虛道篇曰。目也者能遠察天際。而不能近見其背心。亦如之。君子誠知心之似目也。是故物鑒于人。以觀得失。故視不過垣牆之間。而見邦國之表。聽不過闕塾之內。而聞千里之外。貴驗篇曰。水之寒也。火之熱也。金石之剛也。此數物未嘗有言。而人莫不知其然者。信著乎其體也。使吾所行之信。若彼數物。誰其疑我哉。又曰。伊尹放太甲。展季復寒女。商魯之民不稱淫篡焉。原注。韓詩外傳曰。魯有男子獨處。夜暴風雨至。婦人趨而託之。男子閉戶不納曰。吾聞男女不六十不同居。婦人曰。子何不學柳下惠。曰。我將以我之不可。學柳下惠之可。何則。積之於素也。又曰。小人恥其面之不如子都。君子恥其行之不如舜禹。是皆治心養性脩身之要言也。曹丕著論稱之曰。偉長獨懷文抱質。恬澹寡欲。有箕山之志。可謂彬彬君子者矣。著中論成一家言。辭義典雅。足傳于後。此之爲不朽矣。建安二十二年卒於家。世咸宗其道。德云。

議曰堯舜始言中以為傳心之典。列聖授受。統理根極。至子思子著中庸。而其義備矣。歷秦漢五百有餘歲。諸儒馳說。偏倚駁雜。不復及是。幹乃傑然著論。推本堯舜之初。非有所得。能若是乎。觀其切於畏敬。篤於力行。其辭緩。其旨遠。無非誠信爲己之學。進德修業之方。則真知夫中者也。不事操丕父子。不食篡朝之祿。而與幼安比高。而儒雅過之。傳曰國無道至死不變。彊哉矯。偉長有焉。

管寧字幼安。北海朱虛人。齊大夫管仲之後也。田氏有齊。而管氏分處他國。漢初管少卿者。爲燕令。始家朱虛。世有名德。九世而生寧。寧年十六喪父。中表愍其孤貧。咸共贖賻。悉辭不受。寧長八尺。美鬚眉。與平原華歆同縣。邴原相友。俱游學異國。並敬善陳仲弓。嘗與歆共鉏菜。見地有金。寧揮鉏不顧。與瓦石無異。歆捉而擲之。人以其知優劣。後與歆同席讀書。有乘軒過門者。歆推書出觀。寧曰。大丈夫富貴當自致。而窺他人乎。遂割席分坐。曰。子非吾友也。天下大亂。聞公孫度令行海外。遂與邴原及平原王烈等。至遼東。度虛館以候之。既見度。語惟經典。不及世事。乃營居山谷間。因山爲廬。鑿坯爲室。時避難者多居郡南。而寧居北。示無遷志。越海避難者皆來就之。旬月而成邑。遂講詩書。陳俎豆。飾威儀。明禮義。非學者弗見也。由是度安其賢。民化其德。寧所居井汲者。或爭井鬪鬪。寧多買汲器。分置井傍。汲以待之。爭汲者知寧所爲。各相諒責。不復鬪訟。鄰有牛暴寧田者。寧繫牛茂陰。自爲飲飯。牛主至。大慚。若犯嚴刑。寧躬行內恕。禮讓興於遼海。邴原性剛直。清議以格物。度以下心不安之。寧謂原曰。潛龍以不見成德。言非其時。皆招

禍之道也。密令西還。度父子代居海外。

謹案。陳志作庶。子康代居郡外。

以將軍太守爲號。而內實欲自王。卑己崇禮。欲

官寧以自鎮輔。而終莫敢發言。曹操爲司空。辟寧。度子康絕命不宣。中國少安。客人皆還。惟寧晏然若將終焉。黃初四年。詔公卿舉獨行君子。司徒華歆薦寧。曹丕下詔徵寧。時康死。舍嫡子而立弟恭。恭懦弱。而

康孽子淵有雋才。寧曰。廢嫡立庶。下有異心。亂將作矣。乃卽受徵。恭送之南郊。加贈服物。自寧之東。度。恭

康前後所資遺。皆受而藏諸。已西渡。

謹案。今志作既已西渡。宋本無既字。與此合。

盡封還之。將家屬浮海還郡。海中遇暴風。船

幾沒。寧乘船自若。時夜風晦冥。莫知所泊。忽見火光。趣之得島。島無居人。又無火。人咸異之。寧在遼東三

十七年。乃歸。其後淵果奪恭位。叛魏連吳。僭號稱王。曹叅使司馬懿討平之。死者以萬數。皆如寧言。詔以

寧爲太中大夫。固辭不受。上書曰。臣聞傳說發夢以感殷宗。呂尙啓兆以動周文。以通神之才。悟于聖主。

用能匡佐帝業。克成大勳。臣之器朽。實非其人。雖貪清時。釋體蟬蛻。內省頑病。日薄西山。惟陛下聽野人

山藪之願。使一老者得盡微命。從之。曹叅立。太尉華歆遜位讓寧。司空陳羣又薦寧曰。臣聞王者顯善以

消惡。故湯舉伊尹。不仁者遠。伏見徵士北海管寧。行爲世表。學任人師。清儉足以激濁。貞正足以矯時。前

雖徵命。禮未優備。昔司空荀爽。家拜光祿大夫。

謹案。陳志無大夫二字。

先儒鄭元。卽授司農。若加備禮。庶必可致。至

延西序。坐而論道。必能昭明古今。有益大化。遂下詔曰。大中大夫管寧。耽懷道德。服膺六藝。清虛足以侔

古。廉白可以當世。曩遭王道衰缺。浮海遁居。大魏受命。則襁負而至。斯蓋應龍潛升之道。聖賢用舍之義。

而黃初以來。徵命屢下。每輒辭疾。拒違不至。豈朝廷之政。與生殊趣。將安樂山林。往而不能反乎。夫以姬公之聖。而耆德不降。則鳴鳥弗聞。以秦穆之賢。猶思詢乎黃髮。況朕寡德。曷能不願開道于子大夫哉。今以寧爲光祿勳。禮有大倫。君臣之道。不可廢也。望必速至。稱朕意焉。又詔青州刺史曰。寧抱道懷真。潛翳海隅。比下徵書。違命不至。盤桓利居。高尚其事。雖有素履幽人之貞。而失考父茲恭之義。使朕虛心。引領歷年。其何謂邪。徒欲懷安。必肆其志。不惟古人亦有翻然改節。以隆斯民乎。日逝月除。時方已過。澡身浴德。將以何爲。仲尼有言。吾非斯人之徒與。而誰與哉。其命別駕從事郡丞掾奉詔。以禮發遣。寧詣行在所。給安車吏從。茵蓐道上。廚食上道。先奏。寧稱草莽。臣上疏曰。臣海濱孤微。罷農無伍。祿運幸厚。橫蒙陛下。纂承洪緒。德侔三皇。化溢有唐。久荷渥澤。積祀一紀。不能仰答陛下。恩養之福。沈委篤痾。寢疾彌留。逋違臣隸。顛倒之節。夙宵戰怖。無地自厝。臣元年十一月。被公車司馬令所下州郡。八月甲申。詔書徵臣。更賜安車衣被。茵蓐。以禮發遣。光寵並臻。優命屢至。怔營竦息。悼心失圖。思自陳聞。申展愚情。而明詔抑割。不令稍修章表。是以鬱滯于今日。誠謂乾覆恩有紀極。不意靈潤彌以隆赫。奉今年二月。被州郡所下。三年十二月辛酉。詔書重賜安車衣服。別駕從事。與郡功曹。以禮發遣。又特被璽書。以臣爲光祿勳。躬秉勞謙。引喻周秦。損上益下。受詔之日。精魂飛散。靡所投死。臣重自省揆。德非園綺。而蒙安車之榮。功無竇融。而蒙璽封之寵。案稅駕下。荷棟梁之任。垂沒之命。獲九棘之位。懼有朱博鼓妖之咎。

原注。漢書。御史大夫朱博爲丞相。少府趙元

爲御史大夫。臨廷登受策。有大聲如鐘鳴殿中。郎吏陛者皆聞焉。上以問黃門侍郎楊雄。李尋。尋對曰。洪範所謂鼓妖者也。其後博元坐爲姦謀。博自殺。元滅死論。又年疾日侵。有加無損。不任

扶輿進路。以塞元責。望慕閭闔。徘徊闕庭。謹拜章陳情。乞蒙哀宥。抑恩聽放。無令骸骨填于衢路。自黃初

至于青龍。徵命相仍。常以八月賜牛酒。詔書問青州刺史程喜。寧爲守節高乎。審老疾。庭頓邪。喜上言。寧

有族人管貢爲州吏。與寧鄰比。臣常使經營消息。貢說寧常著皂紗帽。謹案。陳志作者。阜帽。無紗字。布襦袴。布裙。隨時

單複。出入閭庭。能自任杖。不須扶持。四時祠祭。輒自力強。改加衣服。著絮巾。故在遼東。所有白布單衣。親

薦饌饋。跪拜成禮。寧少而喪母。不識形象。常特加觴。泫然流涕。又居宅離水七八十步。夏時詣水中澡洒

手足。闕于園圃。臣揆寧前後辭讓之意。獨自以生長潛逸。耆艾智衰。是以栖遲。每執謙退。此寧志行所欲

必全。不爲守高。正始二年。太僕陶丘一。永寧衛尉孟觀。侍中孫邕。中書侍郎王基。薦寧曰。臣聞龍鳳隱耀

應德而臻。明哲潛遁。俟時而動。是以鸞鷲鳴岐。周道隆興。原注。國語。周文王時鸞鷲鳴于岐。說文曰。鸞鷲。鳳屬。神鳥也。四皓爲佐。漢帝

用康。伏見太中大夫管寧。應二儀之中和。總九德之純懿。含章素質。冰潔淵清。元虛澹泊。與道逍遙。娛心

黃老。游志六藝。升堂入室。究其闢奧。韜古今于胷懷。包道德之機要。中平之際。黃巾陸梁。華夏傾蕩。王綱

弛頓。遂避時難。乘桴越海。羈旅遼東三十餘年。在乾之始。匿景藏光。嘉遯養浩。韜韞儒墨。潛化旁流。暢于

殊俗。黃初四年。高祖文皇帝疇咨羣公。思求雋乂。故司徒華歆舉寧。應選公車。特徵振翼遐裔。翻然來翔。

行遇屯厄。遭罹疾病。卽拜太中大夫。烈祖明皇帝嘉美其德。登爲光祿勳。寧疾彌留。未能進道。今寧舊疾

已瘳行年八十志無衰倦環堵葦門偃息窮巷飯嚮餬口并日而食吟詠詩書不改其樂困而能通遭難必濟經危蹈險不易其節金聲玉色久而彌彰揆其終始殆天所祚當贊大魏輔亮雍熙袞職有闕羣下屬望昔高宗刻象營求賢哲周文啓龜以下良佐況寧前朝所表名德已著而久栖遲未時引致非所以奉遵明訓繼成前志也陛下踐阼纂承洪緒聖敬日躋超越周成每發德音動諮師傅若繼二祖招賢古典賓禮雋邁以廣緝熙濟濟之化侔于前代寧清高恬泊擬跡前軌德行卓絕海內無偶歷觀前世玉帛所命申公枚乘周黨樊英之儔原注。漢書。武帝自爲太子。開乘名。及卽位。乘年老。乃以安車蒲輪徵乘。道死。英不得已到京師。天子爲英設壇。令公車令道尙書奉引賜几杖。待以師傅之禮。延問得失。無奇謀深策。談者以爲失望。周黨。申公。見前注。測其淵源覽其清濁未其厲俗獨行若寧者也誠宜束帛加璧備禮徵聘仍授几杖延登西序敷陳墳索坐而論道上正璇璣協和皇極下阜羣生彝倫攸斂必有可觀光益大化若寧固執匪石守志箕山追跡洪崖原注。神仙傳。衛叔卿與數人博。其子度曰。向與博者爲誰。叔卿曰。洪崖先生也。參蹤巢許斯亦聖朝同符唐虞優賢揚歷垂聲千載原注。裴松之曰。今文尙書。優賢揚歷。謂揚其所歷試。左思魏都賦。優賢著于揚歷。雖出處殊途俯仰異體至于興治美俗其揆一也於是特具安車蒲輪束帛加璧聘焉會寧卒時年八十四拜子邈郎中後爲博士初寧妻先卒知故勸更娶寧曰每省曾子王駿之言意常嘉之豈自遭之而違本心哉原注。韓詩外傳。曾參妻死不更娶。人問其故。曾子曰。以華元善人也。漢書。王駿妻死不復娶。或問之。駿曰。德非曾參。子非華元。亦何敢娶。寧自越海及還常坐一木榻積五十餘年未嘗箕股榻上當膝處皆穿以衰亂之時世多安變氏族遠聖人之制非禮命姓之意故著氏姓

論以原本世系所居姻親知舊鄰里有困乏者家雖不盈擔石必分以贍救之與人子言教以孝與人弟言訓以悌言及人臣誨以忠貌恭言遜其行邈然若不可及卽之則熙然而溫因事導人于善故見之者無不化處險譎之世而獨不污僞命天下莫不高之王烈字彥方謹案後漢書本傳注云魏志烈字彥考通識達道秉義不回師事潁川陳仲弓與其二子紀譔爲友時荀慈明賈偉節李元禮韓元長皆就仲弓學咸稱烈器業由是知名海內聲聞在邠原管寧之右行成德立還歸舊廬遭父喪泣血三年歲大饑分釜庾以救邑里途有餓殍輟食以活之以典籍自娛從之學者甚衆善誘能教化行州閭里中有盜牛者主得之盜謝罪曰邂逅迷惑罪戮是甘幸蒙赦宥請自今改過乞不使王彥方知烈聞而使人謝之遺布一端或問此人爲盜反與之布何也烈曰昔秦穆公人盜其駿馬食之乃賜之酒盜者不愛其死以救穆公之難今此盜能悔其過懼吾聞之是知恥惡知恥惡則善心將生故與布勸之爲善也歲終行路老父擔重人爲代擔行數十里欲至家置而去問姓名不告頃之老父復行遺劍于路一人守之至暮老父還尋付之乃前代擔人也老父墮其袂問曰子前者代吾擔不得姓名今子復守吾劍于路未有若子之仁不可使子之名沒而不聞竟不言去而老父以告烈烈推問之乃昔盜牛人也烈歎曰能改過者君子也親詣其門表其閭巷卒爲善士時有爭訟曲直將質于烈或至塗而反或望廬而還皆相推以直不敢使烈聞之郡舉孝廉三府並辟皆不就會董卓作亂與邠原管寧避地遼東躬耕隴畝匿名編戶公孫度知之命爲長史固辭不

應遂爲商賈以自穢。乃免。曹操累徵辟。遼東爲解而不遣。建安二十三年卒。年七十八。時鉅鹿張琦字子明。潁川胡昭字孔明。亦養志不仕。張琦少游太學。學兼內外。後歸鄉里。袁紹前後辟命不應。移居上黨。高幹表除樂平令。不就。徙道常山。門徒數百人。遷居任縣。曹操爲丞相。辟不詣。太和中詔求隱學之士。能消災復異者。郡累上琦發遣。老病不行。廣平太守盧毓到官三日。綱紀白承前致版謁琦。毓教曰。張先生所謂上不事天子。下不友諸侯者也。此豈版謁所可光飾哉。但遣主簿奉書致羊酒之禮。青龍四年辛亥。詔書張掖郡元川溢涌。激波奮蕩。寶石負圖。狀像靈龜。宅於川西。巍然盤峙。蒼質素章。麟鳳龍馬。煥炳成形。文字告命。粲然著明。太史令高堂隆上言。古皇聖帝所未嘗蒙。實有魏之禎命。東序之世寶。事頌天下。任令于綽連齋以問琦。琦密謂綽曰。夫神以知來。不追已往。禎祥先見。而後廢興從之。漢已久亡。魏已得之。何所追興徵祥乎。此石當今之變異。而將來之禎瑞也。正始元年戴篤原注。林反。如之鳥巢。琦門陰。琦告門人曰。夫戴篤陽鳥。而巢門陰。此凶祥也。乃援琴歌詠。作詩二篇。旬日而卒。時年一百五歲。是歲廣平太守王肅至官。教下縣曰。前在京都。聞張子明來至。問之。會其已亡。致痛惜之。此君篤學隱居。不與時競。以道樂身。昔絳縣老人。屈在泥塗。趙孟升之。諸侯用睦。愍其耄勤好道。而不蒙榮寵。書到遣吏勞問其家。顯題門戶。務加殊異。以慰既往。以勸將來。胡昭始避地冀州。亦辭袁紹之命。遁還鄉里。曹操爲司空丞相。頻加禮辟。昭往應命。既至。自陳一介野生。無軍國之用。歸誠求去。操曰。人各有志。出處異趣。勉卒雅尚。義不相屈。

昭乃轉居陸渾山中躬耕樂道以經籍自娛閭里敬而愛之初司馬懿與昭有舊同郡周生等謀害懿昭聞而邀之于崦澠之間以義喻之生乃止因斫棗樹共盟而去竟不以語懿百姓避馬超亂入山者千餘家飢乏相劫略昭遜辭譬解皆感服改行所居部落中三百里無相侵暴者建安二十三年陸渾長張固被書調丁夫給漢中百姓憚遠役並懷擾亂孫狼等因興兵殺縣主簿作爲叛亂縣邑殘破固率將十餘吏卒依昭住止招集遺民安復社稷狼等南附關侯侯授印綬給兵還爲寇賊至陸渾南長樂亭自相約誓言胡居士賢者也不得犯其部落居民賴昭無虞後徙居宜陽原注高士傳幽州刺史杜恕嘗過昭所居草廬之中言事論理辭義謙敬恕甚重焉太尉蔣濟辟不就正始中驃騎將軍趙儼尙書黃休郭彜散騎常侍荀顗鍾毓太僕庾嶷原注裴松之曰嶷字劭然潁川人子灑字元默晉尙書陽翟子嶷弟遁字德先太中大夫遁允嗣克昌爲世盛門侍中峻宏農太守何楨等原注文士傳楨字元幹廬江人有文學器幹容貌甚偉歷幽州刺史廷尉入晉爲尙書光祿大夫楨子肅後將軍勗車騎將軍暉豫州刺史其餘多至大官自後累世昌早司空文穆公充暉之孫也貴達至今遞薦昭曰天真高潔老而彌篤元虛靜素有夷皓之節宜蒙徵命以厲風俗時方用兵議格不行後顗休復與庾嶷薦昭有詔訪于本州評議侍中章誕駁曰禮賢徵士王政之所重也古者考行於鄉今顗等位皆常伯納言嶷爲卿佐足以取信附下罔上忠臣之所不行也昭宿德耆艾遺逸山林謹案今志此下有世所高尙四字宋本無與此合誠宜嘉異乃從誕議嘉平二年謹案今志作嘉平二年嘉平漢靈帝年號爲談無疑宋本作嘉平與此合公車特徵會卒年八十九拜子纂郎中初昭善史書與鍾繇邯鄲淳衛顗章誕並有名尺牘之迹動見模楷焉原注傅子曰胡徵君怡怡無不愛也雖僕隸必加禮焉外

同乎俗。內秉純潔。心非其好。王公不能屈。年八十而不倦於書籍者。吾于胡徵君見之矣。

議曰。邈乎高哉。寧之所爲乎。矚焉霽月光風而不滓焉者也。乾之初九。潛龍之德。寧有之矣。雖與之天下。弗顧也。豈三公能挽之哉。漢季人物。昭烈而下。祇有諸葛亮及寧二人。方其龍臥不可起。等爲一世高人。亮遇昭烈。幡然而改。寧蹈海外。終身不屈。時見則見。時潛則潛。易地則皆然矣。伯夷避紂。太公相武王而誅之。道豈異乎哉。各得其仁而已爾。王烈之獨行。張珩胡昭之淵靜。皆能全身遠害。不汙于亂。亦寧之次也。

李密字令伯。犍爲武陽人也。一名虔。

謹案。華陽國志。作虔。又作虔。原注。晉書作虔。恐是虔字之訛。

祖父光。朱提太守。父某。早亡。母何氏。更

適人。密年數歲。養于祖母劉氏。

原注。晉書列傳曰。父早亡。母何氏改醮。密時年數歲。感戀彌至。烝烝之性。遂以成疾。劉氏躬自撫養。

密事祖母以孝聞。有疾

則涕泣側息。日夜不解衣帶。膳飲湯藥。必自嘗。

原注。晉書列傳曰。有暇則講學忘疲。

及長。師事譙周。周門人以方游夏。治左

氏春秋。博綜藝學。善屬文。州辟從事。爲尙書郎。轉大將軍主簿。太子洗馬。奉使聘吳。吳主問蜀馬多少。對

曰。官用有餘。人間自足。遂與羣臣論倫類之義。或謂願爲人弟。密曰。願爲人兄。吳主曰。何以爲兄。密曰。爲

兄供養之日長。吳主及羣臣皆稱善。漢亡。征西將軍鄧艾聞其名。請爲主簿。以祖母老年。志在致養。不應。

晉武帝立太子。徵爲洗馬。詔書累下。郡縣逼遣。於是密上疏曰。臣以險釁。夙遭閔凶。生孩六月。慈父見背。

行年四歲。舅奪母志。祖母劉愍臣孤弱。躬親撫養。臣少多疾病。九歲不行。零丁孤苦。至于成立。既無叔伯。

終鮮兄弟。門衰祚薄。晚有兒息。外無期功彊近之親。內無應門五尺之童。煢煢子立。形影相弔。而劉夙嬰疾病。常在牀蓐。臣侍湯藥。未嘗廢離。逮奉聖朝。沐浴清化。前太守臣逵察臣孝廉。後刺史臣榮舉臣秀才。臣以供養無主。辭不赴命。詔書特下。拜臣郎中。尋蒙國恩。除臣洗馬。猥以微賤。當侍東宮。非臣隕首所能。上報。臣具以表聞。辭不就職。詔書切峻。責臣逋慢。郡縣逼迫。催臣上道。州司臨門。急如星火。臣欲奉詔奔馳。則劉病日篤。欲苟順私情。則告訴不許。臣之進退。實爲狼狽。伏惟聖朝以孝治天下。凡在故老。猶蒙矜育。況臣孤苦。特爲尤甚。且臣少仕僞朝。歷職郎署。本圖宦達。不矜名節。今臣亡國賤俘。至微至陋。過蒙拔擢。寵命優渥。豈敢盤桓有所希冀。但以劉日薄西山。氣息奄奄。人命危淺。朝不慮夕。臣無祖母。無以至今日。祖母無臣。無以終餘年。母孫二人更相爲命。是以區區不能廢遠。臣密今年四十有四。祖母劉今年九十有六。是臣盡節于陛下之日長。報劉之日短也。烏鳥私情。願乞終養。臣之辛苦。非徒蜀之人士及二州牧伯所見。明知皇天后土。實所共鑒。願陛下矜愍愚誠。聽臣微志。庶劉僥倖。卒保餘年。臣生當隕首。死當結草。臣不勝犬馬怖懼之情。帝覽表曰。密不空有名也。賜奴婢二人。下郡縣供養。及祖母卒。服終。復以洗馬徵至洛。司空張華問之曰。安樂公何如。密曰。可方齊桓。華問其故。對曰。齊桓得管仲則霸。用豎刁則亡。安樂公得諸葛亮則存漢。任黃皓則喪國。其致一也。原注。晉書列傳曰。桓得管仲而霸。用豎刁而衆亂。安樂公得諸葛亮而抗魏。任黃皓而喪國。是知成敗一也。又謹案。晉書作雅大語。監與凡人言宜碎。孔明問孔明言教何碎。密曰。昔舜禹皋陶相與語。故得簡大雅語。本作大雅語。與此合。

與言者大抵皆凡人言教是以碎爾華善之。以爲尙書郎。未幾出爲溫令。政化嚴明。中山諸王。每過溫必責求供給。民吏患之。及密至。諸王過縣。徵求無藝。密箋引高祖過沛。賓禮老幼。桑梓之供。一無煩擾。伏惟明王。孝思惟則。動識先戒。本國望風。式歌且舞。誅求之苛。未敢聞命。自後諸王。過不敢擾。煩時郡從事。貪冒。密惡之。嘗與人書言。慶父不死。魯難未已。意在賈充輩也。從事白其書。司隸司隸以密節高。弗劾也。密去官。爲州大中正。性方直。不曲意勢位。與人交。每公議其得失。而切責之。嘗言。吾獨立於世。顧影無儔。然而不懼者。以無彼此於人故也。原注。姓氏遙華錄曰。凡與人交。責善曰。吾獨立于世。顧形無儔。實際文章善者。令姬雪兒歌以協音律。荀勗等惡之。出爲漢中太守。原注。晉書密有才能。常望內轉。而朝廷無授。乃遷漢中太守。自以失分。懷怨。及賜餞東堂。詔令賦詩。其卒章曰。守人亦有言。有因有緣。官無中人。不如歸田。明明在上。斯語豈然。意謂朝廷黨與固結。無勢援者不得進也。武帝忿之。都官從事奏免密官。

未幾復免官。年六十四卒於家。著述理論十篇。安東將軍胡烈與皇甫謐並善之。密二子。賜興。賜字宗石。少能屬文。嘗爲元鳥賦。見稱于時。州辟別駕。舉秀才。未行而卒。興字儁石。亦有文學。益州刺史羅尙辟爲別駕。尙爲李雄所攻。使興詣鎮南將軍劉宏求救。興因願留爲宏參軍。尙白宏。宏卽奪其手板而遣之。興之在宏府。宏立諸葛孔明羊叔子碣。使興爲其文。甚有辭理。謹案。諸葛亮碣文見亮傳注。

議曰。密純孝也。挺特不撓。國亡而不苟祿仕。有漢之遺直。當漢之季。孔明出師一表。盡天下之忠。及漢之亡。令伯陳情一表。盡天下之孝。四百年仁義公恕。猶在茲乎。觀其表辭。雖切於養祖母。其穢曹馬而自潔之志。凜然不可揜。亦管寧田疇之流亞也。其視荀賈之叨附逆亂。猶糞壤爾。謹案。李密陳情一表。爲世所稱道。晉書入之孝友傳。宜矣。此

書以密入高士傳。考密服終仕晉。非終于隱遯者。經乃議其穢
曹馬而自潔之志。凜然不可撓。與管寧田疇並稱。未免失實也。

續後漢書卷第六十九下

列傳第六十六下

高士

魏

范粲子喬 皇甫謐 王真

吳

石偉 范平

范粲字承明。陳留外黃人。漢萊蕪長丹之孫也。粲高亮貞正。博涉強記。州府交辟。初不就。久之乃應命。爲治中。轉別駕。辟太尉掾。尙書郎。出爲征西司馬。歷職皆有聲稱。遷武威太守。到郡。選良吏立學校。勸農桑。明設防備。戎夷不犯。西域流通。郡壤富實。珍玩充積。粲檢制之。不爲華侈。以母老。輒棄官歸。左遷樂涑注原。官音。頃之召爲太宰從事中郎。遣母憂。以至孝稱。服闋。復爲太宰中郎。司馬師廢曹芳於金墉城。粲素服拜送。哀慟左右。師召羣臣會議。粲又不到。遂稱疾。閤門不出。特詔爲侍中。持節使雍州。粲因陽狂不言。寢所乘車。足不履地。子孫有婚宦大事。密爲諮請。合者則色無變。不合則眠寢不安。以此知其旨。晉武帝

篡代同郡孫和爲太子中庶子表薦粲稱其操行高潔久嬰疾病可使郡縣輿至京師賜醫藥若遂瘳除必有益於政化乃詔郡縣給醫藥又以二千石祿養病歲以爲常加賜帛百匹子喬以父疾篤辭不敢受詔不許以太康六年卒年八十四不言三十六載終於所寢之車喬字伯孫謹敏夙成九歲受學言無媿辭及長淹貫經術光祿大夫李銓嘗論揚雄才學優於劉向喬以爲向定一代之書正羣籍之篇使雄當之故非所長遂著劉揚優劣論以父粲陽狂不言乃與二弟並絕人事侍疾家庭粲沒居喪毀瘠服闋亦不出邑里司隸校尉劉毅抗論于朝曰使范武威疾若不篤是爲伯夷叔齊復存于今如其信篤聖主亦宜哀矜其子久侍父疾名德著茂不加敍用深爲朝廷惜之元康中詔求廉讓沖退履道寒素者尙書郎王琨薦喬曰喬秉德貞粹立操高潔儒學精深含章內奧安貧樂道棲志窮巷簞瓢永業長而彌堅誠當今之寒素著厲俗之清彥時張華領司徒天下所舉凡十七人於喬特發優論除安樂令辭疾不拜凡一舉孝廉八薦公府再舉清白異行又舉寒素一無所就初喬邑人臘夕盜斫其樹人有告者喬如不聞邑人愧而歸之喬曰卿節日取柴欲與父母歡娛爾又何歸也外黃令高顓歎曰諸士大夫未有不及私者而范伯孫恂恂率道名諱未嘗經於官曹士之貴異於今而見大道廢而有仁義信矣

皇甫謐字士安一名靜漢太尉嵩之曾孫也出後叔父徙居新安年二十六不好學遊蕩無度或以爲癡嘗得瓜果進所後叔母任氏任氏曰日用三牲之養猶爲不孝汝今年踰二十目不知書心不入道昔孟

母三徙以成仁。曾父烹豕以存教。豈我居不卜鄰。教有所闕邪。因對之泣涕。謚乃感激。就鄉人席坦。學家貧躬自稼穡。帶經而鉏。遂博綜典籍。自號元晏先生。著禮樂聖真論。後得風痺疾。猶手不釋卷。或勸謚修名。廣交謚以爲非。聖人孰能兼存。出處居田里之中。亦可以樂堯舜之道。何必崇接世利。事官執掌。然後爲名乎。作元守論以答之。曰。或謂謚曰。富貴人之所欲。貧賤人之所惡。何故委形待於窮而不變乎。且道之所貴者。理世也。人之所美者。及時也。先生年邁齒變。飢寒不贍。轉死溝壑。其誰知乎。謚曰。人之所至惜者。命也。道之所必全者。形也。性形所不可犯者。疾病也。若擾全道以損性命。安得去貧賤存所欲哉。吾聞食人之祿者。懷人之憂。形強猶不堪。況吾之弱疾乎。且貧者士之常。賤者道之實。處常得實。沒齒不憂。孰與富貴擾神耗精者乎。又生爲人所不知。死爲人所不惜。至矣。暗聾之徒。天下之有道者也。夫一人死而天下號者。以爲損也。一人生而四海笑者。以爲益也。然號笑非益死損生也。是以至道不損。至德不益。何哉。體足也。如迴天下之念。以追損生之禍。運四海之心。以廣非益之病。豈道德之至乎。夫惟無損。則至堅矣。夫惟無益。則至厚矣。堅故終不損。厚故終不薄。苟能體堅厚之實。居不薄之真。立乎損益之外。遊乎形體之表。則我道全矣。耽翫典籍。忘寢與食。時人謂之書淫。或有箴其過篤。將損耗精神者。謚曰。朝聞道。夕死可矣。況命之脩短。懸之天乎。叔父有子。旣冠。謚年四十。還歸其宗。城陽太守梁柳謚從姑子也。當之官。人勸謚錢之。謚曰。柳爲布衣時。過吾。吾送迎不出門。食不過鹽菜。貧者不以酒肉爲禮。今作郡而送之。是

貴城陽太守而賤梁柳也。正始中，魏郡召上計掾，舉孝廉。景元初，相國辟及武帝篡代，復徵皆不行。宗舊勸令應命，謚爲釋。勸論以喻其志曰：相國晉王辟余等三十七人，及泰始登禪，同命之士莫不畢至。皆拜騎都尉，或賜爵關內侯，進奉朝請，禮如侍臣。惟余疾困不及國寵。宗人父兄及我寮類，咸以爲天下大慶。萬姓賴之，雖未成禮，不宜安寢。縱其病篤，猶當致身。余惟古今明王之制，事無巨細，斷之以情，實力不堪。豈慢也哉？乃伏枕而歎曰：夫進者身之榮也，退者命之實也。設余不疾，執高箕山，尙當容之。況余實篤，故堯舜之世，士或收迹林澤，或過門不敢入，咎繇之徒，兩遂其願者，遇時也。故朝貴致功之臣，野美全志之士，彼獨何人哉？今聖帝龍興，配名前哲，仁道不遠，斯亦然乎？客或以常言見逼，或以逆世爲慮。余謂上有寬明之主，必有聽意之人，天網恢恢，至否一也。何尤于出處哉？遂究賓主之論，以解難者。名曰釋勸。客曰：蓋聞天以懸象致明，地以含通吐靈，故黃鍾次序，律呂分形，是以春華發萼，夏繁其實，秋風逐暑，冬冰乃結。人道以之，應機乃發。三材連利，明若符契。故士或同升于唐朝，或先覺于有莘，或通夢以感主，或釋釣於涓濱，或叩角以干齊，或解褐以相秦，或冒謗以安鄭，或乘駟以救屯，或班荆以求友，或借術於黃神。原注

漢書·張良嘗間從容步游下邳圯上。有一老父衣帽至良所。出一編書曰：讀是則爲王者師。後十年與。十三年孺子見我。濟北鄒城山下。黃石卽我也。遂去不見。且視其書。乃太公兵法。良因異之。常習誦以說沛公。沛公喜。常用其策。後十三歲。從高帝過濟北。果得穀城山下黃石。取而寶祠之。及良死。并葬黃石。每上冢伏臘祠黃石。餘事皆見前注。

清音。由此觀之，進德貴乎及時，何故屈此而不伸？今子以英茂之材，遊精於六藝之府，散意於衆妙之門。

者有年矣。既遭皇禪之朝。又投祿利之際。委聖明之主。遇知己之會。時清道真。可以沖邁。此真吾生濯髮雲漢鴻漸之秋也。輅光逐藪。含章未曜。龍潛九泉。磴焉執高。棄通道之遠。由守介人之局操。無乃乖於道之趣乎。且吾聞招搖昏迴。則天位正。五教班敍。則人理定。如今王命切至。委慮有司。上招迂主之累。下致駭衆之疑。達者貴同。何必獨異。羣賢可從。何必守意。方今同命並臻。飢不待浚。振藻皇塗。咸秩天官。子獨栖遲衡門。放形世表。遜遜丘園。不睨華好。惠不加人行。不合道。身嬰大疾。性命難保。若其義和促轡。大火西頽。臨川恨晚。將復何階。夫貴賤賤璧。聖所約也。顛倒衣裳。明所箴也。子其鑒先哲之洪範。副聖朝之虛心。沖靈翼于雲路。浴天池以濯鱗。排閭闔。步玉岑。登紫闥。侍北辰。翻然景耀。雜沓英塵。輔唐虞之主。化堯舜之人。宣刑措之政。配殷周之臣。銘功景鐘。參敍彝倫。存則鼎食。亡爲貴臣。不亦茂哉。而忽金白之輝耀。忘青紫之斑璘。辭容服之光粲。抱敝褐之終年。無乃勤乎。主人笑而應之曰。吁。若賓可謂習外觀之暉暉。未覩幽人之髣髴也。見俗人之不容。未喻聖皇之兼愛也。循方圓於規矩。未知大形之無外也。故曰。天元而清。地靜而寧。含羅萬類。旁薄羣生。寄身聖世。託道之靈。若夫春以陽散。冬以陰凝。泰液含光。元氣混蒸。衆品仰化。誕制殊徵。故進者享天祿。處者安丘陵。是以寒暑相推。四宿代中。陰陽不治。運化無窮。自然分定。兩克厥中。二物俱靈。是謂大同。彼此無怨。是謂至通。若乃衰周之末。貴詐賤誠。牽于權力。以利要榮。故蘇子出而六主合。張儀入而橫勢成。廉頗存而趙重。樂毅去而燕輕。公叔沒而魏敗。孫臏別而齊寧。

原注
戰

國策。魏公叔痤病。惠王往問之曰。公叔病。即不可諱。將奈社稷何。公叔痤對曰。痤有御庶子公孫鞅。願王以國事聽之也。為弗能聽。勿使出竟。王弗應。出而謂左右曰。秦果日以強。魏日以削。此非公叔之悖也。惠王之悖乎。公叔死。公孫鞅聞之。已葬。西之秦。孝公受而用之。秦果日以強。魏日以削。此非公叔之悖也。惠王之悖乎。公孫鞅固以不悖者為悖。史記。孫臏嘗與龐涓俱學兵法。龐涓既事魏。得為惠王將軍。而自以為能不及孫臏。乃陰使召孫臏。臏至。龐涓恐其賢于己。疾之。則以法刑斷其兩足而黥之。欲隱令勿見。齊使使者如梁。孫臏以刑徒陰見說齊使。齊使以為奇。竊載與之齊。齊將田忌善而客待之。魏伐趙。趙請救于齊。齊威王以田忌為將。而以孫子為師。疾走大梁。魏去邯鄲。與齊戰于桂陵。大破梁軍。後十五年。蠡種親而越。霸屈子疏而楚傾。是以君無常籍。臣無定名。損年殺龐涓于馬陵。盡破其軍。虜魏太子申以歸。

義放誠一虛一盈故馮以彈劍感主女有反賜之說。原注。戰國策。齊人有馮諼者。貧乏不能自存。使人屬孟嘗曰。客無能也。孟嘗君笑而受之曰。諾。左右以君賤之也。食以草具。居有頃。倚柱彈其劍歌曰。長鋏歸來乎。食無魚。左右以告。孟嘗君曰。食之比門下之客。居有頃。復彈其劍歌曰。長鋏歸來乎。出無車。左右皆笑之。以告。孟嘗君曰。左右之駕。比門下之車。客于其乘其車。揭其劍。過其友曰。孟嘗君客我。後有頃。復彈其劍歌曰。長鋏歸來乎。無以為家。左右皆惡之。以為食而不知足。孟嘗君問馮公有親乎。對曰。有老母。孟嘗君使人給其食用無乏。于是馮諼不復歌。韓詩外傳。孔子南遊適楚。至于阿谷之隧。有處子佩瑱而浣者。孔子抽觸以授子貢曰。善為之辭。以觀其語。子貢曰。北鄰之人也。將南之楚。逢天之暑。思心渾渾。願乞一飲。以表我心。婦人對曰。阿谷之隧。隱曲之汜。其水載清載濁。流而趨海。欲飲則飲。何問婦人乎。吾年甚少。子不早行。竊項奮拔山之力。蒯陳鼎足之勢。原注。漢書項羽歌曰。有狂夫守之者矣。詩曰。漢有游女。不可求思。此之謂也。

制通說韓信令背漢曰。當今之時。兩生懸命。三分天下為漢則漢勝。與楚則楚勝。臣願披心腹。墮肝膽。效愚忠。恐足下不能用也。方今為足下計。莫若兩利而俱存之。三分天下。鼎足而立。其勢莫敢先動。夫以足下之賢聖。有甲兵之地。據強齊。從燕趙。出空虛之地。以制其後。因民之欲。西嚮為百姓請命。天下孰敢不聽足下。按齊國之故。有淮泗之衆。據懷諸侯以德。深拱揖讓。則天下制其王。相率而朝齊矣。蓋聞天與勿取。反受其咎。時至不行。反受其殃。願足下熟圖之。

東郭劫於田榮。顏闔恥於見逼。原注。漢書齊悼惠王時。曹參為相。禮下賢人。請叔孫通為客。初齊王田榮怒項羽二人醜之。相與入深山隱居。相謂通曰。先生之與曹相國。拾遺舉過。顯賢進能。齊國莫若先生守寡不出門者。足下即欲求婦何取。曰。取不嫁者。通曰。然則求臣亦猶是也。彼東郭先生梁石君齊之俊士也。隱居不嫁。未嘗卑節。下意以求仕也。願足下使人禮之。曹相國曰。敬受命。皆以為上賓。淮南子。顏闔魯君欲相之而不肯。使人以幣先焉。擊逐而逼。

東郭劫於田榮。顏闔恥於見逼。原注。漢書齊悼惠王時。曹參為相。禮下賢人。請叔孫通為客。初齊王田榮怒項羽二人醜之。相與入深山隱居。相謂通曰。先生之與曹相國。拾遺舉過。顯賢進能。齊國莫若先生守寡不出門者。足下即欲求婦何取。曰。取不嫁者。通曰。然則求臣亦猶是也。彼東郭先生梁石君齊之俊士也。隱居不嫁。未嘗卑節。下意以求仕也。願足下使人禮之。曹相國曰。敬受命。皆以為上賓。淮南子。顏闔魯君欲相之而不肯。使人以幣先焉。擊逐而逼。

斯皆棄禮喪真。苟榮朝夕之急。嗜也。豈道化之本與。若乃聖帝之創化也。參德乎三皇。齊風乎虞夏。欲溫而和暢。不欲察察而明切也。欲混混若元流。不欲蕩蕩而名發也。欲索索而條解。不欲契契而繩結也。欲茫茫而無垠際。不欲區區而分別也。欲闐然而內章。不欲示白若冰雪也。欲醇醇而任德。不欲瑣瑣而執法也。是以見機者以動成。好遜者無所迫。故曰。一明一昧。得道之概。一弛一張。合禮之方。一浮一沈。兼得其真。故上有勞謙之愛。下有不名之臣。朝有聘賢之禮。野有遁竄之人。是以支伯以幽疾距唐。李老寄迹于西鄰。原注。莊子。舜讓天下于子州支伯子。州支伯曰。吾有幽憂之病。方且顏氏安陋以成名。原思娛道于至貧。榮期以三樂。感尼父。貽婁定諡于布衾。原注。列子。孔子遊于泰山。見榮期啓行乎郊之野。鹿裘帶索。鼓琴而歌。孔子曰。先生何以爲樂。曰。天地萬物。惟人爲貴。吾得爲人。一樂也。男貴女賤。吾得爲男。二樂也。生有不見日月。不充禡祿者。吾年九十。三樂也。貧者土之常。死者人之終。處常得終。復何憂乎。孔子曰。能自寬也。劉向列女傳。魯黔婁先生死。曾子與門人往弔之。至其閭。闔無人。以布衾。手足不盡斂。覆頭而入。立其堂下。有問。其妻出戶。曾子弔之。上堂。見尸在牖下。枕塹席。纒絕不表。覆以布衾。手足不盡斂。覆頭則足見。覆足則頭見。曾子曰。邪引其被則斂矣。妻曰。邪而有餘。不如正而不足也。先生以不邪之故至于此。生時不邪。死而邪之。非先生之意也。曾子不能應。遂哭之畢。哀曰。嗟乎先生之終也。何以爲諡。其妻曰。以康爲諡。曾子曰。先生在時。食不充口。衣不蓋形。死則手足不斂。旁無酒肉。生不得其美。死不得其樂。何樂于此而諡爲康乎。其妻曰。昔先生君嘗欲授之政。以爲國相。辭而不受。是有餘貴也。君嘗賜之粟三千鍾。辭而不受。是有餘富也。彼先生者。甘天下之淡味。安天下之卑位。不感戚于貧賤。不忻忻于富貴。求仁而得仁。求義而得義。其諡爲康。不亦宜乎。干木偃息以存魏。荆萊志邁于江岑。原注。列女傳。老萊子逃世。耕于蒙山之陽。或言之楚王。王遂駕至老萊之門。楚王曰。守國之孤。願煩先生。老萊曰。諾。妻不能爲人所制。投其卷而去。老萊乃隨而隱。君平因善以道著。四皓潛德于洛濱。鄭真躬耕以致譽。幼安發令乎今人。原注。此事皆見前注及本傳。皆持難奪之節。執不回之意。遭拔俗之主。全彼人之志。故有獨定之計者。不

借謀于衆人守不動之安者不假慮于羣賓故能棄外親之華通內道之真去顯顯之明路入昧昧之埃塵宛轉萬情之形表排託虛寂以寄身居無事之宅交釋利之人輕若鴻毛重若泥沈損之不得測之愈深真吾徒之師表余迫疾而不能及者也子議吾失宿而駭衆吾亦怪子較論而不折中也夫才不周用衆所斥也寢疾彌年朝所棄也是以胥克之廢丘明列焉

原注左氏傳晉胥克有蠱疾郤缺爲政秋廢胥克使趙朔佐下軍

伯牛有疾孔子斯歎若黃帝創制于九經岐伯剖腹以蠲腸扁鵲造鏡而尸起文摯徇命於齊王

原注史記扁鵲過魏弟子子虜鍼砥石以取外三陽五會

有間太子蘇乃使子豹爲五分之疑以八減之劑和煮之以更熨兩脅下太子起坐更適陰陽但服湯二旬而復故天下盡以扁鵲爲能生死人扁鵲曰越人非能生死人也此自當生者越人能使之起耳

司馬貞索隱案傳云魏是晉獻公所滅先此百二十餘年此時焉得有魏則此云魏太子非也然按魏後改稱郭春秋有郭公蓋郭之太子也呂氏春秋齊閔王病瘡往宋迎文摯文摯視王疾謂太子曰王疾得怒當愈愈則殺擊

如何太子曰臣當與母共請于王必不殺子矣擊往不解服登牀履衣問醫和顯術于秦晉倉公發祕于漢王之疾王怒叱而起病卽瘳將生烹文學太子與后請不得遂烹文學焉

原注左氏傳晉侯求醫于秦秦伯使醫和視之曰疾不可爲也是謂近女室疾如蠱非鬼非食惑以喪志良臣將死天命不祐史記太倉公者姓淳于氏名意少而喜醫方術高后八年更受師同郡元里公乘陽慶慶年七十餘無子使意盡去其故方更悉以禁方予之傳黃帝扁鵲之脈書五色診病

知人死生決嫌疑定可治及藥難甚精受之三年爲人治病決死生多驗華佗存精于獨識仲景垂妙于定方徒恨生不逢乎若人故乞命訴乎明王求絕編于天錄亮我躬之辛苦冀微誠之降霜故俟罪而窮處

其後武帝下詔敦逼不已謚上疏自稱草莽臣曰臣以庭弊迷子道趣因病抽簪散髮林阜人網不閑鳥獸爲羣陛下披榛採蘭并收蒿艾是以臬陶振褐不仁者遠臣惟頑蒙備食晉粟猶識唐人擊壤之樂

原注帝王世紀帝堯之時天下大和有八九十老人擊壤而歌于康衢辭曰日出而作日入而息鑿井而飲耕田而食帝力何有于我哉藝經壤以木爲之前廣後銳長四寸闊三寸其形如履將戲先側一壤于地遠于三四十

帝力何有于我哉藝經壤以木爲之前廣後銳長四寸闊三寸其形如履將戲先側一壤于地遠于三四十

帝力何有于我哉藝經壤以木爲之前廣後銳長四寸闊三寸其形如履將戲先側一壤于地遠于三四十

帝力何有于我哉藝經壤以木爲之前廣後銳長四寸闊三寸其形如履將戲先側一壤于地遠于三四十

帝力何有于我哉藝經壤以木爲之前廣後銳長四寸闊三寸其形如履將戲先側一壤于地遠于三四十

步。以手中環擊之。中者爲上。蓋古戲也。宜赴京城。稱壽闕外。而小人無良。致災速禍。久嬰篤疾。軀半不仁。右腳偏小。十有九

載。又服寒食藥。違錯節度。辛苦荼毒。于今七年。隆冬裸袒。食冰當暑。煩悶加以咳逆。或苦溫瘧。或類傷寒。

浮氣流腫。四肢酸重。于今困劣。救命呼嗚。父兄見出。妻息長訣。仰迫天威。扶輿就道。所苦加焉。不任進路。

委身待罪。伏枕歎息。臣聞韶衛不並奏。雅鄭不兼御。故郤子入周。禍延王叔。虞丘稱賢。樊姬掩口。原注。郤子事見前

注。列女傳。樊姬者。楚莊王之夫人也。王嘗聽朝而罷晏。樊姬曰。何罷之晏也。王曰。今日與賢者語。樊姬曰。王之所謂賢者。諸侯之客與。將國中士也。王曰。虞丘子也。樊姬掩口而笑曰。妾幸得充後宮。妾所進者九人。今賢于妾者二人。與妾同列者七人。今夫虞丘子之相楚十餘年矣。其所薦者非其子孫。則族昆弟。未嘗聞其進賢而退不肖。夫知賢而不進。是不忠也。若不知賢。是無知也。豈可謂賢哉。君子小人。禮不同器。況臣

穠麤。反。古猛。糲之彫胡。庸夫錦衣。不稱其服。竊聞同命之士。咸以畢到。惟臣疾疾。抱覺牀蓐。雖貪明時。懼斃

命路。隅設臣不疾。已遭堯舜之世。執志箕山。猶當容之。臣聞上有明聖之主。下有輸實之臣。上有在寬之

政。下有委情之人。惟陛下留神垂恕。更旌瓌俊。索隱於傳巖。收釣於涓濱。無令泥滓。久濁清流。謚辭切言

至。遂見聽許。歲餘。又舉賢良方正。並不起。自表就帝借書。帝送書一車。謚雖羸疾。披閱不怠。初服寒食散。

而性與之忤。每委頓悲恚。叩刃欲自殺。叔母止之。濟陰太守蜀人文立。表以命士有贊爲煩。請絕其禮幣。

詔從之。謚聞而歎曰。亡國之大夫。不可與圖存。而以革歷代之制。其可乎。夫束帛。易之明義。元纁之

贊。古之盛典。故孔子稱夙夜強學。以待問。席上之珍。以待聘。士於是乎三揖而進。明致之難也。一讓而退。

明去之易也。若殷湯之于伊尹。文王之于太公。或身卽莘野。或就載而歸。惟恐禮之不重。豈吝其煩費哉。

且一禮不備。貞女恥之。況命士乎。孔子曰。賜也。爾愛其羊。我愛其禮。棄之如何。國之失賢。于此乎在矣。咸寧初。又詔曰。男子皇甫謐。沈靜履素。守學好道。與流俗異趣。其以謐爲太子中庶子。謐固辭。篤疾。帝初雖不奪其志。尋復發詔徵爲議郎。又召補著作郎。司隸校尉劉毅請爲功曹。並不應。太康三年卒。年六十八。謐所著詩賦誄頌論難甚多。又譏帝王世紀。年歷。高士。逸士。列女等傳。元晏春秋。並行于世。門人摯虞。張軌。牛綜。席純。皆爲名臣。

議曰。嗚呼。人臣而放弑其君。三綱絕矣。可復立于其朝乎。力能討賊。則討之可也。不能討賊。則去之可也。視然事之。而叨祿弗顧。則與聞乎故也。自操丕篡代。天下大變。習以爲常。莫不以漢公卿爲魏佐命。及懿師父子。蹈履逆規。以爲當然。相與叶比。轉移鼎命。大抵皆賈充之徒也。孰以爲非哉。惟粲倡明大義。慟哭而去。寢魏之車。不踐晉地。垂四十年。卒于車中。至于子喬。亦終身不仕。雖伯夷之采薇。叔胥之織履。無以尙已。三代以來。所未有也。謐之終身不受辟命。不仕篡朝。有粲之風概焉。其耽玩書籍。著述自娛。亦小畜之懿文德也。易小畜象曰。風行天上。小畜。君子以懿文德。

王裒字偉元。郎中令修之孫也。父儀。高亮雅直。爲安東將軍。司馬。司馬昭東關之敗。昭問於衆曰。今日之事。誰任其咎。儀對曰。責在元帥。昭怒曰。司馬欲委罪于孤邪。引出斬之。裒少有操尙。長八尺四寸。儀狀偉異。辭氣溫雅。博學多能。痛父非命。未嘗西向而坐。示不臣朝廷也。隱居教授。三徵七辟。皆不就。廬于墓側。

旦夕于墓所拜跪攀柏悲號涕淚著樹樹爲之枯母性畏雷母沒每雷輒撫墓曰哀在此及讀詩至哀哀父母生我劬勞未嘗不三復流涕門人受業者爲廢蓼莪之篇家貧躬耕計口而田度身而蠶或欲助之不聽諸生密爲刈麥哀遂棄之知舊有致遺者皆不受門人爲本縣所役告哀求屬令哀曰卿學不足以庇身吾德薄不足以蔭卿屬之何益且吾不執筆已四十年矣乃步擔乾飯兒負鹽鼓草履送所役生到縣門徒隨從者十餘人安丘令以爲詣己整衣迎之哀乃下道至土牛旁罄折而立云門生爲縣所役故來送別因執手流涕而去令卽放罷一縣以爲恥鄉人管彥少有才學而未知名哀與之友男女各始生便共許爲婚彥後爲西夷校尉卒而葬于洛陽哀更嫁其女彥弟馥問哀曰吾薄志畢願山藪昔嫁姊妹皆遠吉凶斷絕每以此自誓今賢兄之子葬父於洛陽此則京邑之人也豈吾取友之意哉馥曰嫂齊人也嘗還臨淄哀曰安有葬父河南而隨母還齊用意如此何婚之有北海邴春原之後也少立志操寒苦自居負笈游學鄉邑僉以爲邴原復出哀以春性險狡慕名終必不成其後春果無行學業不終哀常以爲人之所行期歸善道何必以所能而責人所不能哉洛陽傾覆寇賊蜂起親族悉欲渡江哀戀墳壘不去遂爲賊所害

議曰儀之對昭政如陳泰之請誅賈充有進無退之意也得春秋誅首惡之義矣昭以爲許而殺之甚哉其不仁也公羊子曰父不受誅子復仇可也父受誅子復仇可乎父受誅子復仇推刃之道也昭以篡弒

之賊悖大義而誅儀。衷之義弗共戴天。雖手誅昭可也。顧力不能。以爲終天之痛。不食其祿。不嚮朝廷而坐。得子道矣。宋司馬光曰。舜誅鯀而禹臣舜。不敢廢至公也。嵇康王儀死。皆不以其罪。二子不仕晉室可也。紹苟無蕩陰之忠。殆不免君子之譏乎。

石偉字公操。南郡人也。少好學。尙節概。介然獨立。有不可奪之志。舉茂才。賢良方正。皆不就。孫休立。特徵偉。累遷光祿勳。及孫皓立。朝政昏亂。偉乃辭老耄痼疾乞身。就拜光祿大夫。吳亡。晉建威將軍王戎親詣偉。辟之不從。太康二年詔曰。吳故光祿大夫石偉。秉志清白。皓首不渝。雖處危亂。廉節可紀。年已過邁。不堪遠涉。其以偉爲議郎。加二千石秩。以終厥世。偉遂陽狂。及盲。不受晉爵。年八十三。太熙元年卒。

范平字子安。吳郡錢塘人也。其先銍侯馥。避王莽之亂。適吳。因家焉。平研覽墳索。遍該百氏。姚信。賀邵之徒。皆從受業。孫亮時。舉茂才。累遷臨海太守。政有異能。孫皓立。謝病還家。吳亡。晉太康中。頻徵不起。年六十九卒。有詔。追加諡號曰文貞先生。賀循勒碑紀其德行。三子夷。咸。泉。並以儒學至大官。泉子蔚。關內侯。家有書七千餘卷。遠近來讀者。恆百餘人。蔚爲辦其衣食。使卒業焉。

議曰。偉平不仕暴朝。終不犯難。非惟明哲保身。至使暴君致敬。就加爵秩。國亡而不苟祿仕。不降其志。不隕其節。有吳高士二人而已。亦漢季幼安承明之流亞。江南吳越之清風。至今可攀也。彼二陸之貪冒權寵。至于殺身夷宗。視偉平能無愧乎。

贊曰。坤翁乾闔。莽無人道。君子好遯。長往高蹈。性全神逸。弄月吟風。深山野人。木石不同。遯矣仲弓。淵乎叔度。鄉鄰盡鬪。我方閉戶。幼安矯矯。海外獨步。豈視三公。天下弗顧。林宗孺子。既清且哲。粲喬之義。邁世烈烈。

...

...

...

...

...

...

...

續後漢書卷第七十上

列傳第六十七上

死國

漢

孔融脂習

傅彤子會

程畿

北地王謨

諸葛瞻子尚黃崇

人之所重莫重于死。死得其所而與生同。偷生不死而與死同。死非其所與不死同。故曰見危授命。又曰有殺身以成仁。無求生以害仁。又曰可以死可以無死。死傷勇。惟知權者能盡死之義。故莫重于死。莫難于處死也。孔子謂召忽死之爲自經。管仲不死爲仁。若由也不得其死。顏淵謂子在回何敢死。晏嬰謂君爲社稷死則死之。爲社稷亡則亡之。若爲己死而爲己亡。非其私暱。誰敢任之。是皆處死之道也。故身負大戾。分于一死者。死其身者也。君主在難。義當死之。死其節者也。居官守職。死而不渝。死其官者也。衛君匡國。折敗以死。死其國者也。故楚之滅黃。君死社稷。則書滅。鄭游速滅許。許男不死。甘爲降虜。則書以許男斯歸。孔父仇牧。閔君死節。特書大夫。宋司馬握節以死。不能其官而特書官。孟陽州綽死于私暱。原軫憤激。自討赴敵。則皆不書。此聖人大經大法。處死之道也。魏氏篡漢。凡爲臣子者。類非全節死國之人。惟

昭烈君臣信討賊之義。不濟而繼之以死。孔融誚責曹操。崑然存漢。犯難而繼之以死。自是寂寥無聞。而大義幾乎息矣。及司馬懿翦滅曹宗。夏侯元。李豐。許允。王經。慨然付之一死。王凌。毋丘儉。諸葛誕。相繼稱兵。以討賊爲名。志乎衛君匡國。不幸顛覆覆滅。亦翟義之流。死于其國者也。得其死矣。其視賈充諸人。靦面食息。雀鼠區區。雖生而豈若死乎。或憤激伏劍。或談笑就戮。或涕泣誓衆。或勸其父以義。或勉其子以死。曹氏忌刻。素無恩澤。固結人心。以君臣大義一定而不敢渝。猶言言炳炳之若是。使懿師。昭。炎。盤桓。睨染指垂涎。殺放三君。歷四世而始篡。況道德仁義之固天命者乎。其後末帝之亡。北地王。諸葛瞻。傅僉。父子死于漢。孫皓之亡。而張悌。孫震。沈瑩。諸人死于吳。故並著爲死國篇。表其義概。庶幾篡臣賊子知懼焉。

孔融字文舉。魯國人。孔子二十世孫也。七世祖霸。爲元帝師。號褒成君。原注。漢書。孔霸字次雍。宣帝時爲

高密相。元帝卽位。徵霸。以師賜爵關內侯。號褒成君。給事中。父宙。謹案。後漢書作侑。泰山都尉。融夙悟有異才。兄弟七人。而融居六年四歲。與

諸兄共食梨。融取小者。父問其故。融曰。小兒法當取小者。由是宗族奇之。年十歲。隨父詣京師。時河南尹李膺以簡重自居。不妄接士。勅外自非當世名人及與通家。皆不得白。融欲觀其人。故造膺門。語門者曰。我是李君通家子弟。門者言之。膺請融問曰。高明祖父嘗與僕有恩舊乎。融曰。然。先君孔子與君先人李老君同德比義。而相師友。則融與君累世通家。衆坐莫不歎息。原注。後漢書。李膺字元禮。延熹二年徵再遷河南尹。司隸校尉。是時朝廷紀綱頽弛。膺獨持風

裁。以聲名自高。土有被其容接者。爲登龍門。融家傳曰。聞漢中李公清節直亮。意慕之。遂造公門。李固漢中人。爲太尉。與此不同。史記。孔子與南宮敬叔適周問禮。蓋見老子云。太中大夫陳煒後

至坐中以告煒。煒曰。夫人小而聰了。大未必奇。融應聲曰。觀君所言。將不早慧乎。膺大笑曰。高明必爲偉

器。年十三喪父。哀悴過毀。扶而後起。州里稱其孝。好學博涉。文辭高壯。傑氣蓋世。山陽張儉爲中常侍。侯

覽所怨。詔爲刊章。下州郡以名捕儉。原注。李賢曰。刊。削也。謂削去告人姓名。後漢書作覽爲刊章。劉攽曰。案

殘暴百姓。所爲不軌。儉舉劾覽及其母罪惡。請誅之。覽過絕章表。並不得通。由是結仇。覽等鄉人。朱並素性佞邪。爲儉別業。並懷怨恚。遂上書告儉。與同郡二十四人爲黨。于是刊章討捕。儉得亡命。儉與融兄褒

有舊。亡抵褒。不遇。時融年十六。儉少之。而不告。融見其有窘色。謂曰。兄雖在外。吾獨不能爲君主耶。因留

舍之後。事泄。國相以下密就掩捕。儉得脫走。遂併收褒。融送獄。二人未知所坐。融曰。保納舍藏者融也。當

坐之。褒曰。彼來求我。非弟之過。請甘其罪。吏問其母。母曰。家事任長。妾當其辜。一門爭死。郡縣疑不能決。

乃上讞之。原注。讞。請也。音宜傑反。詔書竟坐褒焉。融由是顯名。與平原陶丘洪。陳留邊讓。俱爲俊秀冠蓋。融持論

經理不及讓等。而逸才宏博過之。州郡禮命皆不就。辟司徒楊賜府時。隱覈官僚之貪濁者。將加貶黜。融

多舉中官親族。尙書畏迫內寵。召掾屬詰責之。融陳對罪惡。言無阿撓。河南尹何進當遷爲大將軍。楊賜

遣融奉謁賀進。不時通。融卽奪謁還府。投劾而去。河南官屬恥之。私遣劍客欲追殺融。客有言于進曰。孔

文舉有重名。原注。融家傳曰。客有言于進曰。孔文舉于時英雄特傑。譬諸將軍若造怨此人。則四方之士引領

而去矣。不如因而禮之。可以示廣于天下。進然之。旣拜而辟。融舉高第。爲侍御史。與中丞趙舍不同。託病

歸家後辟司空掾。拜北軍中候。在職三日。遷虎賁中郎將。會董卓廢立。融義形于色。輒有匡正。遂忤卓。轉爲議郎。時黃巾寇數州。而北海最爲賊衝。卓乃諷三府舉融爲北海相。融到郡。收合士民。起兵講武。馳檄飛翰。引謀州郡。賊張饒等羣輩二十萬衆。從冀州還。融逆擊。爲饒所敗。乃收散兵。保朱虛縣。稍復鳩集。吏民爲黃巾所誤者。男女四萬餘人。更置城邑。立學校。表顯儒術。薦舉賢良。鄭元、彭璆、邴原等。郡人甄子然。臨孝。存知名早卒。融恨不及見之。乃命配食縣社。其餘雖一介之善。莫不加禮焉。郡人無後及四方游士。有死亡者。皆爲槨。具斂葬焉。黃巾復來侵暴。融乃出屯都昌。爲賊管亥所圍。融逼急。乃遣東萊太史慈求救于昭烈。昭烈卽遣兵三千救之。賊乃散走。融負其高氣。志在靖難。而才疎意廣。訖無成功。高談清教。盈溢官曹。辭氣溫雅。可玩而誦。論事考實。難可悉行。但能張磔網羅。而目理甚疏。謹案。志注作自理甚疏。造次能得人。心久久亦不願附也。其所任用。好奇取異。多剽輕小才。如王子法、劉孔慈等。委以腹心。至于尊事名儒。鄭元。執子孫禮。易其鄉名曰鄭公鄉。及清雋之士。左承祖、劉義遜等。皆備在座席而已。不與論政事。曰。此民望不可失也。黃巾來寇。融戰敗。走保都昌。時曹袁公孫首尾相連。融兵弱糧寡。孤立一隅。不與相通。左承祖勸融宜自託強國。融知紹操終圖漢室。不欲與同。故怒而殺之。劉義遜棄去。在郡六年。昭烈表領青州刺史。建安元年。爲袁譚所攻。自春及夏。戰士所餘裁數百人。流矢雨集。戈矛內接。融隱几讀書。談笑自若。城夜陷。乃奔東山。妻子爲譚所虜。及獻帝都許。徵融爲將作大匠。遷少府。每朝會訪對。融輒引正定議。公

卿大夫皆隸名而已。初太傅馬日磾奉使山東，失節于袁術而死。及喪還，朝廷議欲加禮。融議以為大臣

失節，不宜加禮。朝廷從之。謹案：後漢書載其議文。此書入馬日磾傳。時論者多欲復肉刑。融乃建議以為世變既下，宜從先漢

不可苟革。朝廷善之。卒不復焉。尚書令楊彪見曹操專朝，惡之。操誣彪與袁術通，奏收下獄，劾以大逆。將

誅之。融聞之，不及朝服，往見操曰：「楊公四世清德，海內所瞻。周書父子兄弟，罪不相及。況以袁氏歸罪，楊

公易稱積善餘慶，徒欺人爾。」操曰：「此國家之意。」融曰：「假使成王殺召公，周公可得言不知邪？今天下纓綬

搢紳，所以瞻仰明公者，以公聰明仁智，輔相漢朝，舉直錯枉，致之雍熙也。今橫殺無辜，則海內觀聽，誰不

解體。孔融魯國男子，明日便當拂衣而去，不復朝矣。操不得已，理出彪。荆州牧劉表不供職貢，多行僭偽，

遂乃郊祀，擬斥乘輿，詔書班下其事。融上疏曰：「竊聞領荆州牧劉表，桀逆放恣，所為不軌。至乃郊祀天地，

擬儀社稷，雖昏僭惡極，罪不容誅。至于國體，宜且諱之。何者？萬乘至重，天王至尊，身為聖躬，國為神器。陛

級縣遠，祿位限絕，猶天之不可階，日月之不可踰也。每有一豎臣，輒云圖之。謹案：後漢書作輒去圖之。若形之四方，非

所以杜塞邪萌。愚謂雖有重戾，必宜隱忍。賈誼所謂擲鼠忌器，蓋謂此也。是以齊兵次楚，惟責包茅。原注：左

氏傳：桓公責楚曰：爾貢包茅不入，王祭不供，無以縮酒。寡人是徵。時楚僭王，不責其僭，祇責職貢。為王室諱也。王師敗績，不書晉人。原注：公羊傳：王師敗績于茅戎，

之。王者無敵。前已露衰術之罪，今復下劉表之事，是使跛牂欲闕高岸，天險可得而登也。原注：李斯曰：故城高五丈而樓

季不輕犯也。太山之高百仞，而跛牂牧其上。夫樓季而案表跋扈，擅誅列侯，遏絕詔命，斷盜貢篚，招呼元惡，以

雖五丈之限。豈跛牂而易百仞之高哉？峭漸之勢異也。

自營衛專為羣逆主萃淵藪郃鼎在廟章孰甚焉原注左氏傳取郃大鼎于宋戊申納于太廟戚哀伯諫曰官之失德寵賂章也郃鼎在廟章孰甚焉桑落

瓦解其勢可見臣愚以為宜隱郊祀之事以崇國防五年南陽王馮東海王祗薨帝傷其早沒欲為修四

時之祭以訪于融融對曰聖恩敦睦感時增思悼二王之靈發哀愍之詔稽度前典以正禮制竊觀故事

前梁懷王臨江愍王齊懷王臨淮公謹案後漢書作齊哀王臨淮愍王此據後漢書注改並薨無後同產昆弟即景武昭明四帝是

也原注梁懷王揖景帝弟也立十年薨臨江愍王榮武帝兄也為皇太子四歲廢為王坐侵廟壻地自未聞

前朝修立祭祀若臨時所施則不列傳紀臣愚以為諸在冲亂聖慈哀悼禮同成人加以號謚者宜稱上

恩祭祀禮畢而後絕之至于一歲之限不合禮意又違先帝已然之法所未敢處初曹操攻屠鄴城袁氏

婦子多見侵略而操子丕納袁熙妻甄氏融乃與操書稱武王伐紂以妲己賜周公操不悟後問出何經

典對曰以今度之想當然爾後操討烏桓又嘲之曰大將軍遠征蕭條海外昔肅慎不貢楛矢原注國語

商通道于九夷八蠻于是肅慎氏貢楛矢石磐其長尺有咫丁零盜蘇武牛羊可并案也原注漢書蘇武使匈奴單于徙北海時年饑兵興操

表制酒禁融頗書爭之多侮慢之辭原注融集與操書云酒之為德久矣古先哲王類帝禮宗和神定人以

不干鍾無以建太平孔非百觚無以堪上聖濟萬國非酒莫以也故天垂酒星之耀地列酒泉之郡人著旨酒之德堯

卮酒無以激其氣高祖非辭斬白蛇無以暢其靈景帝非醉幸唐姬無以開中興袁盎非醇醪之力無以脫其命定國

不酌飲一斛無以決其法故酈生以高陽酒徒著功于漢屈原不餽糟飲醢取困于楚由是觀之酒何負于政哉又

書曰昨承訓答陳二代之禍及衆人之敗以酒亡者實如來誨雖然徐偃王行仁義而亡今令不絕仁義燕噲以讓

失社稷今令不禁謙退魯因儒而損今令不棄文學夏商亦以婦人失既見操雄詐漸著數不能堪故發辭偏宕

多致乖忤。又嘗奏宜準古王畿之制。千里寰內。不以封建諸侯。操疑其所論。建漸廣。益憚之。然以融名重天下。外相容忍。而潛忌正議。慮鯁大業。帝嘗特見光祿勳山陽郗慮。及融。問曰。鴻豫何所優長。融曰。可與適道。未可與權。慮舉笏曰。融昔宰北海。政散人流。其權安在。遂與融互相短長。以詎失和。未幾。慮遷御史大夫。承望操風旨。以微法奏免融官。因顯明讎怨。操故以書激厲融曰。蓋聞唐虞之朝。有克讓之臣。故麟鳳來而頌聲作也。後世德薄。猶有殺身為君。破家爲國。及至其弊。睚眦之怨必讎。一餐之惠必報。故鼂錯念國。遭禍于袁盎。原注。漢書鼂錯爲御史大夫。摘諸侯之罪過。削其支郡。所更令三十章。諸侯謹諱。吳楚受譖于子蘭。原注。史記。風平爲楚懷王左徒。上官大夫譏之。王怒而疏風平。風平憂思而作離騷。其後秦惠王使留懷王。竟死于秦。子蘭復譏風平于頃襄王。王怒而遷之江南。風平於是懷石自投汨羅以死。彭寵傾亂。起自朱浮。鄧禹威損。失于宗馮。原注。後漢書。朱浮與彭寵不相能。數譖之。光武。寵遂反。宗馮事見前注。由此言之。喜怒怨愛。禍福所因。可不慎與。昔廉蔣小國之臣。猶能相下。寇賈倉卒。武夫屈節。崇好光武。不問伯升之怨。原注。後漢書。光武兄伯升爲更始所害。光武自父城馳詣宛謝。司徒官屬迎用。光武深引過而已。不敢爲伯升服喪。飲食言笑如平常。齊侯不疑射鈞之虜。夫立大操者。豈累細故哉。往聞二君有執法之平。以爲小介。當收舊好。而怨毒漸積。志相危害。聞之慄然。中夜而起。昔國家東遷。文舉盛歎鴻豫名實相副。綜達經學。出于鄭元。又明司馬法。鴻豫亦稱文舉奇逸博聞。誠怪今者與始相違。孤與文舉既非舊好。又於鴻豫亦無恩紀。然願人之相美。不樂人之相傷。是以區區思協歡好。又知二君羣小所構。孤爲人臣。進不能風化海內。退不能建德和人。然撫養戰士。

殺身為國破浮華交會之徒計有餘矣融報曰猥惠書教告所不逮融與鴻豫州里比鄰知之最早雖嘗

陳其功美欲以厚于見私信于為國不求其覆過掩惡有罪望不坐也前者黜退權欣受之昔趙宣子朝

登韓厥夕被其戮喜而求賀原注國語宣子言韓厥于靈公以為司馬河曲之役宣子使人以其乘車千行韓厥

禮之謂諸大夫曰二三子可以賀我矣吾舉厥也中吾乃今知免于罪矣執而戮之衆咸曰韓厥必不沒矣其主朝升之而暮戮其車其誰安之宣子召而

罪為幸乃使餘論遠聞所以慚懼也朱彭寇賈為世壯士愛惡相攻能為國憂至于輕弱薄劣猶昆蟲之

相齧適足還害其身誠無所至也晉侯嘉其臣所爭者大而師曠以為不如心競原注左氏傳秦伯之弟

人子員行人子朱曰朱也當御三云叔向不應子朱怒曰班爵同何以黜朱于朝撫劍從之叔向曰秦晉不和

久矣今日之事幸而集晉國賴之不集三軍暴骨子員道二國之言無私子常易之茲以事君者吾所能御也拂衣

從之人救之平公曰公室懼卑臣不心競而力爭也性既遲緩與人無傷雖出胯下之負榆次之辱原注史記

者大師曠曰公室懼卑臣不心競而力爭也與蓋聶論劍蓋聶怒而不知貶毀之於己猶蚊虻之一過也子產謂人心不相似原注左氏傳子產謂子

目之荆軻遂駕而去焉吾豈敢謂子或矜勢者欲以取勝為榮不念宋人待四海之客大鑪不欲令酒酸也原注沽酒者斗概甚平有

面如吾面乎遇客甚謹為酒甚美而酒不售酒酸者怪其故問所知問長者楊倩二人曰汝狗猛至于屈穀巨瓠堅而無竅

邪曰狗猛何故不售曰人畏焉令孺子懷錢擊壘往沽狗迎齧之所以酸而不售當以無用罪之爾原注韓子齊有居士田仲宋人屈穀往見之曰穀聞先生之義不特仰人而食今穀有樹瓠之法

也則不可以盛物而任堅如石厚而無竅願獻先生田仲曰夫子徒謂我也凡貴于樹瓠者為可以盛也今厚而無竅

也將棄之今仲不恃仰人而食亦無益于人亦堅瓠之類也它者奉違嚴教不敢失墜郗為故吏融所推進

趙衰之拔卻毅不輕公叔之升臣也原注左氏傳趙衰曰郗毅可臣亟聞其言矣說禮樂而敦詩書知同

其愛訓誨發中。雖懿伯之忌。猶不得念。原注。禮記。滕成公之喪。使子叔敬叔弔。子服惠伯爲介。及郊。爲懿伯之忌。不入。惠伯曰。政也不可以叔父之私不將公事。遂入。沉恃舊交而欲自外于賢吏哉。輒布腹心。愴好如初。苦言至意。終身誦之。歲餘復拜太中大夫。性寬容。少忌。好士。喜誘益。後進及退閒職。賓客日盈其門。嘗歎曰。坐上客常滿。尊中酒不空。吾無憂矣。與蔡邕素善。邕卒後。有虎賁士貌類邕。融每酒酣。引與同坐。曰。雖無老成人。尙有典刑。融聞人之善。若出諸己。言有可採。必演而成之。面告其短。而退稱所長。薦達賢士。多所獎進。知而未言。以爲己過。故海內英俊。皆信服之。曹操既積嫌忌。而郗慮復搆成其罪。遂令丞相軍謀祭酒路粹枉狀奏融曰。少府孔融。昔在北海。見王室不靜。而招合徒衆。欲規不軌。云我大聖之後。而見滅于宋。有天下者。何必卯金刀。及與孫權使語。謗訕朝廷。又融爲九列。不遵朝儀。禿巾微行。唐突宮掖。又前與白衣禰衡。跌蕩放言。云父之子。當有何親。論其本意。實爲情欲發耳。子之于母。亦復奚爲。譬如寄物瓶中。出則離矣。旣而與衡更相贊揚。衡謂融曰。仲尼不死。融答曰。顏回復生。大逆不道。宜極重誅。書奏。下獄棄市。時年五十六。妻子皆被誅。幼女年七歲。男年九歲。以其幼弱得全。寄它舍。二子方弈棋。融被收而不動。左右曰。父執不起。何也。答曰。安有巢毀而卵不破乎。主人有遺肉汁。男渴而飲之。女曰。今日之禍。豈得久活。何賴知肉味乎。兄號哭而止。或言于曹操。遂盡殺之。及收至。女謂兄曰。若死者有知。得見父母。豈非至願。乃延頸就刑。顏色不變。莫不傷之。曹丕深好融。文辭。歎曰。揚班儔也。慕天下有上融文章者。輒賞以金帛。所著詩頌。碑文。論議。六言策表。文檄。教令。書記。

凡二十五篇。原注。蔚宗論曰。昔諫議大夫鄭昌有言。山有猛獸者。麋鹿爲之不採。是以孔父正色。不容弑虐之謀。平仲立朝。有紆盜齊之望。若夫文學之高志直情。足以動義概而忤雄心。故使移鼎之迹。事隔于人在。代終之規。啓機于身後也。夫嚴氣正性。覆折而已。豈其員園委風可以每其生哉。凜凜焉皜皜焉其與珉玉秋霜比質可也。因卽列字。五丸反。脂習者。字元升。京兆人。中平中。仕郡。公府。

辟舉高第。除太醫令。天子西遷。及東徙。許昌習常隨從。與孔融親善。操爲司空。威望日盛。而融以故舊意。書疏倨傲。習常戒融。剛直取禍。宜改節。融不從。及融被誅。許下莫敢收視。而習獨往撫尸而哭之。曰。文舉捨我死。我當復誰語。安用生爲。哀動一市。操聞大怒。將收習殺之。尋以忠直見原。居許東土橋下。後見操。操呼其字曰。元升。卿故慷慨。因問其居處。賜穀百斛。黃初中。嘉其有纓布之節。拜中散大夫。年八十餘卒。議曰。黨禍之酷。東漢風節寢衰。建安間。大抵多患失畏死。貪叨無恥之人。往往朋姦扇盜。相與穿窬。主家皆奴才也。故操得逞其谿壑。自以爲姦人之雄。獨孔融堂堂山立。瑰偉正。大海內厭服。英豪歸仰。巖然以風節自持。爲漢家四百年元氣。其視查鄙猥瑣之操。區區偷兒耳。融不死。漢不亡。是以操亟圖之。其高風義概。百世之下。猶足以興衰激懦。使亂臣賊子懼焉。況當世之人哉。故議者謂操之不敢自取。陰昇之丕融之義。有以懼之也。

傅彤。義陽人也。將兵從昭烈伐吳。張南。馮習敗績于猊亭。昭烈退入魚復。彤斷後拒戰。兵人殲焉。吳將諭彤令降。彤罵曰。吳狗。何有漢將軍降者。遂戰死。以子僉爲左中郎。後爲關中都督。景耀六年。魏大舉入寇。詔僉將兵守關口。魏大將軍鍾會使胡烈攻之。初。武興督蔣舒在事。無稱。令人代之。使助僉守關城。舒懷。

怨忿。詭謂僉曰：今賊至不擊而閉城自守，非良圖也。僉曰：受命保城，城全爲功，委城出戰，若喪師失守，死無益矣。舒曰：子以保城獲全爲功，舒以出戰克敵爲功，請各行其志。遂率衆出，僉以爲戰也，不設備。而舒迎降烈，烈乘虛襲城，僉格鬪而死。晉泰始五年，詔曰：蜀將軍傅僉前在關城，身拒官軍，致死不顧，僉父彤復爲劉備戰亡，天下之善一也。豈由彼此以爲異？僉息著，募後沒入奚官，其免爲庶人，賜穀帛以旌其忠。程畿字季然，巴西閬中人也。劉璋時爲漢昌長，巴西太守龐羲欲謀叛璋，使畿子郁誘畿，畿不從。羲謀遂寢，語在璋傳。璋聞之，遷畿江陽太守。昭烈領益州牧，辟爲從事祭酒。後隨昭烈征吳，大軍敗績，泝江而還，或告之曰：後追已至，解船輕去，乃可以免。畿曰：吾在軍，未曾爲敵走。況從天子而見危哉！追兵遂及畿船，畿身執戟戰，敵船有覆者，衆大至，共擊之，乃死。

北地王謐，末帝太子璿之弟也。景耀二年，封北地王。魏大舉入寇，鄧艾破諸葛瞻于綿竹，末帝將從譙周策降。謐怒曰：若理窮力屈，禍敗必及，便當父子君臣背城一戰，同死社稷，以見先帝。末帝不從，遣鄧良奉書送璽綬降于艾。是日謐哭於昭烈皇帝廟，先殺妻子，而後自殺。左右皆爲泣下。諸葛瞻字思遠，丞相亮之子也。初亮在南陽，黃承彥者高朗開列爲河南名士，謂亮曰：聞君擇婦，身有醜女，黃頭黑色，而才堪相配。亮許諾，卽載送之。鄉里爲之諺曰：莫作孔明擇婦，止得阿承醜女。後生瞻，初亮未有子，取兄瑾之子喬養之。喬字仲慎，與兄恪俱有名于時。論者以爲喬才不及恪，而性業過之。及亮求

喬爲嗣。瑾啓孫權遣之。拜駙馬都尉。隨亮至漢中。亮與瑾書曰：「喬本當還成都。今諸將子弟皆得傳運思。」

惟宜同榮辱。今使喬督五六百兵與諸子弟傳于谷中。年二十五。建興元年卒。謹案：蜀志：喬隨亮至漢中。建興元年卒。與此同。考亮以

五年率諸軍北駐漢中。喬既隨亮。不得云元年卒。疑當作六年。子攀官至行護軍。翊武將軍。諸葛恪見誅于吳。子孫皆盡。而亮自有瞻。故攀

還復爲瑾後。亦早卒。十二年。亮出武功。與兄瑾書曰：「瞻今已八歲。而聰明可愛。嫌其早成。恐不爲重器。爾

年十七。尙公主。拜騎都尉。明年爲羽林中郎將。累遷射聲校尉。侍中。尙書僕射。加軍師將軍。瞻穎悟過人。

強識博學。幼工書畫。蜀人追思亮而愛其才。每朝廷有一善政佳事。雖非瞻所建倡。百姓皆相告曰：「葛侯

之所爲也。」是以聲譽大盛。景耀四年。爲行都護衛將軍。與輔國大將軍董厥共平尙書事。時宦人黃皓亂

政于內。而姜維黷武于外。瞻深憂之。與厥及樊建謀以閤宇代維。啓帝不從。六年冬。魏鄧艾自陰平由景

谷道旁入。瞻督諸軍拒之。至涪。尙書郎黃崇勸瞻宜速行拒險。無令敵得入平地。瞻猶豫。崇再三言之。至

于流涕。方進兵。而艾已長驅而前。被瞻前鋒。瞻退住綿竹。艾遣書誘瞻曰：「若降者必表爲琅邪王。瞻怒斬

艾使。遂戰大敗。臨陳死。時年三十七。原注：千寶曰：瞻雖志不足以扶危。勇不足以拒敵。而能外不負國。內不改父之志。忠孝存焉。瞻長子尙歎曰：「父子荷

國重恩。不早斬黃皓。使敗國殄民。何用生爲？」策馬冒陳而死。黃崇亦死之。崇權之子也。瞻次子京及攀子

顯等。炎興二年。徙河東。晉泰始五年。詔曰：「諸葛亮在蜀。盡其心力。其子瞻臨難而死。義天下之善一也。其

孫京可隨才署吏。後爲郾令。

議曰。嗚呼。親王義兼臣子。國有難。猶當死義。以先諸臣。先王所以封建宗子而固維城也。西漢之亡。獨劉更生諄諄勸戒。隨蹙而卒。其餘諸侯。稱說符命。勸進于莽者。以千數。故莽晏然盜國。坐追虞黃。未聞一人獨不從而死之也。東漢之亡。封國亦既盡除。墮姪祝允。劉氏無噍類。故操丕居然爲西伯舜禹。未聞一人獨從容就義而死之也。惟朔易一遐孤。與隆中一草茅士。素無封爵。不階尺土一民。萬折而與操爭。肉薄血并者三十餘年。力竭而繼之以死。及其遂亡。昭烈之一孫。孔明之一子及孫。慨然赴義。與國俱滅。巍巍義烈。高視兩京。五百年所無有也。壯哉。讎也。末帝爲有愧矣。勇哉。尙也。過夫。瞻矣。僉父子及畿付一死。得其所哉。

續後漢書卷第七十中

列傳第六十七中

死國

魏

夏侯元

李豐張緝

豐弟襲許允

劉陶

王經

王凌

令狐愚楊康

單固

毋丘儉

子甸尹大目

諸葛誕

文欽

虎唐咨

夏侯元字泰初，征南大將軍尚之子也。少知名，弱冠爲散騎黃門侍郎，嘗進見，與后弟毛曾並坐。元恥之，怒形於色，曹叡恨之，左遷爲羽林監。正始初，曹爽輔政，元爽之姑子也，累遷散騎常侍中護軍。元名知人，拔用武官，參戟牙門，無非俊傑，多牧典州郡，立法創制，皆爲世則。太傅司馬懿問以時事，元議以爲夫官才用人國之柄也，故銓衡專于臺閣，上之分也。孝行存乎閭巷，優劣任之鄉人，下之敍也。夫欲清教審選，在明其分敍，不使相涉而已。何者？上過其分，則恐所由之不本，而干勢馳騫之路開；下踰其敍，則恐天爵之外通，而機權之門多矣。夫天爵下通，是庶人議柄也；機權多門，是紛亂之原也。自州郡中正品度官才以來，謹案陳志作之來有年載矣，緬緬紛紛，未聞整齊，豈非分敍參錯，各失其要之所由哉？若令中正但考行倫，輩倫輩當行，均斯可官矣。何者？夫孝行著於家門，豈不忠恪於在官乎？仁恕稱於九族，豈不達於爲政乎？

義斷行於鄉黨。豈不堪於事任乎。三者之類。取于中正。雖不處其官名。斯任官可知矣。行有大小。比有高下。則所任之流。亦煥然明別矣。奚必使中正干銓衡之機於下。而執機柄者有所委仗於上。上下交侵。以生紛錯哉。且臺閣臨下。考功校否。衆職之屬。各有官長。旦夕相考。莫究於此。閭閻之議。以意裁處。而使臣宰失位。衆人驅駭。欲風俗清靜。其可得乎。天臺縣遠。衆所絕意。所得至者。更在側近。孰不修飾以要所求。所求有路。則脩己家門者。已不如自達於鄉黨矣。自達鄉黨者。已不如自求之於州邦矣。苟開之有路。而患其飾真離本。雖復嚴責中正。督以刑罰。猶無益也。豈若使各帥其分。官長則各以其屬能否獻之臺閣。臺閣則據官長能否之第。參以鄉閭德行之次。擬其倫比。勿使偏頗。中正則惟考其行迹。別其高下。審定輩類。勿使升降。臺閣總之。如其所簡。或有參錯。則其責負自在有司。官長所第。中正輩擬比。隨次率而用之。如其不稱。責負在外。然則內外相參。得失有所。互相形檢。孰能相飾。斯則人心定而事理得。庶可以靜風俗而審官才矣。又以爲古之建官。所以濟育羣生。統理民物也。故爲之君長以司牧之。司牧之主。欲一而專。一則官任定而上下安。專則職業修而事不煩。夫事簡業修。上下相安而不治者。未之有也。先王建萬國。雖其詳未可得而究。然分疆畫界。各守土境。則非重累羈絆之體也。下考殷周五等之敘。徒有大小貴賤之差。亦無君官臣民。而有二統互相牽制者也。夫官統不一。則職業不修。職業不修。則事何得而簡。事之不簡。則民何得而靜。民之不靜。則邪惡並興。而姦僞滋長矣。先王達其如此。專其職司。而一其統業。

始自秦世。不師聖道。私以御職。姦以待下。懼宰官之不修。立監牧以董之。畏督監之容曲。設司察以糾之。宰牧相累。監察相司。人懷異心。上下殊務。漢承其緒。莫能匡改。魏室之隆。日不暇及。五等之典。雖難卒復。可竊立儀準。以一治制。今之長吏。皆君吏。橫重以郡守。累以刺史。若郡所攝。惟在大較。則與州同。無爲再重。宜省郡守。但任刺史。刺史職存。則監察不廢。郡吏萬數。還親農業。以省煩費。豐財殖穀。一也。大縣之才。皆堪郡守。是非之訟。每生意異。順從則安。直己則爭。夫和羹之美。在于合異。上下之益。在能相濟。順從乃安。此琴瑟一聲也。蕩而除之。則官省事簡。二也。又幹郡之吏。職監諸縣。營護黨親。鄉邑舊故。如有不副。而因公掣頓。民之困弊。咎生于此。若皆并合。則亂原自塞。三也。今承衰弊。民人彫落。賢才鮮少。任事者寡。郡縣良吏。往往非一。郡受縣成。其劇在下。而吏之上選。郡當先足。此爲親民之吏。專得底下。吏者民命。而常頑鄙。今如并之。吏多選清。良者造職。大化宣流。民物獲寧。四也。制使萬戶之縣。名之郡守。五千以上。名之都尉。千戶以下。令長如故。自長以上。考課選用。轉以能升。所牧亦增。此進才效功之序也。若經制一定。則官才有次。治功齊明。五也。若省郡守。縣皆徑達。事不擁隔。官無留滯。三代之風。雖未可必。簡一之化。庶幾可致。便民省費。在于此矣。又以爲文質之更用。猶四時之迭興也。王者體天理物。必因弊而濟通之時。彌質則文之以禮。時泰侈則救之以質。今承百王之末。秦漢餘流。世俗彌文。宜大改之。以易民望。今科制自公列侯以下。位從大將軍以上。皆得服綾綿羅綺紈素金銀飾鏤之物。自是以下。雜綵之服。通于賤人。

雖上下等級各示有差。然朝臣之制已得侔至尊矣。元黃之綵已得通於下矣。欲使市不鬻華麗之色。商不通難得之貨。工不作雕刻之物。不可得也。是故宜大理其本。準度古法。文質之宜。取其中則以爲禮度。車輿服章皆從質樸。禁除末俗華麗之事。使幹朝之家有位之室。不復有錦綺之飾。無兼采之服。纖巧之物。自上以下。至於樸素之差。示有等級而已。勿使過一二之覺。若夫功德之賜。上恩所特加。皆表之有司。然後服用之。夫上之化下。猶風之靡草。樸素之教。興於本朝。則彌侈之心。自消於下矣。懿報書曰。審官擇人。除重官。改服制。皆大善。禮鄉閭本行。朝廷考事。大指如所示。而中間一相承習。卒不能改。秦時無刺史。但有郡守長吏。漢家雖有刺史。奉六條而已。故刺史稱傳車。其吏言從事。居無常治。吏不成臣。其後轉更爲官司耳。昔賈誼亦患服制。漢文雖身服弋絺。猶不能使上下如意。恐此三事。當待賢能然後了耳。元又書曰。漢文雖身衣弋絺而不革正法度。內外有僭擬之服。寵臣受無限之賜。由是觀之。似指立在身之名。非篤齊治制之意也。今公侯命世作宰。追蹤上古。將隆至治。抑末正本。若制定於上。則化行於衆矣。夫當宜改之時。留殷勤之心。令發之日。下之應也。猶響尋聲耳。猶垂謙謙曰。待賢能。此伊周不正般姬之典也。竊未喻焉。頃之爲征西將軍。假節都督雍涼州諸軍事。

原注。魏略。元既遷。司馬景王代爲護軍。護軍總統諸將。任主武官選舉。前後當此官者不能止貨賂。故蔣濟

爲護軍時有謠言欲求牙門當行千匹。百人督五百匹。宣王與濟善。聞以問濟。濟無以解之。因戲曰。洛中市買。一錢不足則不行。遂相對歡笑。元代濟。故不能止絕人事。及景王之代元。整頓法令。人莫犯者。與曹爽共

與駱谷之役。時人譏之。爽誅徵元爲大鴻臚。數年徙太常。元以爽抑屈內不得意。中書令李豐雖宿爲大

將軍司馬師所親待。然私心在元。遂結皇后父光祿大夫張緝。謀欲以元輔政。豐既內握權柄。子尙公主。又與緝俱。馮翊人。故緝信之。豐陰令弟兖州刺史翼求入朝。欲使將兵入并力。起會翼求朝。不聽。嘉平六年二月。當拜貴人。豐等欲因御臨軒諸門有陛兵。誅師。以元代之。以緝爲驃騎將軍。豐密語黃門監蘇鑠。永寧署令樂敦。元從僕射劉賢等曰。卿諸人居內多不法。大將軍嚴毅。累以爲言。張當可以爲誠。鑠等皆許。以從命。師微聞其謀。請豐相見。以詰豐。不以實告。卽殺之。事下有司。收元。緝。鑠。敦。賢等送廷尉。元不肯下辭。廷尉鍾毓自臨治元。元正色責毓曰。吾當何辭。卿爲令史責人也。卿便爲吾作。毓以其名士。節高不可屈。而獄當竟。夜爲作辭。令與事相附。流涕以示元。元視領之而已。毓弟會年少於元。慕元而元不與交。是日於毓坐狎元。元正色曰。士季何相逼如此耶。會慙懼而退。毓奏豐等謀迫脅至尊。擅誅冢宰。大逆無道。請論如法。於是會公卿朝臣廷尉議。咸以爲豐等各受殊寵。典綜機密。緝承外戚椒房之尊。元備世臣。並居列位。而包藏禍心。搆圖凶逆。交關闔豎。授以姦計。畏憚天威。不敢顯謀。乃欲要君脅上。肆其詐虐。謀誅良輔。擅相建立。將以傾覆京室。顛危社稷。毓所上

謹案。陳志作所正。

皆如科律。報毓施行。詔書齊長公主先

帝遺愛。句其三子死命。於是豐。元。緝。敦。賢等皆夷三族。其餘親屬徙樂浪郡。元格量宏濟。臨斬東市。顏色不變。舉動自若。時年四十六。正元中。紹功臣世封尙從孫本爲昌陵亭侯。邑三百戶。以奉尙後。初夏侯霸之奔漢也。呼元欲與之俱。元曰。吾豈苟存自爲亡虜乎。遂還雒。司馬懿卒。許允謂元曰。無復憂矣。元歎曰。

士宗卿何不見事乎。此人猶能以通家年少遇我。子元子上不吾容也。元嘗著樂毅、張良及本無肉刑論。辭旨通遠。爲世所重。元初被收。衛將軍司馬昭流涕請之。師曰。卿忘會趙司空葬乎。先是司空趙儼卒。師昭兄弟會葬。賓客以百數。元後至。賓客咸越席而迎。師由是惡之。竟誅元。

原注。裴松之曰。曹爽以正始五年伐蜀。時元已爲關中都督。至十年

爽誅滅後。方還洛陽。案少帝紀。司空趙儼以六年亡。元則無由得會儼葬。若云元入朝。紀傳又無其事。斯近妄不實。元以五年入朝。史或不書。未可必爲妄也。李豐字安國。衛尉義之子也。年

十七八。在鄴下名爲清白。識別人物。海內翕然稱之。後以父任從軍。在許昌。聲稱日隆。其父不悅。敕使閉門。斷客。初曹叡在東宮。豐爲文學。及卽位。得吳降人。問江東聞中國名士爲誰。降人云。聞有李安國者。是時豐爲黃門郎。叡問左右安國所在。左右以豐對。叡曰。豐名乃被於吳。越邪。後轉騎都尉。給事中。叡卒。爲永寧太僕。正始中。遷侍中。尙書僕射。豐在臺省。常多託疾。時臺制疾滿百日。當解祿。豐疾未滿。輒暫起。已復臥。如是數歲。豐子韜。選尙齊長公主。豐弟翼及偉。並歷郡守。豐嘗於衆中顯誡二弟。言何用榮位。爲及司馬懿久病。曹爽專政。豐依違二公間。無有適莫。故或諷之曰。曹爽之勢熱如湯。太傅父子冷如漿。李豐兄弟如遊光。以爲豐雖外示清淨。而內圖事。有似於遊光也。及懿誅爽。住車闕下。與豐相聞。豐怖。遽氣索。足委地。不能起。嘉平四年。懿卒後。中書令闕。大將軍司馬師諮問朝臣。誰可補者。或舉豐。遂奏用之。豐爲中書二歲。曹芳每獨召豐與語。不知所說。師疑其議己。請豐相見。以詰豐。豐不以實告。師怒。欲誅之。太常夏侯元素貴。以爽故廢黜。居常怏怏。后父光祿大夫張緝。以東莞太守召爲后家。亦不得意。豐自以身處

機密爲芳知遇。子韜又以列侯給事中尙主。有內外之重而疑於師。心不自安。密謂韜曰。元旣爲海內重人。加以當大任。年時方壯。而永見廢。又親曹爽外弟。於大將軍有嫌。張緝有才用。棄兵馬大郡。還坐家巷。各不得志。欲使汝以密計告之。緝嘗病創臥。豐遣韜省病。韜屏人語。緝曰。韜尙主。父子在機近。大將軍秉事。常不見信。太常亦懷深憂。君侯雖有后父之尊。安危未可知。皆與韜家同慮者也。韜父欲與君侯謀之。緝默然良久曰。同舟之難。吾焉所逃。此大事。不捷卽禍及宗矣。韜於是往報豐。密語黃門監蘇鑠等。鑠等答豐。惟君侯計。豐曰。今拜貴人。諸營兵皆屯門。陛下臨軒。因此便共迫脅將羣寮人兵。就誅大將軍。以太常輔政。卿等當共密白此意。鑠曰。陛下儻不從人。奈何。豐曰。事有權宜。若不信聽。當劫將去爾。寧有不從。鑠等許諾。豐曰。此族滅事。卿等密之。事成卿等皆當封侯。常侍也。豐復密以告元緝。緝遣子邈與豐相結。豐遣子韜以謀報元。元曰。宜詳之爾。而不以告也。師聞豐謀。舍人王彘請以師命召豐。豐若無備。情屈勢迫。必來。若不來。彘一人足以制之。若知謀泄。以衆挾輪長戟自衛。徑入雲龍門。挾天子登凌雲臺。臺上有三千人。立仗鳴鼓會衆。如此彘所不及也。師乃遣彘以車迎之。豐見劫迫。隨彘而至。師責豐。豐知禍及。正色曰。卿父子懷姦。將傾社稷。惜吾力劣。不能相擒滅耳。師怒。使勇士以刀環築殺之。夜送尸付廷尉。廷尉鍾毓不受曰。非法官所治也。以其狀告。且救之。乃受。韜以尙主賜死獄中。曹芳怒。將問豐死故。太后懼。呼芳入。乃止。師遣使收翼。翼妻散騎常侍荀廩姊也。謂翼曰。中書事發。可及未至赴吳。何爲坐取死亡。左右

可共同赴水火者。誰翼思未答。妻曰：君在大州，不知可與同死生者。去亦不免。翼曰：二兒小，吾不去。今但從坐身死，二兒必免。果如翼言。豐歷仕二朝，不植生產，仰廩祿而已。韜雖尙主，豐常約敕，不得有所侵取。得賜錢帛，輒散施親族。及賜宮人，多與子弟。而豐皆以與諸外孫。死後有司籍其家，家無餘積。初，李義與尙書僕射杜畿及東安太守郭智善。智子冲有內實而無外觀。州里弗稱也。冲嘗與豐俱見畿，既退，畿歎曰：孝懿無子，非徒無子，殆將無家。君謀爲不死矣。其子足繼其業。時人皆以畿爲誤。及豐死，冲爲代郡太守。始以畿爲知人。張緝字敬仲，涼州刺史。旣之子也。太和中，爲温令，有治能。漢丞相亮出隴右，緝上便宜，詔以問中書令孫資。資以爲有籌略，遂詔拜騎都尉，遣參征蜀軍事。入爲尙書郎，以名父子爲曹叡所識。且以其才能多所堪任，呼相工相之。相者曰：不過二千石。叡曰：何材如是而位止二千石乎？久之出爲東莞太守。嘉平中，女爲曹芳后，徵拜光祿大夫，位特進。妻向封安城鄉君，緝性傾巧，吝於財而矜於勢。一旦以女徵去郡，還坐里舍，悒悒躁擾。數陳吳蜀形勢，又嘗對司馬師料諸葛恪雖幸勝，見誅不久。師問其故，緝曰：威震其主，功蓋一國，欲不死得乎？及恪從合肥還，吳果殺之。師謂人曰：諸葛恪多輩爾。近張敬仲縣論恪以爲必見殺，今果然如此。敬仲之智爲勝恪也。緝與李豐同郡通家，又居相近，俱不得志，乃謀廢師。豐敗，遂收緝送廷尉，賜死獄中。許允字士宗，高陽人。父據歷典農校尉郡守，允少與同郡崔贊俱發名於冀州。曹叡時皆入爲尙書，選曹郎與陳國袁侃同坐職事，皆收送獄。詔旨嚴切，當有死者。

謹案·志注此下有正直者爲重五

字允謂侃曰。卿功臣子。法應八議。不憂死也。侃知其指。乃爲受重允刑竟。謹案。志注。此下有復吏二字。出爲郡守。稍遷

爲侍中尚書中領軍。允與夏侯元。李豐親善。聞豐等被收。欲往見司馬師。已出門。回遑不定。中道還取袴

豐等已收。師聞允前遽。怪之曰。我自收豐等。不知士大夫何爲恩恩也。是時朝廷恩遽者多。而衆人咸以

爲意在允也。先是有詐作尺一詔書。以元爲大將軍。允爲太尉。共錄尚書事。有何人天未明乘馬以詔版

付允。門吏曰。有詔。因便馳去。允卽投書燒之。不以呈師。豐等既誅。欲因誅允。會鎮北將軍劉靜卒。以允代

靜。已受節傳。出止外舍。師與允書曰。鎮北雖少事。而都典一方。念足下震華鼓。建朱節。歷本州。此所謂著

繡畫行也。允心甚悅。與臺中相聞。欲易其鼓吹旌旗。其兄子素頗聞允見嫌。戒允但當趣行。允曰。卿俗士

不解。我以榮國爾。固求之。曹芳以允當出。乃詔會羣臣。羣臣皆集。芳特引允以自近。允前爲侍中。顧當與

芳別。涕泣歔歔。會罷詔促允去。會有司奏允前擅以廚錢穀乞諸俳及其官屬。遂收送廷尉考問。竟減

死徙樂浪。妻子不得自隨。道死。崔贊常以處世太盛戒允。允不從。故及。原注。魏氏春秋。允善用印。將拜。以

雖始成。而已被辱。問送印者。果懼之而墮于廁。相印書曰。相印法本出陳長文。長文以語韋仲將。印工楊利從仲將受

法。以語許士宗。利以法術占吉凶。十可中八九。仲將問長文從誰得法。長文曰。本出漢世有相印。相笏經。又有鷹經

程申伯。是故有一十二家相法。一子奇。猛。奇字子泰。猛字子豹。並有才學。晉武帝將有事于太廟。奇爲太常

丞。朝議以奇父受誅。不宜接近左右。請出爲外官。帝追述允之宿望。稱奇之才。擢爲祠部郎。元康中爲司

隸校尉。幽州刺史。猛尤儒雅。亦宦達於晉云。劉陶字季冶。淮南人。謹案。魏志。陶。曄少子。喜論縱橫。曹爽當國爲選

部郎鄧颺之徒稱之以爲伊呂。陶亦自負。謂夏侯元曰。仲尼不聖。何以知其然。智者圖國。天下羣愚如弄一丸於掌中。而不能得天下。安得爲聖。元以其言狂誕。不復詳難。謂之曰。天下之勢。變無常也。今見卿窮。爽敗。退居里舍。乃謝其言之過。卬丘儉之舉兵也。司馬師以問陶。陶答依違。師怒曰。卿平生與吾論天下事。至於今日。而更不盡乎。乃出爲平原太守。追殺之。

王經字彥偉。清河人也。初爲江夏太守。大將軍曹爽附絹二千匹。

謹案。志注作二十四。

令交市於吳。經不發書。棄

官歸。母問歸狀。經以故對。母以經典兵馬而擅去。對送吏杖五十。爽聞不復罪經。稍遷司隸校尉。甘露中。爲尙書。曹髦以威權日去。不勝其忿。召侍中王沈。散騎常侍王業。及經。謂曰。司馬昭之心。路人所知也。吾不能坐受廢辱。今日當與卿等自出討之。經曰。昔魯昭公不忍季氏。敗走失國。爲天下笑。今權在其門。爲日久矣。朝廷四方皆爲之致死。不顧逆順之理。非一日也。且宿衛空闕。兵甲寡弱。陛下何所資用。而一旦如此。無乃欲除疾而更深之耶。禍殆不測。宜見重詳。髦乃出懷中黃素詔投地曰。行之決矣。正使死何懼。況不必死耶。於是入白郭太后。沈業奔走告昭。呼經欲與俱。經不從。髦遂率僮僕出討。昭賈充令成濟弑髦。昭以經不告己。而從髦。收經及家。付廷尉。經謝其母。母顏色不變。笑而應曰。人誰不死。正恐不得其所。以此并命。何恨之有。與母并就誅。經之爲司隸校尉。辟河內向雄爲都官從事。至是雄哭之哀動一市。與故吏皇甫晏共收葬焉。初。經爲二州刺史。母謂經曰。汝田家子。今仕至二千石。物太過不祥。可以止矣。經

不能從。故及晉泰始元年詔曰：故尚書王經雖身陷法辟，然守志可嘉，門戶堙沒，意常愍之。其以經孫爲郎中。

議曰：嗚呼！元以重名高節表儀一世，其言議規格深見治體，藹然有大臣之風，翹翹者易摧，皜皜者易汙，挺特正大，曠無單複，焉能出大盜之城府哉！觀對許允之言，則以身死國前定久矣，蹈白刃而不懼，臨死生之際而不亂，生平所養至此乃見壯哉乎天下之至勇也。魏之王侯久自禁錮，爽夷而元誅，諸曹夏侯又復單斃，自是而魏亡矣。豐翼諸人智微力少，闡于大義，忽忽舉事，陷元於死，族滅身夷，死不償責矣。君死社稷，臣死於君，王經有焉。

王淩字彥雲，司徒允從子也。允誅董卓，卓將李傕郭汜等爲卓報仇，入長安殺允，盡害其家。淩及兄晨年少，踰城得脫，亡命歸故里。天子東還，淩舉孝廉，爲發干長。遇事髡刑五歲，當道埽除，曹操車過，問此何徒，左右以淩狀對。操曰：此子師兄子也，所坐亦公爾。於是選爲驍騎主簿，稍遷至中山太守。所在有稱，操辟爲丞相掾屬。曹丕立，拜散騎常侍，出爲兗州刺史，與張遼等至廣陵討孫權。臨江夜大風，吳將呂範等船漂至北岸，淩與諸將逆擊，捕斬首虜，獲舟船有功，封宜城亭侯。謹案：陳志作宜成亭侯，通志作宜城，與此合。加建武將軍，轉任青州。是時海濱乘喪亂之後，法度未整，淩布政施教，賞善罰惡，甚有綱紀。百姓稱之，後從曹休伐吳，與吳師遇于夾石，休軍失利，淩力戰決圍，休得免難，徒爲揚豫州刺史。旌先賢之後，求未顯之士，各有條教，意

義甚美。咸得軍民歡心。初凌與司馬朗、賈逵友善。及臨兗豫。繼其名跡。正始初。爲征東將軍假節都督揚州諸軍事。二年。吳大將全琮數萬衆至芍陂。凌率諸軍逆拒爭塘。力戰連日。琮退走。進封南鄉侯。邑千三百五十戶。遷車騎將軍。儀同三司。是時外甥令狐愚以才能爲兖州刺史。屯平阿。舅甥並典兵。專淮南之重。凌就遷爲司空。司馬懿既誅曹爽。進凌爲太尉。假節鉞。凌愚密協計。謂司馬懿專政。齊王芳不任天位。楚王彪長而才。欲誅懿廢芳。而立彪。都許昌。嘉平元年九月。愚遣將張式至白馬。與彪相問往來。凌又遣舍人勞精詣雒陽。語子廣。廣言凡舉大事。應本人情。曹爽以驕奢失民。何平叔虛而不治。丁畢桓鄧雖並爲宿望。皆專競於世。變易朝典。政令數改。所存雖高。而事不下接。民習于舊。衆莫之從。故雖勢傾四海。聲振天下。同日斬戮。名士減半。而百姓安之。莫或之哀。失民故也。今懿情雖難量。事未有逆。而擢用賢能。廣樹勝己。修先朝之政令。副衆心之所求。爽之所以爲惡者。彼莫不畢改。謹案。志注。必改。夙夜匪懈。以恤民爲先。父子兄弟。並握兵要。未易亡也。凌不從。十一月。愚復遣式詣彪。未還。會愚病死。二年。熒惑守南斗。凌謂斗中有星。當有暴貴者。聞東平浩詳知星。呼問詳。詳疑凌有所挾。欲白之。不果。原注。事見魏略。舊文錯亂。必有脫誤。凌聞吳人塞涂水。欲因此發兵。大嚴諸軍。表求討賊。詔報不聽。凌遣將軍楊宏以廢立事告兖州刺史黃華。華宏連名以白司馬懿。懿將中軍乘水道討凌。先下赦。赦凌罪。又爲書論凌已而大軍掩至百尺。謹案。魏書郡國志曰。司馬宣王討太尉王凌。大軍至百尺塢。卽此塢也。凌自知窮勢。乃乘船單出迎懿。遣掾王彧謝罪。送印綬節鉞。懿軍到丘頭。凌面縛水次。

懿承詔遣主簿解其縛。凌旣蒙赦，加特舊好，不復自疑。徑乘小船欲趨懿，懿使人逆止之。住船淮中，相去十餘丈。凌知見外，乃遙謂懿曰：「卿直以折簡召我，我當敢不至邪？」而乃引軍來乎。懿曰：「以卿非肯逐折簡者故也。」凌曰：「卿負我，懿曰：我寧負卿，不負國家。」遂遣步騎六百送凌。西詣雒陽，凌試索棺釘以觀懿意。懿命給之。五月甲寅，凌行過賈逵廟，呼曰：「凌大魏忠臣，惟爾有神知之。」到項，遂飲藥死。張式等皆自首。乃窮治其事，賜楚王彪死。諸相連者悉夷三族。衆議咸以爲春秋之義。齊崔杼、鄭歸生皆加追戮。陳尸斲棺，載在方策。凌愚罪宜如舊典，乃發凌愚冢，剖棺暴尸於所近市三日，燒其印綬朝服，親土埋之。進宏華爵爲鄉侯。廣有志尙學行，死時年四十餘。廣弟飛、梟、金、虎，並才武過人。懿嘗從容問蔣濟，濟曰：「凌文武俱贍，當今無雙。廣等志力有美於父爾。」退而悔之，告所親曰：「吾此言滅人門宗矣。至是尺口不遺。」少子明山善書多技藝，聞難走太原，追兵及之。有飛鳥集桑樹，隨枝低昂，舉弓射之，應弦而墜。追兵乃止。投親家食，親家告吏執殺之。令狐愚字公治，本名凌。黃初中，爲和戎護軍。烏桓校尉田豫討胡有功，小違節度，愚以法繩之。曹丕怒，械繫愚，免官。詔曰：「凌何愚，遂以名之。」正始中，爲曹爽長史，出爲兗州刺史。愚聞楚王彪有智勇，東郡譎言云：「白馬河出妖馬，夜過官牧邊，嗚呼衆馬皆應。」明日見其迹大如斛，行數里還入河中。又有謠言白馬素羈西南馳，其誰乘者朱虎騎。楚王小字朱虎，故愚與王凌陰謀立彪，乃先使人通意於彪。言使君謝王，天下事不可知。願王自愛。彪亦陰知其意，答言：「謝使君知厚意也，未發得疾卒。」初愚有高志，人謂

愚必與令狐氏族。父宏農太守劭獨以爲愚性倜儻。不修德而願大。必滅我宗。愚聞之。甚不平。及劭爲虎賁中郎將。而愚仕進已多所更歷。所在有名稱。愚從容謂劭曰。先時聞大人謂愚爲不繼。今竟云何邪。劭熟視不答。私謂妻子曰。公治性度猶如故也。以吾觀之。終當罷滅。但不知我久當坐之。不邪。將逮汝曹爾。劭卒後十餘年。而愚族滅。愚之被誅。無敢收視者。東平馬隆閔之。以武吏稱。愚客收尸殯葬。列植松柏。服喪三年。乃歸。東州壯之。單固字恭夏。山陽人。正始中。令狐愚與固父伯龍善。辟固爲別駕。固辭以疾。愚禮敬愈厚。固不應。母夏侯氏謂固曰。使君與汝父久善。故命汝不止。汝亦當仕進。自可往爾。固不獲已。遂往。與兼治中從事楊康並爲愚腹心。後愚與王淩通謀。康固皆知其計。會愚病卒。康應司徒召詣雒陽。固亦以疾去。康在京師露其事。司馬懿乃東取王淩。到壽春。固見懿。懿問曰。卿知其事爲耶。固曰。不知。懿曰。令狐反乎。謹案。志注作令狐及乎。誤。固又曰。無之。而楊康白事。事與固連。遂收捕固及家屬。皆繫廷尉。考實數十。固竟云無。懿錄楊康與固相詰。固辭窮。罵康曰。老傭既負使君。又滅我族。願汝當活耶。事上。須報廷尉。以舊皆聽得。與其母妻子相見。固見其母。不仰視。母知其慙也。謂之曰。汝自不欲應州郡。我彊汝爾。汝爲人吏。自當爾耳。此自門戶衰。我無恨也。固終不視。母又不語。以至於死。初。楊康自以白其事。冀得封侯。後以辭頗參錯。亦并斬。臨刑俱出獄。固又罵康曰。老奴汝死。自分爾。死者有知。汝何面目以行地下也。

毋丘儉字仲恭。河東聞喜人也。父興。黃初中。爲武威太守。伐叛柔服。開通河右。名次金城太守。蘇則討賊。

張進及討叛胡有功。雍州刺史張旣表曰：河右遐遠，喪亂彌久，武威當諸郡路道喉轄之要，加民夷雜處，數有兵難。領太守毋丘興到官，內撫吏民，外懷羌胡，卒使柔附，爲官效用。黃華張進，初圖逆亂，扇動左右，興志氣忠烈，臨難不顧，爲將校民夷，陳說禍福，言則涕泣。於時男女萬口，咸懷感激，形毀髮亂，誓心致命。尋率精兵，踰脅張掖，濟拔領太守杜通西海太守張陸，張掖番和驪軒二縣吏民及郡雜胡，棄惡詣興，皆安恤，使盡力田，興每所歷，盡竭心力，誠國之良吏。陛下卽位，留心萬幾，苟有毫毛之善，必有賞錄。臣伏緣聖旨，指陳其事，遂詔封高陽鄉侯，入爲將作大匠，卒儉襲父爵，爲平原王叡文學，叡立爲尙書郎，遷羽林監，以東宮之舊，甚見親待，出爲雒陽典農，時取農民以治宮室，儉上疏曰：臣愚以爲天下所急除者二賊，所急務者衣食，誠使二賊不滅，士民飢凍，雖崇美宮室，猶無益也。遷荊州刺史，青龍中，叡圖討遼東，以儉有幹策，徙爲幽州刺史，加度遼將軍，持節護烏桓校尉，率幽州諸軍至襄平，屯遼隧，右北平烏桓單于寇婁敦，遼西烏桓都督率衆王護留等，昔隨袁尙奔遼東者，率衆五千餘人降。寇婁敦遣弟阿羅槃等詣闕朝貢，封其渠率二十餘人爲侯王，賜與馬繒采各有差。公孫淵逆與儉戰，不利，引還。明年叡遣太尉司馬懿統中軍及儉等衆數萬討淵，定遼東。儉以功進封安邑侯，邑三千九百戶。正始中，儉以高句驪數侵叛，督諸軍步騎萬人出元菟從諸道討之。句驪王宮將步騎二萬人進軍沸流水上，大戰梁口。原注：梁宮音鴻。連破走儉，遂束馬縣車以登丸都，屠句驪所都，斬獲首虜以千數。句驪沛者名得來數諫宮。原注：裴松之曰：按東夷傳

沛者。句驪國之官名。

宮不從其言。得來曰。立見此地將生蓬蒿。遂不食而死。舉國賢之。儉令諸軍不壞其墓。不伐

其樹。得其妻子。皆放遣之。宮單將妻子逃竄。儉引兵還。六年復征之。宮遂奔買溝。儉遣元菟太守王順追

之。原注。世語。順字孔碩。東萊人。

踰烏桓骨都。過沃沮千餘里。踐肅慎氏之庭。東臨大海。長老說有異面之人。近日之所

出。遂周觀諸國。采其法俗。刻石紀功。刊九都之山。銘不耐之城。諸所誅納八千餘口。并討濊貊皆破之。韓

那奚等數十國各率種落詣儉降。儉振旅還。論功受賞。侯者百餘人。穿山溉灌。民賴其利。遷左將軍。假節

監豫州諸軍事。領豫州刺史。轉爲鎮南將軍。諸葛誕戰於東關不利。乃令誕儉對換。誕爲鎮南都督豫州。

儉爲鎮東都督揚州。吳諸葛恪圍合肥新城。儉與揚州刺史文欽禦之。太尉司馬孚督中軍東解圍。恪退

還。初儉與夏侯元。李豐等厚善。及大將軍司馬師誅元豐等。又廢曹芳。儉不能平。陰謀討師。文欽驍果。麤

猛。數有戰功。好增虜獲。以徼寵賞。多不見許。怨恨日甚。儉以計厚待欽。情好歡洽。欽亦感戴。投心無貳。遂

共定策。正元二年正月有彗星數十丈西北竟天。起於吳楚之分。儉欽喜以爲已祥。乃矯太后詔罪狀司

馬師曰。故相國懿。匡輔魏室。歷事忠貞。故烈祖明皇帝授以寄託之任。懿戮力盡節。以寧華夏。輸誠效忠。

弼成齊王。天下賴之。懿欲討滅二虜。以一宇內。未行而薨。齊王以懿有輔相大功。故遂使師承業。委以國

事。而師以盛年。無疾託病。坐擁彊兵。輒虧臣禮。其罪一也。懿造計取賊。多舂軍糧。克期有日。師爲人臣。當

除國難。又爲人子。當率父業。哭聲未絕。而便罷息。爲臣不忠。爲子不孝。其罪二也。賊退過東關。整飽無費。

令三征同進。喪衆敗績。歷年軍實。一旦而盡。致使賊來。天下騷動。死傷流離。其罪三也。賊舉國悉衆。號五十萬。來向壽春。圖詣洛陽。會太尉孚與臣等建計。杜塞險要。不與爭鋒。還固新城。淮南將士。衝鋒履刃。晝夜相守。勤瘁百日。死者塗地。自魏興軍以來。爲難苦甚。莫過於此。而師遂意自由。不論封賞。權勢自在。無所領錄。其罪四也。故中書令李豐等。以師無臣節。專擅大柄。陰欲議退之。師懷不軌。乃劫豐。投刃拉殺。載尸埋棺。豐等國家大臣。帝主腹心。擅加酷暴。死於非辜。師有無君之心。其罪五也。懿每歎說齊王。眞爲令主。謹案。志注作自堪人主。君臣義定。十有五載。始欲歸政。按行武庫。詔問禁兵。不得擅出。師自知姦慝。神人不祐。矯廢君主。加之以罪。孚師之叔父。性甚仁孝。追送齊王。悲不自勝。羣臣皆怒。而師懷忍造逆。不顧大義。其罪六也。又故太常夏侯元海。內重德。光祿大夫張緝。王室懿親。橫加賊殺。又誅夷其妻子。并及母后。逼恐至尊。強催督遣。臨時哀愕。莫不傷痛。而師稱慶以爲快樂。其罪七也。陛下踐阼。聰明神武。事經聖心。欲崇省約。天下聞之。莫不歡慶。而師不自改悔。脩復臣禮。方徵兵募士。毀壞宮內。列侯自衛。陛下卽阼。初不朝覲。陛下欲臨幸師舍。以省其疾。復拒不通。蔑上不道。其罪八也。近者領軍許允。當爲鎮北。以廚錢給賜。而師舉奏加辟。雖云流徙。道路餓殺。天下聞之。莫不哀傷。狡狴險惡。賊殺忠良。其罪九也。三方之守。一朝廢闕。多選精兵。以自營衛。五營領兵。闕而不補。多載器仗。充聚本營。天下所聞。人懷憤怨。譎言盈路。以疑海內。韜藏逆器。包蓄篡具。其罪十也。多休守兵。以占高第。空虛四表。欲擅強勢。以逞姦心。募取屯田。加其復賞。

阻兵安忍。壞亂舊法。合聚諸藩。王公以著。鄴欲悉誅之。一旦舉事。廢主天不長。惡使日腫不成。其罪十一也。臣等先人皆隨從太祖武皇帝。征討凶暴。獲成大功。高祖文皇帝。卽受漢禪。開國承家。道符堯舜。烈祖明皇帝。潤色皇業。緝熙帝載。治隆文景。一旦爲師。撞毀。輒擅廢立。敢行誅殺。公爲篡奪。臣與安豐護軍鄭翼。廬江護軍呂宜。太守張休。淮南太守丁尊。督守合肥。護軍王休等議。各以累世受恩。千載風塵。思盡驅命。以完社稷。安主正朝。斯義苟立。雖焚妻子。吞炭漆身。死而不恨。按師之罪。宜加大辟。以彰姦隱。春秋之義。一世爲善。十世宥之。懿有大功。海內所書。依古典議。廢師以侯。就第師弟。昭忠肅寬。明樂善好士。有高世之度。忠誠爲國。不與師同。臣等碎首所保。可以代師。輔導聖躬。太尉孚忠孝小心。所宜親寵。授以保傅。護軍散騎常侍望忠。公親事。當官稱能。奉迎乘輿。有宿衛之功。可爲中領軍。春秋之義。大義滅親。故周公誅弟。石碯滅子。季友鳩兄。上爲國計。下全宗族。殛鯀用禹。聖人明典。古今所稱。乞陛下下臣等所奏。朝堂博議。臣言。當道使師遜位避賢。罷遣兵衆。則天下協同。若師負勢恃衆。不自退者。臣等率將所領。晝夜兼行。以清君側。臣今舉義。唯欲使大魏永存。陛下得行君道。遠絕亡之禍。百姓安全。六合一體。忠臣義士。得效志節。爾臣恐兵起。天下擾亂。臣輒上事。移三征及州郡國典農。各安慰所部吏民。不得妄動。師聞臣等舉義。必下詔禁絕。關津使駟書不通。擅復徵調。有所收捕。此乃師詔。非陛下詔也。在所皆不得承用。臣等道遠。爲師所覘。凡文奏不得關通。輒臨時賞罰。以便宜從事。須定集上也。並移諸郡國舉兵。迫脅淮南將

守諸別屯者及吏民大小皆入壽春城爲壇于城西歃血爲盟分老弱守城儉欽自將五六萬衆渡淮西至項儉堅守欽在外爲游兵司馬師統中外軍拒之別使諸葛誕督豫州諸軍從安風津擬壽春征東將軍胡遵督青徐諸軍出譙宋之間絕其歸路師屯汝陽使監軍王基督前鋒諸軍據南頓以待之令諸軍皆堅壁勿戰儉欽進不得鬪退恐壽春見襲不得歸計窮不知所爲淮南將士家皆在北衆心沮喪降者相屬惟淮南新附農民爲之用儉之初起遣健步齋書至兗州刺史鄧艾斬之將兵萬餘人兼道前進先趨樂嘉城作浮橋以待師儉使文欽將兵襲之師自汝陽潛兵就艾於樂嘉欽猝見大軍驚愕未知所爲欽子鴛謹案志引魏氏春秋曰欽中子年十八勇力絕人謂欽曰及其未定擊之可破也於是分爲二隊夜夾攻鴛率壯士先至鼓譟軍中震擾師驚駭所病目突出恐衆知之齧被皆破欽失期不應會明鴛見兵盛乃引還師謂諸將曰賊走矣可追之諸將曰欽父子驍猛未有所屈何苦而走師曰夫一鼓作氣再而衰鴛鼓譟失應其勢已屈不走何待欽將引而東鴛曰不先折其勢不得去也乃與驍騎十餘摧鋒陷陳所向皆披靡遂引去師使左長史馬班率驍騎八千翼而追之鴛以匹馬入數千騎中輒殺傷百餘人乃出如此者六七追騎莫敢逼殿中人尹大目自小爲曹氏家奴常侍魏主左右師將與俱行大目知師一目已突出啓云文欽本是明公腹心但爲人所誤爾又天子鄉里素與大目相信乞爲公追解語之令還與公復好師許之大目單身往乘大馬被鎧胄追欽遙相與語大目心實欲爲曹氏謬言君侯何苦

謹案志

注何苦下有若字。册府無若字。與此合。不可復忍數日中也。欲使欽解其旨。欽殊不悟。乃更厲聲罵大目曰。汝先帝家人。不念

報恩而反與司馬師作逆。不顧上天。天不祐汝。乃張弓傅矢欲射大目。大目涕泣曰。世事敗矣。善自努力。也是日儉聞欽退。恐懼夜走。衆遂大潰。欽還至項。以孤軍無繼。不能自立。欲還壽春。壽春已潰。遂奔吳。吳孫峻至東興。聞儉等敗。進至橐皋。欽父子詣峻降。儉北走至慎縣。左右人兵稍棄儉去。儉獨與小弟秀及孫重藏水邊草中。安風津都尉部民張屬就射殺儉。傳首雒陽。屬封侯。秀重走入吳。將士諸爲儉欽所迫脅者悉降歸。儉子甸爲治中侍御史。先時知儉謀將發。私出將家屬逃走新安靈山上。別攻下之。夷儉三族。原注。習鑿齒曰。田丘儉惑明帝之顧命。故爲此役。君子謂田丘儉事雖不成。可謂忠臣矣。夫竭節而赴義者我也。成之與敗者時也。我苟無時。成何可必乎。忘我而不自必。乃所以爲忠也。古人有言。死者復生。生者不愧。若田丘儉可謂能不愧也。甸字子邦。有名京邑。曹芳之廢。甸謂儉曰。大人居方岳重任。國家傾覆。而晏然自守。將受四海

之責。儉然之。司馬師惡其爲人。及儉起兵。問屈頤所在。云不來。曰。謹案。志注無曰字。無能爲也。儉遣子宗四人入

吳。晉太康中。吳平。宗兄弟皆還。宗有儉風。至零陵太守。宗子奧。巴東監軍益州刺史。儉黨七百餘人繫獄。侍御史杜友治之。惟誅首事者十人。餘皆奏免之。儉孫女適劉氏。嘗死。以孕繫獄。廷尉司隸主簿程咸議曰。女適人者。若已產育。則成他家之母。于防則不足懲姦亂之源。于情則傷孝子之恩。男不遇罪於他族。而女獨嬰戮于二門。非所以哀矜女弱。均法制之大分也。臣以爲在室之女。可從父母之刑。旣醮之婦。使從夫家之戮。從之。著於律令。

諸葛誕字公休。漢丞相亮之族弟也。初爲尚書郎。從僕射杜畿試船陶河。遇風與畿俱覆沒。虎賁浮河救誕。誕曰：先救僕射。誕漂著岸而復蘇。調榮陽令。入爲吏部郎。人有所屬託。輒顯其言而承用之。後有當否。則公議其得失以爲褒貶。自是羣僚莫不慎其所舉。累遷御史中丞。尚書與夏侯元。鄧颺等相善。共相題表。以元等四人爲四聰。誕等八人爲八達。謹案。曹嘉之晉紀曰。誕以氣屬稱。嘗倚柱讀書。雷震其柱。誕讀書自若。中書監令劉放子熙。孫資子密。吏部尚書衛臻子烈。三人咸不及比。以父居勢位容之爲三豫。凡十五人。聲望翕然。言事者以誕颺等脩浮華。合虛譽。漸不可長。曹叡惡之。免誕官。會叡卒。正始初。元等並任職。復以誕爲御史中丞。尚書出爲揚州刺史。加昭武將軍。王凌之陰謀也。司馬懿潛軍東伐。以誕爲鎮東將軍。假節都督揚州諸軍事。封山陽亭侯。諸葛恪與東關。遣誕督諸軍拒之。與戰不利。還徙爲鎮南將軍。後母丘儉。文欽舉兵。遣使詣誕。招呼豫州士民。誕斬其使。露布天下。司馬師東征。使誕督豫州諸軍。渡安風津。向壽春。儉欽之破也。誕先至壽春。壽春中十餘萬口。聞儉欽敗。恐誅。悉破城門出。流迸山澤。或散走入吳。以誕久在淮南。乃復以爲鎮東大將軍。儀同三司。都督揚州。吳大將孫峻。呂據。留贊等聞淮南亂。會文欽往。乃率衆將欽徑至壽春。時誕諸軍已至城。不可攻。乃走。誕遣將軍蔣班追擊之。斬贊傳首。收其印節。進封高平侯。邑三千五百戶。轉爲征東大將軍。誕旣與元颺等親善。又王凌。母丘儉。累見夷滅。司馬昭又自代師輔政。威柄益重。懼不自安。傾帑藏振施以結衆心。厚養親附及揚州輕俠者數千人爲死士。原注。魏書誕賞賜過度有犯死罪者。虧制以活之。甘露元年。

冬吳人欲向徐塌計誕所督兵馬足以待之而復請十萬衆守壽春又求臨淮築城以備寇內欲保有淮南大將軍長史賈充以爲宜遣參佐慰勞四征且觀其志昭遂遣充至淮南充見誕從容談時事因謂誕曰雖中諸賢皆願禪代君以爲何如誕厲聲曰卿非賈豫州子乎世受魏恩奈何負國欲以社稷輸人乎卿無復言非吾所忍聞也雖中有難吾當死之充默然還言於昭曰誕再在揚州威名益重得士衆心今徵必不來反疾而禍小不徵則反遲而禍大不如徵之昭從之二年五月昭徵誕爲司空赴京師誕得詔書愈恐曰我作公當在王文舒後今便爲司空不遣使者健步齋書使以兵付樂綝此必綝所爲也乃請諸牙門置酒飲宴皆醉謂之曰前作千人鎧杖始成欲以擊賊今當還雖不復得用吾欲暫出游戲須臾還爾諸君且止乃嚴鼓將士七百人出樂綝聞之閉州門誕宣言曰當還雒邑豎出城游戲爾揚州何爲閉門見備耶乃使兵緣城攻門州人悉走因風縱火焚其府庫遂殺綝

原注。魏末傳載誕表曰。臣受國重任。綝兵在東。揚州刺史樂綝等詐說臣。

與吳交通。又言被詔當代臣位。無狀日久。臣奉國命。以死自立。終無異端。忿綝不忠。輒將步騎七百人。以今月六日討綝。即日斬首。函頭駟馬傳送。若聖朝明臣。臣即魏臣。不明臣。臣即吳臣。不勝發憤有日。謹拜表。臣愚悲感泣血。哽咽斷絕。不知所如。乞朝廷察臣至誠。裴松之曰。魏末傳所言率皆鄙陋。疑誕表言曲不至於此也。

兵者五萬人聚穀足一年食閉城自守遣長史吳綱將小子觀至吳請救

原注。裴松之載世語曰。黃初末。吳人發長沙王吳芮家。以其塹于臨。

湘爲孫堅立廟。芮容貌如生。衣服不朽。後豫發者見吳綱曰。君何類長沙王吳芮。但微短爾。綱瞿然曰。是先祖也。君何由見之。見者言所由。綱曰更葬不。答曰即更葬矣。自芮之卒年至發冢四百餘年。綱芮之十六世孫矣。吳人大喜遣將全懌全端唐咨王祚等率三萬衆密與文欽俱來應誕以誕爲左都護假節大司徒驃騎將

軍青州牧封壽春侯。是時鎮南將軍王基始至督諸軍圍壽春。未合。咨欽等從城東北因山乘險。得將其衆突入城。六月。司馬昭奉曹髦及郭太后督中外諸軍二十六萬臨淮討誕。昭屯丘頭。使基及安東將軍陳騫等四面合圍。表裏再重。塹壘甚峻。欽等數犯圍。逆擊走之。昭又使監軍石苞、兗州刺史州泰等簡銳卒爲遊軍。備外寇。泰擊破朱異於陽淵。異走。泰追之。殺傷二千人。秋七月。吳大將軍孫綝大發卒出屯鍾里。復遣朱異帥將軍丁奉、黎斐等五人解壽春圍。異留輜重於都陸。進屯黎漿。石苞、州泰又擊破之。太山太守胡烈以奇士五千襲都陸。盡焚異資糧。異將餘兵食葛葉走歸。孫綝使異更戰。異以士卒乏食。不從。綝怒。斬異于饒里。引兵還建業。綝旣不能拔出諸葛誕。而喪敗士衆。自戮名將。由是吳人莫不怨之。俄而城中乏糧。外救不至。衆無所恃。蔣班、焦彝皆誕爪牙計事者也。言於誕曰：「朱異等以大衆來而不能進。孫綝殺異而歸江東。外以發兵爲名。而內實坐須成敗。今宜及衆心尙固。士卒思用。并力決死。攻其一面。雖不能盡克。猶可有全者。」空坐守死無爲也。文欽曰：「江東乘戰勝之威久矣。未有難北方者也。況公今舉十餘萬之衆歸命。而欽與全端等皆同居死地。父兄子弟盡在江表。就孫綝不欲。主上及其親戚豈肯聽乎。且中國無歲無事。軍民並疲。今守我一年。勢力已困。內變將起。奈何舍此欲乘危徼倖乎。班、彝固勸之。欽怒。而誕欲殺班、彝。二人懼。且知誕之必敗也。十一月。棄誕踰城降。全、懌兄子輝儀在建業。與其家內爭訟。搆其母將部曲數千家來奔。於是懌與兄子靖及全端弟翽、緝皆將兵在壽春城中。司馬昭用黃門侍

郎鍾會策密爲輝儀作書使輝儀所親信齎入城告懾等說吳中怒懾等不能拔壽春欲盡誅諸將家故逃來歸命十二月懾等率其衆數千人開門出降城中震懼不知所爲詔拜懾平東將軍封臨湘侯端等封拜各有差三年正月文欽謂誕曰蔣班焦彝謂我不能出而走全端全懾又率衆降此敵無備之時也可以戰矣誕及唐咨等皆以爲然遂大爲攻具晝夜五六日攻南圍欲決圍而出圍上諸軍臨高以發石車火箭逆燒破其攻具弩矢及石雨下死傷者蔽地血流盈壘復還入城城內食轉竭降出者數萬口欽欲盡出北方人省食與吳人堅守誕不聽由是爭恨欽素與誕有隙徒以計合事急愈相疑欽見誕計事誕遂殺欽欽子鴛及虎將兵在小城中聞欽死勒兵馳赴之衆散鴛虎單走踰城自歸軍吏請誅之司馬昭曰欽之罪不容誅其子固應當戮然鴛虎以窮歸命且城未拔殺之是堅其心也乃赦鴛虎使將數百騎馳巡城呼語城內云文欽之子猶不見殺其餘何懼表鴛虎爲將軍各賜爵關內侯城內喜且擾又日飢困誕咨等智力窮昭乃自臨圍四面進兵同時鼓譟登城城內無敢動者誕窘急單馬將其麾下突小城門出昭司馬胡奮步兵逆擊斬誕傳首夷三族誕麾下數百人皆拱手爲列不降皆曰爲諸葛公死不恨每斬一人輒降之卒不變以至于盡時人比之田橫吳將于銓曰大丈夫受命其主以兵救人旣不能克又束手於敵吾弗取也乃免胄冒陳而死唐咨王祚及諸裨將皆面縛降吳兵萬衆器仗軍實山積

傳子曰宋建椎牛禱賽終自焚滅文欽日祠祭事天斬于人手諸葛誕夫婦聚會神巫淫祀求福伏尸淮南舉族誅夷此天下所共見足爲明鑒也吳以誕子覲爲大司馬吳亡還晉竄

匿不出。武帝與觀有舊，觀姊又爲琅邪王妃。帝知觀在姊間，因就見之。觀逃于廁，帝逼出之，謂曰：「不意今日復得相見，覲流涕曰：『不能溲身皮面，復覲聖顏，詔以爲侍中，固辭不拜，歸于鄉里，終身不向朝廷而坐。』子恢仕晉，累遷尙書右僕射，散騎常侍。元帝時，終侍中金紫光祿大夫，儀同三司。文欽字仲若，譙郡人也。父稷，建安中爲騎將，有勇力，欽少以材武見稱。魏諷反，欽坐與諷辭語相連，下獄，掠笞數百，當死。曹操以稷故赦之。太和中，爲五營校督，出爲牙門將。欽性剛暴無禮，所在驕傲，陵上不奉法，輒見奏遣。後曹叡復以爲淮南牙門將，轉廬江太守。鷹揚將軍王淩奏欽貪殘，不宜撫邊，請免官治罪。由是徵還。曹爽以其鄉里，不治欽事，復遣還廬江，加冠軍將軍，貴寵踰前。欽以故益驕，爽誅，進欽前將軍以安之。後代諸葛誕爲揚州刺史，自爽之誅，欽常內懼，與諸葛誕相惡，故弗與謀會。誕去，毋丘儉至，乃陰共結謀，及敗走，晝夜間行，追者不及，遂詣孫峻降，奉表于吳曰：「稟命不幸，常隸魏國，雨絕于天，雖側伏隅都，自知無路。司馬師滔天作逆，廢害二主。謹案：何棟較本曰：此表後人僞作。高貴鄉公之弑，昭事也。何得預言二主乎。辛癸高莽，惡不足喻。欽累世受魏恩，烏鳥之情，竊懷憤踊，在三之義，期于斃仆，故與毋丘儉、郭淮等俱舉義兵，當共討師，掃除凶孽，智慮淺薄，微節不騁，進無所依，悲痛切心，退惟不能扶翼本朝，抱愧俛仰，靡所自厝，冒緣古義，固有所歸。庶假天威，得展萬一，僞仆之日，亦所不恨。輒相率將歸命聖化，慙儉苟生，非辭所陳。謹上還所受魏使持節、前將軍山桑侯印綬，臨表惶惑，伏須罪誅。吳以欽爲都護，假節鎮北大將軍、幽州牧、譙侯。及在吳，貽雍州刺史郭淮書曰：『大將

軍昭伯與太傅伯俱受顧命。登牀把臂。託付天下。此遠近所知。後以勢利。乃絕其祀。及其親黨。皆一時之俊。可爲痛心。公侯特與大司馬公恩親分著。義貫金石。當此之時。想益毒痛。王太尉嫌其專朝。潛欲舉兵。事不克捷。復受誅害。及楚王太傅既亡。師繼承父業。肆其虐暴。放主弑后。殘戮忠良。包藏禍心。此而可忍。孰不可忍。欽以名義大故。忠憤內發。忘寢與食。無所吝顧。會卬丘子邦與父書。騰說公侯盡事主之義。欲奮白髮。同符太公。惟須東問。影響相應。聞問之日。能不慷慨。是以不恤妻孥之痛。卽與卬丘鎮東舉義兵三萬餘人。西趨雒陽。欲扶持王室。掃除姦逆。企踵西望。不得聲問。夫當仁不讓。況救君之難。度道遠艱。故不果期。要爾。然同舟共濟。安危勢均。禍痛已受。非言飾所解。自公侯所明也。共事曹氏。積信魏朝。行道之人。皆所知見。然在朝之士。冒利偷生。烈士所恥。公侯所賤。賈豎所不忍爲。況當塗之士。邪軍屯住。項僕以閏月十六日。別進兵。就樂嘉城討師。師之徒衆。尋時崩潰。其所斬截。不復訾原。但當長驅。徑至京邑。而流言先至。卬丘不復詳之。更謂僕爲誤。謹案。此書見魏志。卬丘。儉傳注。僕字作小人。諸軍便爾瓦解。卬丘還走。追尋釋解。無所及。還項復遇王基等十二軍。追尋卬丘。進兵討之。卽時克破。所向全勝。謹案。志注作要。那後無繼。孤軍梁昌。進退失所。還據壽春。壽春復走。狼狽躡闕。無復他計。惟當歸命大吳。借兵乞食。繼踵伍員爾。不若是。謹案。志注作不若。如何快心復君之仇。永使曹氏得享血食。此亦大國之所佑念也。想公侯不使程嬰杵臼擅名于前代。而使大魏獨無鷹揚之士。與今大吳敦崇大義。深見感悼。然僕於國大分連接。遠同一勢。欲俱與。謹案。志

僕隸

代。而使大魏獨無鷹揚之士。與今大吳敦崇大義。深見感悼。然僕於國大分連接。遠同一勢。欲俱與。謹案。志

注與作舉重一分字。

分中國。不願偏取以爲己有。公侯必欲共忍。帥懷宜廣大。勢恐秦川之卒不可孤舉。今者之計。宜屈己伸人。託命歸漢。東西俱舉。乃可克定。師黨爾深。思鄙言。若愚計可從。宜使漢軍克期。要使六合校考。與周召同封。以託付兒孫。此亦非小事也。大丈夫寧處其落落。是以遠呈忠心。時望嘉應。時淮已卒。欽未知也。孫峻待之甚厚。欽在他國。仍不能屈節下人。自呂據、朱異等諸大將皆憎疾之。惟峻常爲保佑。鴛一名俶。誕誅司馬昭。聽鴛收斂。欽喪給牛車葬。舊墓鴛後破涼州虜。名聞天下。太康中爲東夷校尉。假節當之官。入辭武帝。帝見而惡之。託以他事免官。東安公繇欲殺鴛。誣鴛欲謀逆。遂夷三族。唐咨本利城人。黃初中利城郡反。殺太守徐箕。推咨爲主。曹丕遣諸軍討破之。咨走入海。遂亡之。吳官至左將軍。封侯。持節。誕既誅。咨亦就禽。拜咨安遠將軍。

議曰。王淩之欲廢僭尊。立宗子。澄汰王室。大臣之節也。議者謂淩于齊王君臣分定。并儉誕等爲淮南三叛。原注。謂習鑿齒論也。此晉之臣子尊晉之志也。淩欲廢而誅之。師遂廢之。昭又殺之而無爲誅之。則淩知所廢而非叛也。儉誕繼起。聲罪致討。聞雒中禪代之語。投袂致死。有古義士之風。夫豈叛乎哉。誕之得士。至麾下數百人。拱手待斬。以盡。不爲司馬氏屈。義烈挺然。未之前聞也。

續後漢書卷第七十下

列傳第六十七下

死國

吳

留贊字平

呂據

朱異

張悌

孫震沈璧

留贊字正明。會稽長山人也。少爲郡吏。與黃巾賊帥吳桓戰。手斬桓。贊一足被創。遂屈不伸。然性壯烈。好讀兵書及三史。每覽古良將戰攻之勢。輒對書獨歎。因呼諸親近謂曰。今天下擾亂。英豪並起。歷觀前世富貴。非有常人。而我屈躄在閭巷間。存亡無以異。今欲割引吾足。幸不死而伸。幾復見用。死則已矣。親戚皆難之。有間贊。乃以刀自割其筋。流血滂沱。悶絕良久。家人驚怖。遂引伸其足。創愈。良行如故。凌統聞之。請與相見。甚奇之。乃表薦贊。遂被試用。累有戰功。謹案。志無累字。册府元龜有累字。與此合。稍遷屯騎校尉。時事得失。每進規諫。好直言。孫權憚之。諸葛恪攻東興。贊爲前部。合戰先陷陳。大敗魏師。遷左將軍。孫峻出淮南。授贊節。拜左護軍。未至壽春。道路病發。峻令贊將車重先還。魏將蔣班以步騎四千追贊。贊病困不能整陳。知必敗。乃解曲蓋印綬付弟子。以歸曰。吾自爲將。破敵擐旗。未嘗負敗。今病困兵羸。衆寡不敵。汝速去。俱死無益。

於國適所以快敵爾。弟子不肯受。拔刀欲斫之。乃去。初贊爲將。臨敵必先被髮叫天。因抗音而歌。左右應之。畢乃進戰。戰無不克。及敗。歎曰。吾戰有常術。今病困若此。命也。遂被害。時年七十三。二子略平。略爲大將。有父風。平累遷左將軍。孫皓之遊華里。平與右丞相萬彧。右大司馬丁奉謀曰。若至華里不歸。社稷事重。不得不自還。皓頗聞之。以彧等舊臣。隱忍不發。鳳凰元年冬。皓因會。以毒酒飲彧。傳酒人私滅之。又飲平。平覺之。服他藥以解。得不死。彧歸自殺。皓徙其子弟于廬陵。平憂薨。月餘亦卒。

呂據字世議。大司馬範之子也。以父任爲郎。後範寢疾。拜副軍校尉。佐領軍事。範卒。遷安軍中郎將。數討山賊。諸深惡劇地。所擊皆破。隨太常潘濬討五谿。復有功。朱然攻樊。據與朱異破城外圍。還拜偏將軍。入補馬關右部督。遷越騎校尉。太元元年大風。江水溢流。漸淹城門。權使視水。獨見據使人取大船以備害。權嘉之。拜盪魏將軍。權寢疾。以據爲太子右部督。太子立。拜右將軍。魏軍出東興。據赴討有功。明年孫峻殺諸葛恪。遷據爲驃騎將軍。平西宮事。五鳳二年假節與峻等襲壽春。還遇魏將曹珍。破之於高亭。太平元年。帥師侵魏。未及淮。聞孫峻死。以從弟緄自代。據大怒。引軍還。欲廢緄。緄聞之。使中書奉詔。詔文欽。劉纂。唐咨等使取據。又遣從兄憲以都下兵逆據于江都。左右勸據降魏。據曰。恥爲叛臣。遂自殺。夷三族。朱異字季文。前將軍桓之子也。張惇子純與張儼及異俱以童子有雋才。往見驃騎將軍朱據。據聞三人名。欲試之。告曰。老鄙相聞。飢渴甚矣。夫驪廩以迅驟爲功。鷹隼以輕疾爲妙。其爲吾各賦一物。然後乃坐。

儼乃賦犬曰。守則有威。出則有獲。韓盧宋鵠。書名竹帛。純賦席曰。席以冬設。箔爲夏施。揖讓而坐。君子攸宜。異賦弩曰。南嶽之幹。鍾山之銅。應機命中。獲隼高墉。三人各隨其目所見而賦之。皆成而後坐。據大歡悅。尤奇賞異。以父任爲郎。後拜騎都尉。代桓領兵。赤烏四年。隨朱然攻魏樊城。建計破其外圍。還拜偏將軍。魏廬江太守文欽營住六安。多設屯砦。置諸道要。以招誘亡叛爲邊寇害。異乃身率其部二千人。掩破欽七屯。斬首數百。遷揚武將軍。權與論攻戰。辭對稱意。權謂朱據曰。本知季文儉。原注。烏快反。謹案。俱作儉。與此合。定見之復過所聞。十三年。文欽詐降。密書與異。欲令自迎。異表呈欽書。因陳其僞。不可便迎。權詔曰。方今北土未一。欽云欲歸命。宜且迎之。若嫌其有譎者。但當設計網以羅之。盛重兵以防之。爾乃遣呂據督二萬人與異并力至北界。欽果不降。建興元年。遷鎮南將軍。是歲。魏遣胡遵諸葛誕出東興。異督水軍攻浮橋。壞之。大破魏軍。異又隨諸葛恪圍新城。城旣不拔。異等皆言宜速還。恪以書曉異。異投書於地曰。不用我計。而用後子言。謹案。陳志。諡注作侯子言。恪大怒。立奪其兵。遂廢還建業。太平二年。假節爲大都督。救壽春圍不解。還軍。孫綝要異相見。將往。陸抗止之。異曰。子通家人爾。當何所疑乎。遂往。綝使力士於坐上取之。異曰。我吳國忠臣。有何罪乎。乃拉殺之。

張悌字巨先。襄陽人也。少有名理。以風節自負。孫休時爲屯騎校尉。魏大舉寇漢。吳人問悌曰。司馬氏得政以來。大難屢作。智力雖豐。而百姓未服。今又竭其資力。遠征巴蜀。兵勞民疲。而不知恤。敗於不暇。何以

能濟。昔夫差伐齊，非不克勝，所以危亡，不憂其本也。況彼之事乎。謹案。事字志注。作爭地。悌曰不然。曹操雖功蓋中

夏，威震四海，崇詐仗術，征伐無已，民畏其威，而不懷其德，不叡承之，繫以慘虐，內興宮室，外懼雄豪，東西

驅馳，無歲獲安，彼之失民，爲日久矣。司馬懿父子自握政柄，累有大功，除其煩苛，而布其平惠，爲之謀主

而救其疾，民心歸之，亦已久矣。故淮南三叛而腹心不擾，曹髦之死，四方不動，摧堅敵如折枯，蕩異同如

反掌，任賢使能，各盡其心，非智勇兼人，能若是乎。其威武張矣，本根固矣，羣情服矣，姦計定矣。今漢闔宦

專朝，國無政令，而玩戎黷武，民勞卒敝，競於外利，不修守備，彼彊弱不同，智算亦勝，因危而伐，殆其克乎。

若其不克，不過無功，終無退北之憂，覆軍之慮也。何爲不可哉。昔楚劍利而秦昭懼，孟明用而晉人憂。原

史記秦昭王曰。吾聞楚之鐵劍利而倡優拙。夫鐵劍利則士勇。倡優拙則思慮遠。夫以遠思慮而御勇士。吾恐楚之圖秦也。左氏傳。秦伯猶用孟明。孟明增修國政。重施于民。趙成子言於諸大夫曰。秦師又至。將必辟之。懼而增德。不

可當也。彼之得志，固我之大患也。吳人笑其言，而魏果并漢，孫皓末年，以悌爲丞相，晉人大舉來伐，所嚮克

捷，悌使悌督沈瑩諸葛靚帥衆三萬渡江逆戰，至牛渚，沈瑩曰：晉治水軍於蜀久矣，今傾國大舉，萬里齊

力，必悉益州之衆，浮江而下，我上流諸軍，無有戒備，名將皆死，幼少當任，恐邊江諸城莫能禦也。晉之水

軍，必至於此，宜畜衆力，待來與之一戰，若幸一勝，江西自清，上方雖壞，可還取之。今渡江逆戰，勝不可必，

若或摧喪，則大事去矣。悌曰：吳之將亡，賢愚所知，非今日也。吾恐蜀兵至此，衆心駭懼，不可復整。今渡江

決戰，若其喪敗，則同死社稷，無所復恨。若其克捷，則北敵奔走，兵勢萬倍，便當乘威南上，逆之中道，不憂

不破也。若如子計，恐士衆散盡，相與坐待敵到。君臣俱降，無復一人死難者，不亦辱乎？遂率衆濟江，逆戰。圍王渾部將張喬于楊荷，喬閉柵請降。諸葛靚欲屠之，悌曰：「彊敵在前，不宜先事其小。且殺降不祥。」靚曰：「此屬以救兵未至，力少不敵，故僞降以緩我爾。若全之，必爲後患。」悌不從，撫之而進。與揚州刺史周浚結陳相對，瑩率丹陽銳卒刀楯五十三衝晉兵，不動。瑩引退，其衆亂。晉將薛勝、蔣班因其亂而乘之，師遂潰。張喬自後擊之，大敗吳師于板橋。諸葛靚與五六百人退走，使過迎悌，悌不肯去。靚自往牽之，曰：「天下存亡，謹案：天下上志注有且夫二字。疑衍。自有大數，豈卿一人所支？」謹案：支陳志作知。通鑑作支。與此合。奈何故自取死？悌垂泣曰：「仲思，今日是我死日也。且我作兒童時，便爲卿家丞相所拔，常恐不得其死，負名賢知。願今以身殉國，復何道邪？」靚再三牽之，不動，乃流涕去。行百餘步，願之已爲晉軍所殺。孫震、沈瑩等皆死。吳人大震。謹案：孫皓傳。注引襄陽記載此事，無孫震二字。

議曰：留贊驚猛壯烈，萬人敵也。其刺刃信足，與雲長之刮骨何以異哉？心有主而不動，視疾痛死生若無與於己者，壯士之勇也。況復得其死哉？平與彘奉謂社稷爲重，有大臣之節矣。呂據、朱異傑出將門，仗鉞征鎮，益固堂構，克隆國棟，不幸而爲賊臣枉害。若據之討賊不克，不爲叛臣，慨然自裁，志烈盛矣。昔紂虐其臣，莫不離心，至於倒戈流血漂杵，而導武王誅紂。孫皓之虐浮于紂，而張悌諸人不以爲仇，益嚴君臣之義，揮刃赴敵，畀之一死，嗚呼仁哉！觀悌之勉諸將謂同死社稷，無所復恨，至于誚諸葛靚，靚再三牽之。

不動貞心義節雖與日月爭光金石爭堅可也

贊曰名義國閑命輕道重白刃何有丹心弗動壯哉諸臣談笑就死大節儼天烈聞不已

... 諸臣... 談笑就死... 大節儼天... 烈聞不已... 贊曰名義國閑命輕道重白刃何有丹心弗動壯哉諸臣談笑就死大節儼天烈聞不已

續後漢書卷第七十一上

列傳第六十八上

死虐

魏

邊讓

周不疑

楊修

丁儀

弟

崔剡

許攸

毛玠

楊俊

鮑助

父信

鄭小同

謹案邊讓周不疑傳闕

楊修字德祖太尉彪之子也博學有俊才機辯穎悟建安中舉孝廉除郎中曹操為丞相署倉曹屬主簿

時軍國多務修總知內外酬置如流無不稱當自太子丕以下並結交好臨蓄侯植以才捷愛幸委意

選志注作來意文引典略作乘意投修與修書曰數日不見思子為勞想同之也僕少小好為文章迄今二十有五年矣

然今世作者可略而言也昔仲宣獨步於漢南孔璋鷹揚于河朔偉長擅名于青土公幹振藻于海隅德

璋發迹于北魏足下高視于上京當此之時人人自謂握靈蛇之珠家家自謂抱荆山之玉吾王於是設

天網以該之頓八紘以掩之今悉集茲國矣然此數子猶復不能飛騫謹案志注作飛翰絕跡一舉千里也以孔

璋之才不閑於辭賦而多自謂能與司馬長卿同風譬畫虎不成反類狗者也前有書嘲之反作論盛道

僕贊其文。夫鍾期不失聽。于今稱之。吾亦不能妄歎者。畏後世之嗤余也。世人作述。不能無病。僕嘗好人譏彈其文。有不善。應時改定。昔丁敬禮嘗作小文。使僕潤飾之。僕自以才不過若人。辭不爲也。敬禮謂僕卿何所疑難。文之佳惡。吾自得之。後世誰相知定。吾文者邪。吾嘗歎此達言。以爲美談。昔尼父之文辭。與人通流。至于制春秋。游夏之徒。乃不能措一辭。過此而言不病者。吾未之見也。蓋有南威之容。乃可以論於淑媛。有龍淵之利。乃可以議於斷割。劉季緒才不能逮于作者。而好詆訶文章。倚捩利病。昔田巴毀五帝罪三王。皆五霸于稷下。一旦而服千人。魯連一說。使終身杜口。劉生之辯。未若田氏。今之仲連。求之不能。可無歎息乎。人各有好尚。蘭茝蓀蕙之芳。衆人所好。而海畔有逐臭之夫。咸池六莖之發。衆人所共樂。而墨翟有非之之論。豈可同哉。今往僕少小所著辭賦一通。相與夫街談巷說。必有可采。擊轅之歌。有應風雅。匹夫之思。未易輕棄也。辭賦小道。固未足以揄揚大義。彰示來世也。昔揚子雲先朝執戟之臣耳。猶稱壯夫不爲也。吾雖薄德。位爲藩侯。猶庶幾戮力上國。流惠下民。建永世之業。流金石之功。豈徒以翰墨爲勳績。辭賦爲君子哉。若吾志未果。吾道不行。則將采庶官之實錄。辯時俗之得失。定仁義之衷。成一家之言。雖未能藏之于名山。將以傳之于同好。非要之皓首。豈今日之論乎。其言之不慙。恃惠子之知我也。明早相迎。書不盡懷。修答牋曰。不待數日。若彌年載。豈獨愛顧之隆。使係仰之情深邪。損辱來命。蔚矣其文。誦讀反覆。雖諷雅頌。不復過也。若仲宣之擅江表。陳氏之跨冀域。徐劉之顯青豫。應生之發魏國。斯皆

然矣。至如修者聽采風聲，仰德不暇自。謹案。自與文選合。陳志注作目。周章于省覽，何惶駭於高視哉。伏惟君侯少長

貴盛，體發旦之質，有聖善之教，遠近觀者，徒謂能宣昭懿德，光贊大業而已。不謂復能兼覽傳記，留思文章。今乃含王超陳，度越數子，觀者駭視而拭目，聽者傾首而聳耳。非夫體通性達，受之自然，其誰能至於

此乎。又嘗親見執事握牘持筆，有所造作，若成誦在心，借書于手，曾不斯須，少留思慮。仲尼日月，無得踰焉。修之仰望，殆如此矣。是以對鵠而辭，作暑賦彌日而不獻，見西施之容，歸憎其貌者也。伏想執事不知

其然，猥受顧賜，教使刊定，春秋之成，莫能損益。呂氏淮南，字直千金，然而弟子鉗口，市人拱手者，聖賢卓犖，固所以殊絕凡庸也。原注。史記。呂不韋使其客人著所聞。集論以爲八覽。六論。十二紀。二十餘萬言。以爲備

字者。予千金。桓子新論。淮南王聘天下辯士以著篇章。書成。皆布之都市。今之賦頌古詩之流，不更孔公風

。縣置千金。以延示衆士。而莫能有變易者。乃其事約監。體具而言微也。雅無別爾。修家子雲，老不曉事，強著一書，悔其少作。若此仲山周旦之徒，則皆有愆乎。君侯忘聖賢之顯

迹，述鄙宗之過言，竊以爲未之思也。若乃不忘經國之大美，流千載之英聲，銘功景鐘，書名竹帛，此自雅量素所蓄也。豈與文章相妨害哉。輒受所惠，竊備臆腹，誦歌而已。敢忘惠施以忝莊氏，季緒瑣瑣，何足以云。操平漢中，欲遂攻昭烈而不得進，欲守之又難，護軍不知進止，操出教，惟曰雞肋而已。外曹莫能曉，修獨曰：夫雞肋，食之則無所得，棄之則如可惜。公歸計決矣。乃令外白稍嚴，操於是回師。初，邯鄲淳孝女曹娥碑，蔡雖題八字曰：黃絹幼婦，外孫齋白。謂修曰：勿言待吾思之。行三十里，令修言其義。修曰：黃絹色

絲絕字。幼婦少女。妙字。外孫女子。好字。齋曰受辛。辭字。操曰。一如吾意。有智無智。校三十里。操素忌修。於是積前後事。深銜修。及操欲立世子。修與丁儀。丁廙。稱臨菑侯植之才。勸操立之。崔劼。賈詡等諫。乃止。五官將不患之。以車載廢籬。內朝歌長吳質與之謀。修以白操。操未及推驗。不懼。告質。質曰。無害也。明日復以籠載絹。以入。修復白之。推驗無人。操由是疑焉。其後植以驕縱見疏。而植故連綴修不止。修亦不敢自絕。每當就植慮事。有關忤度。操意。豫作答教十餘。敕門下教出。隨所問答之。於是教裁出。答已入。如是者三。操怪其捷。廉之知狀。操又以修衰術之甥。惡之。乃以修前後漏泄言教。交關諸侯。殺之。修臨死。謂人曰。我固知死之晚。其意以爲坐植也。修死百餘日。而操卒。丕立。黜植而殺其黨。丁儀。丁廙。使操不殺修。丕亦殺之矣。修所著賦。頌。碑。贊。詩。哀辭。表記。書。凡十五篇。修子囂。囂子準。皆知名。晉世。原注。劉放曰。案揚氏有兩族。赤泉氏從水。子雲自敘其受氏從才。而楊修書稱曰。修家子雲。又似震族亦是揚氏。不知文士聊如此云。其亦實然耶。今書中華陰之族從水從才相半。未知所從。學者辨之。

丁儀字正禮。沛國人也。父冲。宿與曹操親善。從車駕東還。與曹操書曰。足下常有匡佐之志。今其時矣。時張楊適還河內。操得書。乃引軍迎天子。東詣許。以冲爲司隸校尉。與諸將飲酒醉。爛腸死。操常德冲。聞其子儀爲令士。欲以愛女妻之。以問五官將。丕曰。女子觀貌。而正禮目不正。女必不悅。不如與伏波子楙。操從之。尋辟儀爲掾。與論議。嘉其才。曰。丁掾好士也。即使其兩目盲。尙當與女。何況但眇邪。吾兒誤我。時儀亦恨不得尙公主。而與臨菑侯植親善。數稱其才。操旣欲立植。而儀又贊之。逼大臣正議。遂已。及丕立。

欲治儀罪。轉爲右刺姦掾。欲儀自裁。而儀不能。乃對中領軍夏侯尚叩頭求哀。尚爲流涕而不能救。後因事收付獄殺之。弟麋字敬禮。有才學。初辟公府。建安中爲黃門侍郎。麋嘗從容謂操曰。臨菑侯天性仁孝。發於自然。而聰明特達。博學淵識。文章絕倫。天下賢士君子皆願從遊而爲之死。實天所以鍾福于大魏。而永授無窮之祚也。以勸動操。操曰。植吾愛之。安能若卿言。吾欲立之爲嗣。何如。麋曰。此國家之所以興衰。天下之所以存亡。非愚劣所敢與及。麋聞知臣莫若君。知子莫若父。至於君不論明闇。父不問賢愚。而能常知其臣子者何。蓋相知非一事一物。相親非一旦一夕也。況明公加之聖哲。發命吐言。可謂上應天命。下合人心。得之於須臾。垂之于萬世者也。麋不避斧鉞之誅。敢不盡言。操深納之。及丕立。并其男女皆殺之。

謹案目錄。此下有崔劌傳。今闕。止存許攸婁圭二篇。

許攸字子遠。少與袁紹及曹操善。初平中。隨紹在冀州。嘗爲謀議。官渡之役。諫紹勿與操相攻。紹自以彊盛。必欲極其兵勢。又屢獻計策。不用。俄而其家犯法。欲收攸。攸乃亡詣操。進計攻紹。紹破走。及得冀州。攸有功焉。攸自恃勳舊。時與操相戲。每在席不自限齊。至呼操小字曰某甲。卿非我不得冀州也。操笑曰。汝言是也。然內嫌之。其後出行。從鄴東門。顧謂左右曰。此家非得我。則不得出入此門也。有人白者。遂收殺之。婁圭字子伯。少與曹操有舊。圭有大志。常歎曰。男兒居世。會當得數萬兵千匹騎。著後爾。儕輩笑之。後

坐賊亡命被繫當死。隲獄出捕者追之。圭乃變服如助捕者。吏不能覺。得免。會義兵起。圭亦會衆於荊州北界。與劉表相依。後歸操。操以爲大將軍。不典兵。與議軍國大計。劉表卒。操向荊州。表子琮降。以節迎操。諸將皆疑詐。操以問圭。圭曰：天下擾攘。各貪王命。以自重。今以節來。是必至誠。操以爲然。遂進兵入荊州。甚被寵秩。家累千金。操曰：妻子伯富樂于孤。但勢不如爾。從破馬超等。圭功爲多。操歎曰：子伯之計。孤不及也。後操從諸子出遊。圭與南郡習授同載。授曰：父子如此。何其快耶。圭曰：居世間當自爲之。而觀他人乎。授乃白之。遂見誅。

毛玠字孝先。陳留平丘人也。少爲縣吏。以清公稱。將避亂荊州。未至。聞劉表政令不明。遂往魯陽。謹案。陳志作住魯

陽。通志作往。與此合。曹操臨兗州。辟爲治中從事。玠語操曰：今天下分崩。國主遷移。生民廢業。饑饉流亡。公家無

經歲之儲。百姓無安固之志。難以持久。袁紹劉表。雖士民衆彊。皆無經遠之慮。未有樹基建本者也。夫兵義者勝。守位以財。宜奉天子以令不臣。修耕植以蓄軍資。如此則霸王之業可成也。操敬納其言。轉幕府功曹。操爲司空丞相。玠嘗爲東曹掾。與崔劼並典選舉。其所舉用皆清正之士。雖于時有盛名而行不由本者。終莫得進。務以儉率人。由是天下之士莫不以廉節自勵。雖貴寵之臣。與服不敢過度。操歎曰：用人如此。使天下人自治。吾復何爲哉。曹丕爲五官將。自詣玠屬所親。玠答曰：老臣以能守職。幸得免戾。今所說人非遷次。不敢奉命。大軍還鄴。議所并省。玠請謁不行。時人憚之。咸欲省東曹。乃共白曰：舊西曹爲上。

東曹爲次。宜省東曹。操知其情。令曰。日出于東。月盛于東。凡人言方。亦復先東。何以省東曹。遂省西曹。初操平柳城。班所獲器物。特以素屏風。素憑几。賜玠曰。君有古人之風。故賜君古人之服。玠居顯位。常布衣蔬食。撫育孤兄子甚篤。賞賜振施貧族。家無所餘。遷右軍師。魏國初建。爲尙書僕射。復典選舉。玠雅亮。公正。在官清恪。拔眞實。斥華僞。進遜行。抑阿黨。諸宰守治民功績不著。而私貯豐足者。皆免黜停廢。久不選用。于時四海翕然。莫不勵行。至乃長吏還者。垢面羸衣。常乘柴車。軍吏入府。朝服徒行人。擬壺飧之潔。象濯纓之操。貴者無穢欲之累。賤者絕姦貨之求。吏潔於上。俗移乎下。時太子未定。而臨蓄侯植有寵。玠密諫曰。近者袁紹以嫡庶不分。覆宗滅國。廢立大事。非所宜聞。後羣僚會。玠起更衣。操目指曰。此古所謂國之司直。我之周昌也。原注。漢書周昌爲人疆力敢直言。高帝欲廢太子而立戚姬子如意爲太子。昌廷爭之疆。上問其說。昌爲人口吃。又盛怒。曰。臣不能言。心知其不可。陛下欲廢太子。臣期期不奉詔。崔烈旣死。玠內不悅。後有白玠者。出見黥面反者。其妻子沒爲官奴婢。玠言曰。使天不雨者此也。操大怒。收玠付獄。大理鍾繇詰玠曰。自古聖帝明王。罪及妻子。書云。左不共左。右不共右。子則孥戮女。司寇之職。男子入於罪隸。女子入于春臺。漢律罪人妻子。沒爲奴婢。黥面漢法所行。黥墨之刑。存于古典。今眞奴婢。祖先有罪。雖歷百世。猶有鯨面供官。一以寬良民之命。二以宥并罪之辜。此何以負於神明之意。而當致早。按典謀急恆寒。若舒恆煖。若寬則亢陽。所以爲旱。玠之吐言。以爲寬邪。以爲急也。急當陰霖。何以反旱。成湯聖世。野無生草。周宣令主。旱魃爲虐。亢旱以來。積三十年。歸咎黥面爲相。值不衛人伐邢。師興而雨。

原注。左氏傳。衛人伐邢以報菟圃之役。于是衛大旱。卜有事于山川。不吉。甯莊子曰。昔周饑。克股而年豐。今邢方無道。諸侯無伯。天其或者欲使衛討邢乎。從之。師與而雨。罪惡無徵。何以應天。玠譏

諛之言。流於下民。不悅之聲。上聞聖聽。玠之吐言。勢不獨語。時見黥面。凡為幾人。黥面奴婢。所識知邪。何

緣得見對之歎言。時以語誰。見答云。何以何日月。於何處所。事已發露。不得隱欺。其以狀對。玠曰。臣聞蕭

生飲藥。困於石顯。原注。漢書。宏恭。石顯。久典樞機。蕭望之以為中書政本。宜以賢明之選。自武帝遊宴後庭。故

置廷尉。望之子散騎中郎乃上書訟之。恭顯知望之素高節不詘辱。建白望之不悔過服罪。致子。於是奏望之朋黨。詔

上書歸非于上。發執金吾車騎圍其第。望之飲鴆自殺。陳志。作蕭生縊死。誤。故更飲藥。賈子放外。讒在絳灌。

白起賜劍於杜郵。晁錯致誅於東市。伍員絕命於吳都。斯數子者。或妒其前。或害其後。臣垂齟執簡。累勸

取官。職在機近。人事所竄。屬臣以私。無勢不絕。語臣以冤。無細不理。人情淫利。為法所禁。法禁於利。勢能

害之。青蠅橫生。為臣作謗。謗臣之人。勢不在他。昔王叔陳生。爭政王廷。宣子平理。命舉其契。原注。左氏傳

伯與爭政。王右伯與。王叔陳生怒而出奔。及河。王復之。殺史狹以說焉。不入。遂處之。晉侯使士句平王室。王叔與

伯與訟焉。王叔之宰與伯與之大夫瑕禽坐獄于王庭。士句聽之曰。天子所右。寡君亦右之。所左亦左之。使王叔氏與伯

與合要。王叔不能舉其契。王叔奔晉。是非有宜。曲直有所。春秋嘉焉。是以書之。臣不言此。無有時人說臣此言。必有徵要。乞

蒙宣子之辨。而求王叔之對。若臣以曲聞。即刑之日。方之安駟之贈。賜劍之來。比之重賞之惠。謹以狀對。

時桓階和洽進言救玠。玠遂免黜。卒于家。原注。孫盛曰。魏武于是失政刑矣。易稱明折庶獄。傳有舉直錯枉。庶

訴。可以允釐四海。惟清緝罪者也。昔者漢高獄蕭何。出。操賜棺器錢帛。拜子機郎中。復相之。玠之一責。永見擯放。二主量度。豈不殊哉。

謹案目錄。此下有楊俊傳。今闕。

鮑助字叔業。泰山平陽人。漢司隸校尉鮑宣九世孫也。宣後有從上黨徙泰山者。遂家焉。助祖丹。官至少府侍中。父信。寬厚愛人。沈毅有志節。靈帝時爲騎都尉。大將軍何進遣東募兵。得千餘人。還到成臯。而進已遇害。信至京師。董卓亦始到。信知卓必爲亂。勸袁紹襲卓。紹畏卓不敢發。信乃引軍還鄉里。收兵二萬。騎七百。輜重五千餘乘。是歲曹操亦起兵於己吾。信與弟韜以兵應操。操與袁紹表信行破虜將軍。韜裨將軍。時紹衆最盛。豪傑多向之。信獨謂操曰。夫略不世出。能總英雄以撥亂反正者。君也。苟非其人。雖強必斃。君殆天之所啓。遂深自結納。操亦親異焉。汴水之敗。信被創。韜在陣戰亡。紹劫奪韓馥位。遂據冀州。信言于操曰。姦臣乘釁。蕩覆王室。英雄奮節。天下響應者。義也。今紹爲盟主。因權專利。將自生亂。是復有一卓也。若抑之則力不能制。祇以構難。又何能濟。且可規大河之南。以待其變。操善之。操爲東郡太守。表信爲濟北相。會黃巾大衆入州界。兗州刺史劉岱欲與戰。信諫曰。今賊衆百萬。百姓皆震恐。士卒無鬪志。不可敵也。然賊軍無輜重。惟以鈔略爲資。今不若畜士衆之力。先爲固守。彼欲戰不得。攻又不能。其勢必離散。然後選精銳。據要害。擊之可破也。岱不從。遂與戰。果爲所殺。操以賊恃勝而驕。欲設奇兵挑擊之。于壽張。先與信出行戰地。而卒與賊遇。信殊死戰。以救操。操得潰圍出。信遂戰沒。時年四十一。信雖遭亂起。兵家本儒素。治身至儉。而厚養將士。居無餘財。士以此歸之。操購求其喪。不得。乃刻木如信狀。祭而哭焉。二子劭。助。助清白有高節。劭有父風。建安十七年。操追錄信功。表封助兄劭新都亭侯也。

原注。魏書助有父風。太祖嘉之。

加拜騎都尉。使持節。勅薨。子融嗣。辟助丞相掾。原注。魏書。助清白。有名于世。二十二年立子丕爲太子。以助爲中庶子。徙黃門侍郎。

出爲魏郡西部都尉。丕郭夫人弟爲曲周縣吏。斷盜官布法。應棄市。操時在譙。丕留鄴。數手書爲之請罪。

助不敢擅縱。具列上。助前在東宮。守正不撓。丕固不悅。及此。悲望滋甚。會郡界休兵。有失期者。密敕中尉。

奏免助官。久之。拜侍御史。延康元年。操卒。丕立。助以駢馬都尉兼侍中。丕篡代。助每陳今之所急。惟在軍。

農。寬惠百姓。臺榭苑囿。宜以爲後。丕將出獵。助停車上疏曰。臣聞五帝三王。靡不明本立教。以孝治天下。

陛下仁聖惻隱。有同古烈。臣冀當繼蹤前代。令萬世可則也。如何在諒闇之中。修馳騁之事乎。臣冒死以。

聞。惟陛下察焉。丕手毀其表。而競行獵。中道頓息。問侍臣曰。獵之爲樂。何如八音也。侍中劉曄對曰。獵勝。

于樂。助抗辭曰。夫樂上通神明。下和人心。隆治致化。萬邦咸乂。故移風易俗。莫善于樂。況獵暴華。蓋于原。

野。傷生育之至理。櫛風沐雨。不以時隙哉。昔魯隱觀魚于棠。春秋譏之。雖陛下以爲務。愚臣所不願。因奏。

劉曄佞諛不忠。阿順陛下過戲之言。昔梁丘據取媚于遯臺。曄之謂也。原注。左氏傳。齊侯至自田。晏子侍于

和夫。晏子對曰。據亦同也。焉得爲和。公曰。和與同異乎。對曰。異。和如羹焉。水火醯醢鹽梅以烹魚肉。曄之以辭。

成其可。君所謂否。而有可焉。臣獻其可。以去其否。是以政平而不干。民無爭心。今據不然。君所謂可。而有否焉。臣獻其否。以

據亦曰可。君所謂否。據亦曰否。若以水濟水。孰能食之。若琴瑟之專一。誰能聽之。同之不可也。如是。請有司。

議罪。以清皇朝。丕怒。作色罷還。卽出助爲右中郎將。黃初四年。尙書令陳羣。僕射司馬懿。並舉助爲宮正。

宮正卽御史中丞也。帝不得已而用之。百僚嚴憚。罔不肅然。六年秋。丕欲伐吳。羣臣大議。助面諫曰。王師。

屢征而末有所克者。蓋以吳蜀唇齒相依。憑阻山水。有難收之勢故也。往年龍舟飄蕩。隔在南岸。聖躬蹈危。臣下破膽。此時宗廟幾至傾覆。爲百世之戒。今又勞兵襲遠。日費千金。中國虛耗。令黠虜玩威。臣切以爲不可。不益忿之。左遷勛爲治書執法。丕從壽春還屯陳留郡界。太守孫邕見出過勛。時營壘未成。但立標埒。邕邪行不從正道。軍營令史劉曜欲推之。勛以塹壘未成。解止不舉。軍還雒陽。曜有罪。勛奏緹遣。而曜密表勛私解邕事。詔曰。勛指鹿作馬。收付廷尉。廷尉法議正刑五歲。三官駁依律罰金二斤。丕大怒曰。勛無活分。而汝等敢縱之。收三官已下。付刺姦。當令十鼠同穴。太尉鍾繇。司徒華歆。鎮軍大將軍陳羣。侍中辛毗。尙書衛臻。守廷尉高柔等。並表勛父信有功於太祖。求請勛罪。丕不許。遂誅勛。勛內行旣修。廉而能施。死之日。家無餘財。後二句。丕亦卒。莫不爲勛歎恨。

謹案。此卷鮑勛以上諸人議俱闕。

鄭小同。漢大司農元之孫也。父益恩。北海太守孔融舉孝廉。黃巾圍融。死之。小同其遺腹子也。丁卯日生。而元以丁卯歲生。有文在其手曰元。謹案。後漢書鄭元傳云。元以其手文似己。故名曰小同。取春秋子同生之義也。原注。左氏子同生。公曰。是其生也。與吾同物。命之曰同。及長。盡傳元學。爲鉅儒。教授鄉里。曹丕徵爲郎中。稱疾不起。曹叅立。太尉華歆表曰。臣聞勵俗宣化。莫先於表善。班祿序爵。莫美于顯能。是以楚人思子文之治。復命其允。漢室嘉江公之德。用顯其世。原注。左氏傳。楚滅若敖氏。其孫箴尹克黃使于齊。還。及宋聞亂。其人曰。不可以入矣。箴尹曰。葉君之命。獨誰受之。君天也。天可逃乎。遂歸復命。而自拘於司敗。王思子文之治楚國也。曰。子文無

後。何以勸善。使復其所。改命曰生。漢書。蝦丘江公受穀梁春秋及詩於管申公。傳子至孫爲博士。宣帝卽位。開衛太子好穀梁春秋。徵江公孫爲博士。伏見故漢大司農北海鄭元。當時之學。名冠華夏。爲世儒宗。文皇帝旌錄先賢。拜元適孫小同。以爲郎中。長假在家。小同年踰三十。少有令質。學綜六經。行著鄉邑。海岱之人。莫不嘉其自然。美其器量。迹其所履。有質直不渝之性。然而恪恭靜默。色養其親。不治可見之美。不競人間之名。斯誠清時所宜式。敍前後明詔所斟酌而求也。臣老病委頓。無益視聽。謹具以聞。於是徵爲侍中。賜爵關內侯。甘露中。曹髦行養老禮。詔以王祥爲三老。小同爲五更。後以事詣司馬昭。昭有密疏。未之屏也。如廁還。謂小同曰。卿見吾疏乎。對曰。勿見也。昭曰。寧我負卿。無卿負我。遂鳩殺之。

議曰。小同以碩儒重德。若介然知止。則果同夫祖矣。方盜憎主人。乃珥貂佩劍。備顧問。管喉舌。位通侯。歸然爲國老。觸忤險機。不得其死。視康成之雍容進退。不污衰董。卒全其高。而考其終。則大不同矣。初曹操殺呂伯奢家八人。曰。寧我負人。無人負我。及昭之害小同。乃曰。寧我負卿。無卿負我。陰賊狼忍。知有一我。不復有天地人物。賊臣篡子。用心皆出一律。其亦不仁甚矣。唐陸贄乃曰。無我負人。寧人負我。克己自反。休休有容。易曹馬爲顏閔。特一念反覆之間焉。夫子之道。忠恕而已。大哉曾子之言。

續後漢書卷第七十一下

列傳第六十八下

死虐

吳

高岱

于吉

盛憲

沈友

張休

吾粲

朱據

王蕃

樓元

賀邵子循

章曜

華覈

邵疇

張尙

高岱字孔文。吳郡人也。性聰達。輕財貴義。甄英拔奇。取於未顯。所友八人者。皆一世之傑。太守盛憲以爲上計。舉孝廉。許貢來領郡。欲害憲。岱將憲避難於許昭家。求救于陶謙。謙未卽救。岱憔悴泣血。水漿不入。口謙感其忠壯。許爲出軍。以書與貢。岱得謙書還。而貢已囚其母。吳人皆危懼。謂往必見害。岱曰。在君則爲君。且母在牢獄。義當必往。若得見事。自當解。遂詣貢通書。貢卽與相見。岱才辭敏捷。屈爲陳謝。貢遽出其母。岱語友人張允。沈疇。原注音曼。令豫具船。謂貢必悔。當復來追。出使將母乘船易道而逃。貢果遣人追之。令追者若及於船。便殺之。已過江則止。其人與岱錯道。遂免。乃隱于餘姚。孫策定會稽。使會稽丞陸昭逆之。策虛已候焉。聞其善左氏春秋。欲從講讀。或謂策曰。高岱以將軍但英武而已。素無文學。若與論傳

而云不知者。則某言符矣。又謂岱曰。孫將軍爲人惡勝己者。若問當言不知。乃合意爾。如遂辯議。則必危殆。岱以爲然。及與論傳。輒云不知。策果怒。以爲輕己。乃囚之。其親友及州人皆露坐爲請。策登樓望見數里中填滿。惡其得衆。遂殺之。時年三十餘。

謹案目錄此下有于吉傳今闕。

盛憲字孝章。會稽人也。品量雅偉。舉孝廉。補尚書郎。稍遷吳郡太守。許貢代之。因還會稽。孫策平定吳會。誅其英豪。憲素有高名。策深忌之。未及害憲而卒。孫權統業。尤惡憲。初憲與少府孔融善。融憂其不免。乃與曹操書曰。歲月不居。時節如流。五十之年。忽焉已至。公爲始滿。融又過二。海內知識。零落殆盡。惟有會稽盛孝章尙存。其人困於孫氏。妻孥湮沒。單子獨立。孤危愁苦。若使憂能傷人。此子不得永年矣。春秋傳曰。諸侯有相滅亡者。桓公不能救。則桓公恥之。原注。公羊傳。邢亡孰亡之。蓋狄滅也。曷爲不言。蓋狄滅之爲桓公諱也。曷爲爲桓公諱。上無天子。下無方伯。諸侯有相滅亡者。桓公不能救。則桓公恥之。今孝章實丈夫之雄也。天下談士。依以揚聲。而身不免於幽墊。命不期於旦夕。吾祖不當

復論損益之友。而朱穆所以絕交也。公誠能馳一介之使。加咫尺之書。則孝章可致。友道可宏矣。今之少年。善謗前輩。或能譏評孝章。孝章要爲有天下大名。九牧之人。所共稱歎。燕君市駿馬之骨。非欲以騁道里。乃當以招絕足也。原注。戰國策。郭隗謂燕昭王曰。臣聞古之人君。有市千里馬者。三年而不得。于是遣使者齎千金之貨。將市于他國。未至而千里之馬已死。使者以五百金買死馬之骨以歸其君。大怒曰。

所求者本不市死馬。何故捐金市死馬乎。將誅之。使者對曰。死馬尙市之。況生者乎。天下必知吾君之好也。馬將至矣。于是期年而千里馬至者三焉。惟公匡復漢室。宗社將絕。又能正之。

正之之術實須得賢珠玉無脛而自至者以人好之也況賢者之有足乎

原注韓詩外傳蓋晉謂晉平公曰珠出於海玉出於山無足而至

者好之也土有足而不至者君不好也

昭王築臺以尊郭隗隗雖小才而逢大遇竟能發明主之至心故樂毅自魏往劇辛自

趙往鄒衍自齊往向使郭隗倒懸而王不解臨難而王不拯則士亦將高翔遠引莫有北首燕路者矣凡

所稱引自公所知而復有云者欲公崇篤斯義因表不悉由是徵為騎都尉制命未至果為權所害子匡

奔魏位至征東司馬

沈友字子正吳郡人也年十一華歆行覽風俗見而異之因呼曰沈郎可登車語乎友遂巡卻曰君子講

好會宴以禮今仁義陵遲聖道崩壞先生銜命將以宏闡教化整齊風俗而輕脫威儀猶負薪救火無乃

更崇其熾乎歆慙曰自桓靈以來雖多英俊未有幼童若此者弱冠博學無不貫綜善屬文仍喜武事注

孫子兵法又辯給所至人皆默然莫與為對咸稱其筆舌刀為三妙原注蘇州志辯于口時稱其權以

禮聘之既至論王霸之略當時之務因陳宜并取荊州權納之正色危言風采峻厲大迂庸臣遂誣以謀

反權亦忌其英邁謂終不為己用原注蘇州志正色立朝為庸臣所譖權亦疑其不為己用害之

一日大會羣僚友有所是非權令人扶

出謂曰人言卿反友知不免乃曰主上在許有無君之心者可謂非反乎遂殺之年二十九

張休字叔嗣輔吳將軍昭次子也弱冠與諸葛恪顧譚等俱為太子登僚友以漢書授登休為人解達指

摘文義分別事物並有條章登甚敬之從中庶子轉為右弼都尉權嘗遊獵迨暮乃歸休上疏諫戒權大

善之以示昭及登卒後爲侍中拜羽林都督平三典軍事遷揚武將軍爲魯王霸友黨所譖與顧譚承俱以考陂論功事休承與典軍陳恂通情詐增其伐並徙交州中書令孫宏佞僞險詖原注吳錄會稽人休素所忿宏因是譖訴下詔賜休死時年四十一

謹案目錄此下有吾粲朱據傳今闕

議曰策翻蜚江表民未見德而惟戮是聞謂吉惑衆則猶有辭岱何爲哉斃于貢客而鏡中見吉鬼誅之也孫權有偏霸之略統馭之術惜乎無君人之度也張昭顧命遺老至使士門終于散地虞翻以觸忤擯陸績以直道黜終身不復客死南徼盛憲沈友一時名流猜阻不釋而竟誅之張休吾粲朱據皆以忠諫蔽于讒慝獲罪隕身睚眦險狠無以異操士生茲時不能高飛遠舉而蹈其禍何不幸歟

王蕃字永元廬江人也博覽多聞兼通術藝始爲尙書郎去官孫休卽位與賀邵薛瑩虞汜俱爲散騎中常侍皆加駙馬都尉時論清之遣使至漢漢人稱焉還爲夏口監軍孫皓立復入爲常侍與萬彧同官彧與皓有舊俗士挾侵謂蕃自輕謹案俗士二句通志作挾主自輕謂蕃輕己語較明晰又中書丞陳聲皓之嬖臣數譖毀蕃蕃體氣高亮不能承顏順指時或注意積以見責甘露二年丁忠使晉還皓大會羣臣蕃沈醉頓伏皓疑而不悅擊蕃出外頃之請還酒亦不解蕃性有威嚴行止自若皓大怒呵左右於殿下斬之衛將軍滕牧征西將軍留平請不能得皓出登來山使親近將擲蕃首作虎跳狼爭咋齧之首皆碎壞原注江表傳皓用巫史之言謂建業宮不利乃西巡武昌

仍有遷都之意。恐羣臣不從。乃大請會賜。將吏問蕃射不主皮。爲方不同科。其義云何。蕃思惟未答。卽于殿上斬蕃。出登來山。使親近將跳蕃首作虎跳狼爭咋齧之頭皆碎壞。欲以示威。使衆不敢犯也。此與本傳不同。吳錄。皓每於會因酒酣。輒令侍臣嘲謔公卿。以爲笑樂。萬或既爲左丞相。蕃朝或曰。魚潛于淵。出水煦沫。何則。物有本性。不可橫處。非分也。或出自溪谷。羊質虎皮。虛受光赫之寵。跨越三九之位。犬馬猶能識養。將何以報厚施乎。或曰。唐虞之朝。無謬舉之才。造父之門。無驚蹇之質。善上誦明選。下訕煥幹。亦何傷於日月。適見其不知量爾。裴松之曰。按本傳云。丁忠使晉還。皓爲大會。于會中殺蕃。檢忠從北還在此年之春。或時尚未爲丞相。至秋乃爲相爾。吳錄所言爲乖。互不同。

丞相陸凱上疏曰。常侍王蕃。黃中通理。知天知物。處朝忠蹇。斯社稷之重鎮。大吳之龍逢也。昔事景皇。納言左右。景皇欽嘉。歎爲異倫。而陛下忿其苦辭。惡其直對。梟之殿堂。尸骸暴棄。邦內傷心。有識悲悼。其痛蕃如此。蕃死時年三十九。皓徙蕃家屬廣州。二弟著。延。皆佳士。郭馬起事。不爲馬用。見害。

謹案目錄此下有樓元賀邵韋曜傳今闕

華覈字永先。吳郡武進人也。始爲上虞尉。典農都尉。以文學入爲祕府郎。遷中書丞。漢爲魏所并。覈詣宮門發表曰。聞聞賊衆蟻聚西境。西境難險。謹案。今志。謂當無虞。定聞陸抗表至。成都。不守。臣主播越。社稷傾覆。昔衛爲狄所滅。而桓公存之。原注。左氏傳。狄人伐衛。懿公及狄人戰于濮澤。衛師敗績。遂滅衛。立戴公以于夷儀。二年封衛于楚丘。邢遷如歸。衛國忘亡。今道理長遠。不可救振。失委附之士。棄貢獻之國。臣以草芥竊懷不寧。陛下聖仁恩澤。遠撫卒聞如此。必垂哀悼。臣不勝沖悵之情。謹拜表以聞。孫皓卽位。封徐陵亭侯。寶鼎二年。皓更營新宮。制度宏廣。飾以金玉。所費甚多。是時盛夏興工。農守並廢。覈上疏諫曰。臣聞漢文之世。九州晏然。秦民喜去慘毒之苛政。歸劉氏之寬仁。省役約法。與之更始。分王子弟。以藩漢室。當此之時。皆以爲泰山之

安無窮之基也。至于賈誼，獨以爲可痛哭及流涕者三，可爲長歎息者六。乃曰：當今之勢，何異抱火於積薪之下，而寢其上，火未及然而謂之安，其後變亂皆如其言。臣雖下愚，不識大倫，竊以曩時之事，揆今之勢，誼云：復數年間，諸王方剛，漢之傅相稱疾罷歸，欲以此爲治，雖堯舜不能安。今大敵據九州之地，有大半之衆，習攻戰之餘術，乘戎馬之舊勢，欲與中國爭相吞之計，其猶楚漢勢不兩立，非徒漢之諸王淮南濟北而已。誼之所欲痛哭，比今爲緩，抱火臥薪之喻，於今而急。大皇帝覽前代之如彼，察今勢之如此，故廣開農桑之業，積不訾之儲，恤民重役，務養戰士，是以大小感恩，各思竭命，期運未至，早棄萬國，自是之後，疆臣專政，上詭天時，下違衆議，忘安存之本，邀一時之利，數興軍旅，傾竭府藏，兵勞民困，無時獲安。今之存者，乃創夷之遺衆，哀苦之餘民爾。遂使軍資空匱，倉廩不實，布帛之賜，寒暑不周，重以失業，家戶不贍，而北積穀養民，專心東向，無復他警。蜀爲西藩，土地險固，加承前主統御之術，謂其守御足以長久，不圖一朝奄至，傾覆層亡，齒寒。古人所懼，交州諸郡，國之南土，交趾九真二郡已沒，日南孤危，存亡難保。合浦以北，民皆搖動，因運避役，多有離叛，而備戍成少，威鎮轉輕，常恐呼吸復有變故。昔海虜窺竄東縣，多得離民，地習海行，狃于往年，鈔盜無日，今胥背有嫌，首尾多難，乃國朝之厄會也。誠宜住建立之役，先備豫之計，勉墾殖之業，爲饑乏之救，惟恐農時將過，東作向晚，有事之日，整嚴未辨，若舍此急，盡力功，卒有風塵不虞之變，當委版築之役，應烽燧之急，驅怨苦之衆，赴白刃之難，此乃大敵所因爲資也。如但固

守曠日持久。則軍糧必乏。不待接刃而戰士已困矣。昔太戊之時。桑穀生庭。懼而修德。怪消般興。災惑守心。宋以爲災。景公下從。瞽史之言。而葵惑退舍。景公延年。夫修德于身。而感異類。言發于口。而通神明。臣以愚蔽。誤忝近署。不能冀宣仁澤。以感靈祇。仰慚俯愧。無所投處。退伏思惟。葵惑桑穀之異。天示二主。至於他餘。錙介之妖。近是門庭。小神所爲。驗之天地。無有他變。而徵祥符瑞。前後屢臻。明珠既覲。白雀繼見。萬億之祚。實靈所挺。以九域爲宅。天下爲家。不與編戶之民。轉徙同也。又今之宮室。先帝所營。卜土立基。非爲不祥。又揚市土地。與宮相接。若大功畢竟。輿駕遷往。門行之神。皆當轉移。猶恐長久。未必勝舊。屢遷不可。留則有嫌。此乃愚臣所以夙夜爲憂灼也。臣省月令。季夏之月。不可以興土功。不可以會諸侯。不可以起兵動衆。舉大事必有殃。今雖諸侯不會。諸侯之軍。與會無異。六月戊巳。土行正王。旣不可犯。加又農月。時不可失。昔魯隱公。夏城中丘。春秋書之。垂爲後戒。今築宮爲長世之洪基。而犯天地之大禁。襲春秋之所書。廢敬授之上務。臣以愚管。竊所未安。又恐所召離民。或有不至。討之則廢役興事。不討則日月滋慢。若悉並到。大衆聚會。希無疾病。且人心安則念善。苦則怨叛。江南精兵。北土所難。欲以十卒當東一人。天下未定。深可憂惜之。如此宮成。死叛五千。則北軍之衆。更增五萬。若到萬人。則倍益十萬。病者有死亡之損。叛者傳不善之語。此乃大敵所以歡喜也。今當角力中原。以定疆弱。正於際會。彼益我損。加以勞困。此乃雄夫智士所以深憂。臣聞先王治國。無三年之儲。曰國非其國。安寧之世。戒備如此。況敵疆大而

忽農忘畜。今雖頗種植。間者大水沈沒。其餘存者。當須耘穫。而長吏怖期。上方諸郡。身涉山林。盡力伐材。廢農棄務。士民妻孥羸小。墾殖又薄。若有水旱。則永無所獲。州郡見米。當待有事。冗食之衆。仰官供濟。若上下空乏。運漕不供。而北敵犯疆。使周召更生。良平復出。不能爲陛下計明矣。臣聞君明者。臣忠。主聖者。臣直。是以懷懷昧犯天威。乞垂哀省。書奏。皓不納。後遷東觀令。領右國史。覈上疏辭讓。皓答曰。得表以東觀儒林之府。當講校文義。處定疑難。漢時皆名學碩儒。乃任其職。乞更選英賢。聞之以卿研精墳典。博覽多聞。可謂悅禮樂。敦詩書者也。當飛翰騁藻。光贊時事。以越揚班張蔡之儔。何乃謙光厚自。菲薄宜勉。修所職。以邁先賢。勿復紛紛。時倉廩無儲。世俗滋侈。覈上疏曰。今寇虜充斥。征伐未已。居無積年之儲。出無應敵之畜。此乃有國者所宜深憂也。夫財穀所生。當出於民。趨時務。農國之上急。而都下諸官。所掌別異。各自下調。不計民力。輒與近期。長吏畏罪。晝夜催民。委舍佃事。追赴會日。定送到都。或蘊積不用。而徒使百姓消力失時。到秋收月。督其限入。奪其播殖之時。而責其今年之稅。如有逋懸。則籍沒財物。故家戶貧困。衣食不足。宜暫息衆役。專心農桑。古人稱一夫不耕。或受其飢。一女不織。或受其寒。是以先王治國。惟農是務。軍興以來。已向百載。農人廢南畝之務。女工停機杼之業。推此揆之。則蔬食而長飢。薄衣而履冰者。固不少矣。臣聞主之所求於民者二。民之所望於主者三。二謂求其爲己勞也。求其爲己死也。三謂飢者能食之。勞者能息之。有功者能賞之。民以致其二事。而主失其三望者。則怨心生而功不建。今帑藏不

實民勞役猥主之二求以備民之三望未報且飢者不待美饌而後飽寒者不俟狐貉而後溫爲味

諫案
志作滋

者口之奇文繡者身之飾也今事多而役繁民貧而俗奢百工作無用之器婦人爲綺靡之飾不

勤麻泉並繡文黼黻轉相倣效恥獨無有兵民之家猶復逐俗內無儻石之儲而出有綾綺之服至于富賈商販之家重以金銀奢恣尤甚天下未平百姓不贍宜一生民之原豐穀帛之業而棄功於浮華之巧妨日於侈靡之事上無尊卑等級之差下有耗財費力之損今吏士之家少無子女多者三四少者一二通令戶有一女十萬家則十萬人續織一歲一束則十萬束矣使四疆之內同心戮力數年之間布帛必積恣民五色惟所服用但禁綺繡無益之飾且美貌者不待華采以崇好豔姿者不待文綺以致愛五采之飾足以麗矣若極粉黛窮盛服未必無醜婦廢華采去文繡未必無美人也若實如論有之無益廢之無損者何愛而不暫禁以充府藏之急乎此救乏之上務富國之本業也使管晏復生無以易此漢之文景承平繼續天下以定四方無虞猶以彫文之妨農事錦繡之害女工開富國之利杜飢寒之本況今六合分乖豺狼充路兵不離疆甲不解帶而可以不廣生財之原充府藏之積哉皓以數年老敕令草表覈不敢又敕作草文停立待之覈爲文曰咨覈小臣草芥凡庸遭眷值聖受恩特隆越從朽壤蟬蛻朝中熙光紫闥青璫是憑愆挹清露沐浴凱風效無絲毫負闕山崇滋潤含垢恩貸累重穢質被榮局命得融欲報罔極委之皇穹聖恩雨注哀棄其尤猥命草對潤被下愚不敢違敕懼速罪誅冒承詔命魂逝形留

覈前後陳便宜及貢薦良能解釋罪過書百餘上皆有補益天冊元年以微譴免數歲卒覈所論事章疏咸傳于世

邵疇字溫伯會稽人也敦尚氣節不爲詭隨太守郭誕辟爲功曹鳳皇三年會稽妖言章安侯奮當爲天子臨海太守奚熙與誕書非論國政誕白熙書不白妖言下郡收誕誕惶恐無以自明疇進曰疇今自在明府何憂遂詣吏自列云不白妖言事由於己非府君罪吏上疇辭皓怒甚疇慮誕卒不免遂自殺以證之臨亡置辭曰疇生長邊陲不閑教道得以門資廁身本郡踰越儕類位極朝右不能贊揚盛化養之以福今妖訛橫興干國亂紀疇以嗜嗜之語本非事實雖家誦人詠不足有累天下重器而匹夫橫議疾其醜聲不忍聞見欲舍垢藏疾不彰之翰筆鎮躁歸靜使之自息愚心勤勤每執斯旨故誕屈其所是默以見從此之爲愆實由于疇謹不敢逃死歸罪有司惟乞天鑒特垂清察吏收疇喪得辭以聞皓乃免誕大刑送付建安作船疇死時年四十皓嘉疇節義詔郡縣圖形廟堂奚熙初以佞幸於皓爲中書郎譖宛陵令賀惠惠邵弟也遣使者徐粲訊治熙又譖粲顧護不卽決斷皓遣使就宛陵斬粲收惠付獄會赦得免張尙紘之孫元之子也有俊才孫皓時爲侍郎以辯捷見知擢爲侍中中書令皓嘗問詩云汎彼柏舟惟柏中舟乎尙對曰詩言檜楫松舟則松亦中舟也又問烏之大者惟鶴小者惟雀乎尙對曰大者有禿鷲小者有鷓鴣皓性忌勝己而尙談論每出其表深以致恨皓使尙鼓琴尙對曰素不能敎使學之後侍宴

之次說琴之精妙。尙因言晉平公使師曠作清角。曠言吾君德薄不足以聽之。原注。韓子。衛靈公將之晉。舍于濮水之上。夜半聞鼓琴聲。召師曠授琴寫之。去之晉。見晉平公。平公置酒于施夷之臺。酒酣。靈公曰。有新聲。請奏之。平公曰。可即令師曠坐師曠旁。授琴鼓之。未終。師曠撫而止之曰。此亡國之聲也。不可聽。平公曰。此道奚出。師曠曰。師延所作也。與紂爲靡靡之樂。武王伐紂。師延東走。自投濮水之中。故聞此聲。必以濮水之上。先聞此聲者國削。平公曰。寡人所好者音也。願遂聞之。師曠鼓而終之。平公曰。音無此最悲乎。師曠曰。有。平公曰。可得聞乎。師曠曰。君德義薄。不可以聽之。平公曰。寡人所好者音也。願聞之。師曠不得已。援琴而鼓之。一奏之有元鶴二八集于郭門。再奏之。延頸而鳴。舒翼而舞。平公大喜。起而爲師曠壽。反坐問曰。音無此最悲乎。師曠曰。有。昔者黃帝以清角大合鬼神。今君德義薄。不足以聽之。聽之將敗。平公曰。寡人老矣。所好者音也。願遂聞之。師曠不得已。援琴而鼓之。一奏之。有白雲從西北起。再奏之。有大風至。而雨隨之。飛廊瓦。左右皆奔走。平公恐懼。伏於廊屋之間。晉國大旱。赤地三年。皓意尙以喻己不悅。後又問孤飲酒可以方誰。尙對曰。陛下有百觚之量。皓云。尙知孔丘之不王。而以孤方之。因發怒收尙。積前後語言。皆追以爲詰。尙書岑昏率公卿已下百餘人詣宮叩頭請尙罪。得減死。送建安作船。尋遣人就誅之。

議曰。薛瑩稱王蕃器量綽異。宏博多通。樓元清白節操。才理條暢。賀邵厲志高潔。機理清要。韋曜篤學好古。博覽羣籍。有記述之才。胡沖以爲元邵蕃一時清妙。略無優劣。必不得已。元宜在先。邵當次之。華嚴文賦之才。有過於曜。而典誥不及也。陳壽曰。予觀覈數獻良規。期於自盡。庶幾忠臣矣。然此數子。處無妄之世。而有名位。彊死其理。得免爲幸爾。

贊曰。叔世暴君。熹殺崇忍。英賢不幸。遭此凶閔。戾氣孔優。魏初吳季。式觀坤維。仁矣漢繫。

續後漢書卷第七十二上

列傳第六十九上

技術

漢

華佗吳普 樊阿

蒯子訓

左慈

甘始

東郭延年 封君達

王真

郝孟節

李意其

周羣

張裕

杜瓊 何宗

古者數以衍道。後世為技為術而不本于道。故大方不完。入於小數。盡為異端之私也。河出圖。宓犧畫之

為易。洛出書。大禹敍之為範。原注。易曰。天一地二。天三地四。天五地六。天七地八。天九地十。天數五。地數

變化而行鬼神也。此河圖之數也。書洪範。天乃錫禹洪範九疇。彝倫攸敍。初一曰五行。次二曰敍用五事。次三曰農

用八政。次四曰協用五紀。次五曰建用皇極。次六曰又用三德。次七曰明用稽疑。次八曰念用庶徵。次九曰嚮用五福。

威用六極。孔安國注曰。天與禹。洛出書。神龜負文而出。列於背。有數至於九。禹遂因而筮之。以成九數常道。所以次敍。先儒謂洛書蓋取龜象。其數戴九履一。列於背。有數至於九。禹遂因而筮之。以

迎日推策。歷象日月星辰。原注。司馬貞索隱。封禪書曰。黃帝得寶鼎神策下云。于是推策迎日。則神策者神者也。黃帝得著以推算歷數。于是迎知節氣日辰之來。故曰推策迎日也。書堯典。乃命羲和。

歷象日月星辰。皆所以述道。不以為技也。周官馮相氏掌歲月日時。原注。周禮春官馮相氏掌十有二歲。十有二

其敍事。以會天位。冬夏致日。春秋致月。以辨四時之敍。保章氏掌天星。以星土辨九州之地所封。封域皆有分星。以觀其妖祥也。眡祲掌十

輝。原注。以觀妖祥。辨吉凶。一曰禘。二曰象。三曰鑄。四曰監。五曰閏。六曰晉。七曰彌。八曰敘。九曰躋。十曰想。太卜掌三兆。其經兆之體。皆百有二十。其頌皆千有二

百龜人掌六龜。原注。天龜曰靈屬。地龜曰釋屬。東龜曰異屬。西龜曰蠶屬。南龜曰蜃屬。北龜曰若屬。各以其方之色與其體辨之。筮人辨九筮。原注。掌三易以辨。九筮之名。一曰連山。二曰歸藏。

三曰周易。九筮之名。一曰巫比。二曰巫式。三曰巫目。四曰巫比。五曰巫易。六曰巫比。七曰巫祠。八曰巫參。九曰巫環。以辨吉凶。占夢占六夢。原注。掌其歲時。觀天地之會。辨陰陽之氣。以日月星辰。占六夢之吉凶。

四曰寤夢。五曰喜夢。六曰懼夢。又如食疾蕩之諸醫。原注。食醫。疾醫。皆天官屬。皆專工職守以事上。雖以為技亦未離乎道也。故不敢迂怪以為欺。神異以為誑。挾弄以為姦。一有不經左道。則不免王法之誅。戰國之際。國程侯度。壤亂墮廢。莫不踰繩破檢。譎張為幻。於是星公歷史。卜相醫巫。擲揄揣摩。筮錯機構。巧法奇中。驚眩一世。及秦始皇盡削先王經制。狡詭險譎之徒。以術自雄。為方士神仙之說。自以為游乎方之外。閻苑神仙。接乎天帝。抽金繩。檢玉策。匱祕記於寶府。識神經於瑤臺。有長生之方。不死之藥。荒唐誕妄。不可紀極。而技盡為術矣。

原注。史記封禪書。宋毋忌。正伯僑。充尚。羨門子高。最後皆燕人為方仙道。形解銷化。依於鬼神之事。驪衍以陰陽主運顯于諸侯。而燕齊海上之方士。傳其術不能通。然則迂怪阿諛苟合之徒。自引而去。蓋嘗有至者。諸仙人及不死之藥。皆在焉。其物禽獸盡白。而黃金銀為宮闕。未至望之如雲。及到三神山。反居水下。臨之風輒引去。終莫能至。云。漢興於是有天文。原注。漢書藝文志。天文者。序二十八宿。步五星日月。以紀吉凶之象。聖

由也。夫觀景以譴形。非明王亦不能服聽也。以不能由之臣。諫不能聽之王。此所以兩有患也。有陰陽。原注。漢書。九流有陰陽家者流。蓋出於羲和之官。及有歷譜。原注。歷譜者。序四時之位。正分至之節。會日月五星之辰。以考寒暑殺生之實。故聖王必正歷數以定三統。服色之道。又以探知五星日月之會。凶阨之患。吉隆之喜。其術皆出焉。此聖人知命之術也。書云。初一曰五行。次二曰羞之亂也。患出于小人。而強欲知天道者。壞大以有五。原注。五行者。五常之形氣也。書云。初一日五行。次二曰羞為小。削遠以為近。是以道術破碎而難知也。有五行。原注。五行者。五事也。五事失而五行之序亂。次二曰羞之變作。皆出於律歷之數。而分為一者也。其法亦起五德。終始推有善龜。原注。善龜者。聖人之所用也。書曰。汝則其極則無不至。而小數家因此以為吉凶而行於世。寔以相亂。

其極則無不至。而小數家因此以為吉凶而行於世。寔以相亂。

有善龜。原注。善龜者。聖人之所用也。書曰。汝則其極則無不至。而小數家因此以為吉凶而行於世。寔以相亂。

有善龜。原注。善龜者。聖人之所用也。書曰。汝則其極則無不至。而小數家因此以為吉凶而行於世。寔以相亂。

有善龜。原注。善龜者。聖人之所用也。書曰。汝則其極則無不至。而小數家因此以為吉凶而行於世。寔以相亂。

有善龜。原注。善龜者。聖人之所用也。書曰。汝則其極則無不至。而小數家因此以為吉凶而行於世。寔以相亂。

有善龜。原注。善龜者。聖人之所用也。書曰。汝則其極則無不至。而小數家因此以為吉凶而行於世。寔以相亂。

有善龜。原注。善龜者。聖人之所用也。書曰。汝則其極則無不至。而小數家因此以為吉凶而行於世。寔以相亂。

有善龜。原注。善龜者。聖人之所用也。書曰。汝則其極則無不至。而小數家因此以為吉凶而行於世。寔以相亂。

有善龜。原注。善龜者。聖人之所用也。書曰。汝則其極則無不至。而小數家因此以為吉凶而行於世。寔以相亂。

有善龜。原注。善龜者。聖人之所用也。書曰。汝則其極則無不至。而小數家因此以為吉凶而行於世。寔以相亂。

成天下之覆壓者。有數術。堂義和史卜之職也。有雜占。原注。雜占者。紀百事之象。有形法。原注。形法者。大舉九州之勢以立城郭。室舍

形人。及六畜骨法之度數。器物之形容。以求其聲氣。賤善惡之徵。衆占非一也。有醫經。原注。醫經

鬼神。數自然也。然形與氣相首尾。亦有有其形而無其氣。猶律有長短而各徵其聲。非有

脈經絡骨髓陰陽表裏以起百病之本。死生之門。有方技。原注。方技者。皆生

而用度鍼石湯火所施。調百藥劑和之所宜也。有識緯。原注。圖讖及

也。卿以盪怪平心。同死生之域。而無怵惕于胸中。有識緯。原注。圖讖及

以爲務。則誕欺怪迂之文。彌以益多。非聖王之所以教也。奇邪小技又有風角。原注。後漢

書耶顯傳注。風角。謂候四方四隅之風。以占吉凶也。遁甲。原注。七志有遁甲經也。太乙九宮。原注。乾鑿度曰。太乙取其數以行九宮。鄭元

每四乃還于中央。中央者北神之所居。故謂之九宮。天數大分以陽出。以陰入。陽起于子。陰起于午。是以太乙下九宮

。從坎宮始。自此而從于坤宮。又自此而從於震宮。又自此而從於巽宮。所以行半矣。還息於中央之宮。既又自此而從

於乾宮。又自此而從於兌宮。又自此而從於艮宮。又自此而從於離宮。六日七分。原注。後漢書。耶顯傳注。易稽圖

行則周矣。上游息於太乙之宮而反紫宮。行起從坎宮。又始終於離宮也。六日七分。原注。甲子卦氣起中孚。六日八十

分日之七。鄭元注云。六以候也。八十分爲一日之七也。一卦六日七分也。日者。原注。卜筮占候。時日通名。墨子曰。墨子北之齊。遇日者。日者曰。帝

而反。逢占。原注。逢人所射覆祕諸物。令閣射之。挺專。原注。挺。大寧反。楚辭索稿茅以筮專。王逸。須臾。原

。七志有武王須臾一卷。孤虛。原注。前漢書藝文志有風后孤虛二十卷。陰陽家謂魁罡之屬。原注。陰陽家謂戊爲

陰陽吉凶立成之鬼也。孤虛。原注。孤六甲之孤辰。若甲子旬中無戊亥。對孤爲虛。魁罡之屬。原注。陰陽家謂戊爲

不可殫紀拘礙泥窒偏駁厖亂反害乎道。至於逆知前億。教人爲亂資之爲盜。誤國殺天下喪身覆族而

不悔者皆是也。鴻儒碩士亦往往爲所誤。如董仲舒之下吏。原注。漢書。董仲舒爲江都。治國以春秋災異之變

反是行之。一國未嘗不得所欲。中廢爲中大夫。先是遼東高廟長陵高園殿災。仲舒居家。推說其意。草藪未上。主父偃候

之誅戮。原注。睦宏字孟。元鳳三年。太山有大石自立。昌邑有枯社木臥復生。孟以為當有從匹夫為天子者。而不知其所在。即說曰。先師董仲舒有言。雖有繼體守文之君。不害聖人之受命。漢家堯後。有傳國之運。漢帝宜誰

帝幼。大將軍霍光秉政。惡之。下其書廷尉。奏賜孟妾設妖言惑眾。大逆不道。皆伏誅。京房事見前注。李尋之

流放。原注。李尋好洪範災異。又學天文月令陰陽事。大司馬王根薦尋待詔黃門。每有災異。輒問尋。遷黃門侍郎。哀

郎顛之賊殺。原注。後漢書郎顛父宗字仲綏。學京氏易。善風角。星算。六日七分。能望氣占候。顛少傳父業。張衡

襄楷特幸而免爾。原注。張衡善機巧。尤致思於天文。陰陽。歷算。公車徵為太史令。遂乃研覈陰陽。妙盡璇機之政

化。永和初為河間相。三年徵拜尚書。卒。襄楷好學博古。善天文陰陽之術。桓帝時宦官專朝。災異尤數。楷詣闕上

疏。不省。復上書。詔尚書問狀。尚書承旨奏楷假借星宿。造合私意。誣上問事。收送洛陽獄。帝以楷言天文。桓象之數

故不誅。猶司寇論刑。靈帝即位。與荀爽。嗚呼。數以衍道。其弊至於殺天下後世。曷若不為之愈乎。凡非六經

所載仲尼之門所不道者皆不可以為學也。技術為秦漢以來亂本。而前史屢書特書。故推本所自以為

戒亦著于篇。

謹案華佗傳文闕止存議

議曰。醫家切於寄生。故為上技。自神農味百穀。辨草木飛走之屬。別金石之性。使人用萬物。而後黃帝岐

伯論著方書。為萬世生生之具。聖人之事也。至戰國之際。素問諸書始出。故其文不類。其義則精奧深切。

非聖人莫能為之。其論氣數之際。殆與六經相表裏。特心傳口授。至戰國先秦筆之於書耳。以醫名家。見

於載籍者。自扁鵲。秦和。倉公而下。祇有華佗。其砭熨方藥。至於剖腹滌腸。固為絕技。若夫導引之術。假五

禽以爲戲。則古之節宣其氣。勿使壅底之道。不針不藥。致之太和。尤其妙者。可謂良醫矣。而爲操所滅。惜哉。

謹案。此下有荀子訓。左慈傳。今闕。

甘始。東郭延年。原注。漢武內傳曰。延年字公游。

封君達。三人者。皆方士也。率能行容成御婦人術。或飲小便。或自倒懸。

愛膏精氣。不極視大言。甘始。元放。延年。皆爲操所錄。問其術而行之。原注。曹植辯道論曰。甘始者老而有少容。

有怪言。余嘗辟左右獨與之言。問其所行。溫顏以誘之。美辭以導之。始語余。吾本師姓韓。字雅。嘗與師于南海作金。前後數四。投數萬斤金子海。又言諸深時西域胡來獻香屬。腰帶割玉刀。時悔不取也。又言車師之西國。兒生劈背出胎。

欲其食少而怒行也。又言取鯉魚五寸一雙。令其一著藥。共投煮膏。中有藥者。奮尾鼓腮。遊行沈浮。有若處深淵。其一者已然而可噉。余時問言寧可試否。言是藥去此踰萬里。當出塞。始不自行。能得也。言不盡于此。頗難悉載。故臆

舉其巨怪者。始若遭秦始皇漢武帝。則復徐市。樂大之徒也。君達號青牛師。原注。漢武帝內傳曰。封君達隴西人。初服黃連五十餘年。入鳥舉山。

病死者。識與不識。便以腰間竹管中藥與服。或下針。應手皆愈。不以姓名語人。凡此數人。皆百餘歲及二百歲

也。聞魯女生得五岳圖。連年請求。女生未見授。并告節度二百餘歲。乃入元丘山去。

王真。謹案。後漢書注云。字叔經。上黨人。

年且百歲。視之面有光澤。似未五十者。周流五嶽名山。能行胎息胎食之方。嗽

音朔。舌下泉咽之。不絕房室。習閉氣而吞之。名曰胎息。習嗽舌下泉而咽之。名曰胎食。

郝孟節。上黨人。能含棗核不食。可至五年十年。又能結氣不息。身不動搖。狀若死人。可至百日半年。亦有

室家。爲人謹慎。不妄言。似士君子。曹操使領諸方士焉。

李意其蜀人也。世傳見之漢文帝時。昭烈欲伐吳。遣人迎意。其到敬禮之。問以吉凶。意其不答。而求紙筆。畫作兵馬器仗十數紙。已便一一以手裂壞之。又畫作一大人掘地埋之。便徑去。昭烈怒。遂行。爲吳所敗。還忿恥發病崩。乃知意其畫作兵仗而壞之。卽兵敗也。大人而埋之。卽昭烈崩意也。

議曰。子訓諸人皆誕異不經之術。所謂左道惑世亂衆者也。王法所必誅。而竟以術免。迂怪之士益神矣。人之受命。脩短有數。故堯不爲壽。顏不爲夭。必以智計超出能至數百年。則術可以逾數。力可以制命。人可以造天矣。不可以訓孔子。所以不語怪力亂神也。昔孝武晚年悔過。每對羣臣自歎曰。鄉時愚惑爲方士所欺。天下豈有神仙。盡妖妄耳。節食服藥。差可少病而已。此躬踐其事。然後知其非。可以爲鑒也。

謹案目錄此下有周羣傳。今闕。

杜瓊字伯瑜。蜀郡成都人也。少受學任安。精究安術。劉璋時辟爲從事。昭烈領益州牧。以瓊爲議曹從事。末帝卽位。拜諫議大夫。遷左中郎將。大鴻臚太常。爲人靜默。少言。闔門自守。不與世事。蔣琬費禕等皆器重之。雖學業入深。初不視天文。有所論說。後進通儒譙周嘗問其意。瓊答曰。欲明此術甚難。須當身視。識其形色。不可信人也。晨夜苦劇。然後知之。復憂漏泄。不如不知。是以不復視也。周因問曰。昔周徵君以爲當塗高者魏也。其義云何。瓊答曰。魏闕名也。當塗而高。聖人取類而言耳。又問周曰。寧復有所怪邪。周曰。未達也。瓊又曰。古者名官職不言曹。始自漢以來。名官盡言曹。吏言屬曹。卒言侍曹。此殆天意也。瓊年八

十餘。延熙十三年卒。著韓詩章句十餘萬言。不教諸子內學。無傳業者。周緣瓊言。乃觸類而長之。曰。春秋傳著晉穆侯名太子曰仇。弟曰成師。師服曰。異哉君之名子也。嘉耦曰妃。怨耦曰仇。今君名太子曰仇。弟曰成師。始兆亂矣。兄其替乎。其後果如服言。及漢靈帝名二子曰史侯。董侯。既爲帝。後皆免爲諸侯。與師服言相似也。昭烈諱備。其訓具也。末帝諱禪。其訓授也。託劉已具矣。當授與人也。意者甚于穆侯靈帝之名子。後宦人黃皓弄權于內。景耀五年。宮中大樹。無故自折。周深憂之。無所與言。乃書柱曰。衆而大。期之會。具而授。若何復言。曹者衆也。魏者大也。衆而大。天下其當會也。具而授。如何復有立者乎。漢既亡。咸以周言爲驗。周曰。此雖己所推尋。然其所因。由杜君之辭而廣之耳。殊無神思。獨至之意也。何宗字彥英。蜀郡郫人也。事廣漢任安。精究安術。與杜瓊同師。而名聞過之。劉璋時爲犍爲太守。昭烈定益州。領牧。辟爲從事祭酒。後援引圖讖。勸昭烈卽尊號。踐阼之後。遷爲大鴻臚。建興中卒。子雙。字漢偶。滑稽談笑。有淳于髡東方朔之風。爲雙柏長。早卒。

議曰。國家將興。必有禎祥。將亡。必有妖孽。動乎蓍龜。見乎四體。蓋誠于中。形于外。氣焰之所激發。朕兆之所著見。變日星。移物產。興謳歌。起怨讎。有不能揜者。智者觀之。廢興之由可知矣。未必指擬姓氏名字。啓覬覦而亂天下也。自僞莽盜漢。造作符命。姦人因之。遂爲讖記。以世祖之明德。而亦惑之。漢道于是。不純矣。桓靈之季。遂有當塗高代漢之訛。既誤袁氏。務成曹丕。譙周又衍杜瓊之言。爲備具禪授之論。方之仇

與成師卒勸末帝舉國降魏。隕昭烈之業。而遺辱宗社。嗚呼。邪說之禍甚矣。

續後漢書卷第七十二中

列傳第六十九中

技術

魏

朱建平 周宣馬鈞

管輅

謹案朱建平傳闕

周宣

謹案魏志字孔和樂安人也

爲郡吏太守楊沛夢人曰八月一日曹公當至必與君杖飲以藥酒使宣占之是時

黃巾賊起宣對曰夫杖起弱者藥治人病八月一日賊必除滅至期賊果破後東平劉楨夢蛇生四足穴居門中使宣占之曰此爲國夢非君家之事也當殺女子而作賊者頃之女賊鄭姜遂俱夷討以蛇女子之祥足非蛇之所宜故也曹丕問宣曰吾夢殿屋兩瓦墜地化爲鸞鴛鴦此何謂也宣對曰後宮當有暴死者丕曰吾詐卿耳宣曰夫夢者意耳苟以形言便占吉凶言未畢黃門令奏宮人相殺無幾丕復問曰我昨夜夢青氣自地屬天宣對曰天下當有貴女子冤死是時丕已遣使賜甄后璽書聞宣言而悔之遣人追使者不及丕復問曰吾夢磨錢文欲令滅而更愈明此何謂耶宣悵不對丕重問之宣對曰此自陞

下家事。雖意欲爾。而太后不聽。是以文欲滅而明爾。時丕欲治弟植之罪。偃于太后。但加貶爵。以宣爲中郎屬。太史嘗有問宣曰。吾昨夢見芻狗。其占何也。宣曰。君欲得美食耳。有頃出行。果遇豐膳。後又問宣曰。吾昨復夢見芻狗。何也。宣曰。君欲墮車折足。宜戒慎之。頃之。果如宣言。後又問宣。昨復夢見芻狗。何也。宣曰。君家欲失火。當善護之。俄遂火起。語宣曰。前後三時皆不夢也。聊試君爾。何以皆驗耶。宣曰。此神靈動君使言。故與真夢無異也。又問宣曰。三夢芻狗。而其占不同。何也。宣曰。芻狗者祭神之物也。故君始夢。當得飲食也。祭祀既訖。芻狗爲車所轢。故中夢當墮車折足也。芻狗既車轢之後。必載以爲樵。故後夢憂失火也。宣之敍夢。凡此類也。十中八九。世以比建平之相焉。謹案。目錄附馬鈞。今闕。

管輅字公明。平原人也。幼聰敏。八九歲。卽喜仰視天文。父母禁之。不可。曰。家雞野鷲。謹案。陳志作野鷲。猶尙知時。

況于人乎。及長。又善周易。星數。風角。占相。無不精究。容貌麤醜。無威儀。而嗜酒。飲食言戲。不擇非類。故人

多愛之。而不敬也。嘗曰。廉介細直。士之浮飾。不足務也。知我者稀。則我貴矣。原注。輅別傳。輅年八九歲。便不肯寐。父母常禁之。猶不可止。自言我雖年小。然眼中喜視天文。嘗云。家雞野鷲。猶尙知時。得人輒問其名。夜共戲土壤中。輒畫地作天文。及日月星辰。每答言說事。語皆不常。宿學著人。不能折之。皆知其當有大異之材。及成人。果明周易。仰觀風角。占相之道。無不精微。體性寬大。多所含受。憎己不仇。愛己不棄。每欲以德報怨。常謂忠孝信

義。人之根本。不可不厚。廉介細直。士之浮飾。不足爲務也。自言知我者稀。則我貴矣。安能斷江漢之流。爲激石之積。樂與季主論道。不欲與漁父同舟。此吾志也。其事父母孝篤。兄弟順。愛士友。皆仁和發中。終無所闕。臧否之士。晚亦服焉。父爲瑗。瑗卽丘長。時年十五。來至官舍讀書。始讀詩。論語。及易本。便開淵布筆。辭義斐然。於時輅上

有遠方及國內諸生四百餘人。皆服其才也。瑗太守單子春。雅有才姿。聞輅一覽之雋。欲得見輅。父卽遣輅造之。大會賓客百餘人。座上有能言之士。輅問子春。府君名士。加有雄貴之姿。輅既年少。瞻未堅剛。若欲相觀。懼失精神。

會賓客百餘人。座上有能言之士。輅問子春。府君名士。加有雄貴之姿。輅既年少。瞻未堅剛。若欲相觀。懼失精神。

會賓客百餘人。座上有能言之士。輅問子春。府君名士。加有雄貴之姿。輅既年少。瞻未堅剛。若欲相觀。懼失精神。

請先飲三升清酒。然後得而言之。子春大喜。便酌三升清酒。獨使飲之。酒盡之後。問子春今欲與輅爲對者。若府君四座之士邪。子春曰。吾欲自與廂旗鼓相當。輅言始讀詩論易本。學問微淺。未能上引聖人之道。陳泰漢之事。但欲論金。生。少引聖籍。多發天然。子春及衆士互共攻劫。論難蜂起。而輅以爲易耶。如是唱大論之端。遂經於陰陽。文采葩流。枝葉橫衆人曰。此年少甚有才器。聽其言語。正似司馬犬子游獵之賦。何其磊落雄壯。父爲利漕。利漕民郭恩兄弟三人英神以茂。必能明天文地理變化之數。不徒有言也。于是發聲徐州。號之神童。父爲利漕。利漕民郭恩兄弟三人

皆得覺疾。使輅筮其所由。輅曰。卦中有君本墓內有女鬼。非君伯母當叔母也。昔饑荒之世。當有利其數升米者。排著井中。嘖嘖有聲。推一大石下。破其頭。孤魂冤痛。自訴于天。於是恩流涕服罪曰。誠有斯事。兄

弟躋來三十載。如棘子。但願不及子孫爾。輅曰。火形不絕。水形無餘。不及後也。原注。輅別傳。利漕民郭恩字

又能仰觀。輅就義博讀易數。十日中午便開發。言難論師。于此分著下卦。用思精妙。占爻上諸生疾病。死亡。貧富。喪衰。初無錯舛。莫不驚怪。謂之神人也。又從義博學仰觀。三十日中午。通夜不臥。語義博君但相語墟落處所爾。至于

推運會。論災異。自當出吾天分。學未一年。義博反從輅問分著及天文事要。義博每聽輅語。未嘗不推機慷慨。自言聞君至論之時。忘我爲篤疾。明闇之不相逮。何其遠也。義博設主人。獨請輅具告辛苦。自說兄弟三人俱得覺疾。不知何

故。試相爲作卦。知其所由。若有咎殃者。天道赦人。當爲吾祈福于神明。勿有所愛。兄弟俱行。此爲更生。輅作卦思之。未詳。會日夕。因留宿。至中夜。語義博曰。吾以此得之。既言其事。義博悲涕沾衣曰。皇漢之末。實有斯事。君

不名主諱也。我不得言禮也。兄弟躋來三十餘載。脚如棘子。不能復治。但願不及子孫爾。輅言火形不絕。水形無餘。不及後也。廣平劉奉林婦病困。已買棺器。時正月也。使

輅占曰。命在八月辛卯日。日中之時。奉林謂必不然。而婦漸差。至秋發動。一如輅言。原注。輅別傳。鮑子春

與輅相見。曰。聞君爲劉奉林卜婦死亡。何其詳妙。試爲論其意義。輅論爻象之旨。說變化之義。若規圓矩方。無不合也。子春自晉。晉少好談易。又喜分著。可謂盲者欲視白黑。聾者欲聽清濁。若而無功也。聽君語後。自視體中。眞爲憤憤者

也。輅往見安平太守王基。基令作卦。輅曰。當有賤婦。人生一男兒。墮地便走入竈中死。又牀上當有一大

蛇銜筆。小大共視。須臾去之也。又烏來入室中。與燕共鬪。燕死烏去。有此三怪。基大驚。問其吉凶。輅曰。直

官舍久遠。魍魎魍魎為怪爾。兒生便走。非能自走。直宋無忌之妖將其入竈也。大蛇銜筆。直老書佐爾。鳥

與燕鬪。直老鈴下爾。今卦中見象而不見其凶。知非妖咎之徵。自無所憂也。後卒無患。原注。輅別傳。基與輅共論易數。日中大

以為喜樂。語輅言俱相聞善下。定共清論君一時異才。當上竹帛也。輅為基出卦。知其無咎。因謂基曰。昔高宗之鼎。非雉所鳴。殷之階庭。非木所生。而野鳥一鳴。武丁為高宗。桑穀暫生。太戊以興。焉知三事不為吉祥。願府君安身養德。

從容光大。勿以知神。茲汗異天眞也。時信都令家婦女驚恐。更互疾病。使輅筮之。輅曰。君北堂西頭有兩死男子。一男持矛。

一男持弓箭。頭在壁內。腳在壁外。持矛者主刺頭。故頭重痛不得舉也。持弓者主射胃腹。故心中縣痛不

得飲食也。晝則浮游。夜來病人。故使驚恐也。於是掘徙骸骨。家中皆愈。原注。輅別傳。王基即遺信都令。遷掘其室中。入地八尺。果得二棺。一棺中有

矛。一棺中有角弓及箭。箭久遠木皆消爛。但有鐵及角完耳。及徙骸骨去城一十里埋之。不復疾病。基曰。吾少好讀易。玩之已久。不謂神明之數。其妙如此。便從輅學易。推論天文。輅每開變化之象。演吉凶之兆。未嘗不纖微委曲。盡

其精神。基曰。始聞君言。如何可得。終以昏亂。此自天授。非人力也。于是藏周易。絕思慮。不復學卜筮之事。輅鄉里乃太原。問輅君往者為王府君論怪云。老書佐為此。老鈴下為鳥。此本皆人。何化之微賤乎。為見于爻象。出君意乎。

輅言苟非性與天道。何由背爻象而任胸心者。夫萬物之化。無有常形。人之變異。無有常體。或大為小。或小為大。固無優劣。夫萬物之化。一例之道也。是以夏縣天子之父。趙王如意。漢祖之子。而繇為黃熊。如意為蒼狗。斯亦至尊之位。而為黔喙之類也。況蛇者協辰巳之位。鳥者棲太陽之精。此乃騰黑。清河王經去官還家。輅與相見。經曰。近有

之明象。白日之流景。如書佐鈴下。各以微驅化為蛇鳥。不亦過乎。清河王經去官還家。輅與相見。經曰。近有

一怪。大不喜之。欲煩作卦。卦成。輅曰。爻吉。不為害也。君夜在堂戶前。有一流光如燕爵者。入君懷中。殷殷

有聲。內神不安。解衣彷徨。招呼婦人。覓索餘光。經大笑曰。輅如君言。輅曰。吉。遷官之徵也。其應立至。頃之

經為江夏太守。原注。輅別傳。經欲使輅卜。而有疑難之言。輅笑而答之曰。君侯州里遠人。何言之鄙。昔司馬季主有言。夫卜者必法天地。象四時。順仁義。伏義作八卦。周文王三百八十四爻。而天下治。病者或以愈。且

死或以生。忠或以免。事或以成。嫁女娶妻。或以生長。豈直數千錢哉。以此推之。愈務也。荷道之明。聖賢不讓。況吾小人。敢以為難。彥緯斂手謝輅。前言戲之耳。于是輅為作卦。其言皆驗。經每論輅以為得靈龍之精。能養和運幽者。

非徒合會之才也。輅又至郭恩家。有飛鳩來在梁頭。鳴甚悲。輅曰：當有老公從東方來。搗豚一頭。酒一壺。主人雖喜。

當有小故。明日果有客如所占。恩使客節酒戒肉。慎火而射雞作食。箭從樹中間激中數歲女子手。流血

驚怖。原注：輅別傳義博從輅舉鳥鳴之候。輅言君雖好道。天才既少。又不解音律。恐難爲節也。輅爲說八風之變。五音之數。以律呂爲衆鳥之商。六甲爲時日之端。反覆譚曲。出入無窮。義博靜然沈思。馳精數日。卒無所得。義博言才不出位。難以追徵。遂于此止。輅至安德令劉長仁家有鳴鵲來在閣屋上。其聲甚急。輅曰：鵲言東北有婦。昨殺夫。牽

引西家人。夫離婁候。不過日。在虞淵之際。告者至矣。到時果有東北同伍民來告鄰婦。手殺其夫。詐言西

家人與夫有嫌。來殺我婿。原注：輅別傳。渤海劉長仁有辯才。初雖聞輅能曉鳥鳴。後每見輅輅曰：夫生民之音曰言所異也。孔子曰：吾不與鳥獸同羣。明其賤也。輅答曰：夫天雖有大象而不能言。故運星精於上。流神明於下。驗風雲以表異。役鳥獸以通靈。表異者必有浮沈之候。通靈者必有宮商之應。是以宋襄失德。六鷁道退。伯姬將焚。鳥告其災。四國未火。融風以發。赤鳥夾日。殃在荆楚。此乃上天之所使。自然之明符。考之律呂。則音聲有本。求之人事。則吉凶不失。昔在秦祖。以功受封。葛盧聽音。著在春秋。斯皆典謨之實。非聖賢之虛名也。商之將興。由一燕卵也。文王受命。丹鳥銜書。此乃聖人之靈祥。周室之休祚。何賤之有乎。夫鳴鳥之聽。精在鶉火。妙在八神。自非斯倫。猶子路之於死生也。長仁言君辭雖茂。華而不實。夫之敢信。須臾有鳴鵲之驗。長仁乃服。輅至列人典

農王宏直許有飄風高三尺餘。從申上來。在庭中。幢幢回轉。息以復起。良久乃止。直以問輅。輅曰：東方當

有馬吏至。恐父哭子如何。明日膠東吏到。直子果亡。直問其故。輅曰：其日乙卯。則長子之候也。木落于申。

斗建申。申破黃。死喪之候也。日加午而風發。則馬之候也。離爲文章。則吏之候也。申未爲虎。虎爲大人。則

父之候也。有雄雉飛來。登直內鈴柱頭。直大以不安。令輅作卦。輅曰：到五月必遷。時三月也。至期直果爲

渤海太守。原注：輅別傳。輅又曰：夫風以時動。爻以象應。時者神之驅使。象者時之形表。一時其道。不足爲難。王宏直亦大學問有道術。皆不能精。問輅風之推變。乃可爾乎。輅言此但風之毛髮。何足爲異。若夫列宿不守。

衆神亂行。八風橫起。怒氣電飛。山崩石飛。樹木摧傾。揚塵萬里。仰不見天。鳥獸藏窟。兆民感驚。于是使梓慎之徒。登高臺。望風氣。分災異。刻期日。然後知神思遐幽。靈風可懼。館陶令諸葛原遷新

與太守。輅往祖餞之。賓客並會。原自起取燕卵。蜂窠。蠶蠶。著器中。使射覆。卦成。輅曰。第一物。含氣須變。依

乎宇堂。雄雌以形。翅翼舒張。此燕卵也。第二物。家室倒懸。門戶衆多。藏精育毒。得秋乃化。此蜂窠也。第三

物。殼棘長足。吐絲成羅。尋網求食。利在昏夜。此蠶蠶也。舉坐驚喜。原注。輅別傳。諸葛輅字景春。亦學士。好

有榮辱之分。因輅餞之。大有高談之容。諸人多聞其善卜。仰觀不知其有大異之才。於是先與輅共論聖人著作之原。又敘五帝三王受命之符。輅解景春微旨。遂開張戰地。示以不固。藏匿孤處。以待來攻。景春奔北。軍師摧劓。自言吾觀

輅旌旗城池已壞也。其欲戰之士。於是鳴鼓角。舉雲梯。弓弩大起。牙旗雨集。然後登城。嚙威。開門受敵。上論五帝。如延如漢。下論三王。如翻如輪。其英者若春華之俱發。其攻者若秋風之落葉。聽者眩惑。不達其義。言者收聲。莫不

心服。雖白起之坑趙卒。項羽之塞濶水。無以尙之。于是客皆欲面縛銜璧。求束手于軍鼓之下。輅猶趨于山立。未便許

之。至明日。離別之際。然後布腹心。始終一時。海內俊士八九人矣。蔡元才在朋友中最有清才。在衆人中言水聞輅作

狗。何意爲龍。輅言潛陽未變。非卿所知焉。有狗耳得聞龍聲乎。景春言今當遠別。後會何期。且復共一射覆。輅占既

皆中。景春大笑。卿爲我論此卦意。舒我心懷。輅爲開爻散理。分賦形象。言徵辭合。妙不可述。景春及衆客。莫不言

聽後論之美。勝於射覆之樂。景春與輅別戒以二事。言痾性樂酒。量雖溫克。然不可保。寧當節之。卿有水鏡之才。所

見者妙。仰觀雖神。禍如膏火。不可不慎。持痾數才。游于雲漢之間。不憂不富貴也。輅言酒不可極。才不可盡。吾欲

持酒以禮。持才以愚。何患之有也。輅族兄孝國居在斥丘。輅往從之。與二客會客去後。輅謂孝國曰。此二人天庭及口耳之

間。同有凶氣。異變俱起。雙魂無宅。原注。輅別傳。輅又曰。厚味腊毒。天精幽夕。坎爲棺槨。兌爲喪車。流魂于海。骨歸於家。少許時當並死

也。復數十日。二人飲酒醉。夜共載車牛。驚下道入漳河中。皆卽溺死。當此之時。輅之鄰里。外戶不閉。無相

偷竊者。清河太守華表召輅爲文學掾。安平趙孔曜薦于冀州刺史裴徽曰。輅雅性寬大。與世無忌。仰觀

天文。則同妙。甘公石申俯覽周易。則齊思季主。今明使君方垂神幽數。留精九臯。輅宜蒙陰和之應。得及

羽儀之時。徽於是。辟爲文學從事。引與相見。大善友之。徙部鉅鹿。遷治中別駕。初。應州召。與弟季儒共載至武城西。自卦吉凶。語儒云。當在故城中見三狸。爾者乃顯。前到河西故城角。正見三狸共踞城側。兄弟

並喜。正始九年舉秀才。原注。輅別傳。輅爲華清河所召。爲北魏文學。一時士友。無不歎慕。安平趙孔昭。明敏有思識。無雙。當去俗騰飛。翱翔吳蒼。云何在此。閒卿消息。使吾食不甘味也。輅與輅相見。言卿腹中汪汪。故時死人半。今生人莊之道。未嘗不注情于嚴盟之徒也。又嘗吾意重能相明。信者。今當故往爲卿陳感虎開石之誠。輅言非四淵之龍。易及老使白日晝陰。卿若能動東風。興朝雲。吾志所不讓也。於是遂至冀州。見裴使君。使君言君顏色何可以消滅於故耶。孔昭言體中無藥石之疾。然見清河郡內。有一麒麟。拘繫後殿。歷年去。王良伯樂百八十里。不得騎天骨。起風塵。以此憔悴耳。使君言麒麟今何在也。孔昭言平原管輅字公明。年三十六。雅性寬大。與世無思。可爲士雄。仰觀天文。則能同妙甘公石申。俯覽周易。則能齊恩季主。遊步道術。開神無窮。可爲士英。抱荆山之璞。高風遐被。莫不草靡。宜使輅賢文學。可爲痛心疾首也。使君方欲留精九臯。垂神幽藪。欲令明主不獨治逸才不久滯。高風遐被。莫不草靡。宜使輅特蒙陰和之應。得及羽儀之時。必能翼宣隆化。揚聲九圍也。裴使君聞言則慷慨曰。何乃爾邪。雖在大州。未見異才。可用釋人鬱悶者。思遷京師。得共論道耳。況草間自有清妙之才乎。如此便相爲取之。莫使麒麟更爲凡馬。荆山反成凡石。即徽召輅爲文學從事。一相見清論終日。不覺罷倦。天時大熱。移牀在庭前樹下。乃至雞向晨。然後出。再相見。便轉爲鉅鹿從事。三見輅治中。四見輅爲別駕。至十月舉爲秀才。輅辭裴使君。使君言丁郎二尙書有經國才略。於物理不精也。何尙書神明精微。言皆巧妙。巧妙之志。殆破秋毫。君當懷之。自晉不解易九事。必當以相問。比至洛。宜善精其理也。輅言何若巧妙以攻難之才。游形之表。未入于神。夫入神者當步天元。推陰陽。探元虛。極幽明。然後覽道無窮。未暇細言。若欲差次老莊而參爻象。愛微辨而興浮藻。可謂射侯之巧。非能破秋毫之妙也。若九事皆至義者。不足勞思也。若陰陽者。精之已久。輅去之後。歲朝當有時刑大風。風必摧破樹木。苦發于乾者。必有天威。不足共清談者。

許輅與晏談久之。輅謂輅曰。君名善易。而語初不及易中辭義。何也。輅曰。夫善易者不言易也。晏含笑贊之曰。可謂要言不煩也。晏遂問易九事。輅辨析明暢。晏曰。君論此世無雙。謹案。陳志。君論下有陰陽二字。因謂輅曰。試爲作一卦。知位當至三公否。又問連夢青蠅數十來在鼻上。驅之不去。輅曰。夫飛鴟天下賤鳥。及其在林食

甚則懷我好音。況輅心非草木。敢不盡忠。昔元凱之弼重華。宣慈惠和。周公之翼成王。坐而待旦。故能流光六合。萬國咸寧。此乃履道休應。非卜筮之所明也。今君侯位重山嶽。勢若雷電。而懷德者鮮。畏威者衆。殆非小心翼翼多福之仁。夫鼻者良天中之山。原注。裴松之曰。按相書謂鼻之所在。爲天中。鼻有山象。故曰天中之山。高而不危。所以長守貴。

也。今青蠅臭惡而集之位。峻者顛輕豪者亡。不可不思。害盈之數。盛衰之期。是故山在地中曰謙。雷在天。上曰壯。謙則哀多益寡。壯則非禮不履。未有損己而不光大。行非而不傷敗。願君侯上追文王六爻之旨。

下思尼父象象之義。然後三公可決。青蠅可驅也。颺曰。此老生之常談。輅曰。夫老生者見不生。常談者見不談。晏謝之曰。知幾其神乎。古人以爲難。交疏而吐其誠。今人以爲難。君今一面而盡二難之道。可謂明。

德君子矣。過歲更當相見。輅還邑舍。具以語舅氏。舅氏責輅言太切至。輅曰。與死人語。何所畏耶。舅大怒。謂輅狂悖。歲朝西北大風。塵埃蔽天十餘日。聞晏颺皆誅。然後舅氏乃服。謂輅曰。爾何以知何鄧之敗。爲。

已有凶氣耶。輅曰。與禍人共會。然後知神明交錯。與吉人相近。又知聖賢求精之妙。夫鄧之行步。筋不束骨。脈不制血。謹案。志注。血作肉。起立傾倚。若無手足。此爲鬼躁。何之視候。則魂不守宅。血不華色。精爽煙浮。容若

稿木。此爲鬼幽。故鬼躁者爲風所收。鬼幽者爲火所燒。二者皆非遐福之象。自然之符。不可蔽也。原注。輅後因得休。裴使君問何平叔才名。其實何如。輅曰。其才若盆盎之水。所見者清。所不見者濁。神其廣博。志不務學。弗能成才。欲以盆盎之水。求一山之形。形不可得。則智由此惑。故說老莊則巧而多華。說易生義則美而多僞。華則道浮。僞則神虛。得上才則淺而流絕。得中才則游精而獨出。輅以爲少功之才也。裴使君曰。誠如來論。吾敬與平叔共說老莊及易。常覺其辭妙于理。不能折之。又時人吸習皆歸服之焉。益令不了。相見得清言。然後灼灼耳。始

始

輅過魏郡太守鍾毓共論易義輅因言卜可知君生死之日毓使筮其生月日如言無蹉跌毓大愕曰君
 可畏也死以付天不以付君遂不復筮毓問輅天下當太平否輅曰方今四九天飛利見大人神武升建
 王道文明何憂不平毓未解輅言無幾曹爽等誅乃覺寤云原注輅別傳魏郡太守鍾毓清逸有才難輅易二
 滯分張爻象義皆殊妙毓即謝輅輅卜知毓生月日毓愕然曰聖人運神通化連屬事何聰明乃爾輅言幽明
 同化死生一道悠悠太極終而復始文王捐命不以爲憂仲尼曳曳不以爲懼連屬事何聰明乃爾輅言幽明
 者好事死者惡事哀樂之分吾所不能齊且以付天不以付君也石苞爲鄉典農與輅相見問曰聞君鄉里翟文
 耀能隱形其事可信乎輅言此但陰陽蔽匿之數苟得其數則四岳可藏河海可逃況以七尺之形游變化之內散
 雲霧以幽身布金水以滅迹術足數成不足爲難苞曰欲聞其妙君且善論其數也輅言夫物不精不爲神數不妙
 不爲術故精者神之所合妙者智之所遇合之幾微可以性通難以言論是故魯班不能說其手離婁不能說其目
 非言之難孔子曰書不盡言言之細也言不盡意意之微也斯皆神妙之謂也請舉其大體以驗之夫白日登天運
 景萬里無物不照及其入地一炭之光不可得見三五盈月清耀燭夜可以遠望及其在書明不如鏡今逃日
 月者必陰陽之數陰陽之數通于萬類鳥獸猶化況于人乎夫得數者妙得神者靈非徒生者有驗死亦有徵
 是以杜伯乘火氣以流精彭生託水變以立形是故生者能出亦能入死者能顯亦能幽此物之精氣化之遊魂人鬼相
 感數使之然也苞曰目見陰陽之理不過于君君何以不隱輅曰夫陵虛之鳥愛其清高不願江漢之魚淵沼
 之魚樂其濡溼不易騰風之鳥由性異而分不同也僕自欲正身以明道直己以親義見數不以爲異知術不以爲奇
 夙夜研幾孳孳溫故而索隱行怪未暇斯務也而平原太守劉邠取印囊及山雞毛著器中使筮輅曰內方外圓五色成文含寶守
 信出則有章此印囊也高嶽巖巖有鳥朱身羽翼元黃鳴不失晨此山雞毛也邠曰此郡舍官連有變怪
 使人恐怖其理何由輅曰或因漢末之亂兵馬擾攘軍尸流血汙染丘山故因昏夕多有怪形也明府道
 德高妙自天祐之願安百祿以光休寵原注輅別傳故郡將劉邠字令元清和有思理好易而不能精與輅相
 見意甚喜歡自託注易向乾也輅言今明府欲勞不世之神經緯大道
 誠富美之秋然輅以爲注易之愈急于水火水火之難登時之驗易之清濁延于萬代不可不先定其神而後垂明
 訓也自且至今聽探聖論未有易之一分易安可注也輅不解古之聖人何以處乾位于西北坤位于西南夫乾坤者

天地之象。然天地至大爲神明君父。覆載萬物。生長無首。何以安處二位。與六卦同列。乾之象矣。曰。大哉乾元。萬物資始。乃統天。夫統者。尊莫大焉。何由有別位也。邪。依易擊辭。請爲之理以爲注。不得其要。輅尋擊下難。事皆窮析。曰。夫乾坤者。易之祖宗。變化之根源。今明府論清濁者有疑。疑則無神。恐非注易之符也。輅于此爲論八卦。事皆卦之道。及爻象之精。大論開廓。衆化相連。邪所解者。皆以爲妙。所不解者。皆以爲神。自說欲注易八年。用思勤苦。歷戰靡寧。定相得至論。此才不及易。不愛久勞。喜承雅言如此。之。相爲高枕休息矣。欲從輅學射覆。輅言今明府以虛神于注易。亦宜絕思於懸著。靈著者。二儀之明數。陰陽之幽契。施之于道。則定天下吉凶。用之於術。則收天下毫纖。靈微未可以爲易也。邪。曰。以爲術者。易之近數。欲求其端耳。若如來論。何事于斯。留輅五日。不遺恤官。但共清談。連自言數與何平叔論易及老莊之道。至于精神退流。與化周旋。清若金水。鬱若山林。非君侶也。邪。又曰。此郡官談。連有變怪多形。使人怖恐。君似當遠此數者。其理何由也。輅言此郡所以名平原者。本有原山。無木石與地。自然舍陰能吐雲。含陽不能激風。陰陽雖弱。猶有徵神。徵神不真。多聚凶姦。以類相求。魍魎成羣。或因漢末兵馬擾攘。軍尸流血。汙染丘岳。靈魂相感。變化無常。故因骨夕之時。多有怪形也。昔夏禹文明。不怪于黃龍。周武信時。不惑于暴風。今明府道德高妙。神不懼妖。自天祐之。吉無不利。願安百祿。以光休寵也。邪。曰。聽雅論爲近其理。每有變怪。輒聞鼓角聲音。或見弓劍形象。夫以土山之精。伯有之魂。實能合會于犯明靈也。邪。問輅易言剛健篤實。輝光日新。斯爲同不也。輅曰。不同之名。朝旦爲輝。日中爲光。晉諸公讚。邪本名炎。犯晉太子諱。改爲邪。位至太子僕。子粹字純緜。侍中。次宏字終繼。太常。次漢字仲暇。光祿大夫。漢清沖有貴識。名亞樂。廣。去子成徐州刺史。次耽晉陝內史。耽子恢。字真長。尹丹陽。爲中興名士也。清河令徐季龍。使人行獵。令輅

筮其所得。輅曰。當獲小獸。復非食禽。雖有爪牙。微而不強。雖有文章。蔚而不明。非虎非雉。其名曰狸。獵人暮歸。果如輅言。季龍取十三種物。著大篋中。使輅射云。器中籍籍。有十三種。先說雞子。後道蠶蛹。遂一一名之。惟以梳爲枇耳。季龍因與輅論龍動則景雲起。虎嘯則谷風生。以爲火星者龍。參星者虎。火出則雲應。參出則風到。此乃陰陽之感化。非龍虎之所致也。輅曰。夫論難當先審其本。然後求其理。理失則機謬。機謬則榮辱之主。若以參星爲虎。則谷風更爲寒霜之風。寒霜之風。非東風之名。是以龍者陽精。以潛爲陰。幽靈上通。和氣感神。二物相扶。故能興雲。夫虎者陰精。而居於陽。依木長嘯。動於巽林。二數相感。謹案

數志注作

二氣。故能運風若磁石之取鐵。不見其神而金自來。有徵應以相感也。況龍有潛飛之化。虎有文明之變。招雲召風。何足爲疑。季龍曰。夫龍之在淵。不過一井之底。虎之悲嘯。不過百步之中。形氣淺弱。所通者近。何能漂景雲而馳東風。輅曰。君不見陰陽燧近在掌握之中。形不出手。乃上引太陽之火。下引太陰之水。嘯吸之間。煙景以集。苟精氣相通。懸象應乎二炁。苟不相感。則二女同居。志不相得。自然之道。無有遠近。季龍曰。世有軍事。則雞雉先鳴。其道何由。復有他占。惟在雞雉而已。輅言貴人有事。其慮在天。在天則日月星辰也。兵動民憂。其應在物。在物則山林鳥獸也。夫雞者兌之畜。金者兵之精。雉者離之鳥。獸者武之神。故太白揚輝。則雞鳴。熒惑流行。則雉驚。各感數而動。又兵之神道。布在六甲。六甲推移。其占無常。是以晉樞牛响。果有西軍。鴻嘉石鼓。鳴則有兵。不專近在於雞雉也。季龍曰。魯昭公八年。有石言於晉。師曠以爲作事不時。怨讎動于民。則有非言之物而言。于理爲合。不輅曰。晉平奢泰。崇飾宮室。斬伐林木。殘破金石。民力既盡。怨及山澤。神痛人感。二精並作。金石同氣。則兌爲口舌之妖。動于靈石。傳曰。輕百姓。飾城郭。則金不從革。此之謂也。原注。輅別傳。季龍欽嘉留輅。經數日。輅占攬既驗。季龍曰。君雖神妙。但不多藏物耳。近物。能蔽聰明。季龍大笑。君既不謙。又念窮在近矣。輅言君向未識謙言。焉能論道。夫天地者。則乾坤之卦。著龜者。則卜筮之數。日月者。離坎之象。變化者。陰陽之爻。杳冥者。神化之原。未然者。幽冥之先。此皆周易之紀綱。何僕之不謙。季龍於是取十三種物。欲以窮之。輅射之。皆中。季龍乃歎曰。作者之謂聖。述者之謂明。豈此之謂乎。輅隨軍西行。過毋丘儉祖父墓下。倚樹哀吟。精神不樂。人問其故。輅曰。林木雖茂。無形可久。碑誅雖美。無後可守。元武藏頭。蒼龍無足。白虎銜尸。朱雀悲哭。四危以

備法當滅族。不過二載。其應至矣。卒如其言。後得休過清河。倪太守時天旱。倪問輅雨期。輅曰。今夕當雨。是日陽燥。晝無形似。府丞及令在坐。咸謂不然。到鼓一中。星月皆沒。風雲並起。竟成快雨。于是倪盛修主人禮。共為歡樂。

原注。輅別傳。輅與倪清河相見。既刻雨期。倪猶未信。輅曰。夫造化之所以為神。不疾而速。不行而到。查冥。殷殷雷聲。嘘吸雨靈。學習雷公電父。風伯雨師。羣岳吐陰。衆川激精。雲漢垂澤。蛟龍含靈。燈煙朱電。宣布星符。刺下東井。告命南箕。使習雷谷風。六合皆同。欬唾之間。品物流形。天有常期。道有自然。不足為難也。倪曰。談高信寡。相為憂之。于是便留輅。往請府丞及清河令。若夜雨者。當為啖二百斤犢肉。若不雨當住十日。輅曰。言念費損。至日向暮。了無雲氣。衆人並嗤輅。輅言樹上已有少女微風。樹間又有陰鳥和鳴。又少男風起。衆鳥和翔。其應至矣。須臾果有良風。鳴鳥。日未入。東南有山雲樓起。黃昏之後。雷聲動天。到鼓一中。星月皆沒。風雲並起。元氣四合。大雨河傾。倪謂輅言誤中爾。不為神也。輅曰。誤中與天期。不亦工乎。正元二年弟辰

謂輅曰。大將軍待君意厚。冀當富貴乎。輅嘗歎曰。吾自知有分直爾。然天與我才明。不與我年壽。恐四十七八間不見。女嫁兒娶媳婦也。若得免此。欲作洛陽令。可使路不拾遺。枹鼓不鳴。但恐至泰山治鬼。不得治生人。如何。辰問其故。輅曰。吾額上無生骨。眼中無守精。鼻無梁柱。腳無天根。背無三甲。腹無三壬。此皆不壽之驗。又吾本命在寅。加月食夜生。天有常數。不可得諱。但人不知爾。吾前後相當死者百人。略無錯也。是歲八月為少府丞。明年二月卒。年四十八。

原注。輅別傳。既有才名。遭朱陽之運。於時名勢赫奕。若火猛風。無貴賤。候之以禮。京城紛紛。非徒歸其名勢而已。然亦憐其德焉。向不天命。輅之榮華。非世所測也。弟辰嘗欲從輅學。下及仰觀事。輅言。卿不可教爾。夫卜非至精。不能見其數。非至妙。不能觀其道。孝經詩論。足為三公。無用知之也。輅是下止。子弟無能傳其術者。辰曰。夫晉魏之士。見輅道術神妙。占候無錯。以為有隱書及象甲之數。辰每觀輅書傳。惟有易林。風角。及鳥鳴。仰觀。星書三十餘卷。世所共有。然輅獨在少府官舍。無家人子弟隨之。其亡沒之際。好奇不衰。喪者盜輅書。惟餘易林風角及鳥鳴書遺耳。夫術數有百數十家。其書有數千卷。書不少也。然而世鮮名人。皆由無才。不由無書也。裴冀州。何鄆二尚書。及鄉里劉太常。潁川兄弟。以輅稟受天才。明陰陽之道。吉凶之情。一得

其源。遂涉其流。亦不爲難。嘗歸服之。輅自言與此五君共語。使人精神清發。昏不暇寐。自此以下。殆白日欲寢矣。又自言當世無所願欲。得與魯梓慎。鄭裨竈。晉卜偃。宋子章。楚甘公。魏石申。共登靈臺。披神圖。步三光。明災異。運著龜。決狐疑。無所復恨也。辰不以閭淺。得因孔懷之親。數與輅有所詰論。至於辨人物。析臧否。說近義。彈曲直。若俯臨深澤。杳杳兮精絕。偁以攻難而失其當亡。欲受學明哲相殊。以迷京房。無不扼腕推指。追音響而長歎也。昔京房雖善卜。及風律之占。卒不免禍。而輅自知四十八當亡。可謂枯龜之餘智。膏燭之末景。豈不哀哉。世人多以猶道路紛紜。輅處魏晉之際。藏智以朴。卷舒有時。妙不見遺。可謂幾於龜也。京房不量萬乘之主。不避佞諂之徒。欲以天文洪範。利國利身。困不能用。卒陷大刑。可謂枯龜之餘智。膏燭之末景。豈不哀哉。世人多以輅之京房。辰不敢許也。至于仰察星辰。俯定吉凶。遠期不失年歲。近期不失日月。辰以甘石之妙不先也。射覆名物。見輅流述。東方朔不過也。觀骨形而審貴賤。覽形色而知生死。許貢唐舉不超也。若夫疏風氣而探微候。聽鳥鳴而識神機。亦一代之奇也。向使輅宜達爲宰相大臣。膏腴流于名世。華曜列于竹帛。使幽陰皆舉。祕言不遺。千載之後。有賢退潛。不宜于良史。而爲鄙弟所見。信者以妙過真。夫妙與神合者。得神則無所惑也。恨材長命短。道貴時賤。親臨觀靈囿。說魏晉興衰。及五運浮沈。兵革災異。十不收一。無源何以成河。無根何以垂榮。雖秋菊可採。十得二焉。至仰觀靈囿。說魏晉興衰。及五運浮沈。兵革災異。十不收一。無源何以成河。無根何以垂榮。雖秋菊可採。十得二焉。至臨文慷慨。伏用哀慚。將來君子。幸以高明求其義焉。往孟荆州爲列人典農。嘗問亡兄昔東方朔射覆。得何卦正。知守宮蜥蜴二物者。亡兄于此爲安卦生象。辭喻交錯。微義叢起。變化相推。會於辰巳。分別龍蛇。各使有理。言絕之後。孟荆州長歎息曰。吾聞君論。精神騰躍。殆欲飛也。寔智竝以儒學爲名。無能言之。世語稱寔博辯猶不足。以竝裴何之流。又案輅自說云。本命在寅。則建安十五年生也。至正始九年應三十九。而傳云三十六。以正元三年卒。應四十七。傳云四十八。皆爲不相應也。近有閻續伯者名讚。談徵通物。有良史風。爲天下補綴遺脫。敢以所聞列於篇左。皆從受之于大。人先哲足以取信者。冀免虛誣之譏云爾。嘗受辰傳所謂劉太常者曰。輅始見聞。由于爲鄰婦亡牛。云當在西面窮牆中。縣頭上向。教婦人令視諸丘冢中。果得牛。婦人因以爲藏己牛。告官案驗。乃知以術知。故裴冀州遂聞焉。又云。路破主人靈。婦從靈中出。劉侯云。甚多此類。辰所載纔十一二耳。輅與共闕。具如其言。豚逸走。卽共追之。豚入舍。突云輅在田舍。嘗候遠鄰。主人患數失火。輅卜。教使明日于南陌上伺。當有一角中諸生駕黑牛故車。必引留爲設賓主。此能消之。卽從。輅戒諸生有急求去。不聽。遂留當宿。意大不安。以爲圖己。主人罷入。生乃把刀出門。倚兩薪積間。側立假寐。欸有一小物直來過前。如獸。手中持火。以口吹之。生驚舉刀斫。正斷視視之則狐。自此主人不復有災。前長廣太守陳承祐口授城門校尉華長駿語云。昔其父爲清河太守時。召輅作吏。駿與少小。復以鄉里。遂加恩意。常與

同載周旋。具知其事。云諸要驗。三倍于傳。辰既短才。又年歲小。又多在田舍。故益不詳。辰仕宦至州主簿部從事。大康之初物故。駿又云。輅卜亦不悉中。十得七八。駿問其故。輅云。理無差錯。來卜者或言不足以宣事實。故使爾。華城門夫人者。魏故司空塚郡盧公女也。得疾。連年不差。華家時居西城下南纏里中。三殿在其東南。輅卜當有師從東方來。自言能治。便聽使之。必得其方。後無何。有南征廢驕當充甲卒來詣盧公。言能治女郎。公即表請留之。專使其子將詣華氏療疾。初用散藥。後復用丸。治尋有效。即奏除驕名。以補太醫。又云。隨輅父在利漕時。有治下屯民捕鹿者。其晨行還見毛血。人取鹿處來詣廢告輅。輅爲卦語云。此有盜者。是汝東巷中第三家也。汝還往門前。伺無人時。取一瓦子密發其碓屋東頭第七椽。以瓦著下。不過明日。食時。自送還汝。其夜盜者父病頭痛。壯熱煩疼。然亦來詣輅卜。輅發崇。盜者具伏。輅令擔皮肉臙還著故處。病當自愈。乃密教鹿主往取。又語使復往如前。舉椽粟瓦。盜父亦差。又都尉治內史有失物者。輅使明晨于寺門外看當逢一人。使指天畫地。舉手四向。自當得之。暮果獲於故處矣。

議曰。建平之相宣之占夢。億則屢中小數之雋也。至於公明通占相合卜筮。衍象數。傳諸義理。深造天人之際。則技進於道矣。其勉何晏以元凱輔堯舜。周公相成王。視鄧颺爲死人。謂爲鬼幽鬼躁。則有儒者之風。非直技術之士也。

續後漢書卷第七十二下

列傳第六十九下

技術

吳

吳範

劉惇

趙達

陳訓

葛洪

謹案吳範傳闕

劉惇字正仁平原人也。遭亂避地客游廬陵。事孫輔。以明天官。達占數。顯於南土。每有水旱寇賊。皆先時處期。無不中者。輔以爲軍師。軍中咸敬事之。號曰神明。建安中。孫權在豫章時。有星變。以問惇。惇曰。災在丹陽。權曰。何如。曰。客勝主人。到某日當得問。謹案。問。陳志作聞。是時邊鴻作亂。卒如惇言。惇於諸術皆善。尤明太乙。皆能推演其事。窮盡要妙。著書百餘篇。名儒刁元稱以爲奇。惇亦寶愛其術。不以告人。故世莫得而明也。趙達。河南人也。少從漢侍中單甫受學。用思精密。謂東南有王者氣。可以避難。故脫身渡江。治九宮一算之術。究其微旨。是以能應機立成。對問若神。至計飛蝗。射隱伏。無不中效。或難曰。飛者固不可校。誰知其然。此殆妄爾。達使其人取小豆數斗。播之席上。立處其數。驗覆果信。嘗過知故。知故爲之具食。食畢。謂曰。

倉卒乏酒。又無嘉穀。無以敘意。達因取盤中隻箸。再三縱橫之。乃言卿東壁下有美酒一斛。又有鹿肉三斤。何以辭無。時坐有他賓。內得主人情。主人慙曰。以卿善射。有無欲相試爾。竟效如此。遂出酒。又有書簡。上作千萬數。著空倉中。封之。令達算之。達處如數。云但有名無實。其精微若是。惜其術自闕澤。殷禮皆名儒善士。親屈節就學。達祕而不告。太史丞公孫滕少師事達。勤苦累年。達許教之者有年數矣。臨當喻語。而輒復止。滕他日齋酒具候顏色。拜跪而請。達曰。吾先人得此術。欲圖爲帝王師。至仕來三世。不過太史郎。誠不欲復傳之。且此術微妙。頭乘尾除一算之法。父子不相語。然以子篤好不倦。今真以相授矣。飲酒數行。達起取素書兩卷。大如手指。達曰。當寫讀此。則自解也。吾久廢不復省之。今欲思論一過。數日當以相與。滕如期往。至乃陽求索書。驚言失之。云女壻昨來。必是渠所竊。遂從此絕。初孫權行師征伐。每令達有所推步。皆如其言。權問其法。達終不語。由此見薄。祿位不至。初權稱尊號。令達算作天子之後。當復幾年。達曰。昔高祖建元十二年。陛下倍之。權大喜。後果如達言。達嘗笑謂諸星氣風術者曰。當迴算帷幕。不出戶牖。以知天道。而反晝夜暴露。以望氛祥。不亦難乎。閒居無爲。引算自校。乃歎曰。吾數訖盡。某年月日。其終矣。達妻數見達效。聞而哭泣。達欲弭妻意。乃更算言。向者謬誤爾。尙未也。後如期死。權聞達有書求之不得。乃錄問其女。及發棺。無所得。法術絕焉。

原注。孫盛曰。夫元覽未然。逆鑿來事。雖碑龜梓慎其猶病語。況術之下此者乎。吳史書達知東南當有王氣。故輕舉濟江。魏承漢緒。受命中讖。達不能豫觀兆萌。而流竄吳越。又不知奇術之鄙。見薄于時。安在其能逆視天道。簡審帝王之符瑞哉。昔聖王窺天地之文。以畫八卦之象。故虜虜成于著策。變化形乎六爻。是以三易雖殊。卦繇理一。安有迴轉一籌。可

以鈎深測隱。意對逆占。而能逢知來物者乎。流俗好異。妄說神奇。不幸之中。仲尼所棄。是以君子志其大者。無所取諸。裴松之以爲盛云。君子志其大者。無所取諸。故評家之旨。非新聲也。其餘所譏。則皆爲非理。自中原酷亂。至于建安。數十年間。生民殆盡。比至小康。皆百死之餘爾。江左雖有兵革。不能如中國之甚也。焉知達不算其安危。知禍有多少。利在東南。以全其身乎。而實不知魏氏將興。流播吳越。在京房之儔。猶不能自免刑戮。況達但以祕術見薄。在悔吝之間乎。古之道術。蓋非一方。探頭之功。豈惟六爻。苟得其要。則可以易而知之矣。迴轉一籌。胡足怪哉。達之推算。窮其要妙。以知幽測隱。何愧于古。而以禱梓限之。謂達爲妄。非篤論也。謹案。目錄附皇象傳。今闕。

陳訓字道元。歷陽人也。好祕學。天文算歷。陰陽占候。無不畢綜。尤善風角。孫皓以爲奉禁都尉。使占候。皓政嚴酷。訓知必敗。而不敢言。時錢唐湖開。或言天下當太平。青蓋入雒。皓以問訓。訓曰。臣止能望氣。不能達湖之開塞。退而告其友曰。青蓋入雒。將有輿櫬銜璧之事。非吉祥也。旣而吳亡。訓入晉。拜諫議大夫。俄去職還鄉。及陳敏作亂。遣弟宏爲歷陽太守。訓謂邑人曰。陳家無王氣。不久當滅。宏聞將斬之。訓鄉人秦璩爲宏參軍。說宏曰。訓善風角。可試之。如不中。徐斬未晚也。宏攻征東參軍衡彥于歷陽。問訓曰。城中有幾千人。攻之可拔不。訓登牛渚山望氣曰。不過五百人。然不可攻。攻之必敗。宏復大怒曰。何有五百人攻五百人。而有不得理。遂攻之。果爲彥所敗。方信訓有道術。乃優遇之。都水參軍淮南周亢嘗問訓以官位。訓曰。君至卯年當剖符近郡。酉年當有曲蓋。亢曰。脫如所言。當相薦拔。訓曰。性不好官。惟欲得米爾。後亢果爲義興太守。金紫將軍。時劉聰王彌寇雒陽。歷城太守武瑕問訓曰。國家人事何如。訓曰。胡賊三逼。國家當敗。天子野死。今尙未也。其後懷愍二帝果有平陽之禍。或問明年吉凶。訓曰。揚州刺史死。武昌大火。上方節將亦當死。至時劉陶州周訪皆卒。武昌大火燒數千家。時甘卓爲歷陽太守。訓私謂所親曰。甘侯

頭低而視仰。名爲盼刀。又自有赤脈。自外而入。不出十年。必以兵死。不領兵則可以免。卓果爲王敦所害。丞相王導多病。每自憂慮。以問訓。訓曰。公耳豎垂肩。必壽。亦大貴。子孫當興于江東。咸如其言。年八十餘卒。

議曰。範等吳之精於術數者也。陰機奇中。鬼神所惡。故不敢語諸人。傳諸子孫。猶爲造物所忌。往往不得其死。謂之殺身之學。人君之術。在于修己。用人以安百姓。區區小數。不足學也。孫權必欲知其訣。傳其道。以不得而擯薄之。豈知君人之道哉。陳訓官爲奉祭。畏皓不言。知矣哉。

葛洪謹案。晉書。字稚川。

丹陽句容人也。祖系吳大鴻臚。父悌。吳亡入晉爲邵陵太守。洪少學。家貧。樵薪以買紙墨。

夜則寫書誦習。遂以儒學知名。性寡欲。無所愛翫。不知碁局。幾道。搏菹齒名。爲人木訥。不好榮利。閉門卻掃。未嘗交游。於餘杭山見何幼道。郭文舉。目擊而已。各無所言。時或尋書問義。不遠數千里。崎嶇冒涉。期於必得。遂究覽典籍。尤好神仙導養之法。從祖元孫權時。學道得仙。號曰葛仙公。以煉丹祕術授弟子鄒隱。洪就隱學。悉得其法。後師事南海太守上黨鮑元。亦內學。逆占將來。見洪深重之。以女妻洪。洪傳元業。兼綜練醫術。凡所著撰。皆精覈是非。而才章富贍。太安中石冰作亂。吳興太守顧祕爲義軍都督。與周玘等起兵討之。祕檄洪爲將兵都尉。攻冰別帥。破之。遷伏波將軍。冰平。洪不論功賞。徑至雒陽求異書。以廣其學。洪見天下已亂。欲避地南土。參廣州刺史嵇含軍事。及含遇害。還鄉里。征鎮檄命。一無所就。及元帝

爲丞相。辟爲掾。以平賊功。賜爵關內侯。咸和初。司徒導召補州主簿。轉司徒掾。遷諮議。參軍。干寶深相親友。薦洪才堪國史。選爲散騎常侍。領大著作。洪固辭不就。以年老欲鍊丹。以祈遐年。聞交趾出丹。求爲勾漏令。帝以洪資高。不許。洪曰。非欲爲榮。以有丹爾。帝從之。洪遂將子姪俱行。至廣州。刺史鄧嶽留不聽去。洪乃止。羅浮山鍊丹。嶽表補東官太守。又辭不就。嶽乃以洪兄子望爲記室參軍。在山積年。著述不輟。其自序曰。洪體乏進趨之才。偶好無爲之業。假令奮翅。則能陵厲元霄。騁足則亦追風躡景。猶欲戢勁翮于鷦鷯之羣。藏逸迹于跛驢之伍。豈況大塊稟我以尋常之短羽。造化假我以至鶩之蹇足。自卜者審。不能者止。豈敢力蒼蠅而慕沖天之舉。策跛鼈而追飛兔之軌。飾嫫母之篤陋。求媒陽之美談。推沙礫之賤質。索千金於和肆哉。夫焦僥之步。而企及夸父之蹤。原注。僥。偏僥。短人。長三尺。近才所以躓礙也。要離之羸。而強赴扛鼎之勢。秦人所以斷筋也。原注。史記。秦武王與孟說舉鼎。絕膂死。膂。脛骨也。戰國策作脈。與此不同。是以望絕於榮華之塗。而志安乎窮圯之域。藜藿有八珍之甘。蓬華有藻枕之樂。權貴之家。雖咫尺不從也。知道之士。雖艱遠必造也。考覽奇書。亦既不少。率多隱語。難可卒解。自非至精。不能尋究。自非篤勤。不能悉見。道士宏博洽聞者寡。而意斷妄說者衆。至于時有好事者。欲有所修爲。倉卒不知所從。而意之所疑。又無足語。今爲此書。羸舉長生之理。其至妙者。不得宣之於翰墨。蓋羸言較略。以示一隅。冀悻憤之徒省之。可以思過半矣。豈謂閤塞必能窮微。暢遠乎。聊論其所先覺者耳。世儒徒知服膺周孔。莫信神仙之書。不但大笑之。又將謗毀真正。故予所著

于言黃白之事名曰內篇其餘駁難通釋名曰外篇大凡內外一百一十六篇雖不足藏諸名山且欲緘之金匱以示識者自號抱朴子因以名書其餘所著碑誄詩賦百卷移檄章表三十卷神仙良吏隱逸集異等傳各十五卷又鈔五經史漢百家之言方技雜事三百一十卷金匱藥方一百卷肘後要急方四卷洪博聞深洽江左絕倫又精辯元隨析理入微後忽與嶽疏云當遠行尋師克期便發嶽得疏狼狽往別而洪坐至日中兀然若睡而卒嶽遂不及語時年八十一視其顏面如生體亦柔軟舉尸入棺輕如空衣世以爲尸解得仙云

謹案葛洪晉人無與三國雖以裴注之博采亦不及洪事此入正傳于限斷爲疏矣

議曰余觀洪所著抱朴子書博雅該貫精窮技術潤色之以儒學鼓吹之以文藻方士之魁傑者也其以爲神仙可至專爲修鍊服餌誤天下後世深矣人配天地用萬物養生之具聖王制作六經備矣其居室其服絲麻其食穀麥果菜魚肉起居有時嗜欲有節不傷之而已其存沒如晝夜之常不祈生而惡死也自周之衰乃有方士爲長生不死神仙之說誘天下以欲而盡其心於是有修鍊服餌之術燒灼其胃腸煎熬其血氣易穀麥以金石潤精液爲鉛汞以求長生不死而徼冀爲神仙往往殺身而札瘥天昏漢晉之初猶祕其術而陰以殺天下至洪著書昌言於世隋唐以來其術盛行世主甘心爲周穆秦王漢武憲稔而下藥殺者數君

原注唐書憲宗服金丹多躁怒左右宜官往往獲罪有死者庚子暴崩於中興殿穆宗初柳泌等既誅方士稍復因左右以進上餌其金石藥疾作崩於慶殿武宗餌方士金丹性

加躁急喜怒不常六年三月帝崩宣宗餌道士藥疽發於背而崩

王公大人焚其身而不知悟者見於載籍不啻數十百人

原注韓文李千墓誌于以進士爲鄂

岳從事。遇方士柳泌從受藥法。服之。往往下血。比四年。病益急。乃死。其法以鉛滿一鼎。案中爲空。實以水銀。蓋封四際。燒爲丹砂云。余不知服食說自何世起。殺人不可計。而世慕尚之益至。此其惑也。在文書所記及耳聞相傳者不說。今直取目見親與之游而以藥敗者六七公。以爲世誠。工部尙書歸登殿中御史李虛中。刑部尙書李遜。遜弟利部侍郎建。臺陽節度使工部尙書孟簡。東川節度御史大夫盧坦。金吾將軍李道古。此其人皆有名位。世所共識。工部既食水銀日。得病自說若有燒鐵杖自顛實其下者。摧而爲火。射竅節以出。狂痛號呼。乞絕其禍席。嘗得水銀。發且止。唾血十數。日以斃。殿中直發其背死。刑部且死。謂余曰。我爲藥誤。其季建一旦無病死。臺陽黜爲吉州司馬。余自袁州還京師。襄陽乘舸邀我於蕭洲。屏人曰。我得祕藥。不可獨不死。今遣子一器。可用囊肉爲丸服之。別一年而病。其家人至。訊之曰。前所服藥誤方。且下之。下則平矣。病二歲竟卒。盧大夫死時潮出血肉。痛不可忍。乞死及。金吾以柳泌得罪。食祕藥五十。死海上。此可以爲誠者也。至今未已也。其禍天下後世如此之酷而洪乃謂世儒不知而謗已。嗚呼。儒不知洪邪。洪不知儒邪。

贊曰。神局與鎖。冥探灼索。揭露陰機。戒之在得。

續後漢書卷第七十三上上

列傳第七十上上

狂士

王弼 荀爽 焦先 扈累 石德林 嵇康 向秀 郭象 孫登 劉伶

禮爲修身之綱。法爲治世之具。所以導民彜。保恆性。軌物則定。王制建皇極。謹天道。故教不肅而成。令不嚴而行。人皆自治。天下無事。所以無爲也。禮主於敬。法主於謹。敬則心不放。非僻邪侈不入。而內直。謹則國有閑。非僻邪侈不爲。而外正。內直外正。心統乎身。國統乎人。內外曲防。而禮法立。禮法立。而人道立矣。自羲皇氏始爲法制。至殷周而極備。人人務爲禮。而天下共守法。所以爲二帝三王之治。仲尼氏之六經。垂萬世之統。之綱。之紀。爲天下大閑。使人終日有爲。而未嘗有爲也。老聃爲禮者也。言道之體。而不及用。一之乎無爲。初未害乎道也。莊周才雄識邁。隘聖人之常。而喜道之變。窮原築底。而又上之。過遠極高。入於虛則蕩。必爲無則罔。以禮爲桎梏。謂放曠爲達。眇天地。蔑萬物。皆以爲土苴。厭然以身心爲疣贅。眇然忘而棄之。直視太初之前。茫然以爲得。託物寓意。馳說騁辯。十餘萬言。自帝堯舜禹湯文武周公孔子。及孔門之高弟。無不毀訾。詬病以尊老聃氏。於是素隱行怪之徒。蓬首垢面。嘯呼而起。人道頽圯。而天下亂。

矣。然爲之者特方士逸民與道家者流爾。名教之人猶未溺乎其中也。漢魏之季，何晏、王弼始好老莊，尚清談，謂之元學。學士大夫翕然景嚮，流風波蕩，不可防制。於是嵇康、阮籍、籍兄子咸、山濤、向秀、王戎、劉伶皆一時名流，跌宕太行之阿，號竹林七賢。蔑棄禮法，褫裂衣冠，穠糝爵祿，汗穢朝廷，婆娑偃蹇，遺落世故，顛顛癡癡，心死病狂，乃敢非薄湯武，至於敗俗傷化，大害名教。或臨喪而劇飲，或途窮而慟哭，或箕踞而爲鍛，或荷鍤以自理，解弛樂浪，曠然以爲高，而咸子瞻、孚、族子修、裕與畢卓、謝鯤、胡母輔之之徒，縱爲奇誕。公卿大夫亦皆從臾，驟敗綱維，頓廢機要，視天下國家，邈然無情。而王衍爲尤甚。卒使八王稱兵，二帝失尊，僭亂之禍，古所未有也。極其志以爲惡師，昭之篡代而爲之，則亦接輿避世之狂人，箕子保身之伴狂也。何至于是然後乃爲狂歟？琴、張、曾、皙、牧、皮、孔子之所謂狂，特以其過高失中爾，未嘗如是也。若嵇、阮諸人非避世也，非保身也，乃真狂爾。故目爲狂士而著於篇。

王弼字輔嗣，侍中粲族孫也。初粲與從兄凱俱避地荊州，劉表欲以女妻粲，而嫌其不揚，以凱有風貌，乃妻凱。凱生業，蔡邕有書近萬卷，盡載與粲。粲卒，相國掾魏諷反，粲二子與焉，旣被誅，曹丕以業嗣粲。邕所與書悉入業，業字長緒，位至謁者僕射。生宏及弼，宏字正宗，終司隸校尉。弼幼聰警，年十餘歲，好老莊書，通辯能言，業爲尙書郎，裴徽爲吏部郎，弼未弱冠，往造焉。徽異之，問弼曰：夫無者誠爲萬物之所資也，然聖人莫肯致言，而老子申之無已者，何也？弼曰：聖人體無，無又不可以訓，故不說也。老子是有者也，故恆

言無所不足。徹甚歎服。尋亦爲傳。叢所知。而何晏尤奇。弼曰。仲尼稱後生可異。若斯人者。可與言天人之際矣。正始中。黃門侍郎累缺。晏既用賈充。裴秀。朱整。又議用弼。時丁謐與晏爭衡。致高邑王黎於曹爽。爽用黎。于是以弼補臺郎。初除覲爽。請間。爽爲屏左右。而弼與論道移時。無所他及。爽嗤之。時爽專政。黨與共相推進。弼通儁。不治名高。尋黎無幾。時病亡。爽用王沈代黎。弼遂不得在爽門。晏爲之歎恨。弼在臺既淺。事功亦雅非所長。益不留意焉。淮南劉陶善論縱橫。爲當時所推。每與弼語。弼天才卓出。當其所得。莫能奪也。性和理。樂游晏。解音律。善投壺。文辭不及何晏。自然有所拔得多。晏也。頗以所長陵人。故爲士君子所嫉。弼與鍾會善。會論議以校練爲家。然每服弼之高致。何晏以爲聖人無喜怒哀樂。其論甚精。鍾會等述之。弼不以爲然。謂聖人茂於人者。神明也。同於人者。五情也。神明茂。故能體沖和。以通無。五情同。故不能無哀樂。以應物。然則聖人之情。應物而無累于物者也。今以其無累。便謂不復應物。失之多矣。弼注易。潁川人荀融難弼大衍義。弼與書曰。夫明足以尋極幽微。而不能去自然之性。顏子之量。孔父之所預。謹案。志鐘會傳注載此書。預注預在。然遇之不能無樂。喪之不能無哀。又常挾謹案。挾志注作挾。斯人以爲未能以情從理者也。而今乃知自然之不可革。足下之量。雖已定乎胷懷之內。然而隔踰旬朔。何其相思之多乎。故知尼父之于顏子。可以無大過矣。弼又注老子。爲之指略。致有理統。著道略論。往往有高麗言。太原王濟好談病老莊。常云。見弼易注。所悟者多。然弼爲人淺而不識物情。初與王黎荀融善。黎奪其黃門郎。於是恨黎。與融

亦不終。正始十年。曹爽廢。以公事免。其秋遇癘疾卒。時年二十四。宋豫章太守范甯著論。論何晏及弼曰。或曰。黃唐緬邈。至道淪翳。濠濮輟詠。風流靡託。爭奪兆於仁義。是非成于儒墨。平叔神懷超絕。輔嗣妙思通微。振千載之頹綱。落罔孔之塵網。斯蓋軒冕之龍門。濠梁之宗匠。嘗聞夫子之論。以爲罪過桀紂。何哉。答曰。子信有聖人之言乎。夫聖人者。德侔二儀。道冠三才。雖皇帝殊號。質文異制。而統天成務。曠代齊趣。王何蔑棄典文。不遵禮度。游辭浮說。波蕩後生。飾華言以翳實。聘繁文以惑世。搢紳之徒。翻然改轍。洙泗之風。緬焉將墜。令仁義幽淪。儒雅蒙塵。禮壞樂崩。中原傾覆。古之所謂言僞而辨。行僻而堅者。其斯人之徒與。昔夫子斬少正於魯。太公戮華氏於齊。豈非曠世而同誅乎。桀紂暴虐。正足以滅身覆國。爲後世鑒戒耳。豈能迴百姓之視聽哉。王何叨海內之浮譽。資膏粱之傲誕。畫螭魅以爲巧。扇無檢以爲俗。鄭聲之亂樂。利口之傾邦。信矣哉。吾固以爲一世之禍輕。歷代之罪重。自喪之釁小。迷衆之愆大也。

荀彧字奉倩。尚書令彧之子。散騎常侍惲之弟也。諸兄並務儒術。而彧獨喜談虛元。常以爲子貢稱夫子之言性與天道不可得而聞。然則六籍雖存。固聖人之糠粃。彧兄侯難曰。易云。聖人立象以盡意。繫辭焉以盡言。則微言胡爲不可得而聞哉。彧曰。理之微者。非物象之所舉也。今稱立象以盡意。此非通于意外者也。繫辭焉以盡言。此非言乎繫表者也。斯則象外之意。繫表之言。固蘊而不出矣。當時能言者不能屈也。又論父彧不如從兄攸。彧立德高整。軌儀以訓物。而攸不治外形。慎密自居而已。彧以此善攸。諸兄怒。

而不能迴也。太和初到京邑，與傅嘏談。嘏善名理，而粲尙元遠。宗致雖同，倉卒時或有格而不相得。裴徽通彼我之懷，爲二家騎驛。頃之粲與嘏善，亦善夏侯元。嘗謂嘏元曰：子等在世塗間，功名必勝我，但識劣我爾。嘏難曰：能功名者識也。天下孰有本不足而末有餘者耶？粲曰：功名者志局之所獎也。然則志局自一物爾，固非識之所獨濟也。我能使子等爲貴，然未必齊子等所爲也。粲常以婦人者才智不足論，自宜以色爲主。驃騎將軍曹洪女有美色，粲娶焉。容服帷帳甚麗，專房歡宴。歷年後，婦病亡，未殯。傅嘏往唁，粲不哭而神傷。嘏問曰：婦人才色並茂，爲難子之妾也。遺才而好色，此自易遇。今何哀之甚？粲曰：佳人難再得，痛悼不能已。歲餘亦卒。時年二十九。

原注：世說粲與婦至篤，冬日婦病熱，乃出中庭自取冷，還以身與之。

粲簡貴不與常人交，至葬夕赴

者裁十餘人，皆同時知名士也。

議曰：孔氏之門，易道傳於顏、曾、子思、孟軻氏。如大學、中庸及七篇，其理皆易，而不及卦爻象數，亦不援引上下經及大傳之文，可謂善藏其用矣。漢儒推本授受之目，則曰孔子傳之商瞿子木，漢興而有田何丁寬，代遠而不見其文，或有見焉。第卜筮占驗之迹，未有言其理者焉。獨王弼之注，著漢魏傳注之學，辭旨簡奧，各就條貫，最爲折中。然後知漢儒之所傳，亦孔門真是之原也。特弼之學流於老莊，時亂其理，於是疵而未醇。惜哉！初晏弼雖好老莊，宗虛元尙清談，猶未敢放言高論。至粲乃無忌憚，輒以六經爲穢，強辨以肆其狂。於是誕妄之徒聞風而起，則粲之罪有甚晏弼者。嗚呼！自謂知道得於象外言表，乃好色而

死於欲其所謂道果何道耶。

焦先字孝然。河東人也。中平末。白波賊起。先年二十餘。與同郡侯武陽避亂。武陽年小有母。先與相扶接。東客揚州。建安初。西還。武陽詣大陽。占戶。先留陝界。復遭亂。失家屬。獨竄河渚間。食草飲水。無衣履。大陽長朱南見之。謂爲亡士。欲遣船捕之。武陽聞而告南曰。是吾友也。狂癡人爾。遂注籍給稟。日五升。後大疫。人多死者。縣常使埋瘞。童兒豎子皆輕易之。然其行不踐邪徑。必循阡陌。及捃拾不取大穗。飢不苟食。寒不苟衣。結草以爲裳。科頭徒跣。每見婦人。則自隱翳。須去乃出。自作蝸廬。灑掃其中。編木爲牀。布草蓐其上。天寒爇火以自炙。呻吟獨語。飢則出爲人客作飽食而已。不取其直。人或遺之食及衣物。不受。或數日一食。或數日不食。於道中與人相遇。輒下道藏匿。或問其故。常言草茅之人。孤兔同羣。未嘗妄語。雖有驚急。亦不遽言。或冒辱之。不顧也。一日爲野火焚其廬。不復結。處草木中。躑躅土枕塊。五形盡露。體如泥漆。冬雪大至。亦臥不移。人以爲死。往視之。卽驚走避之。魏青龍中。嘗持一杖。南渡淺河水。輒獨云未可也。由是人頗疑其不狂。嘉平中。太守賈穆之官過先。先見穆。與語不應。與食不食。穆謂之曰。國家使我來爲卿作君食。卿而不食。與卿語而不應。如是我。不中爲卿作君。當去爾。先乃曰。寧有是耶。遂不復語。明年大發卒伐吳。有竊問先。今討吳何如。先不應。而謬歌曰。祝劬祝劬。非魚非肉。更相追逐。本心爲當殺。群羊更殺其殺。羸耶。郡人不知其謂。會諸軍敗。好事者乃推其意。群羊謂吳。羸羸謂魏。於是人僉謂之隱者也。議郎河

東董經素不識先密往觀之見先奮其鬚髯爲如與之有舊者謂曰阿先闊乎念共避白波時不先熟視不言經知其與武陽厚復曰念武陽不耶先乃曰已報之矣經又復挑與語遂不復應後歲餘病卒時年百餘歲矣安定皇甫謐曰焦先何人也曰吾不足以知之考之於表可略而言矣夫世之所常趣者榮味也形之所不可釋者衣裳也身之所不可離者室宅也口之所不能已者言語也心之所不可絕者親戚也今焦先棄榮味釋衣服離室宅絕親戚閉口不言曠然以天地爲棟宇闔然合至道之前出羣形之表入元寂之幽一世之人不足以挂其意四海之廣不能以回其顧妙乎與三皇之先同矣結繩以來未及其至也豈羣言之所能髣髴常心之所得測量哉彼行人所不能行堪人所不能堪犯寒暑不以傷其性居曠野不以恐其形遭驚急不以迫其慮離榮愛不以累其心捐視聽不以恐其耳目舍足於不損之地居身於獨立之處延年歷百壽越期頤雖上識不能尙也自羲皇以來一人而已矣故梁州刺史耿輔以先爲仙人也傅元謂之性同禽獸並爲之傳云

原注高士傳曰世莫知先所出或言生乎漢末自陝居大陽無父母兄弟妻子見漢世衰乃自絕不言及魏受禪常結草爲

廬于河之涘獨止其中冬夏常不着衣臥不設帶又無草蓐以身親土其體垢汚皆如泥漆五形盡露不行人間或數日一食飲食則爲人賃作不以衣衣之乃使限功受直足得一食輒去人欲多與終不肯取亦有數日不食時行不由邪徑目不與女子逆視口未嘗言雖有驚急不與人語遺以食物皆不受河東太守杜恕嘗以衣服迎見而不與語司馬景王聞而不足安定太守董經因事過視又不肯語經以爲大賢其後野火燒其廬先因露寢選冬雪大至先袒臥不移人以爲死就視如故不以爲病人其審其意度年可百歲餘乃卒

扈累字伯重京兆人也初平中山東人有青牛先生者字正方客三輔曉知星歷風角鳥情常食青菘芫

華如五六十者人或識之謂其已百餘歲矣累年四十餘隨正方游學人謂之得其術謹案志注此下有建安中三輔亂隨正方南入漢中正方入蜀累與相失隨徙民詣鄴遭疾疫喪其婦黃初元年又徙詣洛陽不復娶婦獨居道側以飢力不輒爲障施一廚牀食宿其中晝日潛思夜則仰視吟詠內書人或問之閉口不言嘉平中年八九十若四五十者縣官以其孤老給廩日五升不足食頗爲人傭作飽則復入人與食不食又數年卒百餘歲矣

石德林者

謹案志注云寒貧者本姓石字德林

安定人也建安初客三輔時長安有宿儒樂文博門徒數十謹案志注作數千德林

亦就學始精詩書後好內事於衆輩中最元默關中亂南入漢中不治產業不畜妻孥常讀老子五千文及論內書晝夜吟詠二十五年漢中破隨衆還長安遂伴狂謹案志注作癡愚不復識人食不求味冬夏衣敝布

連結不揜體目如無所見獨居窮巷人與之衣食不受郡縣以其鰥窮給廩日五升食不足頗行乞乞不取多人問其姓字閉口不言故因號之曰寒貧或素知識者往存卹之輒拜而去人因以爲不癡車騎將

軍郭淮以意氣呼之問其所欲亦不言淮因與脯糒及衣不受取脯一胸糒一升而去後不知所往

議曰先等外形骸廢倫類自同土木而羣乎麋鹿直以辟漢之亂故伴狂爾何必爾耶伯夷太公辟紂者也聞文王作興而歸之箕子亦狂者也武王勝殷而事之隱見各以其時爾故孔子曰賢者辟世其次辟地其次辟色其次辟言苟道不行辟之而已又何必狂哉又曰鳥獸不可以同羣吾非斯人之徒與而誰

與。又何必自同麋鹿哉。當是之時。卓紹操懿。篡弑攘奪。固當辟之。昭烈帝室之胄。明於王道。討賊興漢。以孔明之高臥。猶且歸之。先游於雍涼之間。聞其作興。何不從之耶。故先非辟世也。特喪心發狂。至是極爾。其中固無有也。故特列之狂士。皇甫士安儒者也。盛爲稱道。謂羲皇以來所未有。豈知言哉。

嵇康字叔夜。譙國銍人也。其先姓奚。會稽上虞人。以辟怨徙銍。銍有嵇山。家於其側。因以爲氏。謹案。虞預晉書曰。先

自會稽遷于譙之銍縣。改爲嵇氏。取稽字之上。加山以姓。蓋以志其本也。一曰銍有嵇山。家于其側。遂氏焉。兄喜幹敏有治理。歷太僕宗正。康早孤。有奇才。文辭

壯麗。身長七尺八寸。美風儀。而土木形骸。不自藻飾。人以爲龍章鳳姿。天質自然。好老莊。以宗室戚屬。拜

中散大夫。常修養生服食之事。彈琴詠詩。以自娛樂。謂神仙稟之自然。非積學所得。至於導養得理。則安

期彭祖之倫可及也。乃著養生論曰。世或有謂神仙可以學得。不死可以力致者。或云。上壽百二十。古今

所同。過此以往。莫非妖妄者。原注。養生經。黃帝問天老曰。人生上壽一百二十年。此皆兩失其情。請試麤論之。

夫神仙雖不目見。然記籍所載。前史所傳。較而論之。其有必矣。似特受異氣。稟之自然。非積學所能致也。

至于導養得理。以盡性命。上獲千餘歲。下可數百年。可有之爾。原注。養生經。老子曰。人生大期以百二十年爲限。節度護之。可至千歲。而世皆

不精。故莫能得之。何以言之。夫服藥求汗。或有弗獲。而愧情一集。渙然流離。原注。漢書上問左丞相周勃曰。天下一歲決獄幾何。勃謝不知。

問天下錢穀一歲出入幾何。勃又謝不知。汗出洽背。媿不能對。終朝未餐。則囂然思食。而曾子銜哀。七日不食。原注。禮記。曾子謂子思曰。僕

者七夜分而坐。則低迷思寢。內懷殷憂。則達旦不眠。原注。古勁刷理鬢。醇醴發顏。僅乃得之。壯士之怒。赫

然殊觀。植髮衝冠。原注。淮南子。荆軻賦。目裂皆。髮植衝冠。由此言之。精神之於形骸。猶國之有君也。神躁於中而形喪於外。

猶君昏於上。國亂於下也。夫為稼於湯之世。偏有一溉之功者。雖終歸於燋爛。必一溉者後枯。然則一溉

之益。固不可誣也。而世常謂一怒不足以侵性。一哀不足以傷身。輕而肆之。是猶不識一溉之益。而望嘉

穀於旱苗者也。是以君子知形恃神以立。神須形以存。悟生理之易失。知一過之害生。故修性以保神。安

心以全身。愛憎不棲於情。憂喜不留於意。泊然無感而體氣和平。又呼吸吐納。服食養身。使形神相親。表

裏俱濟也。夫種田者一畝十斛。謂之良田。此天下之通稱也。不知區種可百餘斛。原注。汜勝之田。農書上。農區田。大區方深各六寸。

相去七寸。一畝三千七百區。丁男女治十畝。至秋收區三升粟。畝得百斛也。區。鄔侯切。田種一也。至於樹養不同。則功收相懸。謂商無十倍之價。農

無百斛之望。此守常而不知變者也。且豆令人重。榆令人瞑。原注。博物志。食豆三年。則身重行止難。啖榆則瞑不欲覺也。合歡蠲忿。萱草

忘憂。原注。見神農本草。愚智所共知也。葷辛害目。豚魚不養。常世所識也。原注。養生要曰。大葷勿食。葷辛害目。說文曰。豚魚無血。食之皆不利人。蝨處

頭而黑。麝食柏而香。原注。抱朴子。今頭虱着身。皆稍變而白。身虱處頭。皆漸化而黑。則是元素果無定質。移易存乎所漸。本草名醫云。麝香形似蟬。常食柏葉。五月得香。又夏月食蛇。多至寒香。入春

患急痛。以脚別去。着矢溺中覆之。皆有常處。人有遇得。乃勝殺取。頸處險而瘦。齒居晉而黃。推此而言。凡所食之氣。蒸性染身。莫不相應。

豈惟蒸之使重。而無使輕。害之使闇。而無使明。薰之使黃。而無使堅。芬之使香。而無使延哉。故神農曰。上

藥養命。中藥養性者。原注。本草。上藥一百二十種。為君主。中藥一百二十種。為臣。主養性為應人。養生經。上藥養命。五石練形。六芝延年。中藥養

性。合歡蠲忿。萱草忘憂也。誠知性命之理。因輔養以通也。而世人不察。惟五穀是見。聲色是耽。目惑元黃。耳務淫哇。

滋味煎其府藏。醴醪原注：今其腸胃。香芳腐其骨髓。喜怒悖其正氣。思慮銷其精神。哀樂殃其平粹。夫

以叢爾之軀。攻之者非一塗。易竭之身。而外內受敵。身非木石。其能久乎。其自用甚者。飲食不節。以生百

病。好色不倦。以致乏絕。風寒所災。百毒所傷。中道夭於衆難。世皆知笑悼。謂之不善持生也。至于措身失

理。亡之于微。積微成損。積損成衰。從衰得白。從白得老。從老得終。悶若無端。中智以下。謂之自然。縱少覺

悟。咸歎恨於所遇之初。而不知慎衆險於未兆。是猶桓侯抱將死之疾。而怒扁鵲之先見。以覺痛之日爲

受病之始也。原注：韓子。扁鵲謂桓侯曰。君有疾在腠理。猶可湯熨。桓侯不信。後病。迎扁鵲。扁鵲逃。桓侯遂

有桓公午。去簡子首末相距二百八年。史記自爲舛錯。韋昭曰。魏無桓侯。害成於微而救之於著。故有無功之治。

馳騁常人之域。故有一切之壽。仰觀俯察。莫不皆然。以多自證。以同自慰。謂天地之理。盡此而已矣。縱聞

養生之事。則斷以所見。謂之不然。其次狐疑。雖少庶幾。莫知所由。其次自力服藥。半年一年。勞而未驗。志

以厭衰。中路復廢。或益之以吠澮。而泄之以尾閭。原注：莊子。海若曰。天子之水莫大于海。萬川歸之。不知何

尾閭水之從海水出者也。一名沃焦。在東大海之中。尾者在百川之下。故稱尾閭者聚也。水聚族

之處。故稱閭也。在扶桑之東。有一石方圓四萬里。厚四萬里。海水注者無不焦盡。故名沃焦。欲坐望顯報者。或

抑情忍欲。割棄榮願。而嗜好常在耳目之前。所希十年之後。又恐兩失。內懷猶豫。心戰於內。物誘其外。交

賒相傾。如此復敗者。夫至物微妙。可以理知。難以目識。譬猶豫章生七年。然後可覺爾。今以躁競之心。涉

希靜之塗。意速而事遲。望近而應遠。故莫能相終。夫悠悠者。既以未效不求。而求者以不專喪業。偏恃者

以不兼無功。追術者以小道自溺。凡若此類。故欲之者萬無一能成也。善養生者則不然矣。清虛靜泰。少私寡欲。知名位之傷德。故忽而不營。非欲而彊禁也。識厚味之害性。故棄而弗顧。非貪而後抑也。外物以累心不存。神氣以醇白獨著。曠然無憂患。寂然無思慮。又守之以一。養之以和。和理日濟。同乎大順。然後蒸以靈芝。潤以酒醴。晞以朝陽。綏以五絃。無爲自得。體妙心元。忘歡而後樂足。遺生而後身存。若此以往。庶可與羨門比壽。王喬爭年。何爲其無有哉。又以爲君子無私。著論曰。夫稱君子者。心不措乎是非。而行不違乎道者也。何以言之。夫氣清神虛者。心不存于矜尙。體亮心達者。情不繫于所欲。矜尙不存乎心。故能越名教而任自然。情不繫于所欲。故能審貴賤而通物情。物情順通。故大道無違。越名任心。故是非無措也。是故言君子則以無措爲至。以通物爲美。言小人則以匿情爲非。以違道爲闕。何者。匿情矜吝。小人之至惡。虛心無措。君子之篤行也。是以大道言及吾無身。吾又何患。無以生爲貴者。是賢於貴生也。由斯而言。夫至人之用心。故不存有措矣。故曰。君子行道。忘其爲身。斯言是矣。君子之行賢也。不察於有度而後行也。任心無邪。不議於善而後正也。顯情無措。不論於是而後爲也。是故傲然忘賢而賢與度會。忽然任心而心與善遇。儻然無措而事與是俱也。其略如此。尤曉音律。善鼓琴。每撫弄暢適。超然自得。自謂夔曠合爲一人。乃作琴賦曰。余少好音聲。長而翫之。以爲物有盛衰。而此無變。滋味有厭。而此不勑。可以導養神氣。宣和情志。處窮獨而不悶者。莫近於音聲也。是故復之而不足。則吟詠以肆志。吟詠之不足。則寄

言以廣意。然八音之器。歌舞之象。歷世才士。並爲之賦頌。其體制風流。莫不相襲。稱其才幹。則以危苦爲上。賦其聲音。則以悲哀爲至。美其感化。則以垂涕爲貴。麗則麗矣。然未盡其理也。推其所由。似元不解音聲。覽其旨趣。亦未達禮樂之情也。衆器之中。琴德最優。故綴敍所懷。以爲之賦。其辭曰。惟椅桐之所生兮。託峻嶽之崇岡。披重壤以誕載兮。參辰極而高曠。含天地之醇和兮。吸日月之休光。鬱紛紜以獨茂兮。飛英蕤於昊蒼。夕納景于虞淵兮。旦晞幹於九陽。原注。淮南子曰。入于虞淵之汜。楚辭。夕晞余身乎九陽。經千載以待價兮。寂神時而永康。且其山川形勢。則盤紆隱深。崔嵬岑崑。元嶺巉巖。岵嶇嶮嶮。丹崖嶮嶮。青壁萬尋。若乃重巘增起。偃蹇雲覆。邈隆崇以極壯。峒巍巍而特秀。蒸靈液以播雲。據神淵而吐溜。爾乃顛波奔突。狂赴爭流。觸巖舣隈。鬱怒彪休。洶湧騰薄。奮沫揚濤。滂汨澎湃。原注。滂。阻瑟反。汨。莫歷反。滂。滿衡反。滂。普拜反。蟹螯相糾。原注。蟹。於阮反。放肆大川。濟乎中州。安回徐邁。寂爾長浮。澹乎洋洋。縈抱山丘。詳觀其區土之所產毓。與宇之所寶殖。珍怪琅玕。瑤瑾翕絕。叢集累積。免衍於其側。若乃春蘭被其東。沙棠殖其西。涓子宅其陽。原注。列仙傳。涓子者。齊人。好餌朮。著天地人經三十八篇。釣于潭。得符鯉魚中。隱于宕山。能致風雨。造伯陽九山法。淮南王少得文。不能解其音旨。其琴心三篇。有條理焉。玉醴涌其前。元雲陰其上。翔鸞集其巔。清露潤其膚。惠風流其間。疎肅肅以靜謐。密微微其清閒。夫所以經營其左右者。固以自然神麗而足思。願愛樂矣。於是邈世之士。榮期綺季之疇。乃相與登飛梁。越幽壑。援瓊枝。陟峻嶇。以游乎其下。周旋永望。邈若凌飛。邪睨崑崙。俯闕海湄。指蒼梧之迢遞。臨迴江之威夷。悟時俗之多累。仰箕山之餘輝。羨斯嶽之宏敞。心慷慨。

以忘歸情舒放而遠覽接軒轅之遺音慕老童於駝原注。俱。位反。隅欽泰容之高吟原注。山海經。魏山神書童居之。其音常如鐘磬。郭璞注。

書童。老童也。顧頊之子。思元賦。太容吟曰。念哉駝山。在三危西九十里。顧茲梧而興慮。思假物以託心。乃斲孫枝。準量所任。至人據思。制為雅

琴。乃使離子督墨。匠石奮斤。原注。莊子。黃帝亡其元珠。使離婁索之。能視百里之外。見秋毫之末。郢人夔襄薦

法。般僮聘神。原注。夔師夔。魯般僮也。餽會哀則朗密調均。華繪彫琢。布藻垂文。錯以犀象。藉以翠綠。絃以園客之絲。

徽以鍾山之玉。原注。列仙傳。園客者濟陰人也。常種五色香草。積數十年。食其實。一旦有五色神蛾止香樹末。客

纒繭。三十日乃盡訖。則俱去。莫知所如。原注。生桑蠶焉。時有好女夜至。自稱我與君作妻。道蠶狀。客與俱蠶。得百頭繭。皆如蠶

許慎曰。鍾山。北陸無日之地。出美玉。爰有龍鳳之象。古人之形。伯牙揮手。鍾期聽聲。華容灼爚。發采揚

明。何其麗也。伶倫比律。田連操張。原注。漢書黃帝使伶倫自大夏之西。崑崙之陰。取竹于嶰谷。斷兩節間而吹之。以為

韓子。田連成竅。天下善鼓琴者也。原注。黃鍾之宮。制十二簫以聽鳳凰之鳴。以比黃鍾之宮。皆可以生之。是為律本。

然而田連鼓上成竅。擲下而不能成曲。進御君子新聲。膠亮何其偉也。及其初調。則角羽俱起。宮徵相證。參發

並趣。上下累應。踈踈磔磔。美聲將興。固以和昶而足耽矣。爾乃理正聲。奏妙曲。揚白雪。發清角。紛淋浪以

流離。免淫衍而優渥。粲奕奕而高逝。馳岌岌以相屬。沛騰邊而競越。翕韡煜而繁縟。狀若崇山。又象流波。

浩兮湯湯。鬱兮峩峩。怫懣煩冤。紆餘婆娑。陵縱播逸。霍濩紛葩。檢容授節。應變合度。競名擅業。安軌徐步。

洋洋習習。聲烈遐布。含顯媚以送終。飄餘響乎泰素。若乃高軒飛觀。廣廈閒房。冬夜肅清。朗月垂光。新衣

翠縈。纓徽流芳。於是器冷絃調。心閒手敏。觸挽原注。蒲。結反。如志。唯意所擬。初涉淥水中。奏清徵。雅昶唐堯。終

詠微子。原注。堯暢微子皆琴操。寬明宏潤。優游蹠跼。拊絃安歌。新聲代起。歌曰。凌扶搖兮憩瀛洲。要列子兮

爲好仇人。原注。列子名禦寇。與鄭穆公同時。

餐沆瀣兮帶朝霞。眇翩翩兮薄天遊。齊萬物兮超自得。委性命兮任去留。激

清響以赴會。何絃歌之網繆。於是曲引向闌。衆音將歇。改音易調。奇弄乃發。揚和顏。攘皓腕。飛纖指以馳

驚。紛儼囂以流漫。原注。說文。儼。不及也。師。立反。囂。疾言也。徒合反。或徘徊顧慕。擁鬱抑按。盤桓毓養。從容祕翫。爾奮逸風。駭

雲亂。牢落凌厲。布濩半散。豐融披離。斐擘煥爛。英聲發越。采采粲粲。或間聲錯糅。狀若詭赴。雙美並進。駢

馳翼驅。初若將乖。後卒同趨。或曲而不屈。直而不倨。或相凌而不亂。或相離而不殊。時劫倚以慷慨。或怨

嬾。原注。庶反。子。而躊躇。忽飄飄以輕邁。乍留聯而扶疏。或參譚繁促。複疊攢仄。從橫駱驛。奔遯相逼。拊嗟累讚。

間不容息。瓌豔奇偉。殫不可識。若乃閒舒都雅。洪纖有宜。清和條昶。案衍陸離。穆溫柔以怡懌。婉順絃而

委蛇。或乘險投會。邀隙趨危。響原注。音嬰。若離鷗鳴清池。翼若遊鴻翔曾崖。紛文斐尾。綖繆離纒。微風餘音。

靡靡猗猗。或摟掩樸捋。縹緲澈冽。輕行浮彈。明嬾際原注。祭反。七。慧疾而不速。留而不滯。翩緜飄逸。微音迅逝。

遠而聽之。若鸞鳳和鳴。戲雲中。迫而察之。若衆葩敷榮。曜春風。既豐贍以多姿。又善始而令終。嗟姣妙以

宏麗。何變態之無窮。若夫三春之初。麗服以時。乃攜友生。以邀以嬉。涉蘭圃。登重基。背長林。翳華芝。臨清

流。賦新詩。嘉魚龍之逸豫。樂百卉之榮滋。理重華之遺操。原注。舜操也。慨遠慕而長思。若乃華堂曲宴。密友近

賓。蘭肴兼御。旨酒清醇。進南荆。發西秦。紹陵陽。度巴人。變用雜而並起。竦衆聽而駭神。料殊功而比操。豈

笙簫之能倫。若次其曲引所宜。則廣陵止息。東武太山。飛龍鹿鳴。鷓鴣遊絃。原注。八曲。皆琴操也。更唱迭奏。聲若

自然流楚窈窕。懲躁雪煩。下逮謠俗。蔡氏五曲。原注。五曲謂游春。淶水。坐愁。秋思。幽居也。王昭楚妃千里別鶴。原注。三曲皆琴操也。有王者

昭君辭。楚妃樊姬也。有楚妃歎。商陵牧子。作別鶴操。謂鶴一舉千里。故名千里別鶴。猶有一切承間籛乏。亦有可觀者焉。然非夫曠遠者不能與之嬉

遊。非夫淵靜者不能與之閒止。非夫放達者不能與之無忝。非夫至精者不能與之析理也。若論其體勢

詳其風聲。器和故響逸。張急故聲清。間遠故音痺。絃長故徽鳴。性潔靜以端理。含至德之和平。誠可以感

邊心志而發洩幽情矣。是故懷戚者聞之。若不慳原注。慳。七。慳。慘。悽。愀。愴。傷心。含哀懊。不能自禁。其康樂

者聞之。則歛原注。歛。于反。愉。懽。釋。拊。舞。踊。溢。留。連。瀾。漫。嗚。嘍。原注。上烏沒反。下巨略反。終日若和平者聽之。則怡養悅愈

淑穆元真。恬虛樂古。棄事遺身。是以伯夷以之廉。顏回以之仁。比干以之忠。尾生以之信。惠施以之辯。給

萬石以之訥。慎其餘觸類而長。所至非一。同歸殊途。或文或質。總中和以統物。咸日用而不失。其感人動

物。蓋亦宏矣。於時也金石寢聲。匏竹屏氣。王豹輟謳。狄牙喪味。原注。淮南子。淄澠之水合。狄牙嘗而知之。天吳踊躍於重淵。原注。

山海經。朝陽之谷。有神名曰天吳。是為水伯。其形首足尾並八。人面青色。王喬披雲而下墜。舞鸞驚于庭階。游女飄焉而來萃。感天地以致和

況岐行之衆類。嘉斯器之懿茂。詠茲文以自慰。永服御而不厭。信古今之所貴。亂曰。悒悒琴德。不可測兮。

體清心遠。邈難極兮。良質美手。遇今世兮。紛綸翕響。冠衆藝兮。識音者希。孰能珍兮。能盡雅琴。唯至人兮。

其胷懷所寄。以高契難期。每思郢質。所與為神交者。陳留阮籍。河內山濤。豫其流者。河南向秀。沛國劉伶。

籍。兄子咸。琅邪王戎。遂為竹林之遊。世謂之竹林七賢。戎自言與康居山陽二十年。未嘗見其喜慍之色。

康嘗採藥游山澤。會其得意。忽焉忘反。樵蘇者遇之。謂爲神人。至汲郡山中。見孫登。從之遊。登無所言。康辭去。登曰。君性烈而才多識寡。謹案。才多識寡。晉書多字作雋。難乎免矣。康又遇王烈。共入山。得石髓如飴。烈自服半。餘

半與康。皆疑爲石。又於石室中見素書一卷。遽呼康往取。輒不復見。烈乃歎曰。叔夜志趣非常。而輒不遇

命也。山濤將去。選官舉康自代。康乃與濤書告絕曰。足下昔稱吾於潁川。吾常謂之知言。然經怪此意。尙

未熟悉於足下。何從便得之也。前年從河東還。顯宗阿都說足下議以吾自代。原注。晉氏八王故事注。公孫崇字顯宗。魏國人。爲尙書郎。

魏康文集錄注。阿都。呂仲悌。東平人也。康與呂長悌絕交書曰。少知阿都志力閒華。每喜足下家復有此弟。事雖不行。知足下故不知之。足下傍通多可而少怪。

吾直性狹中。多所不堪。偶與足下相知。爾間聞足下遷。惕然不喜。恐足下羞庖人之獨割。引尸祝以自助。

原注。莊子庖人雖不治庖。尸祝不越樽俎而代之。手薦鸞刀。漫之羶腥。故具爲足下陳其可否。吾昔讀書得并介之人。或謂無之。今

乃信其真有爾性。有所不堪。真不可強。今空語同知。有達人無所不堪。外不殊俗。而內不失正。與一世同

其波流。而悔吝不生爾。老子莊周吾之師也。親居賤職。柳下惠東方朔達人也。安乎卑位。吾豈敢短之哉。

又仲尼兼愛。不羞執鞭。子文無欲卿相。而三登令尹。是乃君子思濟物之意也。所謂達能兼善而不渝。窮

則自得而無悶。以此觀之。故堯舜之君世。許由之巖棲。子房之佐漢。接輿之行歌。其揆一也。仰瞻數君。可

謂能遂其志者也。故君子百行殊塗。而同致。循性而動。各附所安。故有處朝廷而不出。入山林而不反之

論。且延陵高子臧之風。長卿慕相如之節。原注。史記。司馬相如字長卿。其觀名之犬子。相如既學。慕相如之爲人。更名相如。志氣所託。不可奪也。

吾每讀向子平。慕孝威傳。慨然慕之。想其爲人。

原注。英雄記。向子平有道術。爲縣功曹。休歸。自入山擔薪賣。以供食飲。後漢書。向子平隱居不仕。惟向中和好。通老易。向

向不同。未詳。養終者。字孝威。魏郡人。隱于武安山。鑿穴爲居。采藥爲業。

少加孤露。母兄見驕。不涉經學。性復疏嬾。筋肉緩頭。面常一月十

五日不洗。不大悶癢。不能沐也。每常小便而忍不起。令胞中略轉乃起爾。又縱逸來久。情意傲散。簡與禮相背。嬾與慢相成。而爲儕類見寬。不攻其過。又讀莊老。重增其放。故使榮進之心日頽。任實之情轉篤。此由禽鹿少見馴育。則服從教制。長而見羈。則狂顧頓繆。赴蹈湯火。雖飾以金鑣。饜以嘉肴。逾思長林而志在豐草也。阮嗣宗口不論人過。吾每師之。而未能及。至性過人。與物無傷。惟飲酒過差爾。至爲禮法之士所繩。疾之如讎。幸賴大將軍保持之爾。吾不如嗣宗之賢。而有慢弛之闕。又不識人情。闇于機宜。無萬石之慎。而有好盡之累。久與事接。疵釁日興。雖欲無患。其可得乎。又人倫有禮。朝廷有法。自惟至熟。有必不堪者七。甚不可者二。臥喜晚起。而當關呼之不置。一不堪也。抱琴行吟。弋釣草野。而吏卒守之。不得妄動。二不堪也。危坐一時。痺不得搖。性復多蝨。把搔無已。而當裹以章服。揖拜上官。三不堪也。素不便書。又不喜作書。而人間多事。堆案盈几。不相酬答。則犯教傷義。欲自勉強。則不能久。四不堪也。不喜弔喪。而人道以此爲重。已爲未見恕者所怨。至欲見中傷者。雖瞿然自責。然性不可化。欲降心順俗。則詭故不情。亦終不能獲無咎無譽。如此五不堪也。不喜俗人。而當與之共事。或賓客盈坐。鳴聲聒耳。囂塵臭處。千變百伎。在人目前。六不堪也。心不耐煩。而官事執掌。機務纏其心。世故繁其慮。七不堪也。又每非湯武而薄周孔。

在人間不止此事會顯。世教所不容。此甚不可一也。剛腸疾惡。輕肆直言。遇事便發。此甚不可二也。以促
中小心之性。統此九患。不有外難。當有內病。寧可久處人間耶。又聞道士遺言。餌尤黃精。令人久壽。意甚
信之。遊山澤。觀魚鳥。心甚樂之。一行作吏。此事便廢。安能舍其所樂而從其所懼哉。夫人之相知。貴識其
天性。因而濟之。禹不偪伯成子高。全其節也。仲尼不假蓋於子夏。護其短也。原注。家語。孔子將行。兩無蓋。商之爲人也。嚮短于財。吾聞喪人交者。推其長者。達其短者。故能久也。近諸葛孔明不偪元直以入蜀。華子魚不強幼安以卿相。此可謂能相

終始真相知者也。足下見直木必不可以爲輪。曲者必不可以爲桷。蓋不欲以枉其天才。令得其所也。故

四民有業。各以得志爲樂。惟達者爲能通之。此足下度內爾。不可自見好章甫。強越人以文冕也。原注。莊子。宋人

資章甫而適越。越人敦髮文身。無所用之。敦。斷也。已嗜臭腐。養鷓鴣以死鼠也。原注。莊子。惠子相梁。莊子往見之。或謂惠子曰。莊子來

日。南方有鳥。名鷓鴣。子知之乎。夫鷓鴣發南海而飛於北海。非梧桐而不止。非竹實而不食。非醴泉而不飲。于是鷓鴣得腐鼠。鷓鴣過之。仰天而視之曰。嚇。今子欲以子國嚇我耶。吾頃學養生之術。方外

榮華去滋味。游心於寂寞。以無爲爲貴。縱無九患。尙不顧足下所好者。又有心悶疾。頃轉增篤。私意自試

不能堪其所不樂。自卜已審。若道盡塗窮。則已爾。足下無事。寃之令轉於溝壑也。吾新失母兄之歡。意常

悽切。女年十三。男年八歲。未及成人。況復多病。顧此悵悵。如何可言。今但願守陋巷。教養子孫。時與親舊

敘闊。陳說平生。濁酒一盃。彈琴一曲。志願畢矣。足下若騶之不置。原注。騶。擿擿也。音義與饒同。奴了反。不過欲爲官得人。以

益時用爾。足下舊知吾潦倒羸疏。不切事情。自惟亦皆不如今日之賢能也。若以俗人皆喜榮華。獨能離

之以此爲快。此最近之可得言爾。然使長才廣度。無所不淹。而能不營。乃可貴爾。若吾多病。困欲離事。自全以保餘年。此真所乏爾。豈可見黃門而稱貞哉。若趨欲共登王塗。期於相致。時爲歡益。一旦迫之。必發

其狂疾。自非重怨。不至於此也。野人有快炙背而美芹子者。欲獻之至尊。原注。列子。宋國有田父。常衣澗

廣廩。室絲續狐貉。顧謂其妻曰。負日之暄。人莫知之。以獻吾君。將有賞也。其室告之曰。雖有區區之意。亦已疏矣。昔人有美戎菽。甘棠。整芹。萍子者。對鄉豪稱之。鄉豪取嘗之。苦于口。慘于腹。棄之。雖有區區之意。亦已疏矣。願足下勿似之。其意如此。既以解足下。并以爲別。司馬昭見而惡之。康性好鍛。宅中一柳。甚茂。激水圍

之。當盛夏。袒裼鍛於其下。以爲樂。時鍾會有寵於昭。聞康名而造焉。康箕踞而鍛。不爲之禮。會將去。康曰。何所聞而來。何所見而去。會曰。聞所聞而來。見所見而去。遂深銜之。東平呂安慕康高致。每一相思。輒千

里命駕。其後安兄巽誣安不孝。康爲證其不然。安遂逮繫。會因言於昭曰。康臥龍也。不爲公起。公無憂天

下。願以康爲慮爾。且聞康欲助田丘儉。昔齊戮華士。魯誅少正卯。原注。韓子。太公封於齊東海上。有居士任

諸侯。耕而食之。掘而飲之。吾無求於人也。無上之名。無君之祿。不事仕而事力。太公使執而殺之。以爲首誅。周公從魯聞之。急傳而問曰。二子賢者也。今日變國。殺之何也。太公曰。是昆弟立議曰。不臣天子。是望不得而臣也。不

友諸侯。是望不得而使也。耕而食之。掘而飲之。是望不得以賞罰勸禁也。且夫君之所以使臣者。非爵祿則刑罰也。今四者不足。以使之。則望誰爲君乎。是以誅也。家語。孔子爲魯相。攝朝七日而誅少正卯。門人進問曰。夫少正卯魯之聞

人也。夫子爲政而始誅之。得無失乎。孔子曰。居。吾語汝其故。人有惡者五。而盜竊不與焉。一曰身達而險。二曰行僻而堅。三曰言僞而辯。四曰記醜而博。五曰順非而澤。此五者有一於人。則不得免於君子之誅。而少正卯兼有之。故

居處足以聚徒成羣。言談足以飾邪營衆。彌禦足以反是獨立。此小人之桀雄也。不可不誅也。

誠以害時亂教。聖賢不得不誅爾。康等言論放蕩。無父無君。毀譽湯武。非聖無法。且潛圖不軌。宜因釁除去。以懿風俗。昭遂殺安及康。原注。世語。田丘儉反。康有力。且欲起兵應之。以問山濤。山濤曰。

不可。儉亦已敗。裴松之曰。本傳云。康以景元中坐事誅。而于寶。孫盛。習鑿齒諸書。皆云正元二年。司馬文王反。自樂嘉。殺禮康呂安。蓋緣世語云。康欲舉兵應毘丘儉。故謂破儉便應殺康也。其實不然。山濤爲選官欲舉康自代。康書告絕。事之明審者也。案濤行狀。濤始以景元二年除吏部郎。景元與正元相較七八年。以濤行狀檢之。如本傳爲書。又鍾會傳亦云會作司隸校尉誅康。會作司隸景元中也。干寶云。呂安兄巽善於鍾會。巽爲相國掾。俱有寵於司馬文王。故遂抵安罪。尋文王以景元四年鍾鄒平蜀後始授相國位。若巽爲相國掾。時陷安。焉得以破毘丘儉年殺禮呂。此又干寶之疏謬自相違伐也。康始逮獄作幽憤詩曰。嗟余薄祜。少遭不造。哀焚靡識。越在襁褓。母兄鞠育。有慈無威。恃愛肆姐。不訓不師。爰及冠帶。憑寵自放。抗心希古。任其所向。託好老莊。賤物貴身。志在守璞。養素全真。曰余不敏。好善闇人。子玉之敗。屢增惟塵。大人含宏。藏垢懷恥。民之多僻。政不由己。惟此褊心。顯明臧否。感悟思愆。恒若創痛。欲寡其過。謗議沸騰。性不傷物。頻致怨憎。昔慚柳惠。今愧孫登。內負宿心。外惡良朋。仰慕嚴鄭。樂道閒居。與世無營。神氣晏如。咨予不淑。嬰累多虞。匪降自天。實由頑疏。理弊患結。卒致囹圄。對答鄙訊。繫此幽阻。實恥訟免。時不我與。雖曰義直。神辱志沮。澡身滄浪。豈云能補。噉噉鳴雁。奮翼北遊。順時而動。得意忘憂。嗟我憤歎。曾莫能儔。事與願違。遭茲淹留。窮達有命。亦又何求。古人有言。善莫近名。奉時恭默。咎悔不生。萬石周慎。安親保榮。世務紛紜。祇攪予情。安樂必誠。乃終利貞。煌煌靈芝。一年三秀。予獨何爲。有志不就。懲難思復。心焉內疚。庶勗將來。無聲無臭。采薇山阿。散髮巖岫。永嘯長吟。頤性養壽。將刑東市。太學生三千人請以爲師。勿許。康顧視日影。索琴彈之曰。昔袁孝尼嘗從吾學。廣陵散。吾每靳之。廣陵散于今絕矣。時年四十。海內之士。莫不寃之。初康嘗遊洛西。宿華陽亭。彈琴至夜分。忽有客謁康。自稱爲古人。與康共談。辭致清辨。因索琴彈之。而爲廣陵散。

聲調絕倫。遂以授康。誓不傳人。亦不言其姓字。故康臨終。以自寓云。康撰集高士自上古至管寧。凡一百一十九人。爲之傳贊。又作太師箴。以明帝王之道。復作聲無哀樂論。甚有條理。子紹爲侍中。死。蕩陰之難。原注。晉書。紹字延祖。十歲而孤。事母孝謹。以父得罪。靖居私門。山濤領選。啓武帝曰。康諳有言。父子罪不相及。稽紹賢侔。卻缺。宜加旌命。起家爲祕書丞。累遷侍中。王師敗績于蕩陰。百官侍衛莫不散潰。惟紹端冕。以身捍衛。遂被害于帝側。血濺御服。帝深哀歎之。左右欲浣衣。帝曰。此穉侍中血。勿浣也。

向秀字子期。河內懷人也。清悟有遠識。少爲山濤所知。雅好老莊。著莊周書隱解。發明宗趣。振起虛元。惠帝世。郭象又述而廣之。儒術之迹熄。而道家之言盛矣。始秀欲注莊。嵇康曰。此書詎復須注。正是妨人作樂爾。及成。示康曰。殊復勝不。又與康論養生。辭難往復。蓋欲發康高致也。康善鍛。秀爲之佐。相對欣然。傍若無人。又與呂安灌園於山陽。康旣被誅。秀應本郡計入雒。司馬昭問曰。聞有箕山之志。何以在此。秀曰。巢許狷介之士。未遑堯心。豈足多慕。昭甚悅。秀乃作思舊賦云。余與嵇康。呂安。居止接近其人。並有不羈之才。嵇意遠而疏。呂心曠而放。其後並以事見法。嵇博綜伎藝。于絲竹特妙。臨當就命。顧視日影。索琴而彈之。逝將西邁。經其舊廬。於時日薄虞淵。寒冰淒然。鄰人有吹笛者。發聲寥亮。追想曩昔游宴之好。感音而歎。故作賦曰。將命適於遠京兮。遂旋反而北徂。濟黃河以泛舟兮。經山陽之舊居。瞻曠野之蕭條兮。息余駕乎城隅。踐二子之遺跡兮。歷窮巷之空廬。歎黍離之愍周兮。悲麥秀於殷墟。追古昔以懷今兮。心徘徊以躊躇。棟宇存而弗毀兮。形神逝其焉如。昔李斯之受罪兮。歎黃犬而長吟。悼嵇生之永辭兮。顧日影

而彈琴。託運遇於領會兮。寄餘命於寸陰。聽鳴笛之慷慨兮。妙聲絕而復尋。佇駕言其將邁兮。故援翰以寫心。後爲散騎侍郎。轉黃門侍郎。散騎常侍。在朝不任職。容迹而已。卒於位。

郭象者字子元。好老莊。能清言。太尉王衍深歎異之曰。聽象語如縣河瀉水。注而不竭。然爲人無行。初秀著莊子隱解。惟秋水至樂二篇未竟而卒。秀子幼。不復綴緝。遷流於世。象乃竊秀義以爲己注。惟自注秋水至樂二篇及易馬蹄一篇。其餘或點定文句而已。其後秀義別本出而不行。至今惟行象注云。謹案。晉書作故今

有向郭二莊。

孫登字公和。汲郡共人也。無家屬。於郡北山爲土窟居之。夏則編草爲裳。冬則被髮自覆。好讀易。撫一弦琴。見者皆親樂之。性無恚怒。人或投諸水中。欲觀其怒。旣出。便大笑。時游人間。或設衣食。一無所受。嘗住宜陽山。有作炭人見之。知非常人。與語。登亦不應。司馬昭聞之。使阮籍往觀。旣見。與語。亦不應。嵇康又從之游三年。問其所圖。終不答。康每歎息。將別。謂曰。先生竟無言乎。登乃曰。子識火乎。火生而有光。而不用其光。果在于用光。人生而有才。而不用其才。果在於用才。故用光在乎得薪。所以保其耀。用才在乎識真。所以全其年。今子才多識寡。難乎免于今之世矣。子無求乎。康不能用。果遭非命。乃作幽憤詩曰。昔慙柳下。今愧孫登。或謂登以魏晉去。就易生嫌疑。故爲嘿者也。竟不知所終。

劉伶字伯倫。沛國人也。貌甚癡。放情肆志。常以小宇宙齊萬物爲心。與阮籍嵇康相遇。欣然神解。攜手入

林不以生產介意。常乘鹿車。攜一壺酒。使人荷鍤隨之。謂死便埋我。嘗渴甚。求酒于其妻。妻捐酒毀器。涕泣諫曰。君酒太過。非攝生之道。伶曰。吾不能自禁。惟當祝鬼神自誓爾。便可具酒肉。妻從之。伶跪祝曰。天生劉伶。以酒爲名。一飲一斛。五斗解醒。婦人之言。慎不可聽。乃引酒御肉。隗然復醉。嘗醉與俗人相忤。其人攘袂奮拳而往。伶徐曰。雞肋不足以當尊拳。其人笑而止。伶雖陶兀昏放。而機應不差。未嘗厝意文翰。惟著酒德頌一篇。其辭曰。有大人先生。以天地爲一朝。萬期爲須臾。日月爲扃牖。八荒爲庭衢。行無轍迹。居無室廬。幙天席地。縱意所如。止則操卮執觚。動則挈榼提壺。惟酒是務。焉知其餘。有貴介公子。搢紳處士。聞吾風聲。議其所以。乃奮袂攘襟。怒目切齒。陳設禮法。是非鋒起。譚案。毛本晉書作峰起。注一作鋒。先生於是方捧罌承槽。銜盃漱醪。奮髯箕踞。枕麴藉糟。無思無慮。其樂陶陶。兀然而醉。恍爾而醒。靜聽不聞雷霆之聲。熟視不見泰山之形。不覺寒暑之切肌。嗜欲之感情。俯觀萬物。擾擾焉。如江漢之載浮萍。二豪侍側焉。如蜾蠃之與螟蛉。嘗爲建威參軍。泰始初對策。盛言無爲之化。時輩皆以高第得調。伶獨以無用罷。以壽終于家。議曰。易曰。天地閉。賢人隱。又曰。否之匪人。不利君子貞。陰長陽消。臣弑君子。弑父無復人道。君子隱而已矣。又何必外形骸以自穢。必如楚狂桑扈。然後爲達耶。原注。莊子。子桑戶。孟子反。子琴張三人相與友曰。執能相與。子無相與。相爲子死。孰能登天遊霧。撓挑無極。相忘以生。無所終窮。三人相視而笑。莫逆于心。遂相與友。莫然有問。而子桑戶死。未葬。孔子聞之。使子實往待事焉。或編曲。或鼓琴。相和而歌曰。嗟來桑戶乎。嗟來桑戶乎。而已反其真。而我猶爲人。猶。子實趨而進曰。敢問臨尸而歌。禮乎。二人相視而笑曰。是惡知禮意。子實反以告夫子曰。彼何人者耶。修行無有而外其形骸。臨尸而歌。顏色不變。無以命之。彼何人者耶。孔子曰。彼遊方之外者也。嵇康諸人皆以逸才

不能好遯。遂爲狂人。老莊之術誤之也。司馬氏父子方放弑攘竊。踵武操丕。厭然自以爲舜禹。康乃非薄湯武。謂皆以臣弑君。揭觸所忌。其能免乎。著論養生而卒殺身。豈知養生之道哉。太上養心。其次養生。喪心病狂。身死久矣。又奚養生爲。公和風度邁往。高出物表。重閉不泄。古之避世之士也。至于被髮穴處。草衣木食。絕去倫類。委棄世教。雖自同無懷之民。亦接輿之狂也歟。

續後漢書卷第七十三上下

列傳第七十上下

狂士

阮籍從子

阮咸子瞻

阮籍字嗣宗。丞相掾瑀之子也。籍容貌瓌傑。辭藻豔逸。志氣宏放。傲然獨得。或閉戶視書。累月不出。或登臨山水。經日忘歸。博覽羣籍。尤好老莊。嗜酒善嘯。能鼓琴。當其得意。忽忘形骸。時人謂之癡。惟族兄文業每歎異之。以爲勝己。籍嘗隨叔父至東郡。兗州刺史王昶請與相見。終日不交一言。太尉蔣濟聞其有雋才而辟之。籍詣都亭奏記曰。伏惟明公以合一之德。據上台之位。英豪翹首。俊賢抗足。開府之日。人人自以爲掾屬。辟書始下。而下走爲首。昔子夏在於西河之上。而文侯擁篲。鄒子處於黍谷之陰。而昭王陪乘。原注。劉向別錄。鄒衍在燕。有谷地美而寒。不生五穀。鄒子居之。吹律而溫。至黍生。今名黍谷。方士傳言鄒子在燕。其遊諸侯畏之。皆郊迎而擁篲。夫布衣章帶之士。孤居特立。王公大人所以禮下之者。爲道存也。今籍無鄒卜之道。而有其陋。猥見採擇。無以稱當。方將耕於東臯之陽。輸黍稷之餘稅。負薪疲病。足力不強。補吏之召。非所克堪。乞迴謬恩。以光清舉。初濟恐籍不至。得記欣然。遣卒迎之。而籍已去。濟大怒。于是鄉親共喻之。乃就吏。後謝病歸。復爲尙書郎。未幾而又以病免。及曹爽輔政。

召爲參軍籍以疾辭屏居田里歲餘爽誅司馬懿以爲從事中郎懿卒司馬師復引爲大司馬從事中郎曹髦立封關內侯轉散騎常侍籍本有濟世志屬魏晉之際天下多故名士少得全者由是不與世事常爲酣飲司馬昭欲爲武帝求婚于籍籍醉六十日不得言而止鍾會數以時事問之欲因其可否而致之罪皆以酣醉獲免及昭輔政籍從容言于昭曰籍平生會遊東平樂其風土昭大悅卽拜東平相籍乘驢到郡壞府舍屏障使內外相望法令清簡旬日而還昭引爲大將軍從事中郎有司言有子殺母者籍曰嘻殺父乃可至殺母乎坐者怪其失言昭曰殺父天下之極惡而以爲可乎籍曰禽獸知母而不知父殺父禽獸之類也殺母禽獸之不若衆乃悅服籍聞步兵廚營人善釀有貯酒三百斛乃求爲步兵校尉遺落世事雖去佐職恆遊府內朝宴必與焉會昭讓九錫公卿將勸進使爲其辭籍沈醉忘作臨詣府使取之見籍方據案醉眠使者以告籍便書案使寫之無所改竄辭甚清壯爲時所重籍雖不拘禮教然發言元遠不減否人物性至孝母終正與人鬪基對者求止籍留與決旣而飲酒數斗舉聲一號吐血數升及將葬食一蒸肫飲酒二斗然後臨訣直言窮矣舉聲一號又吐血數升毀瘠骨立殆至滅性裴楷往弔之籍散髮箕踞醉而直視楷弔唁畢便去或問楷凡弔者主哭客乃爲禮籍旣不哭君何爲哭楷曰阮籍旣方外之士故不崇禮典我俗中之士故以軌儀自居各得其志爾原注晉書虞預雅好經史憎嫉元虛謂阮籍裸袒比之伊川被髮籍能爲青白眼見禮俗之士以白眼對之及嵇喜來弔籍作白眼喜不懌而退喜弟康聞之齋酒挾琴造焉籍大

悅乃見青眼。由是禮法之士疾之若讐。司隸校尉何曾面質籍于司馬昭坐曰：卿縱情背禮，敗俗之人。今忠賢執政，綜核名實，若卿之曹不可長也。因謂昭曰：公方以孝治天下，而聽阮籍以重哀飲酒食肉于公座，何以訓人？宜擯之。四裔無令污染華夏。昭愛籍才，常擁護之。籍嫂嘗歸寧，籍相見與別，或譏之。籍曰：禮豈爲我設邪？鄰家少婦有美色，嘗釀酤酒，常詣婦飲酒，醉便臥其側。籍既不自嫌，其夫察之亦不疑也。兵家女有才色，未嫁而死，籍不識其父兄，徑往哭之。盡哀而還。時率意獨駕，不由徑路，車迹所窮，輒慟哭而反。嘗登廣武觀漢楚戰處，歎曰：時無英雄，使豎子成名。登虎牢山望京邑而歎。於是賦豪傑詩，又著達莊論，敍無爲之貴。籍嘗于蘇門山遇孫登，與商略終古及棲神導氣之術，登皆不應。籍長嘯而退，至半嶺間，聞有聲若鸞鳳之音，響乎巖谷，乃登之嘯也。遂歸。又著大人先生傳，其略曰：世之所謂君子，惟法是修，惟禮是克，手執圭璧，足履繩墨，行欲爲目前檢，言欲爲無窮則，少稱鄉黨，長聞鄰國，上欲圖三公，下不失九州牧，獨不見羣蝨之處，禪中逃乎深縫，匿乎壞絮，自以爲吉宅也，行不敢離縫際，動不敢出禪褶，自以爲得繩墨也。然炎丘火流，焦邑滅都，羣蝨處于禪中而不能出也。君子之處域內，何異於蝨之處禪中乎？籍能屬文，初不留思，作詠懷詩八十餘首，爲世所重。宋顏延之、齊沈約皆爲之注，以爲魏晉雜唱。今存者十有七篇。其詩曰：夜中不能寐，起坐彈鳴琴。薄帷鑑明月，清風吹我衿。孤鴻號外野，朔鳥鳴北林。徘徊將何見，憂思獨傷心。二妃游江濱，逍遙順風翔。交甫遺環佩。

原注：列仙傳：江妃二女，佩兩明珠，大如卵。游江漢之湄。逢鄭交甫，戲之。不知其神也。曰：願請子之。

佩。二女解與交甫。去數十步。忽然不見。佩亦失之。婉孌有芬芳。猗靡情歡愛。千載不相忘。傾城迷下蔡。容好結中腸。感激生憂思。

諼草樹蘭房。膏沐爲誰施。其雨怨朝陽。如何金石交。一旦更離傷。嘉樹下成蹊。東園桃與李。秋風吹飛糞。

零落從此始。繁華有憔悴。堂上生荆杞。驅馬舍之去。去上西山趾。一身不自保。何況戀妻子。凝霜被野草。

歲暮亦云已。昔日繁華子。安陵與龍陽。原注。說苑。安陵君纏得龍于楚恭王。江乙謂纏曰。吾聞以財事人者。財

有火若雲霓。從南方來。正弼王馳。善射者射之。兕死于車下。王謂纏曰。萬歲後子將誰與樂。纏泣下沾衣曰。大王

萬歲之後。臣將殉。恭王乃封纏車下三百戶。故江乙善謀。安陵善知時。龍陽君釣十餘魚而棄之。因泣下。王曰。有所

不安乎。對曰。無。王曰。然則何爲涕出。對曰。臣始得魚甚喜。後得益多而大。欲棄前之所得也。今以臣兇惡而得拂

枕席。今爵至人君。走入於庭。避人於塗。四海之內。其美人甚多矣。聞臣之得幸于王。舉裳裝而趨王。臣亦蠶之所得

魚也。亦將棄矣。安得無涕出乎。王乃布令敢言美人者族。天天桃李花灼灼。有輝光。悅懌若九春。馨折似秋霜。流盼發姿媚。交笑吐芬芳。

攝手等歡愛。夙昔同衣裳。願爲雙飛鳥。比翼共翱翔。丹青著明誓。永世不相忘。天馬出西北。由來從東道。

春秋非有託。富貴焉常保。清露被皋蘭。凝霜霑野草。朝爲媚少年。夕暮成醜老。自非王子晉。誰能常美好。

登高臨四野。北望青山阿。松柏翳岡岑。飛鳥鳴相過。感慨懷辛酸。怨毒常苦多。李公悲東門。蘇子狹三河。

求仁自得仁。豈復歎咨嗟。開秋兆涼氣。蟋蟀鳴牀幃。感物懷殷憂。悄悄令心悲。多言焉所告。繁辭將訴誰。

微風吹羅袂。明月耀清輝。晨雞唱高樹。命駕起旋歸。平生少年時。輕薄好絃歌。西游咸陽中。趙李相經過。

娛樂未終極。白日忽蹉跎。驅馬復來歸。反顧望三河。黃金百鎰盡。資用常苦多。北臨太行道。失路將如何。昔聞東陵瓜。近在青門外。連畛距阡陌。子母相鉤帶。五色曜朝日。嘉賓四面會。膏火自煎熬。多財爲患害。

布衣可終身。寵祿豈足賴。步出上東門。北望首陽岑。下有采薇士。上有嘉樹林。良辰在何許。凝霜霑衣襟。
 寒風振山岡。元雲起重陰。鳴雁飛南征。鷓鴣發哀音。素質游商聲。悽愴傷我心。昔年十四五。志尙好書詩。
 被褐懷珠玉。顏閔相與期。開軒臨四野。登高望所思。丘墓蔽山岡。萬代同一時。千秋萬歲後。榮名安所之。
 乃悟羨門子。噉噉今自嗤。徘徊蓬池上。還顧望大梁。綠水揚洪波。曠野莽茫茫。走獸交橫馳。飛鳥相隨翔。
 是時鶉火中。日月正相望。朔風厲嚴寒。陰氣下微霜。羈旅無疇匹。俛仰懷哀傷。小人計其功。君子道其常。
 豈惜終憔悴。詠言著斯章。炎暑惟茲夏。三旬將欲移。芳樹垂綠葉。青雲自逶迤。四時更代謝。日月遞差池。
 徘徊空堂上。切怛莫我知。願覩卒歡好。不見悲別離。灼灼西隕日。餘光照我衣。迴風吹四壁。寒鳥相因依。
 周周尙銜羽。蛩蛩亦念飢。原注。韓子鳥有周周者。首重而風尾。將欲飲于河。則必顧。乃銜羽而飲。今人之所有飲
 不足者。不可以不索其羽矣。爾雅。西方有此肩獸焉。與叩叩蛩蛩比。爲叩叩蛩蛩醫甘
 草。卽有雞。叩叩蛩蛩
 負而走。其名謂之蹙。如何當路子。磬折忘所歸。豈爲誇譽名。憔悴使心悲。寧與燕雀翔。不隨黃鶴飛。黃鶴

游四海。中路將安歸。獨坐空堂上。誰可與歡者。出門臨永路。不見行車馬。登高望九州。悠悠分曠野。孤鳥
 西北飛。離獸東南下。日暮思親友。晤言用自寫。北里多奇舞。濮上有微音。輕薄閒游子。俯仰乍浮沈。捷徑
 從狹路。備俛趣荒淫。焉見王子喬。乘雲翔鄧林。獨有延年術。可以慰我心。湛湛長江水。山有楓樹林。皋蘭
 被徑路。青驪逝駸駸。遠望令人悲。春氣感我心。三楚多秀士。朝雲進荒淫。朱華振芬芳。高蔡相追尋。一爲
 黃雀哀。涕下誰能禁。原注。戰國策。莊辛諫楚王曰。郢都必危矣。王獨不見黃雀俯啄白粒。仰棲茂樹。鼓翅奮翼。自
 以爲與人無爭。不知夫公子王孫左挾彈。右攝丸。以矰頭爲的。晝遊茂樹。夕調酸醎。黃雀其

小者也。蔡侯囚是已。南遊高陂。北陟巫山。飲茹溪之流。食湘陂之魚。左抱幼妾。右擁嬖女。與之馳騁乎高蔡之中。而不以國家爲事。不知夫子發受命于宣王。繫已以朱絲而見之也。蔡侯之事其小者也。君王自囚是已。左州侯。右夏侯。從鄢陵與壽陵君。飯封祿之粟。載方府之金。與之馳乎雲夢之中。而不以天下國家爲事。不知夫穰侯方謀受命乎秦王。填渾池之塞內。投已渾池塞之外。襄王聞顏色變。四體戰慄。于是乃以執珪授之。封以爲闕陵君。景元四年卒。年五十四歲。子渾字長成。有父風。少慕通達。不飾小節。籍謂之曰。仲容已豫吾流。汝不得復爾。太康中。爲太子庶子。卒。從子修字宣子。好易老。善清言。嘗有論鬼神有無者。皆以人死者有鬼。修獨以爲無。曰。今見鬼者云。著生時衣服。若人死有鬼。衣服有鬼邪。論者服焉。後伐社樹。或止之。修曰。若社而爲樹。伐樹則社移。樹而爲社。伐樹則社亡矣。性簡任。不修人事。絕不喜見俗人。遇便舍去。意有所思。率爾褰裳。不避晨夕。至或無言。但欣然相對。常以百錢掛杖頭。至酒家。便獨酣暢。雖當世富貴。而皆不顧。家無儋石。不以爲慮。王衍當時談宗。自以論易略盡。然有所未了。終莫能悟。每云。不知比沒當見能通之者。不衍族子敦。謂衍曰。阮宣子可與言。衍曰。吾亦聞之。但未知定何如耳。謹案。晉書作但未知其壘壘之處定何如耳。及與修談。言寡而旨暢。衍乃歎服。梁國張偉。志趣不常。自隱於屠釣。修愛其才。而知其不真。偉後爲黃門郎。陳留內史。果以僞敗。修年四十餘。未有室家。王敦與諸名士。斂錢爲婚。慕之者求入錢不得。敦時爲鴻臚卿。謂修曰。卿嘗無食。鴻臚丞差有祿。能作否。修曰。亦復可爾耳。遂爲之。轉太傅。行參軍。太子洗馬。避亂南行。至西陽期思縣。爲賊所害。年四十二。

議曰。蘇武李陵初爲古詩。高簡雅質。爲西漢正體。建安中。七子作而詞氣盛。逮夫潘陸。益尙才華。古意始

衰矣。惟東漢之十九首與阮籍之詠懷十七首。託物寓興。辭旨幽婉。曠逸邁往。如醉語無枝。吐出真實。高

風遠韻。邈不可及。其後陶潛出于應璩。原注。元好問詩文自警初學記。晉門載應璩雜詩。晉子語富兒。無錢可把掘。耕日不得粟。采彼南山葛。簞瓢恆自在。無用相呵喝。文苑英華載璩三

叟詞云。昔有行路人。陌上見三叟。年各百餘歲。相對鋤禾莠。駐車問三叟。何以得此壽。一叟前致詞。量腹節所受。中叟前致詞。夜臥不覆首。下叟前致詞。室內婦齷齪。要哉三叟言。所以能長久。鍾嶸詩評。謂淵明詩其源出于應璩。

然璩詩世不多見。宋人以璩百一詩較之。謂淵明與璩。全無關涉。殆未見前二詩邪。大率前輩議論。悉有依據。讖評之際。不可不慎也。靜深簡麗。委運乘化。悠然天地同流。與籍

作相表裏。於是爲魏晉古詩之正。歷齊梁南北隋唐。至陳子昂之感遇。原注。三首。李白之古風。原注。五杜

甫之諸詠懷古。韓愈之秋懷。原注。十首。柳宗元。韋應物。蘇軾。黃庭堅之諸五言雜體。及朱熹之齋居感興

原注。二首。與近世元好問之萬化如大路等。其風格氣骨皆本于籍。璩嗚呼籍雖狂。而其中蘊蓄者如是。

乃爲詩家規矩大匠。亦人豪也哉。

阮咸字仲容。父熙。武都太守。咸任達不拘。與叔父籍爲竹林之遊。咸與籍居道南。諸阮居道北。北阮富而

南阮貧。七月七日北阮盛晒衣服。皆錦綺粲目。咸以竿掛大布犢鼻於庭。人或怪之。答曰。未能免俗。聊復

爾耳。仕爲散騎侍郎。山濤舉咸典選。曰。阮咸貞素寡欲。深識清濁。萬物不能移。若在官人之職。必絕于時。

武帝以咸耽酒虛浮。遂不用。太原郭奕高爽有識量。知名於時。少所推先。見咸心醉。不覺歎服。咸居母喪。

縱情越禮。素幸姑婢。姑當歸夫家。初云留婢。旣而從去。時方有客。咸聞之。遽借客馬追婢。旣及。與婢累騎

而還。曾無愧容。咸妙解音律。善彈琵琶。雖處世不交人事。惟與親知絃歌酣宴。特善從子修。每以得意爲

歡諸阮皆飲酒。咸至共集。不復用杯觴。以大盆盛酒。圓坐相向大酌。更飲時。羣豕來飲其酒。咸直接去其上。便共飲之。羣從昆弟莫不以放達爲行。荀勗每與咸論音律。自以爲不及也。疾之。出補始平太守。卒。二子瞻。字千里。清虛寡欲。讀書不甚研求。而默識其要。與人談辯。辭不足而旨有餘。善鼓琴。人往求聽。不問貴賤長幼。皆爲彈之。神氣沖和。而不知向人所在。外兄潘岳。每令鼓琴。終日達夜。無忤色。由是莫不歎其恬憺。不可榮辱矣。司徒王戎嘗問瞻曰。聖人貴名教。老莊明自然。其旨同異。瞻曰。將無同。戎咨嗟良久。卽命辟之。時人謂之三語掾。太尉王衍亦雅重之。瞻嘗羣行。冒熱渴甚。逆旅有井。衆人競趨之。瞻獨逡巡在後。須飲者畢。乃進。東海王越鎮許昌。以瞻爲記室參軍。原注。晉書。瞻與王承。謝鯤。鄧攸。俱在越府。越與瞻等書曰。禮年八歲出就外傅。明始可以加師訓之。則十年曰幼學。明可漸進先王之教也。然學之所入淺。體之所安深。是以閑習禮容。不如式瞻儀度。諷誦遺言。不若親承音旨。小兒毗既無令淑之質。不聞道德之風。望諸君時以開豫。周旋誨接。永嘉中爲太子舍人。瞻素執無鬼論。物莫能難。每自謂此理足以辯正幽明。忽有一客通名詣瞻。寒温畢。與談名理。客甚有才辯。良久及鬼神之事。反覆甚苦。客遂屈。乃作色曰。鬼神古今聖賢所共傳。君何得獨言無。僕卽鬼也。於是變爲異形。須臾消滅。瞻默然。意色大惡。後歲餘病卒。年三十。字遙集。其母卽姑婢也。孚始生。其姑取王延壽魯靈光殿賦曰。胡人遙集于上楹。而以字焉。初辟太傅府。遷騎兵屬。避亂南渡。元帝以爲安東參軍。蓬髮飲酒。不以國務嬰心。時帝旣用申韓以救世。而孚輩未能改故。不以事任處之。轉丞相從事。中郎。終日酣縱。恆爲有司所按。帝每優容之。琅邪王裒爲車騎將軍。鎮廣陵。高選綱佐。以孚爲長史。帝謂

曰卿既統軍府郊壘多事宜節飲也對曰陛下不以臣不才委之以戎旅之重臣僂俛從事不敢有言者竊以今王洸鎮威風赫然皇澤遐被賊寇斂跡氛祲既澄日月自朗臣何可燭火不息正應端拱嘯詠以樂長年爾遷黃門侍郎散騎常侍嘗以金貂換酒復爲所司彈劾帝宥之轉太子中庶子左衛率領屯騎校尉明帝卽位遷侍中從平王敦賜爵南安縣侯轉吏部尙書領東海王師稱疾不拜詔就家用之尙書令郗鑒以爲非禮帝曰就用之誠不快不爾便廢才矣時卞壺當官勤恪而孚以曠達自高每謂壺曰卿恆無閒泰常如銜瓦石不亦勞乎壺曰諸君以道德恢宏風流相尙執鄙吝者非壺而誰於是貴遊子弟多慕孚及王澄謝鯤之徒爲達壺正色於朝曰悖禮傷教罪莫斯甚中朝傾覆實此之由欲推奏之王導庾亮不從乃止聞者莫不折節而孚自若也及帝疾大漸溫嶠入受顧命過孚要與同行升車乃告之曰主上遂大漸江左危弱實資羣賢共康世務卿時望所歸今欲屈卿同受顧託孚不答固求下車嶠不許垂至臺門告嶠內迫求暫下便徒走還家原注晉書祖約性好財孚性好屨同爲累而未判其得失有詣約見正量屨神色甚閒暢于是勝負始分咸和初拜丹陽尹時太后臨朝政出舅族孚謂所親曰今江東雖累世而年數實淺主幼時艱運終百六而庾亮年少德信未孚以吾觀之將兆亂矣會廣州刺史劉凱卒遂苦求出王導等以孚疏放非京尹才乃除都督交廣寧三州軍事鎮南將軍領平越中郎將廣州刺史假節未至鎮卒年四十九無何蘇峻作逆識者以孚爲知機無子從孫廣嗣

議曰。夫有無不足以論道。正始以來。崇尚老莊。凡物一歸于無。任適放散。闡然以爲樂。故修既爲無鬼之說。而瞻遂爲無鬼之論。爲客所苦。失意而死。則心魄之所未安而致之也。鬼神者道之妙用。聖人罕言。惟於易大傳言其情狀曰。精氣爲物。游魂爲變。陰陽不測而妙萬物。最爲深切著明。陽之動而信。聚而爲精。則神之所爲也。陰之反而歸。變而之化。則鬼之所爲也。屈信于天地人物之間。而不滯于天地人物者也。爲陰陽造化而不滯于陰陽造化者也。建立無窮天地萬物。消沈無窮天地萬物。其迹遍天下而卒莫見其迹。其功蓋天下而不自以爲功。故能爲天地無窮之覆載。日月無窮之照臨。寒暑無窮之變化。風雷無窮之震盪。雨露無窮之膏潤。水火無窮之燥溼。峙山嶽。流川瀆。徵聲色。蘊臭味。以爲天地無窮之用。其在于人。一慮之起。神之爲也。一慮之滅。鬼之爲也。一呼之來。神之爲也。一吸之往。鬼之爲也。一生之長。神之爲也。一死之消。鬼之爲也。至于疾痛疴癢。喜怒哀樂。作息語默。不疾而速。不行而至。皆其所爲。于是爲男女夫婦無窮之別。父子兄弟無窮之親。君臣上下無窮之分。仁義禮智無窮之理。禮樂刑政無窮之法。治亂得失無窮之業。古今存亡無窮之迹。權運世操。倚伏制興衰。柄成壞。機榮辱。統是非。辨邪正。以爲斯人無窮之用。故鬼神者三才之機要。幽明之橐籥。名教之紀綱也。豈可謂爲無鬼乎。夫道體藏于靜陰。鬼反爲神之質。神則無方而鬼則有體。若瞻者一狂生爾。烏足以語是哉。孔子謂子路未知人焉。知鬼子路聖門高弟。且猶不知。瞻又豈能知哉。惟其不知。遂謂之無爾。且世俗之謂鬼者。人死而精魄不化。有聲而無

形爾。修瞻諸狂。方放心遺形。雖其身之生。亦以爲贅。又況其死者乎。故斷然謂之無也。精變而爲神。魄化而爲鬼。理之常也。氣盛而彊。死精爽則不化。理之變也。故有馮物爲聲。僵形爲影之鬼焉。斷木之餘。蒸而爲菌。戰陳之血。雨而爲燐。有時而然。不可以爲常也。故謂之無鬼。不知鬼者也。謂人之死皆爲鬼。不知人者也。

續後漢書卷第七十三下上

列傳第七十下上

狂士

王戎

從弟衍 衍弟澄

王戎字濬冲琅邪臨沂人也。祖雄幽州刺史父渾涼州刺史貞陵亭侯。

原注：裴松之曰：案王氏譜：雄字元伯。太保祥之宗也。魏名臣奏議載

安定太守孟達薦雄曰：臣聞明君以求賢為業。忠臣以進善為效。故易稱拔茅連茹。傳曰舉爾所知。臣不自量。竊慕其義。

臣昔以人乏謬充備部職。時涿郡太守王雄為西部從事。與臣同寮。雄天性良固。果而有謀。歷試三縣。政成人和。及在近職。奉宣威恩。懷柔有術。清慎持法。臣往年出使。經過雄郡。自說受陛下拔擢之恩。常厲節精心。奉恩投命。為效。言辭激揚。情趣款惻。臣雖愚闇。不識真偽。以為雄才兼資文武。忠烈之性。踰越倫輩。今涿郡領戶三千。孤寡之家。參居其半。北有守兵藩衛之固。誠不足舒雄智力。展其勤幹也。臣受恩深重。無以報國。不勝懷悽。淺見之情。謹冒陳聞。詔曰：昔蕭何薦韓信。鄧禹進吳漢。惟賢知賢也。雄有膽智技能文武之姿。吾宿知之。今便以參散騎之選。方使少

州刺史。子渾。涼州刺史。次子。平北將軍。司徒安豐侯戎。渾之子。太尉武陵侯衍。荊州刺史澄。皆戎之子。

戎幼穎悟。神彩秀徹。視日不眩。裴楷見而目之曰：戎眼爛爛如巖下電。原注：戲猛獸。在檻中虓吼震地。衆皆奔走。觀

戎獨立不動。神色自若。魏明帝于閣上。見而奇之。又嘗與羣兒戲于道側。見李樹多。戲曰：戎獨不往。或問其故。戎曰：樹在道邊而多子。必苦李也。取之信然。

阮籍與渾為友。戎少籍二十歲。而籍與之交。籍每適渾。俄頃輒去。過視戎。良久乃出。謂渾曰：濬冲清賞。非卿倫也。與卿言。不如與阿戎談。及渾卒。涼州故吏賻贈數百萬。戎辭不受。由是顯名。為人短小任率。不修威儀。善發談端。賞其要會。原注

續後漢書 卷七十三下上

一〇五七

晉書。朝賢嘗上已禳洛。或問王濟曰。昨遊有何勝談。濟曰。張華善說史漢。裴頠論前言往行。袞袞可聽。王戎談子房李札之間。超然元著。其爲譚鑒者所賞如此。戎嘗與阮籍飲。兗州刺史劉昶在坐。籍以酒少。酌不及昶。昶無憾色。戎異之。他日問籍曰。彼何如人也。答曰。勝公榮不可不與飲。與阮籍爲竹林之遊。戎嘗後至。籍曰。俗物已復來。若減公榮則不敢不共飲。惟公榮可不與飲。公榮昶字也。

敗人意。戎笑曰。卿輩意亦復易敗爾。鍾會伐漢。與戎別。問計。戎曰。道家有言。爲而不恃。非成功難。保之難也。及會敗。以戎爲知言。襲父爵。辟相國掾。晉武篡代。歷吏部黃門郎。散騎常侍。河東太守。荊州刺史。坐遣吏修園宅。應免官。詔以贖論。遷豫州刺史。加建武將軍。詔率所部伐吳。戎遣參軍羅尙。劉喬領前鋒。進攻武昌。吳將楊雍。孫述。江夏太守劉朗。各率衆詣戎降。戎督大軍臨江。吳牙門將孟泰以斬春郝二縣降。吳平。進爵安豐縣侯。增邑六千戶。賜絹六千疋。戎渡江。綏慰新附。宣揚威惠。吳光祿勳石偉。方直不容皓朝。稱疾歸家。戎嘉其清節。表薦之。詔拜偉爲議郎。以二千石祿終其身。荆土悅服。徵爲侍中。南郡太守劉肇。賂戎筒中細布五十端。爲司隸所糾。以知而未納。故得不坐。帝謂朝臣曰。戎豈懷私苟得者。正當不欲爲異爾。帝雖有是言。然大貶于清議。後遷光祿勳。吏部尙書。以母憂去職。性至孝。不拘禮制。飲酒食肉。或觀弈碁。而容貌毀瘁。殆不能起。裴頠往弔之。謂人曰。若使一慟能傷人。濬沖不免滅性之讖也。時和嶠亦居父喪。以禮法自持。量米而食。哀毀不踰于戎。帝謂劉毅曰。和嶠毀頓過禮。使人憂之。毅曰。嶠雖寢苦食粥。乃生孝爾。至于王戎。所謂死孝。陛下當先憂之。戎先有吐疾。居喪增甚。帝遣醫療之。并賜藥物。又斷賓客。楊駿輔政。拜太子太傅。駿誅東安公繇。專斷刑賞。威震內外。戎戒繇曰。大事之後。宜深遠之。繇不從。果得

罪轉中書令。加光祿大夫。給恩信五十人。遷尙書左僕射。領吏部。戎始爲甲午制。凡選舉皆先治民。然後授用。司隸傅咸奏戎曰。書稱三載考績。三考黜陟幽明。今內外羣官。居職未朞。而戎奏還。旣未定其優劣。且送故迎新。相望道路。巧詐由生。傷農害政。戎不仰依堯舜典謨。而驅動浮華。虧敗風俗。非徒無益。乃有大損。宜免戎官。以敦風俗。戎與賈郭通親。竟得不坐。尋轉司徒。苟媚取容。愍懷太子之廢。竟無一言匡諫。裴頠戎之婿也。頠誅戎坐免官。齊王問起義。孫秀錄戎于城內。趙王倫世子欲取戎爲尙書令。倫誅得釋。而河間王容遣使說成都王穎舉兵誅齊王問。檄至。問謂戎曰。孫秀作逆。天子幽逼。孤糾合義兵。掃除元惡。臣子之節。信著神明。二王聽讒。構造大難。當賴忠謀。以濟不協。戎曰。公首舉義衆。匡定大業。開闢以來。未始有也。然論功報賞。不及有勞。朝野失望。人懷二志。今二王帶甲百萬。鋒不可當。若以王就第。不失故爵。委權崇讓。此求安之策也。問黨葛旗怒曰。漢魏以來。王公就第。寧有得保妻子乎。戎可斬。羣僚震悚。戎僞藥發墮。廁得免。以王室方亂。規依避禍。不爲譽諤。及典銓政。未嘗進寒素。退虛僞。但戶調門選而已。尋拜司徒。雖位鼎司。而委事寮屬。閒乘小馬。從便門出游。見者不知其三公也。故吏多至大官。道路相遇。輒避之。性好利。置園田水碓。周徧天下。積聚錢貨。不知紀極。每自執牙籌。晝夜計算。恆若不足。而儉嗇不自奉養。人目爲饕虜。其女適裴頠。貸錢數萬。久而不還。及來歸寧。戎色不悅。女遽還之。從子將婚。戎遣其一單衣。婚訖而更責取家有好李。常出貨之。恐人得種。乃鑽其核。其鄙吝如此。車駕西遷。戎出奔郊野。在危

難間。方接鋒刃。談笑自若。時召親賓。歡宴竟日。永興二年卒于郟縣。年七十二。諡曰元。戎有人倫風鑒。嘗目山濤如璞玉。渾金。皆欽其寶。莫知名其器。王衍神姿高徹。如瑤林璠樹。自然是風塵表物。謂裴頠拙於用長。荀勗工於用短。陳道寧謾謾。謹案。晉書作綬綬。注一本作綬綬。如束長竿。族弟敦有高名。戎惡之。敦每候戎。輒託疾

不見。敦後果爲逆。嘗經黃公酒壚下。顧謂後車客曰。吾昔與嵇叔夜。阮嗣宗。酣暢於此。竹林之游。亦預其末。自嵇阮云亡。吾便爲時所羈縲。今日視之。雖近。邈若山河。初孫秀爲琅邪羣吏。求品於鄉議。戎從弟衍將不許。戎勸品之。及秀得志。朝士有宿怨者。皆被誅。而戎衍獨得免。子萬有美名。少而大肥。戎令食糠。而肥愈甚。年十九卒。有庶子興。戎所不齒。以從弟陽平太守。愔子爲嗣。及元帝渡江。戎諸宗族益盛。澄。導。綏。敦。元。皆爲將相。及太保祥。太尉衍。并戎。號瑯琊八王云。王衍字夷甫。神情明秀。風姿詳雅。總角嘗造山濤。濤嗟歎良久。旣去。目送之曰。何物老嫗。生寧馨兒。然誤天下蒼生者。未必非此人也。父又爲平北將軍。嘗有公事。使行人列上。不時報。衍年十四在京師。造僕射羊祜。申陳事狀。辭甚清辯。祜不以爲然。而衍無屈下之色。祜曰。敗俗傷化。必此人也。楊駿欲以女妻衍。衍恥之。遂佯狂自免。武帝聞其名。問戎曰。夷甫當世誰比。戎曰。未見其比。當從古人中求爾。泰始八年。詔舉奇才。可以安邊者。衍初好論從橫之術。故尙書盧欽舉爲遼東太守。不就。於是絕口不論世事。惟雅詠元虛而已。原注。晉書衍嘗因宴集爲族人所怒。舉標擲其面。衍初無言。引王導共載而去。然心不能平。

在車中攬鏡自照。謂導曰。爾看吾目光乃在牛背之上矣。

父卒於北平。送故甚厚。爲親識所借貸。因捨之。數年之間。家資罄盡。出就維城。

西田園而居。後爲太子舍人。遷尙書郎。出補元城令。終日清談。而縣務亦理入爲中庶子。黃門侍郎。衍既有盛才。明悟若神。常自比子貢。妙於元言。惟談老莊。聲名籍甚。傾動當世。每捉玉柄麈尾。與手同色。義理有所不安。隨卽改更。世號口中雌黃。朝野翕然。謂之一世龍門。後進之士。莫不景慕。選舉登朝。皆以爲稱首。於高浮誕。遂成風俗。原注。晉書衍嘗喪幼子。山簡弔之。衍悲不自勝。簡曰。孩抱中物。何至于此。衍曰。聖人之姻也。藉中宮之勢。剛復食戾。聚斂無厭。好干預人事。衍患之而不能禁。時有鄉人幽州刺史李陽。京師大俠也。郭氏素憚之。衍謂郭曰。非但我言卿不可。李陽亦謂不可。郭氏爲之小損。衍疾郭之貪鄙。故口未嘗言錢。郭欲試之。令婢以錢繞牀。使不得行。衍晨起見錢。謂婢曰。舉阿堵物卻。其措意如此。

後歷北軍中候。中領軍尙書令。女爲感懷太子妃。太子爲賈后所誣。衍懼禍。自表離婚。賈后既廢。有司奏衍曰。衍與司徒梁王彤書。寫呈皇太子手與妃。及衍書。陳見誣之狀。彤等伏讀辭旨。懇惻。衍備位大臣。應以義責。太子被誣得罪。衍不能守死。卽求離婚。得太子手書。隱蔽不出。志在苟免。無忠饗之操。宜加顯責。以厲臣節。可禁錮終身。從之。衍素輕趙王倫。及倫篡位。伴狂斫婢。以病自免。倫誅拜河南尹。轉尙書。又爲中書令。齊王冏有匡復功。專權自恣。公卿皆爲之拜。衍獨長揖焉。以病去官。成都王穎以衍爲中軍師。累遷尙書僕射。領吏部。後拜尙書令。司空。司徒。衍雖居宰輔之重。不以經國爲念。而思自全之計。說東海王越曰。中國已亂。當賴方伯。宜得文武兼資以任之。乃以弟澄爲荊州。族弟敦爲青州。因謂澄敦曰。荊州有江漢之固。青州有負海之險。卿二人在外。而吾留此。足以爲三窟矣。及石勒王彌寇京師。以衍都督征討諸軍事。持節假黃鉞以拒之。衍使前將軍曹武。左衛將軍王景。擊勒等。

敗之。獲其輜重。遷太尉。尚書令如故。封武陵侯。辭封不受。時雒陽危逼。多欲遷都以避其難。而衍獨賣牛車以安衆心。越討苟晞。衍以太尉爲太傅軍司。及越卒。衆共推衍爲元帥。衍以賊寇蜂起。懼不敢當。曰。今日之事。安可以非才處之。俄而爲石勒所破。勒呼王公與之相見。問衍以晉故。衍爲陳禍敗之由。云計不在己。且少無宦情。不豫世事。因勸勒稱尊號。冀以自免。勒怒曰。君少壯登朝。名蓋四海。身居重任。至於白首。何得言無宦情邪。破壞天下。非君而誰。使左右扶出。謂其黨孔萇曰。吾行天下多矣。未嘗見此輩人。當可活不。萇曰。彼皆晉之王公。必不爲我盡力。勒曰。要不可加以鋒刃。夜使排牆填殺之。時年五十六。衍將死。顧左右言曰。吾曹雖不如古人。向若不祖尚浮虛。戮力以匡天下。猶可不至今日。復誰咎哉。王敦過江。嘗稱之曰。夷甫處衆中如珠玉在瓦石間。顧愷之作畫贊。亦稱衍巖巖清峙。壁立千仞。其爲人所尙如此。子元字眉子。少慕簡曠。亦有俊才。與衛玠齊名。荀藩以爲陳留太守。屯尉氏。元素名家。有豪氣。荒弊之時。人情不附。將赴祖逖。爲盜所害。初。正始中。何晏王弼等祖述老莊。立論以爲天地萬物皆以無爲爲本。無也者。開物成務。無往不存者也。陰陽恃以化生。萬物恃以成形。賢者恃以成德。不肖恃以免身。故無之爲用。無爵而貴矣。於是流俗放蕩。不尊儒術。阮籍諸人。素有高名。競談浮虛。蔑棄禮法。尸祿耽寵。仕不視事。至衍而聲譽太盛。尤尙清談。位高勢重。不以物務自嬰。遂相倣效。風教凌遲。表頌乃著。崇有論以譏之。衍不以爲然。攻難交至。莫能屈頷。

原注。晉書裴頠傳。崇有論曰。夫總混羣本。宗極之道也。方以族異。庶類之品也。形象著分。有生之體也。化感錯綜。理述之原也。夫品而爲族。則所稟者備。備

無自足。故憑乎外資。是以生而可尋。所謂理也。理之所體。所謂有也。有之所須。所謂資也。資有攸合。所謂宜也。擇乎厥宜。所謂情也。識智既授。雖出處異業。默語殊途。所以資生存宜。其情一也。衆情並而無害。故貴賤形焉。失得由力任。勞而後贊。居以仁順。守以恭儉。率以忠信。行以敬讓。志無盈求。事無過用。乃可濟乎。故大建厥極。綏躬其力任。則物垂範。於是乎在。斯則聖人爲政之由也。若乃淫抗凌肆。則危害萌矣。故欲行則速患。情佚則怨博。擅恣則與攻。專利則延寇。可謂以厚生而失生者也。悠悠之徒。駭乎若茲之靈。而尋艱爭所緣。察夫偏實有弊。而報簡損之善。遂闢貴無之議。而建賤有之論。賤有則必外形。外形則必遺制。遺制則必忍防。忍防則必忘禮。禮制弗存。則無以爲政矣。衆之從上。猶水之居器也。故兆庶之情。信於所習。習則心服其業。業服則謂之理然。是以君子必慎所教。無以其刑政一切之務。分宅百姓。各授四職。能令稟命者之不肅而安。忽然忘異。莫有遷志。況於據在三之尊。懷所隆之情。敦以爲訓者哉。斯乃昏明所階。不可不審。夫盈欲可損而未可絕有也。過用可節而未可謂無貴也。蓋有請言之具者。深列有形之故。盛稱空無之義。形器之故有微。空無之義難檢。辯巧之文可悅。似象之言足惑。衆聽眩焉。溺其成說。雖頗有異此心者。辭不獲濟。屈於所狎。因謂虛無之理。誠不可蓋。唱而有和。多往勿反。遂薄綜世之務。賤功烈之用。高浮游之業。卑經實之賢。人情所徇。篤夫名利。於是文者行其辭。訥者讀其旨。染其衆也。是以立言藉於虛無。謂之元妙。虛官不親所司。謂之雅遠。奉身散其廉操。謂之曠達。言笑忘宜。以不惜爲去。士行又虧矣。老子既著五千之文。表摭穢雜之弊。甄舉靜一之義。混漫貴賤之級。其甚者至於裸體。言笑忘宜。以不惜爲去。士行又虧矣。老子既著五千之文。忽容止之表。灑棄長幼之序。混漫貴賤之級。其甚者至於裸體。言笑忘宜。以不惜爲去。士行又虧矣。老子既著五千之文。屬。蓋君子之一道。非易之所以爲體守本無也。觀老子之書。雖博有所經。而云有生於無。以虛爲主。偏立一家之辭。豈有以而然哉。人之既生。以保生爲全。全之所階。以順感爲務。若味近以虧業。則沈溺之覺興。懷末以忘本。則天理之真滅。故動之所交。存亡之會也。夫有非有。于無非無。于無非無。是以申繼播之類。而著貴無之文。將以絕所非之盈謬。存大善之中節。收流遁於既過。反澄正於胸膺。宜其以無爲辭。而旨在全有。故其辭曰。以爲文不足若斯。則是所寄之途。一方之言也。若謂至理信以無爲辭。而旨在全有。故其辭曰。以爲文不足難。未足折其情之途。猶偏雄大體抑之。猶偏有所許。而虛無之首。日以廣衍。衆衆屬起。各列其說。上及造化。下被萬事。莫不貫無。所存食同。情以衆固。乃號凡有之理。皆義之卑者。薄而鄙焉。辯論人倫及經明之業。遂易門肆。頗用豐然。申其所懷。而政者盈集。或以爲一時口言。有客幸過。成見命著文。猶列虛無不允之徵。若未能每事釋正。則無家之義。勿可奪也。頽退而思之。雖君子宅情。無求於顯。及其立言。在乎違旨而已。然去聖久遠。異同紛糾。苟少有彷彿。可以崇濟先典。扶明大業。有益於時。則惟患言之不能。焉得靜默及未舉一隅略示所存而已哉。夫至無者無以能生用之所能全也。理既有之衆。非無爲之所能循也。心非事也。而制事必由於心。然不可以制事以非事。謂心爲無也。非無

非器也。而制器必須於匠。然不可以制器以非器。謂匠非有也。是以欲收重泉之鱗。非偃息之所能獲也。限高墉之禽。非靜拱之所能捷也。審投弦餌之用。非無知之所能覽也。由此而觀。濟有者皆有。虛無奚益於已有之羣生哉。永嘉末年。元帝渡江。王導爲鎮東司馬。陳頴遺導書曰。中華所以傾弊者。正以取才失所。先白望而後實事。

浮競驅馳。互相貢薦。言重者先顯。言輕者後敍。遂相波扇。乃至陵遲。加有莊老之俗。傾惑朝廷。養望者爲宏雅。政事者爲俗人。王職不卹。法物廢墜。夫欲制遠。先由近始。今宜改張。明賞信罰。拔卓茂於密縣。顯朱

邑於桐鄉。然後大業可舉。中興可冀爾。原注。後漢書。卓茂以儒術。舉爲侍郎。遷密令。勞心醇醇。視人如子。太傅。封襄德侯。漢書。朱邑爲舒。桐鄉。奮夫。廉平不苛。以愛利爲行。未嘗笞辱人。存問耆老孤寡。遇之有恩。所部吏民愛敬焉。遷北海太守。以治行第一。入爲大司農。神爵元年卒。天子憫惜。下詔稱揚。大司農邑廉潔守節。退食自公。亡疆外之交。束修之饋。可謂淑人君子。遭離凶。導不從。由是江左流風益盛。永和。中桓溫北伐。過淮泗。踐

北境。與諸僚屬登平乘樓。眺望中原。慨然歎曰。遂使神州陸沈。百年丘墟。王夷甫諸人。不得不任其責。袁宏曰。運有廢興。豈必諸人之過。溫作色曰。昔劉景升有千斤大牛。噉芻豆十倍常牛。負重致遠。曾不若一

羸。桴魏武入荊州。殺以享軍。意在宏也。坐中皆失色。時謝安當國。猶尙清談。不恤典禮。至於期功之喪。不

廢絲竹。嘗與王羲之登冶城。悠然遐想。有高世志。羲之曰。夏禹憂勤。手足胼胝。文王旰食。日不暇給。今四

郊多壘。宜思自效。而虛談廢務。浮文妨要。恐非當今所宜。安曰。秦任商鞅。二世而亡。豈清言致患邪。王坦

之聞之。乃作廢莊論。以諷安。亦弗悛。以及於亡。原注。晉書。王坦之傳。廢莊論曰。荀卿稱莊子蔽於天而不知人。平時變。三賢之言。遠有當乎。夫獨搆之唱。唱虛而莫和。無感之作。義偏而用意。動人由於兼忘。應物在乎無心。孔

父非不體遠。以體遠故用近。顏子豈不具德。以德備故廢教。胡爲其然哉。不獲已而然也。夫自足者寡。故理懸於藝。農

揚雄亦曰。莊周放蕩而不法。何晏云。鸞莊驅。放元虛。而不周

胡爲其然哉。不獲已而然也。夫自足者寡。故理懸於藝。農

揚雄亦曰。莊周放蕩而不法。何晏云。鸞莊驅。放元虛。而不周

胡爲其然哉。不獲已而然也。夫自足者寡。故理懸於藝。農

揚雄亦曰。莊周放蕩而不法。何晏云。鸞莊驅。放元虛。而不周

。徇教者衆。故義申於三代。道心惟微。人心惟危。吹萬不同。孰知正是。雖首陽之精。三黜之智。糜項之甘。落毛之愛。枯槁之生。負石之死。格諸中庸。未入乎道。而況下斯者乎。先王知人情之難肆。懼遠行以致訟。悼司徹之貽悔。審視帶之所緣。故陶鑄羣生。謀之未兆。每攝其契而爲節焉。使夫敦禮以崇化。日用以成俗。誠存而邪忘者。利損而道息。成功遠事。百姓皆曰我自然。蓋善闇者無怪。故所遇而無滯。執道以離俗。孰論於不達。語道而失其爲者。非其道也。辯德而有其位者。非其德也。言默所未究。況揚之爲風乎。且卽濠以尋魚。想彼之我同。推顯以求隱。理得而情味。若夫莊生者。望大庭而撫契。仰彌高於不足。寄積想於三篇。憾我憫之未霽。其言譎詭。其義恢誕。君子內應從我游方之外。衆人因藉以爲弊薄之資。然則天下之善人少。不善人多。莊生之利天下也少。害天下也多。故曰。魯酒薄而邯鄲圍。莊生作而風俗頹。禮與浮雲俱征。僞與利蕩並肆。人以克己爲恥。士以無措爲通。時無履德之譽。俗有陷義之愆。驟語賞罰。不可以造次。屢稱無爲。不可與適變。雖可用於天下。不足以用天下。昔漢陰丈人修渾沌之術。孔子以爲識其一不識其二。莊生之道。無乃類乎。與夫如愚之契何殊間哉。若夫利而不害。天之道也。爲而不爭。聖之道也。羣方所資。而莫知誰氏。在儒而非儒。非道而有道。彌貫九流。元同。衍弟澄。字平子。生而警悟。雖未能言。見人舉動。便識其意。衍尤重之。原注。晉書。衍妻郭氏。性食鄙。令婢路上擔糞。澄年十四。諫郭。郭大怒。謂澄曰。昔夫彼我。萬物用之而不既。塵覆日新而不朽。昔吾孔老固已言之矣。人臨終以小郎屬新婦。不以新婦屬小郎。將杖之。澄曰。安有王夷甫妻尋路拾馬糞者乎。遂走。輪窗而

王敦庾凱爲人士目曰阿平第一子嵩第二處仲第三澄嘗謂衍曰兄形似道而神峯太雋衍曰誠不若卿落落穆穆然也。有經澄所目者。衍不復有言。輒云已經平子矣。累遷成都王穎從事中郎。穎嬖豎孟玖。譖殺陸機兄弟。天下切齒。澄發玖私姦。穎乃誅之。莫不稱快。及穎敗。東海王越請爲司空。長史以迎大駕。勳封南鄉侯。遷建威將軍。雍州刺史。不之職。時王敦謝鯤庾凱阮修皆爲衍所親善。號爲四友。而亦與澄狎。又有光逸胡母輔之等亦豫焉。酣讌縱誕。窮歡極樂。惠帝末。衍白越以澄爲荊州刺史。持節都督。領南蠻校尉。敦爲青州。衍因問以方略。敦曰。當臨事制變。不可豫論。澄辭義鋒出。算略無方。一坐嗟服。澄將之鎮。送者傾朝。見樹上鵲巢。便脫衣上樹探殼而弄之。神氣蕭然。傍若無人。劉琨謂澄曰。卿形雖散

朗而內實動俠。以此處世難得其死。澄默然不答。澄既至鎮。日夜縱酒。不親庶事。雖寇戎急務。亦不經懷。擢順陽人郭舒以爲別駕。委以州府。時京師危逼。澄率衆勤王。而飄風折其節柱。會王如寇襄陽。澄前鋒至宜城。遣使詣山簡。爲如黨嚴嶷所獲。嶷僞使人從襄陽來而問之曰。襄陽拔未答曰。昨旦破城。已獲山簡。乃陰緩澄。使令得亡去。澄聞襄陽陷。以爲信然。遂還。既而恥之。託糧運不繼。委罪長史蔣俊而斬之。巴蜀流人散在荆湘者。與士人忿爭。遂殺縣令。屯聚樂鄉。澄使城都內史王機討之。賊請降。澄僞許之。既而襲之于寵洲。以其妻子爲賞。沈八千餘人于江中。于是益梁流人四五萬家俱反。推杜敬爲主。南破零桂。東掠武昌。敗王機于巴陵。澄亦無懼意。但與機日夜縱酒。投壺博戲。殺富人李才。取其家資以賜郭舒。南平太守應詹驟諫不聽。於是上下離心。望實俱損。猶傲然自得。後率衆擊杜敬。次于作塘。山簡參軍王冲叛于豫州。自稱荊州刺史。澄懼。使杜蕤守江陵。澄遷于孱陵。尋奔沓中。郭舒諫曰。使君臨州。雖無異政。未失衆心。今西收華容向義之兵。足以擒此小醜。奈何自棄。澄不從。初。澄命武陵諸郡同討杜敬。天門太守扈瓌次于益陽。武陵內史武察爲其郡吏所害。瓌以孤軍引還。澄怒。以杜會代瓌。夷陵諳案。晉書脫陵字。袁遂。瓌故吏也。託爲瓌報仇。遂舉兵。逐會。自稱平晉將軍。澄使司馬卍丘邈討之。爲遂所敗。會元帝徵爲軍諮祭酒。於是赴召。時王敦爲江州鎮豫章。澄過詣敦。澄夙有盛名。出于敦右。士庶莫不傾慕。兼勇力絕人。爲敦所憚。澄猶以舊意侮敦。敦益忿怒。請澄入宿。陰欲殺之。而澄左右二十人持鐵馬鞭爲衛。澄手嘗捉玉枕。

觀之。因下牀而謂澄曰。何與杜叡通信。澄曰。事自可驗。敦欲入內。澄手引敦衣。至于絕帶。乃登于梁。因罵敦曰。行事如此。殃將及矣。敦令力士路戎搃殺之。時年四十四。載尸還其家。劉琨聞澄死。歎曰。澄自取之。及敦平。澄故吏佐著作郎桓稚。上表理澄。請加贈諡。詔復澄本官。諡曰憲。長子詹。早卒。次子徽。右軍司馬。議曰。孟子曰。人之所以異于禽獸也者。幾希。庶民去之。君子存之。存之則人道在。所以爲人也。去之則人道亡。雖人而不足以爲人矣。故君子之存之也。始則窮理盡性以至命。中則動心忍性以立命。終則存心養性以俟命。然心爲甚。所以主乎性而統夫人者也。敬慎操持而不放。則常存。心存則人道存矣。自王何崇尚清談。祖述虛無。至二王當國。率天下而放心。遺形以敢廢禮壞法。削去繩檢者爲高。于是君臣父子男女夫婦之倫盡亡。仁義道德禮樂刑政之典盡廢。堯舜禹文武周公孔子孟軻高光昭烈孔明之修理維持者。委地而不復存。天下遂無人道。中國于是乎亡矣。嗚呼。凡學術之不適實用。祇爲高深迂遠而不切者。皆殺天下誤後世者也。有國君人者。可不辨哉。可不慎哉。

續後漢書卷第七十三下

列傳第七十下

狂士

樂廣

謝鯤

胡母輔之子謙之

畢卓

光逸

衛玠

王濟

樂廣字彥輔。南陽滎陽人也。父方參征西將軍。夏侯元軍事。廣時年八歲。元嘗見廣在路。因呼與語。還謂方曰。向見賢郎。神姿朗徹。當爲名士。卿家雖貧。可令專學。必能大卿門戶。方早卒。廣孤貧。僑居山陽。人無知者。性沖澹。與物無競。尤善談論。每以約言析理。裴楷嘗引廣共談。自夕申旦。歎曰。吾不如也。王戎爲荊州刺史。聞廣爲夏侯元所賞。乃舉爲秀才。楷又薦廣於賈充。遂辟太尉掾。轉太子舍人。尙書令衛瓘逮與正始中諸名士談論。見廣。奇之。曰。自昔諸賢既沒。常恐微言將絕。而今乃復聞斯言於君矣。命諸子造焉。曰。此人之水鏡。見之瑩然。若披雲霧而覩青天也。王衍自言與人語甚簡。及見廣。便覺己之煩。其爲有識。歎美如此。出補元城令。遷中書侍郎。轉太子中庶子。累遷侍中。河南尹。廣善清言。而不長於文筆。將讓尹。請潘岳爲表。岳曰。當得君意。廣乃作二百句語。述己之志。岳因次比。便成名筆。時人咸云。若廣不假岳之筆。岳不取廣之旨。無以成斯美也。原注。晉書。嘗有親客久闕不復來。廣問其故。答曰。前在坐蒙賜酒。方欲飲。見盃中有蛇。意甚惡之。既飲而疾。於時河南廳事壁上有角漆畫作蛇。廣意蓋中。

蛇即角影也。復置酒於前處。謂客曰。酒中復有所見不。答曰。所見如初。唐乃告其所以。客豁然意解。沈疴頓愈。衛玠總角時嘗問廣夢。廣云。是想。玠曰。形神所不接。而夢豈是想耶。廣曰。因也。玠思之經日。不得。遂以成疾。廣聞。故命駕爲剖析之。玠病即愈。廣歎曰。此賢胸中當必無膏肓之疾。

廣所在爲政無當時譽。每去職遺愛爲人所思。凡論人必先稱其所長。則所短不言自見。人有過。先盡宏恕。然後善惡自彰。廣與王衍俱宅心事外。名重於時。故天下言風流者

以王樂稱首。

原注。晉書。廣少與宏農楊準相善。準二子喬髦皆知名。準使先詣裝頤。頤性宏方。愛喬有高韻。謂準曰。喬當及卿。髦少減也。又使詣廣。廣性清淳。愛髦有神檢。謂準曰。喬自及卿。髦亦自清出。準笑

曰。我二兒之優劣。

是時王澄胡母輔之等皆任放爲達。或至裸體者。廣聞而笑曰。名教中自有樂地。何必乃裴樂之優劣也。

乃爾。值世道多虞。朝章紊亂。清己中立。任誠保素。時人莫見其際焉。

原注。晉書。先是河南官舍多妖怪。前尹多不敢處正寢。廣居之不疑。嘗外月自閉

左右皆驚。廣獨自若。顧見牆之孔。使人掘牆得狸而殺之。其怪亦絕。

惑懷太子之廢。詔故臣不得辭送。衆官不勝憤歎。冒禁拜辭。司隸校尉

滿奮敕河南中部收縛送獄。廣卽解遣。衆爲廣危懼。孫劾說賈謐曰。前以太子罪惡。有斯廢黜。其臣不懼

嚴詔。冒罪而送。今若繫之。是彰太子之善。不如釋去。謐善其言。廣故得不坐。遷吏部尙書左僕射。後安東

王繇當爲僕射。轉廣爲右僕射。領吏部。代王戎爲尙書令。始戎薦樂廣而終踐其位。時人美之。成都王穎

廣之壻也。及與長沙王又遭難。廣既處朝望。羣小讒謗之。又以問廣。廣神色不變。徐答曰。廣豈以五男易

一女。又猶以爲疑。廣竟以憂卒。三子凱。肇。謨。凱字宏緒。大司馬齊王掾。參驃騎將軍事。肇字宏茂。太傅東

海王掾。洛陽陷。兄弟相攜南渡江。謨字宏範。征虜將軍吳郡內史。

謝鯤字幼輿。陳國陽夏人也。祖贊。典農中郎將。父衡。國子祭酒。鯤少知名。通簡有高識。不修威儀。好易老。

能歌善鼓琴。王衍嵇紹並奇之。永興中。長沙王又輔政。時有疾。鯤者言將出奔。又欲鞭之。鯤解衣就罰。略無忤容。既捨之。又無喜色。太傅東海王越辟爲掾。任達不拘。尋坐家僮取官橐。除名。於時名士王元阮修之徒。並以鯤初登宰府。便至黜辱。爲之歎恨。鯤聞之。方清歌鼓琴。不以屑意。鄰高氏女有色美。鯤嘗挑之。女投梭折其兩齒。時人爲之語曰。任達不已。幼輿折齒。鯤聞之。傲然長嘯曰。猶不廢我嘯歌。轉參軍事。鯤以時方多故。鯤乃謝病去職。避地於豫章。

原注。晉書。鯤嘗行經空亭中。夜宿此亭。舊每殺人。將曉有黃衣人呼鯤字。令開戶。鯤儼然無懼色。便于牕中度手牽之。胛斷。視之。鹿也。

尋血獲。後。爾後。此亭無復妖怪。

左將軍王敦引爲長史。以討杜弢功封咸亭侯。母憂去職。服闋遷敦大將軍。長史時王澄在敦坐。見鯤談語無倦。都不顧敦。敦有不臣之節。鯤知不可弼。乃從容風議而已。每與畢卓。王尼。阮放。羊曼。桓彝。阮孚等縱酒。敦以其名高。雅相賓禮。嘗使至都。明帝在東宮。問曰。論者以君方庾亮。自謂何如。答曰。端委廟堂。使百僚準則。鯤不如亮。一丘一壑。自謂過之。温嶠嘗謂鯤子尙曰。尊大君。豈惟識量淹遠。至於神鑒沈深。雖諸葛瑾之喻。孫權不過也。及敦將爲逆。謂鯤曰。劉隗姦邪。將危社稷。吾欲除君側之惡。匡主濟時。何如。對曰。隗誠始禍。然城狐社鼠。敦怒曰。君庸才。豈達大理。出鯤爲豫章太守。又留不遣。藉其才望。逼與俱下。敦至石頭。歎曰。吾不復得爲盛德事矣。鯤曰。何爲其然。但使自今以往。日忘日去爾。初敦謂鯤曰。吾當以周伯仁爲尙書令。戴若思爲僕射。及至都。復曰。近來人情何如。鯤對曰。明公之舉。雖欲大存社稷。然悠悠之言。實未達高意。周戴南北之望。明公舉而用之。羣情帖然矣。是日敦遣兵收周戴。而鯤

弗知敦怒曰君羸疎耶二子不相當吾已收之矣。鯤與顓素相親重聞之愕然參軍王嶠切諫敦大怒命斬嶠人士畏懼莫敢言者。鯤曰明公舉大事不戮一人嶠以獻替忤旨便以覺鼓不亦過乎敦乃止敦既誅害忠賢稱疾不朝將還武昌。鯤謂敦曰公大存社稷建不世之助然天下之心實有未達若能朝天子使君臣釋然仗衆望以順羣情盡沖退以奉主上如斯則助侷一匡名垂千載矣敦曰君能保無變乎對曰鯤近入覲主上側席遲得見公宮省穆然必無虞矣公若入朝鯤請侍從敦悻然曰正復殺君等數百人亦復何損于時竟不朝而去時朝望被害皆爲鯤憂而鯤推理安常時進正言敦既不能用內亦不悅軍還使之郡莅政清肅百姓愛之尋卒官年四十三敦死追贈太常諡曰康。

胡母輔之字彥國泰山奉高人也高祖班漢執金吾父原河南令輔之少擅高名有知人鑒嗜酒任縱不拘小節與王澄王敦庾凱俱爲太尉王衍所親狎號曰四友澄嘗與人書曰彥國吐佳言如鋸木屑霏霏不絕誠爲後進領袖也辟別駕太尉掾並不就以家貧求試守繁昌令始節酒自厲甚有能名遷尙書郎預討齊王冏賜爵陰平男累轉司徒左長史復求出爲建武將軍樂安太守與郡人光逸晝夜酣飲不視事成都王穎爲太弟召爲中庶子遂與謝鯤王澄阮修王尼畢卓俱爲放達嘗過河南門下飲河南騶王子博箕坐其傍輔之叱使取火子博曰我卒也惟不之吾事則已安復爲人使輔之因就與語歎曰吾不及也薦爲河南尹樂廣擢爲功曹東海王越聞輔之名引爲從事中郎復補振威將軍陳留太守王彌經

其郡輔之不能討坐免官。尋除寧遠將軍揚州刺史。不赴。越復以爲右司馬本州大中正。越卒。避亂渡江。元帝以爲安東將軍。諮議祭酒。遷揚武將軍。湘州刺史。假節。到州未幾。卒。年四十九。子謙之。字子光。才學不及父。而傲縱過之。至酣醉。常呼其父字。輔之正酣飲。謙之闕而厲聲曰。彥國年老。不得爲爾。將令我尻背東壁。輔之歡笑。呼入與共飲。年未三十卒。

畢卓字茂世。新蔡銅陽人也。父讜中書郎。卓少放達。爲胡母輔之所知。太興末。爲吏部郎。常飲酒廢職。比舍郎釀熟。卓因醉夜至。其甕間盜飲之。爲專酒者所縛。明旦視之。乃畢吏部也。遽釋之。卓遂引主人飲于甕側。至醉而去。卓嘗謂人曰。得酒滿數百斛船。四時甘味置兩頭。右手持酒盃。左手持蟹螯。拍浮酒船中。便足了一生矣。及過江。爲溫嶠平南長史。卒官。

光逸字孟祖。樂安人也。初爲博昌小吏。令使逸送客。值雨雪。舉體溼凍。還遇令出。逸解衣傳火。臥令被中。令還見之。大怒。將笞逸。曰。家貧衣單。沾溼寒凍。無可代者。若不覆被。則已死矣。何惜一被不活一人乎。令奇而釋之。後爲門亭長。迎新令。至京師。胡母輔之與荀邃共詣令家。見逸。謂邃曰。彼似奇才。便呼上車。與談。果傑士也。令怪客不入。吏曰。與逸語。令怒除逸名。遣之。後舉孝廉。爲州從事。棄官投輔之。輔之時爲東海王越從事中郎。薦逸于越。越卽辟之。尋避亂渡江。復依輔之。屬輔之與謝鯤。阮放。畢卓。羊曼。桓彝。阮孚。散髮裸袒。閉宇酣飲。已累日。逸將排戶入。守者不聽。逸便于戶外脫衣。露頭從狗竇窺之。大叫。輔之驚曰。

他人決不能爾。必我孟祖也。遽呼入與飲。不舍晝夜。時人謂之八達。共薦之。元帝補軍諮祭酒。後爲給事
中卒官。

衛玠字叔寶。年五歲。丰神秀異。祖父瓘曰。此異兒也。願吾老不見其成爾。總角乘羊車入市。觀者傾疊。皆以爲玉人。驃騎將軍王濟。玠舅也。雋爽有丰姿。每見玠。輒歎曰。珠玉在側。覺我形穢。及長。善言元理。多病體羸。母恆禁其語。遇有勝日。親友時請一言。無不咨嗟。以爲入微。瑯邪王澄有高名。少所推服。聞玠言。輒歎服。時人爲之語曰。衛玠談道。平子絕倒。玠妻父樂廣。有海內重名。議者以爲婦公。冰清女壻。玉潤辟命。屢至。皆不就。久之。爲太傅西閣祭酒。拜太子洗馬。兄璩爲散騎侍郎。玠將奉母避亂渡江。臨別謂璩曰。在三之義。人之所重。今可謂致身之日。兄其勉之。遂渡江。至豫章。見大將軍王敦。言論彌日。敦謂長史謝鯤曰。昔王輔嗣吐金聲于中朝。此子復玉振於江表。微言之緒。絕而復續。不意永嘉之末。復聞正始之音。何平叔若在。當復絕倒。玠嘗以人有所不及。可以情恕。非意相干。可以理遣。故終身不見喜愠之容。以敦豪爽不羣。而好居物上。終非國之純臣。辭敦適建業。每出觀者如堵。羸疾益甚。永嘉六年卒。年二十七。時人謂玠被看殺。後劉惔謝尚論中朝人士。或問杜乂可方衛洗馬不。尚曰。安得相比。其間可容數人。惔又云。杜乂膚清。叔寶神清。中興名士。惟王承及玠爲當時第一云。

議曰。樂廣高簡。尤善清談。廁於二王之間。不免爲狂。其謂名教中自有樂地。則異於彼狂矣。初嵇康阮籍

皆問學淹博。才藻邁逸。自爲一世高人。勝士鄙鍾會之亂臣。絕師昭之賊子。稅穢朝列。放心遺形。則有激而然。若畢卓諸人。中固無有。至于甕間盜飲。以爲適。閉室裸袒。以爲達。踰垣樓女。以爲淫。闕戶字父。以爲醜。特風俗之壞。無所顧忌。耶厥斯弛。至此極爾。夫風俗天下之元氣也。甄陶之以教化。維持之以紀綱。整頓之以禮法。變通之以政事。以爲王風德化。仁流善俗。然後能保天命。而延國脈。故夏之忠。殷之敬。周之文。漢之質。以爲一代風俗。皆傳世數十。歷年數百。桓靈之季。漢政始衰。曹氏篡代。專尙威詐。繼之以佞靡。益之以浮華。終爲虛無狂誕。三代二漢之俗盡矣。晉之君相。不務更化。重爲倡導。自比於非類。而淪於血肉。又亡秦之所不爲。先正謂晉隋不及秦。有以夫。

王濟字武子。司徒渾之子也。少有逸才。風姿英爽。氣蓋一時。好弓馬。勇力絕人。善易及老莊。文詞俊茂。與姊夫和嶠及裴楷齊名。尙常山公主。年二十起家拜中書郎。以母憂去官。起爲驍騎將軍。累遷侍中。與侍中孔恂。王恂。楊濟同列。爲一時秀彥。武帝嘗會公卿。藩牧於式乾殿。顧濟曰。朕左右可謂恂。恂濟濟矣。每侍見未嘗不諮論人物及時政得失。濟善清言。諷議將順。朝臣莫及。帝益親貴之。仕進雖速。論者咸謂才能致之。非主壻故也。然外宏雅而內多忌刻。以父故。每排王濬。時議少之。齊王攸當之藩。濟旣陳請。又累使公主與甌德妻長廣公主俱入稽顙。泣請帝留攸。帝怒。謂侍中王戎曰。兄弟至親。今出齊王。自是朕家事。而甄德王濟連遣婦來生哭人。以忤旨。左遷國子祭酒。當侍如故。數年入爲侍中。時渾爲僕射。主者處

事或不當。濟性峻厲，明法繩之，素與從兄佑不平。佑黨謂濟不顧其父，出爲河南尹，未拜，坐鞭王官吏免官。而王佑始見委任，濟遂被斥，外乃移第北邙山下。性豪侈，麗服玉食。時洛京地甚貴，濟買地爲馬埽，編錢滿之。時人謂爲金溝。王愷以帝舅，奢豪，有牛名八百里駁，常盤其蹄角。濟請以錢千萬與牛對射而賭之。愷亦自恃其能，令濟先射，一發破的。因據胡床，叱左右速探牛心來，須臾而至。一割便去，和嶠性至儉，家有好李，帝求之，不過數十。濟候其上，直率少年詣園共啖，畢伐樹而去。帝嘗幸其宅，供饌甚豐，悉貯琉璃器中，蒸豚甚美。帝問其故，答曰：以人乳蒸之，帝甚不平。食未畢而去。濟善解馬性，嘗乘一馬，著連乾障泥，前有水不肯渡。濟曰：此惜障泥也。使人解去，便渡。故杜預謂濟有馬癖。帝嘗謂和嶠曰：我將罵濟而後，官爵之何如？嶠曰：濟俊爽，恐不可屈。帝因召濟切讓之，旣而曰：知愧否？濟答曰：尺布斗粟之譏，常爲陛下恥之。他人能令親疎，臣不能使親親。以此愧陛下爾。帝默然。帝嘗與濟弈碁，而孫皓在側，謂皓曰：何以好剝人面皮？皓曰：見無禮於君者，則剝之。濟時伸腳局下，故皓譏焉。尋使白衣領太僕，年四十六先渾卒。追贈驃騎將軍。及將葬，時賢畢至，孫楚雅敬濟而後來，哭之甚悲。哭畢，向靈牀曰：卿常好我作驢鳴，我爲卿作之。體似聲真，客皆笑。楚顧曰：諸君不死而令王濟死乎？時吳蜀旣平，大臣鉅室，寶貨充積，豪逐侈競，而濟與石苞之子崇及王愷、羊琇之徒，以奢靡相尙。愷以貽澳釜，崇以蠟代薪，愷作紫絲障四十里，崇作錦步障五十里，崇塗屋以椒，愷用赤石脂，而武帝每助愷，嘗以珊瑚樹賜之，高二尺許，枝柯扶疎，世所罕見。

愷以示崇。崇便以鐵如意擊之。應手而碎。愷以爲嫉己之寶。聲色方厲。崇曰：不足多恨。今當還卿。乃命悉取珊瑚樹。有高三四尺者六七株。條幹絕異。光彩耀日。如愷比者甚衆。愷恍然自失。愷嘗置酒。王敦與其從弟導俱在坐。女妓吹笛。小失聲韻。愷便歐殺之。使美人行酒。勅客飲不盡。卽殺。酒至敦所。敦故不持觴。美人悲懼失色。及導。導素不能飲。彊爲盡觴。愷乃悅。美人得免。其驕傲如此。識者知其亂將作也。

議曰：魏晉名教頹侈。

原注：文兩反。

喪心肆欲。莫不夸毗爲狂。高者旣爲曠達。不經世務。故下者溺於淫侈。相與

逐競。自天子親繫絳紗。縱羊車而幸監作。

原注：晉書。秦始皇元年。帝多簡良家女以充內職。自擇其美者以絳紗繫臂。帝多內寵。平吳之後。復納孫皓宮人數千。自此掖廷始將萬人。而並寵者甚衆。帝莫知其所適。常乘羊車恣其所之。至便寢殿。宮人乃取竹葉插戶。以鹽汁灑地而引帝車。

麗絕世。世因以成俗。至於東昏之躡金蓮。

原注：南史。齊東昏侯鑿金爲蓮花以貼地。令潘妃行其上。曰：此步步生蓮花也。長城之隆結綺。

原注：陳書昭殿前起臨春。結綺。望仙。三閣。各高數十丈。其窗牖壁帶縣楣欄檻。皆以沈檀爲之。飾以金玉。間以珠翠。每微風漸至。香聞數里。石邃血胭脂以列几案。

原注：晉載記。石季龍以子邃爲天王。皇太子。邃荒酒淫色。妝飾宮人美淑者。斬首洗血。置於盤上。共傳視之。高洋斷股。婢以爲弦歌。

原注：北史。齊文宣斷美人股。以爲琵琶。曰：佳人難再得。皆桀紂之所不爲。而自

晉啓之。嗚呼。學術之殺天下後世。若是之酷哉。

贊曰：崇慝翔僞。泯彝墮則。放心遺形。枵然自得。勉勉貞士。甘爲狂人。遂俾魏晉。復生一秦。維綱解弛。倫類戕弊。匪惟誤國。又誤後世。莊爲老兵。老乃佛媒。敗俗叛道。淪胥爲夷。